

**Sehâbî Dîvânı**

## **Dîbâce**

1b

1 ALLÂHU RABBU'L-İCÂBE<sup>1</sup>

Mef'ûlü Mefâ'ilü Mefâ'ilü Fe'ûlün

2 [Tahmîd ü]<sup>2</sup> senâ-yı tû ne der-vüs'at-ı gayr  
Harfî zi makâmât-ı rehet mantık-ı tayr

3 Vâkîf neşud ez ma'rifet-i zât-ı tû 'akl  
Pey şud feres-i fikret ü vâ-mânde zi seyr<sup>3</sup>

4 Her şehd-i hamd ki nahl-ı 'akl ezhâr-ı riyâz-ı rızâ vü fazldan ictinâ ve  
envâr-ı hadâyık-ı hakâyık-ı

5 “ve evhâ rabbuke ile'n-nahl”<sup>4</sup> dan igtizâ ile hâne-i müseddesü'l-  
'adlâ'-ı dehrde ibdâ' vü îdâ'

6 idüp mezâk-ı ashâb-ı zevk u şuhûda halâvet-i 'asel-i musaffâ vü sudûr-ı  
erbâb-ı

7 kulûb-ı ( )<sup>5</sup> şifâ vire. Ve her şeker-i şükr ki tûtî-i şîrîn-zebân-ı  
nefs-i nâtika-i

8 (insân)<sup>6</sup> kafes-i eşbâhda anuñla şeker-hâ ve mürgân-ı “ülî ecnihatin  
mesnâ ve sülâse

9 ve rubâ”<sup>7</sup> serâ-perde-i 'âlem-i ervâhda anuñla perde-serâ olup şerbet-i  
akdâh-ı ifrâsdan<sup>8</sup>

2a

1 kâm-ı cân u cinâna lezzet-i kûs-ı bekâ ve gûş-ı hûş-ı surûş-ı niyûşe  
istimâ'-i nagamât ile

2 simâ'-i agânîden gınâ ire. Ol Hazret-i Hallâk-ı Hakîm u Hudâvend-i  
“vâcibu't-ta'zîm

3 celle celâlühü ve tevâlâ nevâlühü”<sup>9</sup> dergâhına takdîm olunur ki  
hikmet-i Lokmân h'wân-ı ( ... nümâsından)<sup>10</sup>

<sup>1</sup> Allah [duaları] kabul edecek olandır.

<sup>2</sup> Metinde okunamamaktadır. Beytin muhtevasına uyacağı düşüncesi ile ilave edilmiştir.

<sup>3</sup> Senin övgün başkalarının vüs'atine sığmaz. **Mantık-ı Tayr** senin yolunun makâmlarından bir harftir, (ancak) akıl senin zatının marifetine vâkîf olmadı; fikir atı seyr ü seferinden geri kaldı.

<sup>4</sup> “Rabb'in bal arısına vahyetti”, **Kur'an**, Nahl sûresi, 16/68.

<sup>5</sup> Metninde burada bulunan bir kelime silindiği için okunamamaktadır.

<sup>6</sup> Metninde burada bulunan bir kelime silindiği için okunamamaktadır. Beytin muhtevasına uyacağı düşüncesi ile ilave edilmiştir.

<sup>7</sup> “Gökleri ve yeri yaratan, melekleri ikişer, üçer dörder kanatlı elçiler yapan Allah'a hamd olsun”, **Kur'an**, Fâtır sûresi, 35/1.

<sup>8</sup> Kelime “ifrâhdan”, “efrâzdan” veya “efzâsdan” gibi okunabilecek durumda olmakla beraber anlamın cümleye uygunluğu açısından bu şekilde okumak tercih edilmiştir.

<sup>9</sup> Ta'zim ve hürmet edilmesi gerekli olan, büyüklüğü sonsuz ve nimetleri arka arkasına devam eden.

<sup>10</sup> Metninde burada bulunan bir kelime silindiği için okunamamaktadır.

- 4 bir lokma ve haşmet-i **Süleymân** deryâ-yı kibriyâsından bir katredür.  
Ve fesâhat-ı **Hassân**<sup>11</sup>
- 5 elvân-ı nevâlınden bir nevâle ve belâgat-i **Sahbân**<sup>12</sup> feyz-i sehâb-ı fazl  
u efzâlından bir reşhadur.
- 6 Ve ‘ukûd-ı dürer-i dürûd-ı nâ-ma‘dûd, icâbet-i mev‘ûd ki vesîle-i  
fazîlet ü Makâm-ı Mahmûd
- 7 ve zerî‘a-i vüfûd-ı cennet ü cünne-i “nârı **zâtu’l-vekûd**”<sup>13</sup> ola, ol  
bûlbûl-i destân-serâ-yı
- 8 “**ve mâ yantıku ‘anî’l-hevâ**”<sup>14</sup> ve ‘andelîb-i bûstân-serâ-yı “**in hüve  
illâ vahyun yûhâ**”<sup>15</sup>
- 9 fahrü’l-âbâ vü şerefü’l-cüdûd **Ebü’l-Kâsım Muhammed Ahmed-i  
Mahmûd** “**sall’allâhu ‘aleyhi ve âlihi ve sahbihi ve sellem**”<sup>16</sup>
- 10 hazretlerinüñ hazîre-i mutahhara ve ravza-i mu‘attaralarına nisâr u îsâr  
olunur ki câmi‘iyyet-i
- 11 kemâl-sıfât bel kemâl-i câmi‘iyyet-i zâtdan fâtiha-i kitâb-ı hılâfet ve  
hâtıme-i
- 12 risâle-i risâlet ve şecere-i semere-i cûd ve semere-i şecere-i vücûddur.  
Ve **Hazret-i İbrâhîm**
- 2b 1 ve **Âdem**, ol tâhirü’n-neseb ve sa‘îdü’l-cedde eb ü ced oldukları  
sebebdan birine
- 2 mevkad-ı nâr-ı **Nemrûd** münbet-i eşcâr-ı enâr u emrûd ve biri melâyik-i  
seb‘-arâyike mescûd
- 3 olmuştur. Ve tuhaf-ı tahıyyet ü rızâ “**kemâ yuhıbbu rabbunâ ve  
yerdâ**”<sup>17</sup> âl-i kirâm ve ashâb-ı ‘izâm
- 4 ve hıyâr-ı tâbi‘în ve selef-i sâlihîn ervâhına ithâf ve ihdâ olunur ki  
mesned-i hılâfetde
- 5 sudûr u felek-i hidâyetde bûdûr ve kavânîn-i hüdâya “**nücûm**”<sup>18</sup> ve  
şeyâtîn-i hevâya
- 6 rücûmdur, “**rıdvân’ullâhu ‘aleyhim ecma‘în hattâ yekûmu’n-nâsu li-  
rabbi’l-âlemîn.**”<sup>19</sup> **Emmâ ba’d,**
- 7 rây-ı cihân-ârâ-yı erbâb-ı elibbâya mestûr u müsterâb buyurulmaya ki  
neş’e-i insâniyye
- 8 egerçi ezeliyyü’l-vücûd degüldür, velâkin edille-i ‘akliyye-i zâhire ve  
nusûs-ı şer‘iyye-i mütezâhire

<sup>11</sup>Hassân bin Sâbit (633-680) Hz. Peygamber’i şiirleri ile medh etmesi ile tanınmıştır ve onun “Rûhulkudüs, Cebrâil, sana yardım etsin” şeklinde duasına mazhar olmuştur.

<sup>12</sup>Sahbân bin Veil, Hârûn bin Reşid’in halifelîği döneminde yaşamış ve fesâhat ve belâgatı ile meşhur olmuştur.

<sup>13</sup>“(Ateşle) dolu hendek”, **Kur’ân**, Burûc sûresi, 85/5.

<sup>14</sup>“O, Hz. Peygamber, arzusuna göre konuşmaz”, **Kur’ân**, Necm sûresi, 53/3.

<sup>15</sup>“O, bildirdiği, vahyedilenden başkası değildir”, **Kur’ân**, Necm sûresi, 53/4.

<sup>16</sup>Allah ona, âline (aile fertlerine) ve ashâbına salât ve selâm etsin.

<sup>17</sup>Rabbimizin isteyip razı olduğu gibi tahıyyet, dua hediyeleri (âile fertleri ve onun ashâbı üzerine olsun).

<sup>18</sup>Bu kelime Hz. Peygamber’in ashâb-ı kirâm hakkındaki “Ashâbım yıldızlar, “nücûm” gibidir, hangisine uyarsanız hidâyete erişir, doğru yolu bulursunuz” meâlindeki hadîsinden alınmıştır.

<sup>19</sup>İnsanlar âlemlerin Rabb’inin huzurunda duruncaya kadar Allah hepsinden razı olsun.

- 9 muktezâsınca ebediyyü'l-vücûd u sâbitü'l-hulûddur. Pes 'âlim-i hâzime lâzım u mütehattimdür
- 10 ki 'âlem-i berzah u misâl ve mâ ba'dehû mine'l-ahvâlde iltizâz ü izdiyâd-ı fütûh
- 11 içün eyyâm-ı bekâ-i müste'âr ve evkât-ı 'ömr-i nâ-pây-dârda zikr-i cemîl ü ecr-i cezîl
- 12 tahsîline bâ'is olan vesâyil ü vesâyita mütemessik ve müteşebbis ola. Ve ecmel-i
- 3a 1 cümle-i esbâb-ı iktisâb-ı fazîleteyn ve fevz-i hasleteyn nazm-ı bedî'u'n-nizâmıdır ki nazm-ı kelâm-ı
- 2 i'câz-makâmıla hem-nâm olduğu cihetden sâhib-i **Faslu'l-Hitâb**<sup>20</sup> bâ-vücûd-ı 'ulüvv-i cenâb
- 3 kıbel-i fusahâdan ittihâmıyla ittisâm bulmuşdur. Ve kuvvet-i şübhe ve kurb-ı derece eclinden
- 4 tenzîh-i hazret ve tebriye-i sâhati içün “ve mâ 'allemnâhu's-şî'ra”<sup>21</sup> âyeti nâzil olmuşdur, nazm:
- 5 **Ger budî gevherî verây-ı sühan**  
**Z' âsumân âmedî be-câ-yı sühan**<sup>22</sup>
- 6 ve âyet-i “ve's-şu'arâ'u yettebi'uhumu'l-gâvûn”<sup>23</sup> mevriline hâs ve istisnâyıla muhakkaku'l-ihtisâs
- 7 iken ba'z-ı tîbâ'-ı nâ-tamâm mihekke rif'at-i rütbet-i şî'rde mûcib-i şek olursa ol
- 8 nazm-ı mübeccel 'mefâ'îlün mefâ'îlün fe'ûlün' vezninde “**elem tera ennehum fî külli vâdin**”<sup>24</sup> kerîme
- 9 siyle müzeyyel olduğu 'alâ ahseni'l-ittifâk bu makâle a'zam-ı mîsdâkdur. Ve kütüb-i mu'teberede
- 10 mestûr ve elsine-i havâsda mezkûr olduğu üzre ba'z-ı şu'arâ-yı şîrîn-edâyâ bir beyt-i
- 11 bedî'u'l-ma'nî bahâne-i zikr ü du'â ve sebep-i gufrân u rızâ olduğu bu ma'nâyı muhakkık ve bu
- 12 da'vâyı musaddıkdur. Nitekim **Hakîm-i Tûsî** üstâdu's-şu'arâ **Firdevsî**<sup>25</sup> “**zâde'llâhu zâde me'âdihî**”<sup>26</sup>
- 3b 1 hazretlerine silk-i tevhitde nazm eylediği 'ıkd-ı dürer ki  
“**cihân-râ bülendî [vü] pestî tûyî**

<sup>20</sup>Nakşibendi tarikatının önemli sîmalarından Muhammed Pârsâ (Buhâra, 1355-Medine, 1419)'nın bu tarikatın inceliklerini anlatan bir eseridir; tam adı **Faslu'l-hitâb li-vaslı'l-ahbâb**'dır ve Ali Hüsrevoğlu'nun tercümesi ile **Tevhide Giriş** ismi ile Türkçeye tercüme edilmiştir (İstanbul, 1988).

<sup>21</sup>“Biz ona şîir öğretmedik”, **Kur'ân**, Yâsîn sûresi, 36/69.

<sup>22</sup>Eğer bir mücevher sözün arkasında ise o gökyüzünden söz yerine inmiştir. (Sözün ötesinde, sözden daha değerli bir mücevher olsaydı, gökyüzünden söz yerine o inerdi.)

<sup>23</sup>“Şâirlere gelince, onlar da sapıklara uyarlar”, **Kur'ân**, Şu'arâ sûresi, 26/224.

<sup>24</sup>“Onların, şâirlerin, her vâdide başıboş dolaştıklarını görmedin mi”, **Kur'ân**, Şu'arâ sûresi, 26/225.

<sup>25</sup>İran'ın en büyük şâirlerinden Tus'lu Firdevsî (940 ?-1020?), **Şâhnâme** isimli eseri ile meşhûr olmuştur.

<sup>26</sup>Allah âhret azığını ziyâde etsin.

- 2 **ne-dânem çîî herçi hestî tûyî**<sup>27</sup>  
**Târîh-i Güzîde**<sup>28</sup> rivâyeti üzre sebeb-i fevz-i necât ve bâ'is-i
- 3 ref'-i derecât olmuştur. Ve **Şeyh Muslihu'd-dîn Sa'dî**<sup>29</sup>  
**"ravvah'allâhu rûhahu"**<sup>30</sup> kalb-i hâlis ile
- 4 kâlib-i hikmetde sebk eylediği seb'îke-i mev'izet ki, nazm:  
**"berg-i dirâhtân-ı sebz der nazar-ı hûş-yâr**
- 5 **her varakî defterîst ma'rifet-i Kirdigâr**<sup>31</sup>  
**Sübhatü'l-Ebrâr**<sup>32</sup> rivâyeti mûcibince bâ'is-i nisâr-ı
- 6 etbâk-ı envâr olmuştur. Ve **Şeyh 'Amâra**<sup>33</sup> **"nevvera'llâhu kabrehu"**<sup>34</sup> hazretleri makâm-ı 'ışk-ı sâdık ve
- 7 şevk-ı 'âşıkda sevk eylediği makâl ki, beyt:  
**"Ender gazel-i h'îş nihân hâhem geştin**
- 8 **Tâ ber-leb-i tû bûse zenem çüneş be-hânî**<sup>35</sup>  
 şeyh-i mihîn-i mihne, sâhibu's-seyr ve't-tayr **Şeyh**
- 9 **Ebû Sa'îd Ebi'l-Hayr**<sup>36</sup> **"kaddes'allâhu sırrahu"**<sup>37</sup> hazretlerine  
 muvâfık-ı hâl olmagla mezârını ziyâretle 'imâret
- 10 eylemişlerdür. Çün etrâf-ı kelâm zikr-i sâlihîne münce ve câriha-i lisân  
 tîb-i enfâs-ı
- 11 kelimât-ı tayyibeleriyle münce oldu, ber-muktezâ-yı hadîs-i sahîhu'l-  
 ma'nâ-yı şefî'ü'l-ümme ki
- 12 **"inde zikru's-sâlihîn tenzilü'r-rahme"**<sup>38</sup> hîn-i nüzûl-i rahmetde ki  
 mazanna-i icâbet-i da'vettür,
- 4a 1 şol bârgâh-ı felek-iştibâh, hazret-i pâdişâh-ı hilâfet-penâh  
**"eyyede hu'llâhu te'âlâ**
- 2 **ve a'lâhu**<sup>39</sup> hakkında ki mahatt-ı rihâl-ı efâzıl-ı ricâl ve Ka'be-i âmâl-i  
 kabâyıl-ı ehl-i kemâldür, vazîfe-i du'â

<sup>27</sup> Evrendeki yükseklikler ve düzlüklerin hepsi sensin. Bilmiyorum nesin. Bildiğim odur ki ne varsa yoksa sensin.

<sup>28</sup> Hamdullâh Müstevfî-i Kazvînî (ö. 1349)'nin Reşidüddîn Fazlullâh Muhammed (ö. 1318)'in **Câmi'ü't-tevârih** isimli tarih konulu eserinin 1303 yılına kadar getirdiği zeylidir.

<sup>29</sup> Daha çok Şeyh Sa'dî (1193?-1295) olarak bilinen ve **Gülîstân** ve **Bahâristân** isimli eserleriyle meşhur olan İran'lı şâir.

<sup>30</sup> Allah ruhunu yüceltsin.

<sup>31</sup> Yeşil ağaçların yapraklarının her biri akıllı insanların nazarında Allah'ın marifetinin yazıldığı defterin bir yaprağıdır. (Külliyât-ı Sa'dî, nşr. Muhammed Ali Furûğî, Tahran 1367, Gazeliyyât, s. 519)

<sup>32</sup> Nureddin Abdurrahmân (Molla) Câmi (ö. 1492)'nin her birinde farklı bir hikaye anlattığı 40 bölüm, "ıkd"den oluşan manzum bir eserdir.

<sup>33</sup> Şeyh-i 'Amâra diye de okunabilecek olan bu isimle ilgili bir bilgi bulamadım. 'Amâra, kuzey Irak'ta bir kazânın adıdır.

<sup>34</sup> Allah kabrini nurlandırın.

<sup>35</sup> Kendi gazelimin içinde gizlenmek istiyorum tâ ki onu okuduğunda senin dudaklarını öpeyim. (Sen okuduğunda dudaklarını öpebilmek için gazelimin içinde gizlenmek istiyorum.)

<sup>36</sup> Ebû Sa'îd Ebi'l-Hayr, (967-1049), Horasan'lı meşhur sûfilerdendir, rubâileriyle de tanınmıştır.

<sup>37</sup> Allah sırrını takdis etsin, yüceltsin.

<sup>38</sup> "Salih, iyi kişilerden bahsedildiğinde rahmet iner." Bu söz hadis olarak bilirse de meşhur sûfilerden Süfyân-ı Sevrî'ye aittir (İsmail Aclûni, **Keşfü'l-hafâ**, Beyrut 1983, c. 2, s. 91).

<sup>39</sup> Allah onu kuvvetlendirsın ve yüceltsin.

- 3 ve istid'â-yı bekâ-yı 'izz ü i'tilâ münâsib, bel vâcibdür ki 'âmme-i zevi'l-'ukûl üzerine
- 4 farîza-i tâ'ati tâlî-i tâ'at-i Hudâ ve resûldür. Ve rıbka-i rukyeti tavk-ı rakabe-i selâtîn-i fuhûldür.
- 5 Nevk-i sinân-ı cân-sitânı bir kilkdür ki anuñ ucından cemâl-i garrâ-yı gazâ
- 6 gâze-i gâret-i ervâh katli ve gül-güne-i hûn-ı a'dâ ile pür-nakş u nigârdur. Ve tîg-ı tâb-dârı
- 7 bir mîg-ı âb-dârdur ki katâr-ı emtârı kişt-zâr-ı kâr-zârda dökülen dimâ'-i a'dâ-i hâk-sârdur.
- 8 Hengâm-ı hengâme-i vegâ vü heyecân-ı heycâda 'âdet-i melzûmetu's-sa'âdeti, terk-i külâh u kemer-i
- 9 murassa' vü mücevher ve mefhari, i'lâ'-i a'lâm-ı Hak içün lebs-i libâs-ı lebûs u migferdür. Deste-i
- 10 şemşîr-i cihân-gîrine şemse-i hûr zîver kılınsa sezâdur. Ve sâk-ı serîr-i felek tasvîrine
- 11 sîm-i hilâlden halhâl takınsa revâdur. Şükûh u şevketde reşk-i **Kâvus-ı Key**<sup>40</sup> ve cûd u sehâda
- 12 gayret-i **Hâtem-i Tay**'dür<sup>41</sup>. Ve selâtîn-i 'Arab u 'Acem câh u celâline nazar-be-mesâbe-i hâkim-i Rey<sup>42</sup> ü
- 4b 1 şeyh-i Hay'dür.<sup>43</sup> Fermân-dih-i Îrân u kahramân-ı Tûrân şikence-i serpençe-i kahrından emân bulmamışdur.
- 2 Ve ferâ'ine-i Mısr kuvvet-i kâhire ile yed-i beyzâ-yı te'yîd-intimâsınuñ tabancasından necât
- 3 bulmaga dermân olmamışdur. Salâ-yı savleti gûş-ı vuhûşa vâsıl olalı, hirmâs hirâs-ı iftirâs-
- 4 dan gûşe-i bîşede pinhân olmışdur. Ve 'ukbân-ı 'ıkyân-ı elviye-i zafer-tev'emânı sayd-ı mûrg-ı cân ile
- 5 meşhûr olalı, cân-ı hasm-ı vegâ 'Ankâ gibi verâ-yı kevn ü mekânda âşiyân tutmuşdur.
- 6 Zamîr-i münîr-i hurşîd-tenvîrlerine ki matla'-ı envâr-ı hilâfet ü şâhîdür, hücûm-ı vâridât-ı İlâhî
- 7 ve cümûm-ı idrâkât-ı gayr-ı mütenâhî şol derecededür ki 'avâlî-i himemleri bâ-vücûd-ı tekeffül-i nazm-ı
- 8 nizâm-ı mehâm-ı ümem ve ıslâh-ı mesâlih-i cumhûr-ı benî 'Âdem bermuktezâ-yı fehvâ-yı erbâbu'd-düvel
- 9 mülhim-i kâmet-i zîbâ-yı dîbâ-yı ebkâr-ı efkârları tırâz-ı rumûz-ı gaybî ile mu'allem olduğu sebebeden

<sup>40</sup>İran'ın Pişdâdiyân sülâlesinden sonra gelen Keyâniyân sülâlesinin ilk hükümdarı adaletiyle meşhur Keykubâd'ın torunu ve halefi, bu sülâlenin ikinci hükümdarıdır.

<sup>41</sup>Asıl adı İbn Abdullah b. Sa'd'ın lakabıdır ve Tay kabilesinden olduğu için "Tây, Tâyi veya Tâ'i" nisbeleriyle anılır. Hz. Peygamber'in döneminde yaşamışsa da onun peygamberliği dönemine yetişememiştir, cömertliği ile meşhurdur.

<sup>42</sup>İran'ın en eski şehirlerinden birisidir.

<sup>43</sup>Osmanlı hakimiyeti döneminde Basra vilâyetine bağlı bir sancak merkeziydi.

- 10 letâyif-i eş‘âr-ı âb-dârları ekâbir-i ‘Arab ve efâzıl-ı ‘Acem mâ-beyninde  
makbûl u müsellemdür. Ve
- 11 fasl-ı nîsân fazl u ihsânda bahr-i kalb-i şerîflerine nâzil olan bârân-ı keşf  
ü ilhâm,
- 12 sadef-i vücûd-ı pür-cûdlarında şol le‘âli-i nazm-ı hakâyık-nizâma  
mûcib-i in‘ikâd u intizâmdur
- 5a 1 ki her biri ‘aynu’l-‘ıkd kelâm-ı mülûk ve dürretü’t-tâc-ı mülûk-ı  
kelâmdur. Ve  
**Men ne-mî-dânem ki in cins-i sühan-râ nâm çîst**
- 2 **Ne nübüvvet mî-tevânem gufteneş ne sâhirî<sup>44</sup>**  
**“İllâ ve hüve’s-sultân bin es-sultân bin es-sultân**
- 3 **bin es-sultânî’l-mütemessil bi-emr-i “İnne’llâhe ye’muru bi’l-‘adli**  
**ve’l-ihsân”<sup>45</sup> es-Sultân Süleymân Hân**
- 4 **bin es-Sultân Selîm Hân bin es-Sultân Bâyezîd Hân bin es-Sultân**  
**Muhammed Hân**
- 5 **halleda’llâhu te‘âlâ li-te’yîdi’l-İslâmi ve’l-müslimîni mülkehu ve**  
**sultânehu ve efâza ‘alâ kâffeti**
- 6 **‘l-âlemîni ‘adlehu ve ihsânehu. Allâhü’mme’c‘al besâtîne’l-kulûbi**  
**min edrâri midrâri gamâmi in‘âmihi**
- 7 **ke-cennâtin tecrî ve leme‘âti eşî“atin râkathu min mişkûti serîri**  
**hılâfetihi ke-ennahâ kevkebün dürriyyün**
- 8 **rabbi kemâ ce‘alte enzâre’l-istidlâli’l-‘ilmiyyi fi medârici’l-**  
**burhânî’s-silmiyyi**
- 9 **kelîleten ‘an idrâki merâtibi kadrihi ve’rtikâ’ihi. İc‘al etvele’l-**  
**imtidâdeyni mine’l-burhânî**
- 10 **‘t-tabî‘iyyi aksara min medâ müddeti ‘ömrihi ve bakâ’ihi. Âmîn**  
**Âmîn. Lem-’akta‘ bi-vâhıdetin hattâ übelligahâ**
- 11 **‘l-gayni âmînâ<sup>46</sup>**  
**“Çün du‘â-yı pâdişâh-ı mülk ü millet mî-künem**  
**Ez-firâz-ı sidre âmîn mî-küned Rûhu’l-Emîn”<sup>47</sup>**
- 12 Temhîd-i mukaddemât-ı ma‘hûdeden asıl maksûd budur ki çün  
münzevî-i gûşe-i güm-nâmî
- 5b 1 vü nâ-yâbî **Hüsâmü’d-dîn bin Hüseyin el-meşhûr bi-Sehâbî** Hazret-i  
Hakk sübhânehu

<sup>44</sup>Bilmem ki bu hangi nevi sözdür ve adı nedir. Bildiğim odur ki ona Peygamber kelamı diyemem, sihir de değil.  
(Bilmiyorum bu tür sözün adı nedir? Buna ne peygamber sözü diyebilirim ne de büyücünün sözü.)

<sup>45</sup>“Allah muhakkak adaleti ve iyilikte bulunmayı emreder”, **Kur’ân**, Nahl sûresi, 16/90.

<sup>46</sup>O sultan oğlu sultan, Sultan Muhammed Han’ın oğlu Sultan Bâyezîd oğlu Sultan Selim oğlu ve “Allah muhakkak adalet ve iyiliği emreder” [sözünü kendisine] imtisâl edinen Sultan Süleymân, Allah müslümanları güçlendirmek için onu mülk ve saltanatını ebedi kılsın. Adalet ve ihsanını bütün alemlere yaysın. Ey Allah’ım, kalb bahçelerini altlarından ırmaklar cennetler gibi onun in‘âm bulutundan yağdırmak suretiyle nasîbdâr eyle. Aynı şekilde onun hilâfet serîrinden parlayan ışıklarla sanki inciden yıldızın parladığı gibi parlak ve berrak eyle. Ey Rabb’im burhân-ı silmî merdivenlerine yükselmek için olan ilmi, istidlal görüşlerini onun kadrinin yüceliğini ve zatının yükselişini idraktan nasıl âciz kıldıysan burhân-ı tabînin iki uzantısının en uzununu onu ömür müddetlerinden ve dünyadaki kalışından daha kısa eyle, âmîn, âmîn.

<sup>47</sup>Millet ve memleket sultanına dua ettiğim zaman, Sidre’den Cebrâil ona âmin diyor.



- 2 ve te‘âlâ kıbelinden ‘atıyye-i tab‘-ı mevzûn ile memnûn ve süveydâ-yı kalbi sevdâ-yı şî‘r ile meşhûn
- 3 olup evkât-ı ferâg-ı hâtırda teşhîz-i zihn-i fâtır içün tuyûr-ı me‘ânî sayd ve
- 4 zuhûr-ı defâtirde kayd olunurdu. Ve sebep-i zikr u du‘â olmak recâsiyle cem‘ ve
- 5 tertîbine ‘azm olundukça imzâsında mevânî‘ bulunurdu. Hâliyâ ol bârgâh-ı hilâfet-i
- 6 ‘uzmâ “a‘lâhu’llâhu te‘âlâ”<sup>48</sup> savbından müsevvedâtta isbât olunan ebyât cem‘ u tedvîn
- 7 ve her birinin makâmı ta‘yîn olunmak bâbında işâret-i ‘ulyâ-yı feyz-bahşâ fermân-
- 8 fermâ ve te‘yîd-nümâ olmagın, “lâ-cerem sirru’l-me’mûr ma‘zûrun”<sup>49</sup>, ol bâbda destûr kılınup kıllet-i
- 9 bizâ‘at ve kusûr-ı sînâ‘at muhakkak iken ebyât-ı müteferriku‘l-eczâyâ tertîb-i
- 10 hurûf-ı hecâ üzerine “keyfe mâ’t-tefak”<sup>50</sup> nazm u nesik virildi. Erbâb-ı tîbâ‘-ı selîme bu nüsha-i
- 11 sakîme manzûr oldukda gâyet-i mes’ûl budur ki ba‘z-ı ebyât-ı dîl-pesend ile
- 12 hursend olup mevâzı‘-ı i‘tirâzı zeyl-i igmâz ile mestûr buyurular ki mukaddemât-ı
- 6a 1 mütekaddimetü’l-beyâna binâ’en maksad-ı aksâ bir beyt sebebiyle enfâs-ı fukarâdan
- 2 deryûze-i sâlih-i du‘â vü istid‘â-yı magfîret ü rızâdur.  
“Rezzakana’llâhu’l-hatme bi’l-hasenâti
- 3 ve’l-‘afve ‘ani’s-seyyi’âti bi-yedihi ezmetü’l-hüsna ve ileyhi’r-rüc‘â ve hüve’l-müste‘ânu ve ‘aleyhi’t-tüklânu.”<sup>51</sup>

<sup>48</sup> Allah onu yüce kılsın.

<sup>49</sup> Şüphesiz memurun sırrı söylememesi anlayışla karşılanmalıdır.

<sup>50</sup> İttifak edildiği üzere.

<sup>51</sup> Allah bize hayatımızı günahlarımızı afvedilmiş olarak, hasenât, iyilik ile bitirmek nasîp etsin. Bütün güzelliklerin dizginleri O’nun elindedir. Dönüş O’nadır. Kendisinden yardım istenilecek O’dur, tevekkül de O’nadır.

## **Kasîdeler**

**FÎ TEVHÎDÎ BÂRÎ ‘AZZE İSMUHU<sup>52</sup>**

Mef‘ûlü Mefâ‘îlü Mefâ‘îlü Fe‘ûlün

- 1 Hüsnuñ ideli ‘ayn-ı dil ü câna tecellâ  
Dil oldı serâsîme vü cân vâlih ü şeydâ
- 2 ‘Aks-i ruhuña olmasa mir’ât mezâhir  
Mescûd-ı mugân olmaz idi Lât ile ‘Uzzâ
- 3 Ger şem‘ ruhuñ nârına pervâne degülse  
Başında nedendür görinen âteş-i sevdâ
- 4 Mihr-i ruhuñı nûş-ı dehânuñla göreliden  
Hurşîd ile hem-sâye vü teng oldı Mesîhâ
- 5 Zülfüñ hamına olmasa ger şifte Mecnûn  
Pây-ı diline komaz idi silsile Leylâ
- 6 Zâr olmaz idi ‘ârıza-ı ‘ışk ile Vâmık  
‘Arz itmese mihr-i ruhuñı ‘ârız-ı ‘Azrâ
- 7 Ger virmese la‘lûñ leb-i Şîrîn’e halâvet  
Telh itmez idi Kûhken’ûñ kâmın o halvâ
- 8 Hattuñ eseri birle dehânuñ haberi yok  
Bilmem nedür efvâhda bu fitne vü gavgâ
- 6b 9 Hâkister idüp sînede yakduñ dil-i zârı  
Cân âyînesi<sup>53</sup> anuñ ile oldı mücellâ
- 10 Huffâş-sıfat dîde seni görmede ‘âciz  
Sen mihr-i cihân-tâb gibi zâhir u peydâ
- 11 Ol vakt hîred hüsnuñı idrâk ider kim  
Âyînede<sup>54</sup> eşkâl göre dîde-i a‘mâ
- 12 Âgâz ile encâmuña idrâk iremez kim  
Encâmuña gâyet yog u âgâzuña mebdâ
- 13 Her zerre ki var hâl-i dil ile nazar itseñ  
Hem hamdüñe hâmiddür ü hem zikrûñe gûyâ
- 14 Beydâ-yı felâketde felek-vâr Sehâbî  
Olmuş dün ü gün hayret ile bâdiye-peymâ
- 15 Ger bedraka-i lutfuñı kılsañ aña hem-râh  
Ârâm-gehi olur idi menzil-i selmâ

**FÎ NA‘TÎ’N-NEBÎ SALLALLÂHU ‘ALEYHİ VE SELLEM<sup>55</sup>**

Fe‘ilâtün Fe‘ilâtün Fe‘ilâtün Fe‘ilün

<sup>52</sup>Yaratıcı’yı, adı yüce olsun, tevhîd, birleme konusunda.

<sup>53</sup>Metinde “â’înesi” şeklindedir.

<sup>54</sup>Metinde “â’înesi” şeklindedir.

<sup>55</sup>Peygamber’i, Allah şanını yüceltsin ve selâmete erdirdin, övme konusunda.

- 1 Olmaz ferş-i kadem atlas-ı eflâk saña  
Gey Habîb'üm yaraşur hil'at-i "Levlâk"<sup>56</sup> saña
- 2 Lâ-mekân oldu mekânun iremez fî'l-vâki'  
Mürg-ı endîşe ile tâyir-i idrâk saña
- 3 Bükülüp secde ider çerh-ı murassa' hâke  
Olalı ey güher-i pâk sade f hâk saña
- 4 Semer-i ma'rifetu'llâh seçerisin ne 'aceb  
Atsalar seng-i cefâ bir niçe bî-bâk saña
- 7a 5 Lücce-i bahr-i kerem sensin ü 'âlem hâşâk  
Râh-ı kurbet nice bulsun has u hâşâk saña
- 6 Na'tüñe sanma zebân oldu hemân cârî vü bes  
Ki dürûd itdi revân dîde-i nem-nâk saña
- 7 Medh idüp zâtuñı bî-çâre Sehâbî ne disün  
Çünkü "Levlâk" didi Hâlık-ı eflâk saña

## 3

**FÎ MENÂKIBİ HULEFÂ'U'R-RÂŞİDÎN  
RIHVÂNULLÂHI 'ALEYHİM ECMA'ÎN<sup>57</sup>**

Mefâ'ilün Fe'ilâtün Mefâ'ilün Fe'ilün

- 1 Ne havf-ı âteş-i dûzah çeker ne bîm-i 'azâb  
Şu dil ki oldu mekân-ı mahabbet-i ashâb
- 2 'Ale'l-husûs refîk-i şeh-i Rusûl Sıddîk  
Mukaddem-i hulefâ mîr-i zümre-i aktâb
- 3 İkinci pâdişeh-i mülk-i ma'delet Fârûk  
Hatîb-i minber-i İslâm u sâhib-i mihrâb
- 4 Üçüncü ebr-i hayâ bahr-i hilm Zi'n-nûreyn  
Riyâz-ı şer' ü imâmetde gonce-i sîr-âb
- 5 Resûle yâr-ı çehârum 'Aliyy-i 'âlî-kadr  
Vasıyy-i hatm-i rusûl müftî-i çehâr-kitâb
- 6 Dahi Hüseyin ü Hasen iki sıbt-ı pâk-i Nebî  
Biri sipîhr-i kerem biri şâh-ı 'arş-cenâb
- 7 Mahabbet-i hulefâ ile olıcak mahşûr  
Sehâbî maslahat âsân olurdu rûz-ı hisâb

## 4

**FÎ MEDHİ SULTÂNE SELÂTİNİ'Z-ZAMÂN  
HALLEDA'LLÂHU EYYÂME SALTANATIHI BÎ'L-'ADLİ  
VE'L-İHSÂN<sup>58</sup>**

<sup>56</sup>Hadîs-i kudsî olarak bilinen ve tamamı "Levlâke levlâk lemmâ halaktu'l-eflâk" ve "Sen olmasaydın âlemleri yaratmazdım" anlamındaki bu söz hadis değildir, Süfyân ibn-i Uyeyne'ye ait bir sözdür (İsmail Aclûni, **Keşfü'l-hafâ**, Beyrut 1983, c. 2, s. 214).

<sup>57</sup>Doğru yolda giden halifelerin, Allah onların hepsinden razı olsun, menkıbeleri konusunda.

<sup>58</sup>Devrin sultanlar sultanının, Allah onun saltanat günlerini adalet ve iyilik üzere devamlı etsin, övgüsü hakkında.

- Mef'ûlü Fâ'ilâtü Mefâ'ilü Fâ'ilün
- 7b 1 Nusret-karîn ü devlet ü ikbâl hem-rikâb  
Geldi serîr-i saltanata şâh-ı kâm-yâb
- 2 Ey memleket nüvîd ki ten buldı tâze cân  
V'ey rûzgâr müjde ki ref' oldu inkılâb
- 3 Ey baht-ı huft e gaflet-i h<sup>w</sup>âbdan uyan  
Ey fitne h<sup>w</sup>âba var ki senüñdür zamân-ı h<sup>w</sup>âb
- 4 Ey pîr-i çerh 'aynek-i encümle kıl nazar  
Hurşîd-i evc-i 'izzeti seyr eyle bî-hicâb
- 5 Ey mihr-i 'adl dehre ziyâ vir ki necm-i zulm  
Zulmetde oldu mu'tekif-i künc-i ihticâb
- 6 Ey bâd kılma hâk-i perîşânı münkalib  
V'ey âb virme âteş-i sûzâna inkılâb
- 7 Ey bahr hâk-i makdem-i şâha nisâr içün  
Lâyıkdur ola ger katarâtuñdür-i hoş-âb
- 8 İrgür sipihre başuñı ey çerh kim saña  
El virdi pâ-y-bûs-ı şehen-şâh-ı Cem-cenâb
- 9 Hızr u Mesîh-rütbe meh-i âfitâb-kadr  
Sâhib-kırân-ı 'asr şeh-i ma'delet-nisâb
- 10 Sultân-ı mülk-i şer' Süleymân-ı şark u garb  
Kim Hak'dan oldu zıll-ı İlâhî aña hitâb
- 11 Fermân-dih-i mülûk u selâtîn ki hanceri  
Oldı mülûk-i memlekete mâlikü'r-rikâb
- 8a 12 Bahrüñ temevvüci eser-i bâddan degül  
Dest-i güher-nisâr aña virdi inkılâb
- 13 Şarkı müsahhar eyledi bir günde garb ile  
Yakmış gibi çerâgı kılıcından âfitâb
- 14 Dehri münevver itdi ruh-ı enveri belî  
Zerrât-ı kâyinâta virür mihr nûr u tâb
- 15 Dest-i güher-feşânuña beñzerdi fi'l-mesel  
Olsaydı ebr katreleri lü'lü-i hoş-âb
- 16 Lutfuñ giderse tañ mı gönülden küdüreti  
Virse 'aceb mi cevher-i rûha cilâ şarâb
- 17 La'lüñ tekellüm eylese ervâh-ı kuds olur  
Şehd-i kelâm ile şeker-i nutkuña zübâb
- 18 Güm-râh olan 'adûya zamîr-i münevverüñ  
Gösterdi rây-ı sâyib ile menhec-i savâb
- 19 Devrân muhâlifî getürüp âsitânuña  
Sürüp yüzün yire takuban boynına tınâb
- 20 Deryâya atdı bogdı hevâyı siyâsetüñ  
Bir kubbe yapıdı üstine billûrdan habâb
- 21 İtse hasûd âh olur kendü başına  
Her bir şerâresi şerer-i dûzah-ı 'azâb

- 22 Bes kim türâba dökdi dimâ'-i havârici  
Kıldı zamâne tîguña künyet Ebû Türâb
- 23 'Adlûnle buldı şöyle cihân i'tidâl kim  
Oldı tezerv âbhûrî dîde-i 'ukâb
- 8b 24 Kasd idemez kebûtere şâhin ki havf idüp  
İtmez 'ukâb sa'veye şimden girü 'ikâb
- 25 Gördi kılıcuñuñ kesici hûnî oldugın  
Kıldı yirini ma'deletüñ mahbes-i kırâb
- 26 Oldı peleng ü reng birâder yalaşdı kan  
Devründe gördi hem-dem agnâmdur ziyâb
- 27 Sen mâha kec nazarla meger bakdı gice kim  
Çeşm-i sipihre rastladı nîzesin şihâb
- 28 Her hâneyi ki cevri ile tarh itdi rûzgâr  
Seyl-âb-ı tîguñ eyledi ol hâneyi harâb
- 29 'Azm-i mevâkibüñ göricek yiridür eger  
Berk-ı sebük-'inâna dinilse girân-rikâb
- 30 Zînetle bayrak [u] 'alemüñ pür-kitâbdur  
K'âyât-ı Feth u Nasr ile meşhûndur ol kitâb
- 31 Etbâk-ı çerh kâgıdı itmez vefâ eger  
Vasfuñ kitâbını hîredüm kılsa intihâb
- 32 Kapuñ ki cennet-i fukarâdur Sehâbî'ye  
Dünyâ vü âhiretde yiter melce' ü me'âb
- 33 Te'sîr-i sa'd u nahs-ı felekden aña ne gam  
Kim âsitân-ı lutfuña gösterdi intisâb
- 34 Meşşâta-veş eyâdî-i medhûnle ref' ider  
Her dem 'izâr-ı şâhid-i endîşeden nikâb
- 35 Tâ taht-ı lâciverd-i felek üzre şâh-ı çerh  
Alur sipâh-ı sâbit ü seyyâreden hisâb
- 9a 36 Taht-ı sa'âdet üzre karâr it 'ale'd-devâm  
Sen kâm-bahş-ı devlet ü ahhâb kâm-yâb
- 37 Nusret karîn ü baht rezîn ü felek mu'în  
'Avn-i İlâh yâver ü da'avât müstecâb

## 5

**EŞREKA'LLÂHU ŞÂRİKA SEMÂ'İ SALTANATİHİ MASÛNEN  
'ANİ'L-KÛSÛFİ  
VE AKMERA KAMERA FELEKİ 'ÂTİFETİHİ ME'MÛNEN  
'ANİ'L-HUSÛFİ<sup>59</sup>**

Fâ'ilâtün Fâ'ilâtün Fâ'ilâtün Fâ'ilün

- 1 Sanma kim olmuş şafakdan sürh etrâf-ı hilâl  
Virdi dest-i dâver-i devrân sipihre gûş-mâl

<sup>59</sup>Allah onun saltanatının güneşini tutulmaktan korunmuş doğdursun ve ihsan ayını da tutulmaktan emin olarak parlatsın.

- 2 Eyledi kendin şafakdan âşikârâ mâh-ı ‘ıyd  
Cism-i zârı rûzenüñ za‘findan olmışdur hayâl
- 3 Ravza-i eflâkde beñzer nihâl-i tâzeye  
Sarsar-ı takdîrden olmuş hamîde ol nihâl
- 4 ‘Arsa-i ‘âlemde çevgân-vâr gâhî gûşe-gîr  
Devr içinde gûy-veş gâhî serî‘ü’l-intikâl
- 5 İtdi bir saykal nümâyân çerh-i zengârî yine  
Kim göñül âyînesinden mahv ide jeng-i melâl
- 6 Kıldılar peymâne kandîl-i sıyâmı ehl-i ‘ays  
Çün şafak-gün bâde içre gördiler rengîn sifâl
- 7 ‘Iyde gûyâ şâm menşûrın ‘atâ itdi kazâ  
K’oldı zâhir sîm-gün tigrâyile kırtâs-ı al
- 8 Düşmege pây-ı semend-i şâh-ı dehre mâh-ı bedr  
Peykerinden gâh na’l eyler nümâyân gâh dâl
- 9 Kankı şeh ol kutb-ı devrân ser-ver-i sâhib-kırân  
Sâye-i Hak hâmî-i dîn mâhî-i küfr ü dalâl
- 9b 10 Gevher-i dürc-i mürüvvet bedr-i burc-ı ma‘delet  
Dürr-i deryâ-yı celâlet dürrî [hem] evc-i celâl
- 11 Mâh-ı Keyvân-menzilet şâh-ı Süleymân-menkıbet  
Kim anuñ Şebdîzi içün oldu zeyn zer hilâl
- 12 Vefk-ı râyı üzre ger mihr itmese bir lahza devr  
İrişür fi’l-hâl devrândan aña naks-ı zevâl
- 13 Leşker-i menkûb-ı a‘dâ ‘asker-i mansûrına  
Pây-dâr olmaz olursa fi’l-mesel encüm-misâl
- 14 Kana batmış darb-ı tûğından ayakdan başa dek  
Sanma başında kızılbaş-ı pelîdüñ tâc-ı al
- 15 Ey Sehâbî biñde birin vasfinuñ itsem beyân  
Hayretinden ‘akl lâ-ya‘kıl olurdu nutk lâl
- 16 Nice kim seyr ide mihr ü mâh u eflâk ü nücûm  
Nice kim devr ide mâh u sâl u eyyâm u leyâl
- 17 Çerh u encüm sâl u mâh olsun mutî‘ u çâkerî  
Ola kadr u ‘ıyd eyyâm [u] leyâli mâh u sâl

## 6

**LÂ ZÂLET NESÂYİMÜ MA‘DELETİHİ SÂYİRETEN  
VE ŞEMÂ’İMU ‘ATÂ’İHİ ŞÂMİLETEN<sup>60</sup>**

Fe‘ûlün Fe‘ûlün Fe‘ûlün Fe‘ûlün

- 1 Yine çekdi gül-zâra ‘asker şükûfe  
Çemen sahnına kurdu çâder şükûfe
- 2 Geçüp taht-ı çûpîne mânend-i husrev  
Kodı başa şâhâne efser şükûfe

<sup>60</sup> Adalet rüzgarlarının esintisini ve ihsân kokularının yaygınlığını devamlı kılsın.

- 10a
- 3 Meger eyler ihsân cüyûş-ı rebî‘a  
Ki dîvân idüp açdı defter şükûfe
- 4 Saçup sîmini her yaña oldı âhir  
Cünûd-ı reyâhîne ser-ver şükûfe
- 5 Tulû‘ itdi hurşîd-mânend kıldı  
Şebistân-ı bâğı münevver şükûfe
- 6 Sipîhr oldı sebz ile gül-zâr u anda  
Gül-i zerd hurşîd ü ahter şükûfe
- 7 Ele sâkıyâ gül gibi al ayagı  
Ki kaldurdu rindâne sâgar şükûfe
- 8 Ne hâcet şeb-i ‘ayş-ı gül-şende şem‘a  
Ki bir şem‘-i tâbendedür her şükûfe
- 9 Bu emr-i ‘acîbe nazar kıl ki olur  
Gehî beyza geh beyza-perver şükûfe
- 10 Hayâdan tere gül gibi gark olurdu  
Ger olsa ruhuñla ber-â-ber şükûfe
- 11 Sabâ bâga ırgürse zülfüñ nesîmin  
Olurdu ser-â-ser mu‘anber şükûfe
- 12 Gözinden sebel zâyil olurdu kılsa  
Gubâr-ı rehûñ kuhl-i agber şükûfe
- 13 Riyâz-ı fesâhatde olsaydı farzâ  
Sehâbî gibi ger sühan-ver şükûfe
- 14 Hezârân zebân ile eylerdi her dem  
Du‘â-yı şeh-i heft kişver şükûfe
- 10b
- 15 Nice kim nesîm-i bahâr ile eyler  
Meşâm-ı cihânı mu‘attar şükûfe
- 16 Hemîşe nihâl-i berûmend-i rumhuñ  
Getürsün ser-i hasmdan bir şükûfe

## 7

**CE‘ALA‘LLÂHU ‘UMRAHU ETVÂLE‘L-E‘MÂRİ VE  
HARRASE MEVÂRA  
DEVLETİHİ ‘AN ŞEVÂ‘İBİ‘N-NEVÂ‘İBİ VE‘L-EKDÂR<sup>61</sup>**

Mefâ‘ilün Fe‘ilâtün Mefâ‘ilün Fe‘ilün

- 1 Gam-ı bahâr ile zerd itdi rûy-i bâğı hazân  
Niteki çehre-i ‘uşşâkı fûrkat-i cânân
- 2 Mukârin oldugı içün harîf pîri ile  
Ulaşdı şâhid-i bûstâna zahmet-i yerakân
- 3 Rebî‘ haylini târâc kıldı reh-zen-i dey  
Düşürdi<sup>62</sup> kimini vü kimin eyledi ‘uryân
- 4 Çenâr dehr fenâsın görüp kalender-vâr  
Soyundu kaldı çemen içre vâlih u hayrân

<sup>61</sup>Allah ömrünü ömürlerin en uzununu etsin, devlet ve saltanat müddetini bela ve keder karışmaktan korusun.

<sup>62</sup>Metinde " Fuşurdu".



- 5 Hudâ'ya cevri-i şitâdan meger tazallüm ider  
Ki rûy-i zerdini yirlere sürdi berg-i hazân
- 6 Sehâb u ra'd çemen hâline terahhum idüp  
Birisi aglayup eyler birisi âh u efgân
- 7 Çemen yüzün ki sararmışdı berk havfından  
Sefîd kıldı sefidâc-ı berf ile devrân
- 8 Sadâ-yı sıyt-ı zemistânı bâddan işidüp  
Yirinde kuruyı kaldı o demde âb-ı revân
- 9 Neberd-i berdi görüp havfdan nihân oldu  
Hisâr-ı âhen u hârâda âteş-i sûzân
- 11a 10 Ocagı kible idüp nâra tapdılar gûyâ  
Mecûs milletine tâbi' oldu halk-ı cihân
- 11 Yakardı berd cihânı ger olmasaydı bu gün  
Penâh-ı halk-ı cihân âfitâb-ı 'âlemyân
- 12 Şeh-i zemîn ü zamân sâye-i 'inâyet-i Hak  
Hıdv-i pâdişehân hazret-i Süleymân Hân
- 13 Halîl-hulk Süleymân-şükûh 'Îsî-dem  
Serîr-bahş-ı selâtîn nişân-ı mülkistân
- 14 Muhammed-âyet [u] Sıddîk-sıdk [u] 'Osmân-hilm  
'Ömer-salâbet [u] Haydar-dil [u] refî'-mekân
- 15 Şihâb-rumh [u] kamer-tal'at [u] 'Utârid-rây  
Sitâre-ceyş [u] felek-kadr [u] Müşterî-eyvân
- 16 Sipihirden yücedür der-gehûn merâtib ile  
Yiridür ola Zuhâl pâspânuña der-bân
- 17 Cenâbuña iremez rif'at ile ger biñ yıl  
Hevâya eyleye pervâz vehm-i tîz-'inân
- 18 Sevâd-ı hükmüne baş egmeyen kalem-veş olur  
Siyâh-rûy u bürîde-zebân u ser-gerdân
- 19 Şu dem ki eyleye cünbiş nesîm-i lutfuñ olur  
Dil-i şikeste-i ahabâb gül gibi handân
- 20 Ne vakt kim ese hışm ile sarsar-ı kahruñ  
Olur mübâriz-i eflâk bîd-veş lerzân
- 11b 21 Şerîf-i zâtuñı kıldı Hudâ bi-hamdi'llâh  
Cihân-mutâ' u kazâ-kudret u kader-fermân
- 22 Tapuñda ser-ver-i Tûrân gulâm-ı halka-be-gûş  
Kapuñda 'abd-i girîzân sipeh-bud-ı Îrân
- 23 Esîr hükmüne dârâ-yı Hind ile Çîpâl  
Mutî'dür emrüne fagfûr-ı Çîn ile hâkân
- 24 Sen ol mekân-ı keremsin ki virilür her gün  
Kapuñda sâyile mahsûl-i bahr u hâsıl-ı kân
- 25 Keremle ma'deletüñden nümûnedür şâhâ  
Sehâ-yı Hâtem-i Tâî vü 'adl-i Nûşirevân
- 26 Bir iki katre-i nâçîzdür nazar kılsañ  
Bihâr-ı cûduña nisbet muhîl ile 'ummân

- 27 Cihânda pâdişehâ ser-verâ bi-hamdi'llâh  
Emîn-i rûy-i zemînsin emân-ı halk-ı cihân
- 28 Cenâb-ı devletüñe hâlüm ideyin 'arz  
Ki bendeñe neler itdi bu gerdiş-i devrân
- 29 Vatandan eyledi mehcûr u akrabâdan dûr  
Esîr-i derd ü giriftâr-ı mihnet-i hicrân
- 30 Celîs-i derd ü gam oldum enîs ü nâle vü âh  
Tenümde kalmadı tâkat dilümde tâb u tüvân
- 31 Belâ-yı gurbet u endûh-ı fakr ile olmuş  
Gam ile gussa ta'âmum şarâb-ı 'ayşum kan
- 32 Hayât buldı cihân halkı lutf-ı 'âmuñdan  
Benüm de derdüme kıl merhametle bir dermân
- 12a 33 Sehâbî kuluñı k'oldı bahâr-ı medhüñde  
Hezâr nagme ile 'andelîb-i hoş-elhân
- 34 Cefâ-yı fakr ile aglatma iltifât eyle  
Ki ola gül-şen-i 'âlemde gül gibi handân
- 35 Hevâ-yı mihrüñ ile zerre-vâr ururken raks  
Revâ degül ki düşüp ola hâk ile yeksân
- 36 Elini al kerem eyle koma ki ol zârı  
Helâk eyleye hasretle gayret-i akrân
- 37 Nice ki devr ide seyr-i sipihr ü encüm ile  
Rebî' birle zemistân harîf u tâbistân
- 38 Bahâr-ı saltanat u bûstân-ı devletüñe  
Felekden irmeye âsîb-i tünd-bâd-ı hazân

## 8

**ŞEYYEDA'LLÂHU TE'ÂLÂ ERKÂNE DEVLETİHİ MÂ  
TE'ÂKABE'L-MELEVÂN  
VE MEHHEDE KAVÂ'İDE SALTANATİHİ MÂ TÜRÂDİFU'L-  
KAMARÂN<sup>63</sup>**

Fâ'ilâtün Fâ'ilâtün Fâ'ilâtün Fâ'ilün

## I

- 1 Sâkıyâ mey sun ki oldı mevsim-i nev-rûz u 'ıyd  
Hayl-i dey olup girîzân mihnet oldı nâ-pedîd
- 2 Mihr-veş zerrîn kadehle içelüm gül-gûn şarâb  
Kim irişdi rûzigâr-ı sa'd u eyyâm-ı sa'id
- 3 Münhezim kıldı şitâ haylin sipeh-dâr-ı bahâr  
Reh-zen-i Behmen çemenden gitdi h'vâr u nâ-ümîd

<sup>63</sup>Devletin temellerini günler birbirini takip ettikçe (zaman durdukça) yüceltsin. Saltanatının temellerini ay ve güneş birbirini takip ettikçe sağlamlaştırsın.

12b

- 4 Şâh-ı gül geldi diyü müjdeyle varup gül-şeni  
Ser-be-ser zeyn itmege bâd-ı sabâ oldu berîd
- 5 Gonçe agzın gevher-i jâleyle toldurdu hevâ  
Gül-şene çün makdem-i nev-rûzdan virdi nüvîd
- 6 ‘İyd sultânın ziyâfet kılmaya şâh-ı bahâr  
Kurdu sahn-ı gül-şene ezhârdan çetr-i sefîd
- 7 Oldı Tûbâ’dan ‘alâmet virdi Kevser’den nişân  
Sâhat-i gül-zârda âb-ı revân u pâ-yı bîd
- 8 Lâle câmindan çemen bezminde olmuş mest gül  
Çâk ider ceybin simâ’ itdükçe bülbül den neşîd
- 9 Cilve eyler sun‘ mir’âtında Sâni‘ dem-be-dem  
Dîde-i idrâk ile nâzırdur aña ehl-i dîd
- 10 Koma elden kim ganîmetdür husûsâ nev-bahâr  
Dâmen-i yâr u kenâr-ı sebze vü câm-ı nebîd
- 11 Gül-şene vardum seher vaktinde gördüm bî-karâr  
Dem-be-dem tekrâr ider bu şi‘r-i garrâyı hezâr

## II

13a

- 1 Hamdü-li’llâh kim yine esdi nesîm-i nev-bahâr  
Buldu şâm-ı hecr pâ-yân irdi subh-ı vasl-ı yâr
- 2 Kıldı sûret-hâne-i Mânî gibi nakkâş-ı sun‘  
Levh-i bâg hâme-i kudret ile pür-nakş u nigâr
- 3 Goncanuñ halvet-serâyında hezâran nâz ile  
Şâhid-i gül ‘arz-ı dîdâr itdi oldı âşikâr
- 4 Pây-bûs-ı serv içün olmuşdı ser-gerdân zülâl  
Devlet el virdi nasîb oldı aña bûs u kenâr
- 5 Gül-şene âsîb-i deyden irmesün diyü zarar  
Kaldurup Hakk’a elin turmaz du‘â eyler çenâr
- 6 Medh okur gül karşusunda bülbül-i destân-serâ  
Vecd ile başın salar her lahza serv-i cûy-bâr
- 7 Raks ider gül-şende şâh-ı gül hezârân nâz ile  
Pâyine eyler şükûfe sîm u gonçe zer nisâr
- 8 Sanma bârândur yagan gül-şende kim ‘îsâr ider  
Anda her sâ‘at sehâb-ı feyz dürr-i şâhvâr
- 9 ‘Arsa-i gül-zâra sepdi âb sakkâ-yı sehâb  
Bâd ferrâşı süpürdi eyledi def‘-i gubâr
- 10 Sebze atlaslarla zeyn itdi ser-â-ser gül-şeni  
Seyre ‘azm itdi meger hurşîd-i Cem-şîd-iktidâr
- 11 Dürretü’t-tâc-ı selâtîn ser-ver-i rûy-i zemîn  
Husrev-i gâzî Süleymân-ı zamân dârâ-yı dîn

## III

13b

- 1 Ol ŧehen-ŧâh-ı gazenfer-savlet [ü] haydar-tüvân  
Kim kapusıdur penâh-ı vahŧ u tayr u ins ü cân
- 2 Bir eserdür bahr-i eltâf-ı nesîminden bahâr  
Bir ŧererdür âteŧ-i kahr-ı semûmından hazân
- 3 Bâb-ı âlîsinde meh bir bende-i der-bân-sıfat  
Kasr-ı a‘lâsında Keyvân bir gulâm-ı pâs-bân
- 4 Bezm-i dil-h<sup>w</sup>âhında Zühre mutrib-i destân-serâ  
Rezm-i cân-gâhında Mirrîh-i felek bir nâ-tüvân
- 5 Kullaruñdur âsitânuñda mülâzım rûz u ŧeb  
Keykubâd u Behmen u Efrâsiyâb u Erdevân
- 6 Gösterür lutfuñ dalâlet ehline râh-ı hüda  
Sensin ey sultân-ı ‘âlem Mehdî-i sâhib-zamân
- 7 Makdemüñle devlet ü baht u se‘âdet hem-rikâb  
Râyetüñle nusret ü ikbâl u ‘izzet hem-‘inân
- 8 Eymen olmuŧ sâye-i ‘adlûñde ‘âlem ŧöyle kim  
Berreye gürg âhûya ŧîr-i jeyân olmuŧ ŧubân
- 9 Ol ‘adâlet nev-bahârısın ki virdi ‘âleme  
Lutf u ihsânuñ nesîmi müjde-i emn ü emân
- 10 Kaldurur her zerreyi kim dest-i lutfuñ hâkden  
Baŧı üzre saklar anı âfîtâb-ı âsumân
- 11 Çün saña lâyıık Sehâbî idemez medh u senâ  
Kaldurup Hakk’a elin ŧimden girü itsün du‘â

## IV

**TETİMME-İ KASÎDE**

14a

- 1 Tâ ola mezkûr nâm hefte vü eyyâm u sâl  
Dâmen-i ikbâline iriŧmesün gerd-i melâl
- 2 Ehl-i İslâm üstine hurŧîd-i ‘ömr ü devleti  
Müstedâm u rûŧen-i tâbende olsun lâ-yezâl
- 3 Emr-i ‘âlîsine her müdbir ki ikbâl itmeye  
Hâk-veŧ olsun reh-i zillette h<sup>w</sup>âr u pâ-y-mâl
- 4 Nice kim fasl-ı bahâr içre sehâb-ı feyz ile  
Bûstân-ı dehrde sebz ola her zîbâ nihâl
- 5 Nice kim keŧf ide ebkâr-ı çemen ‘ârızların  
Geh zerâfetle sabâ gâhî nezâketle ŧimâl
- 6 Nice kim gûŧ eyleye taht-ı çemende ŧâh-ı gül  
Bûlbûl-i ŧûrîdeden her lahza gûn-â-gûn makâl
- 7 Nice kim gül-ŧende her sâ‘at hezârân nâz ile  
‘Andelîbe ŧâhid-i gül eyleye ‘arz-ı cemâl
- 8 Nahl-i ‘ömrî gül-ŧen-i ‘âlemde olsun ser-firâz  
Gül-bün-i ikbâline iriŧmesün bâd-ı zevâl

- 9 Hasm-ı bed-h<sup>w</sup>âhı gam u derd ile olsun rûz u şeb  
Zâr u bîmâr u perîşân-hâtır u âşüfte-hâl<sup>64</sup>
- 10 Tâ ola tâli‘ sa‘âdet matla‘ından âfitâb  
Sâye-i lutfında olsun ehl-i dâniş kâm-yâb

## 9

**NASSARA‘LLÂHU TE‘ÂLÂ BERÂYÂTE ‘İZZİHİ VE ‘ULÂ‘İHİ  
VE MEDDE İLÂ YEVMİ‘L-‘İRZİ ITNÂBE HAYÂMİ  
BAKÂ‘İHİ<sup>65</sup>**

Mef‘ûlü Fâ‘ilâtü Mefâ‘ilü Fâ‘ilün

- 1 Ey râyetüñle mâh-sıfat tev‘emân zafer  
Gün gibi meh-ce-i ‘alemüñden ‘ıyân zafer
- 2 Heycâ deminde ‘azmüñ ile hem-rikâb feth  
Rûz-ı vegâda bahtuñ ile hem-‘ınân zafer
- 3 Âsâr-ı sa‘d dutdı güneş gibi ‘âlemi  
Hurşîd-i râyetüñle idelden kırân zafer
- 4 Bir servdür neberd fezâsında râyetüñ  
Üstinde itdi fâhte-veş âşiyân zafer
- 5 Tîguñ safâ vu lutf ile bir âb-gînedür  
Kim anda gösterür ruhunu her zamân zafer
- 6 Tîruñ ne idüğini ‘adû bilmek istedi  
Fi‘l-hâl eyledi aña hâtır-nişân zafer
- 14b 7 Heycâ güninde sâye-i rumhuñda durmasa  
Bulmazdı düşmenüñ gibi hergiz emân zafer
- 8 Matlûb-ı husrevân-ı cihân oldu olalı  
Tâ kim mülâzim-i şeh-i gâtî-sitân zafer
- 9 Şâh-ı cihân-güşâ-yı Süleymân ki lâ-yezâl  
Bâbında feth bendedür ü pas-bân zafer
- 10 Ol zıll-ı Hak ki sâye-i rumhında oldılar  
Hem kâm-yâb nusret u hem kâm-rân zafer
- 11 Kadr-i cenâbına iremez itse fi‘l-mesel  
Eflâk-i seb‘ayı yidi kat nerdübân zafer
- 12 Mihr-i sipihr-i hâdiseden eyleyüp firâr  
İtdi livâ-yı nusretüñi sâye-bân zafer
- 13 Su virmege palârek-i âteş-nihâduña  
Meydânda su yirine revân itdi kan zafer
- 14 Rezm içre kime kim içürür âb-ı tîguñı  
Eyler anı kıyâmete dek ser-girân zafer
- 15 Olduñ ‘inâd ehline gâlib mesâfda  
Rûbâha bulduğı gibi şîr-i jiyân zafer

<sup>64</sup>Terkîb-i Bend’in bu bendi bundan önceki 3 bendin aksine bir beyit kısa, 9 beyitten oluşmaktadır.

<sup>65</sup>Allah onun şeref ve üstünlük bayraklarına yardım etsin. Bekâ çadırlarının iplerini kıyamet gününe kadar uzatsın.

- 15a
- 16 Zeyn itdi gül gibi dem-i a‘dâ-yı dîn ile  
Meydân-ı rezmi eyledi bir gül-sitân zafer
- 17 Ey ser-ver-i zamâne rikâbuñda oldılar  
Hem nâm-dâr nusret u hem dâstân zafer
- 18 Feth ile şâd-mân ise ger ser-verân-ı dehr  
Sensin o şeh ki senden olur şâd-mân [zafer]<sup>66</sup>
- 19 Olsaydı nutkı olur idi biñ zebân ile  
Dâyım senüñ senâñ ile ratbü’l-lisân zafer
- 20 İtmiş ‘adûñı gerçi tûvânâ geçerdı ol  
Bâr-ı girân-ı gürzüñ ile nâ-tûvân zafer
- 21 Ser-keşlik eyler idi muhâlif eşigüñe  
Dakdı getürdi gerdenine rîsmân zafer
- 22 Bâr-ı serinden eyledi âzâd gerdenin  
Oldı muhâlife ne ‘aceb mihr-bân zafer
- 23 Tâ buldılar ‘asâkir-i nusret-me’âsirüñ  
Hayl-i ‘adûya ey şeh-i sâhib-kırân zafer
- 24 Oldı yakîn ki ‘asker-i Deccâl-i fitneye  
Buldı cünûd-ı Mehdî-i âhir-zamân zafer
- 25 Tab‘-ı Sehâbî’i yine medhüñle ser-verâ  
Akrânı içre itdi gibi imtihân zafer
- 26 Kim silk-i nazma çekdi bu garrâ kasîdeyi  
Akrâna buldı anuñ ile bî-gümân zafer
- 27 Ebyâtı matla‘ olsa ser-â-ser ‘aceb mi kim  
Gün gibi her birinden olupdur ‘ıyân zafer
- 28 Nice ki feth-nâmeñi ide rakam kalem  
Nice ki ola vird-i zebân-ı cihân zafer
- 29 Devlet gibi karîñüñ ola lâ-yezâl feth  
İkbâl-vâr bendeñ ola câvidân zafer

## 10

15b

**MENNA’LLÂHU TE‘ÂLÂ Bİ-TAHLÎDİ MÜLKİHÎ ‘ALE’L-  
MÜSLİMÎN  
VE ‘A’LÂ’İ KELİMETİHÎ İLÂ YEVMİ’D-DÎN<sup>67</sup>**

Fe‘ilâtün Mefâ‘ilün Fe‘ilün

- 1 Akdı ol zülf ile zenahdâna  
Yine dil düşdi bend ü zindâna
- 2 Saldı âteş vücûd hırmenine  
Hadd-i dil-berde görinen dâne
- 3 ‘Aklumı aldı ol perî kıldı  
Beni Mecnûn-misâl dîvâne

<sup>66</sup>Metinde yazılı değildir.

<sup>67</sup>Allah onun müslümanlar üzerindeki hakimiyetinin ebediliğini ve adının kıyamet gününe kadar yüceltilmesini lutfetti.

- 4 Kapısı Ka'be-i se'âdetdür  
Gel berü hâcı gitme yabana
- 5 Ko füsûnı ki eylemez te'sîr  
Vâ'izâ ehl-i 'ıřka efsâne
- 6 İstimâ' itme ehl-i zerk sözün  
Sakın aldanma mekr-i şeytâna
- 7 Oldı maksûm rûz-ı kismetde  
Zâhide Ka'be rinde mey-hâne
- 8 Savm-ı fûrkatde kalmadı cânım  
İrmedüm 'ıyd-i vasl-ı cânâna
- 9 Gam kem olmaz bu dâr-ı mihnetde  
Mübtelâ-yı belâ-yı hicrâne
- 10 Varayın cevri-i devrden şekvâ  
İdeyin pâdişâh-ı devrâne
- 11 Ol ki vârisdürür eben 'an ced  
Milket-i Hazret-i Süleymân'a
- 12a Kef-i cûduna beñzeden bahri  
Katreyi nisbet itdi 'ummâna
- 13 Ta'n ider tab'-ı gevher-efşânı  
Şi'r-i Hassân u nazm-ı Selmân'e
- 14 Ey Sehâbî kelâmı muhtasar it  
Gel du'â eyle derd-mendâne
- 15 Kim du'â-yı devâm-ı devlet-i şâh  
Farzdur mü'min ü müselmâna
- 16 Tâk-ı çerh üzre nice kim şeb ü rûz  
Şem'-i mihr u çerâğ-ı meh yana
- 17 Kasr-ı rif'atde şem'-i devletine  
Oldı ervâh-ı kuds pervâne

## 11

**MEDDA'LLÂHU SERÂDİKÂTE CELÂLİHİ 'ÂLE  
KUMMETİ'L-CEVZÂ'İ  
VE E'ÂNİHİ 'ALÂ REF'İ'L-EVLİYÂ'İ VE HAFSİ'L-A'DÂ'İ<sup>68</sup>**

Mefâ'ilün Fe'ilâtün Mefâ'ilün Fe'ilün

- 1 Hıred kitâb-ı felekden kec ile açdı fâl  
Bakup mülâhaza kıldum göründi 'aynuma dâl
- 2 Sipihir levhine yazıldı harf-ı nûn gûyâ  
Benât-ı encüme virdi debîr-i çerh misâl
- 3 Hilâl kendüyi gösterdi zulmet-i şebde  
Sevâd-ı şi'rde beñzer ki zâhir oldı hayâl
- 4 Diyâr-ı garbda san pîr-i kîmyâ-gerdür  
Ki bükdi bilini sevdâ-yi mâl u fikr-i menâl

<sup>68</sup>Allah onun yücelik duvarlarını İkiizler burcunun zirvesine kadar uzatsın ve ona dostları elinden tutup düşmanını ezmeğe yardım etsin.

16b

- 5 Görindi gizleneli ‘ankebût kâh-ı sipihr  
Hamîde kâmet ile târ-ı ‘ankebût-misâl
- 6 Nihâl-i nev-res-i bûstân-ı çerhdur gûyâ  
Ki kaddini ham idüpdür nesîm-i bâd-ı şimâl
- 7 Kad-i hamîde-i ‘uşşâka olmasa mânend  
Harîm-i çerhde olmazdı yiri saff-ı ni‘âl
- 8 Müşâbih olması miftâh-ı bâb-ı hammâra  
Yîter huzûr ile sâkî sürûr u ‘işrete dâl
- 9 Görince yüzini bayram ider cihân halkı  
Cemâli oldu mübâreklîgine şâhid-i hâl
- 10 Görüp bu nakş-ı garîbi Sehâbî hayret ile  
Hiredden eyledi mâhiyyetini ‘akl su‘âl
- 11 Didi nişân-ı süm-i esb-i şâh-ı ‘âlemdür  
Ki gök yüzinde görenler tasavvur itdi hilâl
- 12 Nücûm u kevkebe sultân-ı dîn Süleymân Hân  
Meh-i sipihr-i cemâl âfitâb-ı evc-i celâl
- 13 Dilerdi ‘akl cemâl ü celâlini ide vasf  
Tahayyür ile hired vâlih oldu nâtıka lâl
- 14 Felekde nice ki tedvîr ile hilâl ola bedr  
Cihânda nice ki devr eyleyince mâh ola sâl
- 15 Zevâl irmeye hurşîd-i ömr ü devletine  
Be-hürmet-i Nebî-i ümmî vü sahâbe vü âl



## **Gazeller**

## ALLÂHU VELİYYÜ’T-TEVFÎK<sup>69</sup>

[HARFU’L-ELİF]

1

Fâ‘ilâtün Fâ‘ilâtün Fâ‘ilâtün Fâ‘ilün

17b

- 1 Dostlar gönlüm hevâ-yı ‘ışka oldu mübtelâ  
Lâzım oldu şimdi ben bîmâra tebdîl-i hevâ
- 2 Âb u âteşdür yirüm hâl-i ruh-ı dil-ber gibi  
Olalı ol mâh-rûya dîde menzil sine câ
- 3 Vâdî-i hayretde ser-gerdân olan şeydâlara  
Şu‘le-i âhumdur iklîm-i fenâyâ reh-nümâ
- 4 Çeşm-i zâhiden hakikat sûreti mestûrdur  
Olalı âyînesi âlûde-i gerd-i riyâ
- 5 Müjde-i cânân ile alduñ Sehâbî cânını  
Tâze cân bağışladuñ ben hâke ey bâd-ı sabâ

2

Fâ‘ilâtün Fâ‘ilâtün Fâ‘ilâtün Fâ‘ilün

18a

- 1 Cânı mı var kimsenüñ kim beñzedem cânı saña  
Cân nedür ‘âlemde kim teşbîh idem anı saña
- 2 Gördi lâyıık nakş-perdâz-ı ezel ey nahl-i nâz  
Çeşm-i giryânı maña gül-berg-i handânı saña
- 3 Yûsuf-ı sâni demek şâhum saña lâyıık degül  
Yûsuf olsaydı olurdu vâkı‘â sâni saña
- 4 Ey sanem şer‘-i mahabbet kâfiridür itmeyen  
Cân ile dilden fedâ dîn ile îmânı saña
- 5 Nâvek-i bî-dâd ile bagrum delindi ney gibi  
Âşikâr itsem ‘aceb mi âh u efgânı saña
- 6 Bâd-ı âhum çâk kıldı veh ki gönlüm goncesin  
Lâle gibi zâhir oldu dâg-ı pinhânı saña
- 7 Gül-şen-i vasluñda la‘lûñsüz<sup>70</sup> Sehâbî hâlini  
Aglasun ey verd-i handân çeşm-i giryânı saña

3

Fâ‘ilâtün Fâ‘ilâtün Fâ‘ilâtün Fâ‘ilün

- 1 Cennet-i kûy-ı kanâ‘at olalı me’vâ baña  
Görinür zindân-ı mihnet gül-şen-i dünyâ baña

<sup>69</sup>Başarıya ulaştıran ancak Allah’tır.

<sup>70</sup>Metinde yanlışlıkla “la‘ksüz” şeklinde yazılmıştır.

- 2 Kâf-ı ‘uzlet özleyüp geçdüm kanâ‘at tahtına  
Sâye-bândur anda şimdi şeh-per-i ‘Ankâ baña
- 3 Olalı gönlüm gedâ-yı kûy-ı ‘ışk itmez kabûl  
Ger virilse milket-i dünyâ vü “mâ-fihâ”<sup>71</sup> baña
- 4 Degme bir sultâna kul olmam müsellemler olalı  
Devlet-i ‘ışkuñda dârü’l-mülk-i istignâ baña
- 5 Hatt-ı sebz-i yâri aındum la‘lini yâd eyledüm  
Ey Sehâbî oldı zâhir Hızır ile ‘Îsâ baña

## 4

18b

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Sanma kim îsâr kılmaz dil revân cânı saña  
Olsa ger biñ cânı eylerdi fedâ anı saña
- 2 Gıtdiler ey dil ‘adem iklîmine Ferhâd u Kays  
Degdi kûh-ı derd ile mihnet beyâbânı saña
- 3 Zâhidâ kıldı kazâ kısmet deminde nâm-zed  
Kûy-ı cânânı baña firdevs-i Rıdvânı saña
- 4 Pâk kıl dil Ka‘be’sin levs-i bütân-ı hırsdan  
Tâ müyesser ide Hak mi‘râc-ı rûhânî saña
- 5 Kalb mir’âtın Zelîhâ-veş mücellâ itmeden  
Eyleye sanma tecellî Mâh-ı Ken‘ânî saña
- 6 Ey Sehâbî çekme dîvân-ı havâdisden hirâs  
Dilde dâg-ı ‘ışkdur mühr-i Süleymânî saña

## 5

- Fâ‘ilâtün Fâ‘ilâtün Fâ‘ilâtün Fâ‘ilün
- 1 ‘İyd irişdi oldı hayrân cümle ins ü cân saña  
Tâze cân buldı olanlar cân ile kurbân saña
- 2 ‘Ârızuñ ‘arz eyle kim cân nakd îsâr itmege  
Muntazırdur her yaña biñ zâr u ser-gerdân saña
- 3 Bendeye âzâdlık matlûb iken ey şâh-ı hüsn  
Oldılar âzâd olanlar bende-i fermân saña
- 4 Deyr-i ‘âlem içre bir sûretle itdüñ cilve kim  
Ehl-i ma‘ni oldılar sûret gibi hayrân saña
- 5 Ey Sehâbî gündüzüñ bayrâm u giceñ ola Kadr  
Baksa ger ‘ayn-ı ‘inâyetle şeh-i devrân saña

## 6

Fâ‘ilâtün Fâ‘ilâtün Fâ‘ilâtün Fâ‘ilün

<sup>71</sup>Orada bulunan.

- 19a
- 1 Haste göñlüm la‘l-i rûh-efzâ-yı cânândan cüdâ  
Bir ten-i fersûdedür kim oldu cân andan cüdâ
  - 2 İtmesün mi mürğ-ı dil bülbül-sıfat feryâd kim  
Kaldı mahbûs-ı kafes oldu gül-istândan cüdâ
  - 3 Çeşme çeşme kan revân oldu gözümden olalı  
Nahl-i kaddûñ cûy-bâr-ı çeşm-i giryândan cüdâ
  - 4 Rişte-i cân birle peyvend eyledüm her târı kim  
Şâne kıldı ol ham-ı zülf-i perîşândan cüdâ
  - 5 Pây-mâl-i ceşş-i derd oldu Sehâbî mûr-veş  
Olalı hâk-i reh-i Sultân Süleymân’dan cüdâ

## 7

Mef‘ûlû Fâ‘ilâtü Mefâ‘ilü Fâ‘ilün

- 1 Hâl-i dili beyân idemezdi zebân saña  
Bu mâcerâyı eyledi eşküm ‘ıyân saña
- 2 Tîr-i müjeñle sînemi del kıl aña nazar  
Tâ hâl-i zâr-ı dil ola hâtır-nişân saña
- 3 Hecrûñde eşk-i sürh ile âlûde çehreden  
Oldı nümûne bâgda berg-i hazân saña
- 4 Yanardı nâr-ı hecr ile ey şem‘-i dil-firûz  
Pervâne olmasaydı eger mürğ-ı cân saña
- 5 Sen tâyir-i riyâz-ı letâfetsin ey perî  
Ârâm-gâh-ı dîde gerek âşiyân saña
- 19b 6 Cânâ dil alıcak ko cefâyı ki nâ-gehân  
Dirler cihânda dilber-i nâ-mihribân saña
- 7 Gûş itse rûh-ı Husrev eger sihr-i şi‘rûñi  
Dirdi Sehâbî sâhir-i mu‘ciz-beyân saña

## 8

Mefâ‘ilün Mefâ‘ilün Mefâ‘ilün Mefâ‘ilün

- 1 Leb ü dendânı yârûñ ideli la‘l u güher peydâ  
Benüm eşkümle ruhsârumdan oldu sîm ü zer peydâ
- 2 ‘Adem vâdîsini gezdüm ser-â-ser olmadı veh kim  
Miyânuñdan eser zâhir dehânuñdan haber peydâ
- 3 Cemâlûñ zâhir oldu gün gibi zülfûñ nikâbından  
Bi-hamdi’llâh ki şâm-ı hecrûme oldu seher peydâ
- 4 Kamerdür ‘ârızuñ devr-i kamerde fitnedür hattûñ  
Tırâş it koma olsun fitne-i devr-i kamer peydâ
- 5 Ta‘accüb itme ger pervâz idüp senden yaña gelsem  
Ki tîrûñden tenümde oldu bî-had bâl ü per peydâ
- 6 Miyânuñ dikkatinden oldu her bârîk-bîn ‘âciz  
Nezâketle yine ol nükteyi kıldı kemer peydâ

- 7 Yine cûş eyledi deryâ-yı tab‘-ı gevher-efşânum  
Sehâbî eyledüm ahbâb için bir şi‘r-i ter peydâ

## 9

Mefâ‘ilün Mefâ‘ilün Mefâ‘ilün Mefâ‘ilün

20a

- 1 Yaşum bahri ki yokdur anda sâhilden eser peydâ  
İder âhum yelinden mevchâ-yı pür-hatar peydâ  
2 Dem-â-dem yoluña yâkût u la‘l îsâr ider çeşmüm  
Degüldür şeh-süvârum na‘l-i esbüñden şerer peydâ  
3 Görüp kaddüñ nihâlin üstüme yagdı belâ taşı  
Bi-hamdi’llâh ki kıldı nahl-i ümmîdüm semer peydâ  
4 Sabâ zencîr-i zülfinden halâs itdi dil ü cânı  
Kaç ey ‘âkil ki oldılar yine dîvâneler peydâ  
5 Sehâbî olmasaydı eşkümün bârânı olmazdı  
Cihân dürci aransa dürr ü gevherden eser peydâ

## 10

Mefâ‘ilün Fe‘ilâtün Mefâ‘ilün Fe‘ilün

- 1 Kaşuñ cefâ ideli gözlerüñ sitem peydâ  
Gözümde oldı nem ü kâmetümde ham peydâ  
2 Beyâz-ı çehre-i zerd üzre eşk-i sürhum ile  
Hayâl-i kilik-i müjeñ kıldı yüz rakam peydâ  
3 Hevâ-yı câm-ı leb-i la‘lün ile dil cem<sup>72</sup> iken  
Ne câm zâhir idi sâkıyâ ne Cem peydâ  
4 Düşürdi çerh ham u pîç rişte-i câna  
Olalı halka-i zülfünde pîç ü ham peydâ  
5 Sehâbî’nün gam-ı la‘lünde yutduğı kanı  
Kılur yaşı ruh-ı zerd üzre dem-be-dem peydâ

## 11

Fâ‘ilâtün Fâ‘ilâtün Fâ‘ilâtün Fâ‘ilün

20b

- 1 Bâ‘is-i ‘ışk u cünûn bu zülf ü perçemdür baña  
Dostlar dîvânelik şimdi müsellemdür baña  
2 Eylesem hıdmet harâbât ehline ‘ayb itme kim  
Her sıfâli câm-ı mey her rindi bir Cem’dür baña  
3 Mihnet ü derdüm görüp gurbetde yanup aglayan  
Sîne-i sûzân ile bu çeşm-i pür-nemdür baña  
4 Gerçi zâhid dil-güşâdur ravza-i huld-i berîn  
Tal‘at-ı dil-dârsuz zindân-ı mâtemdür baña

<sup>72</sup>Metinde “cem” şeklinde yanlış yazılmıştır.

- 5 Ey Sehâbî hâtırum şâd olmasa olmam melûl  
Kısmet-i rûz-ı ezel çün mihnet ü gamdur baña

## 12

Fâ'ilâtün Fâ'ilâtün Fâ'ilâtün Fâ'ilün

- 1 İtme dermân çekme zahmet ey tabîb-i cân baña  
Derd-mend-i 'ışkum itmez fâyide dermân baña  
2 Bâde-i 'ayş u şarâb-ı kâm-rânîdür diyü  
Hecr câmindan ciger kanın sunar devrân baña  
3 Bakmaga mir'ât-ı rûy-i yâre mâni'dür yaşum  
Dostlar 'ayn-ı zarardur dîde-i giryân baña  
4 El yudum hayvân zülâlinden ki la'l-i yârsuz  
Zehr-i kâtildür zülâl-i çeşme-i hayvân baña  
5 Rûmda bir şâha kul oldum Sehâbî vechi var  
Bendelik 'arz eylese hâkân-ı Türkistân baña

## 13

Fâ'ilâtün Fâ'ilâtün Fâ'ilâtün Fâ'ilün

21a

- 1 Ger dilerseñ ey gönül kim olasın gamdan cüdâ  
Münzevî ol kendüñi kıl halk-ı 'âlemden cüdâ  
2 Acıyup meclisde kan aglar surâhî-veş müdâm  
Sâkıyâ câm olalı 'ışret-geh-i Cem'den cüdâ  
3 Ger rakîb ayrılmasa benden ta'accüb itmeñüz  
Olmaz ebnâ-yı şeyâtîn nesl-i Âdem'den cüdâ  
4 Halka te'sîr eylemez sûz-ı derûn-ı müdde'î  
Nâr-ı dûzah degmede olmaz cehennemden cüdâ  
5 Ey Sehâbî tu'medür yâruñ segân-ı kûyına  
Şerhalar kim nâhun-ı hecr itdi sînemden cüdâ

## 14

Fâ'ilâtün Fâ'ilâtün Fâ'ilâtün Fâ'ilün

- 1 Olalı mihr-i cemâlün çeşm-i pür-nemden cüdâ  
Dîde nemden olmadı hâlî gönül gamdan cüdâ  
2 Sözlerün ihyâ ider halkı bağışlar cân belî  
Her nefes k'olur dem-i 'Îsâ-yı Meryem'den cüdâ  
3 Çeşm-i pür-hûnum benüm hâk-i reh-i dil-dârsuz  
Bir oñulmaz yâredür kim oldu merhemden cüdâ  
4 Yâr u hem-demdür baña hicrân şebinde derd ü gam  
Eyleme yâ Rab beni şol yâr u hem-demden cüdâ  
5 Ey Sehâbî şâhid-i fakr ile vuslat bulmadı  
İbn-i Edhem olmayınca zâl-ı âlemden cüdâ

## 15

Fâ'ilâtün Fâ'ilâtün Fâ'ilâtün Fâ'ilün

21b

- 1 Künc-i külhan yâd-ı ruhsârûnla gül-şendür baña  
Gül-şen-i firdevs sensüz künc-i külhandur baña
- 2 Tâ seg-i dil-dâra izhâr-ı mahabbet eyledüm  
Âşina yad oldı benden dost düşmendür baña
- 3 Cân bedenden çıksa farzâ çıkmazam mey-hâneden  
Hâdisât-ı dehrden ol gûşe me'mendür baña
- 4 Külbe-i târîküm içre şâm-ı hecr-i yârda  
Şu'le-i âh-ı derûnum şem'-i rûşendür baña
- 5 Ben Sehâbî şâh-bâz-ı âşiyân-ı kuds iken  
Kulle-i Kâf-ı belâ şimdi nişîmendür baña

## 16

Fâ'ilâtün Fâ'ilâtün Fâ'ilâtün Fâ'ilün

- 1 Mihnet-i 'ışkî nigârûn râhat-ı cândur baña  
Derd kim dil-dârdan irişse dermândur baña
- 2 Ey felek al cânımı ayırma yârımdan beni  
Yârdan dûr olmadansa ölmek âsândur baña
- 3 Olmadum Ya'kûb-veş gam-hâne-i 'âlemde şâd  
Yûsuf'am hecrinde 'âlem beytü'l-ahzândur baña
- 4 Şâd olup hayvân suyn ey Hızır sen nûş eyle kim  
Gam beyâbânı serâbı âb-ı hayvândur baña
- 5 Fürkatüñ şâmında ey meh encüm-i eşküm görüp  
Subha dek biñ çeşm ile eflâk hayrândur baña
- 6 Şu'le-i âhumla şevk-ı 'ârızûñ her subh u şâm  
Şem'-i bezm-ârâyile hurşîd-i tâbândur baña
- 7 Dime cevrumden Sehâbî halka şekvâ eylemiş  
Dostum hâşâ ma'âza'llâh bühtandur baña

## 17

Fâ'ilâtün Fâ'ilâtün Fâ'ilâtün Fâ'ilün

22a

- 1 Meyl iden her gûşeden kaşuñ kemânıdur baña  
Acıyup kan aglayan tîrûñ nişânıdur baña
- 2 Çâk kıldı sînemi râz-ı derûnum oldı fâş  
Tîr-i gamzeñ kâşîf-i sırr-ı nihânîdür baña
- 3 Çekme zahmet derdüme var ise 'akluñ ey tabîb  
Kim bahâr eyyâmı şeydâlık zamânıdur baña
- 4 Pür-hatardur gerçi ey dil vâdî-i cân-gâh-ı 'ışk  
Anda cân virmek hayât-ı câvidânîdür baña

- 5 Fark-ı serden eksük olmaz zahm-ı darb-ı tîg-ı 'ışk  
Ey Sehâbî bu kazâ-yı âsumânîdür baña

## 18

Mefâ'ilün Fe'ilâtün Mefâ'ilün Fe'ilün

- 1 Hicâbsuz görünür idi ol âfitâb baña  
Eger sehâb-ı vücûd olmasa hicâb baña
- 2 Tarîk-ı bâdiye-i Ka'be-i visâlinde  
Nişân-ı çeşme-i hayvândurur serâb baña
- 3 Lebi tekellüm ile mürdeler kılur ihyâ  
Velî ne fâyide kim söylemez cevâb baña
- 4 Mey-i nezzâre-i yâr ile ser-hoşem sâkî  
Gider ayaguñı sunma dahi şarâb baña
- 5 Sınuk sifâlini elden komam harâbâtuñ  
Sunulsa sâgar-ı zerrîn-âfitâb baña
- 22b 6 Kapuñda bendeñe çekdürme cevri-i agyârı  
Behişt içinde münâsib degül 'azâb baña
- 7 Sehâbî dün gice seyrümde gördüm ol mâhı  
Delîl-i devlet-i bîdâr oldu h<sup>w</sup>âb baña

## 19

Mefâ'ilün Fe'ilâtün Mefâ'ilün Fe'ilün

- 1 Kanı zamânede bir yâr-ı dil-peziñ baña  
Ki pâymâl-ı gamam ola dest-gîr baña
- 2 Yaşumla ruhlarumuñ sîm ile zerîn göricek  
Ganî sanur diyimez müdde'î fakîr baña
- 3 Gürîz eyledi benden huzûr-ı devlet-i vasl  
Olursa gam ne 'aceb yâr nâ-gürîz baña
- 4 Mürîd-i pîr-i harâbât olalı zâhid  
Zamân zamân irişür feyz-i câm-ı pîr baña
- 5 Sehâbî bende-i şâh-ı cihân-penâham ben  
Ri'âyet itse 'aceb mi sipâh u mîr baña

## 20

Fâ'ilâtün Fâ'ilâtün Fâ'ilâtün Fâ'ilün

- 1 Yârsuz lâyk degül seyr-i gül ü gül-şen baña  
Besdürür 'işret-serâ bir gûşe-i külhan baña
- 2 Tende kanlu dâg ile sînemde zahm-ı tîg-ı yâr  
Gül-şen-i 'âlemde yitmez mi gül ü sûsen baña
- 3 Dil gam-ı eyyâmdan mecrûhdur ey pîr-i deyr  
Derdüme kıl çâre sun bi'llâh dürdden baña
- 23a 4 Kûy-ı yâre 'âzim oldum mâni' oldı müdde'î  
Seyr iderdüm cenneti dîv olmasa reh-zen baña



- 5 Dîde-i cân ile cânânı görürdüm bî-hicâb  
Olmasaydı ger hicâb ey dil gubâr-ı ten baña
- 6 ‘Aks-i ruhsâruñla kûyuñ gül-şenidür dostum  
Pertev-i envâr-ı Tûr u Vâdî-i Eymen baña
- 7 Rûşen eyler tal‘atüñ bir gün Sehâbî menzilin  
Gün gibi ey<sup>73</sup> âfitâbum oldu bu rûşen baña

## 21

Fâ‘ilâtün Fâ‘ilâtün Fâ‘ilâtün Fâ‘ilün

- 1 Mürğ-ı dil feryâd eyler kûy-ı cânândan cüdâ  
Nice feryâd itmesün bülbül gül-istândan cüdâ
- 2 La‘l-i dilbersüz sükût itsem ta‘accüb itmeñüz  
Eylemez tûtî tekellüm şekkeristândan cüdâ
- 3 Yüzde hâlin görmesem görmez gözüm dünyâ yüzün  
Gûyiyâ merdümle olur çeşm-i giryândan cüdâ
- 4 Gâh kayd-ı zülf ü geh çâh-ı zenahdânındadır  
Olmadı dîvâne gönîlüm bend ü zindândan cüdâ
- 5 Düşdi cânândan Sehâbî cân cüdâ bî-ihtiyâr  
Yohsa varın terk idüp olmazdı cânândan cüdâ

## 22

Fe‘ilâtün Fe‘ilâtün Fe‘ilâtün Fe‘ilün

23b

- 1 Dil diler fakr u fenâ gûşesi miskîni ola  
Hâk-i gam seng-i belâ bister ü bâlîni ola
- 2 Terk-i cân itse n’ola bir kişi Ferhâd gibi  
Ki anuñ sencileyin dilber-i şîrîn’i ola
- 3 Vire mi hâk-i rehûñ zerresini dünyâya  
Her kimüñ iki gözüm çeşm-i cihân-bîni ola
- 4 Var mı dil mürğına imkân-ı halâs andan kim  
Elde zülfüñ gibi anuñ iki şâhîni ola
- 5 İtme zinhâr Sehâbî taleb-i resm-i vefâ  
Bir güzelden ki cefâ şîvesi âyîni ola

## 23

Fâ‘ilâtün Fâ‘ilâtün Fâ‘ilâtün Fâ‘ilün

- 1 Niçe bir çeşmüm sehâbı giryeden nem-nâk ola  
Gonce-veş dil bâd-ı âhumdan girîbân-çâk ola
- 2 Âteş-i ruhsâruña yansun yakılsun mürğ-ı dil  
‘Âşık-ı sâdık gerek pervâne-veş bî-bâk ola

<sup>73</sup>Metinde “ây” şeklindedir, anlamın daha doğru olacağı düşüncesi ile bu şekilde değiştirilmiştir.

- 3 İhtiyârı birle zâhid şâhid ü mey terkini  
İhtiyâr eyler mi her kim sâhib-i idrâk ola
- 4 Çıksa ger eflâke ‘Îsâ-veş ta‘accüb itmeñüz  
Kim ki<sup>74</sup> bu dehr-i denî âlâyışinden pâk ola
- 5 Kayd-ı ‘âlemden mücerred ol elif-veş tâ senüñ  
Ey Sehâbî menzilüñ fark-ı ser-i eflâk ola

## 24

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kankı bir bîmâr kim tûmâr ide cânân aña  
Görmesün râhat yüzün ‘âlemde ger dermân aña
- 2 Mûrg-ı dil pervânedür bir şem‘-i bezm-ârâya kim  
Mâh u hurşîdiyle olmuş çerh ser-gerdân aña
- 3 Zindeyi bî-cân ider la‘li ölüyi dirgürür  
Bu ne hâletdür ki dirler çeşme-i hayvân aña
- 4 Sebz olup neşv ü nemâ bulmazdı serv-i bâg-ı ‘ışk  
Virmeseydi su eger bu dîde-i giryân aña
- 5 Dîde-i giryâna rahm itmez Sehâbî kalb-i yâr  
Seng-i hârâdur igen kılmaz eser bârân aña

## 25

Mefâ‘ilün Fe‘ilâtün Mefâ‘ilün Fe‘ilün

- 1 ‘Abâya mâyili sanma gam-ı kabâda ola  
Safâ bulur begüm âyîne kim ‘abâda ola
- 2 Gönülde mûcib-i ‘ayş u neşâtdur gam-ı yâr  
Hudâ’dan isteyelüm anı kim ziyâde ola
- 3 Yiridür eyleye dil hâteminde nâmuñı nakş  
Nukûş-ı gayrdan anuñ ki levhi sâde ola
- 4 Cüdâ olur bedenümden çü rişte-i cânım  
Segân-ı kûyuñ için isterem kılâde ola
- 5 Ayaga düşdi gönül al elini merhamet it  
‘Ale’l-husûs ki yoluñda o fütâde ola
- 6 Cefâlaruñ baña mahsûs iken diler gönülüm  
Vefâlaruñ dahi ben zâr u nâ-murâda ola
- 7 Bisât-ı dehrde atlandı her fütâde şehâ  
Revâ mîdur ki Sehâbî kuluñ piyâde ola

HARFU’L- BÂ’

## 26

Fâ‘ilâtün Fâ‘ilâtün Fâ‘ilâtün Fâ‘ilün

<sup>74</sup>Metinde “ki” iki defa yazılmıştır.

24b

- 1 Añladı derd-i derûnum reng-i ruhsârum görüp  
Bildi göñlüm mâ-cerâsın çeşm-i hûn-bârum görüp
- 2 Eyledi devrân beni mahbûs-ı zindân-ı cihân  
Şehd ile âğuşte tûtî-vâr güftârum görüp
- 3 Muhtesib bilmezdi ser-mest oldugum veh kim bu gün  
Añladı keyfiyyetüm âşüfte destârum görüp
- 4 Baña teslîm eyledi sadr-ı kabûli pîr-i deyr  
Küfr-i zülf-i yârdan bilümde zünnârum görüp
- 5 Şi'r-i Mecnûn'ı Sehâbî kıldılar 'uşşâk mahv  
Levh-i hâtırdan benüm dîvân-ı eş'ârum görüp

27

Fâ'ilâtün Fâ'ilâtün Fâ'ilâtün Fâ'ilün

- 1 Seyl-i gam zann itdiler eşk-i firâvânum görüp  
Ebr-i mihnet sandılar bu çeşm-i giryânum görüp
- 2 Dem-be-dem eyler revân ruhsâreye seylâb-ı eşk  
Çeşm-i ter bu vech ile âlûde dâmânum görüp
- 3 Serv-kadler gonce-veş gül-şende handân oldılar  
Her taraftan gül gibi çâk-i girîbânum görüp
- 4 Zülf-i müşgînüñ sabâdan mı begüm âşüfte-hâl  
Yâ perîşândur benüm hâl-i perîşânum görüp
- 5 Ey Sehâbî umarın ihsân idüp tahsîn ide  
Defter ü dîvânımı şâh-ı sühan-dânum görüp

28

Fâ'ilâtün Fâ'ilâtün Fâ'ilâtün Fâ'ilün

25a

- 1 İtmesem 'arz-ı mahabbet baña cevır itmez habîb  
Kimde kim bîmârlık sezmez 'ilâc itmez tabîb
- 2 Vuslat eyyâmında göñlüm nâlesi efzûn olur  
Arturur lâbüd bahâr olsa figânın andelîb
- 3 Âsitânuñda mücâvirdür göñül dîr ise ten  
Hidmete cân hem revân oldu irişür 'an-karîb
- 4 Devlet-i dîdârdan mahrûm kıldı dîdemi  
Yir yüzinden dilerem kim nâ-bedîd olsun rakîb
- 5 Sîne-i çâkümde ârâm eylemez dil gerçi kim  
Sâkin olur kûşe-i vîrânede ekser garîb
- 6 La'l-i Şîrîn kıldı şîrîn-kâm 'ayş-ı Husrev'i  
Kûh-ken-i bî-çâreye hûn-ı ciger oldu nasîb
- 7 Ey Sehâbî 'ışk müstevlî olaldan göñlüme  
Tende tâkat kalmadı dilden firâr itdi şekîb

29

Mefâ'ilün Fe'ilâtün Mefâ'ilün Fe'ilün

25b

- 1 Taleb esîrine dîdâr-ı yâr idi matlûb  
Velî ne fâyide kim oldu dîdeden mahcûb
- 2 Cüyûş-ı sabr ile itmişdi kalb cem'iyet  
Sipâh-ı 'ışkı görüp oldu nâ-gehân maglûb
- 3 Yaşum kapuñda ko aksun ki Yûsuf'ıñ virdi  
Nihâl-i kâmetine âb dîde-i Ya'kûb
- 4 Cefâña râgıb olursam te'accüb eyleme kim  
Ne gelse cânib-i mahbûbdan olur mergûb
- 5 'Adem diyârına sür'atle 'âzim olur idüm  
Cihânda eglemeyeydi beni mey ü mahbûb
- 6 'Ikâl-ı 'akl-ile pâ-bend idüm bi-hamdi'llâh  
Ki 'ışk câzibesi eyledi beni meczûb
- 7 Sehâbî târ-ı ten-i nâ-tüvân ile sarasın  
Yazılsa ol meh-i mekteb-nişîne çün mektûb

30

Fâ'ilâtün Fâ'ilâtün Fâ'ilâtün Fâ'ilün

- 1 Gördi câm-ı mey lebûñle dem-be-dem eyler tarab  
Telh-kâm oldu surâhî-veş gönül ey nûş-leb
- 2 Dil ser-i kûyuñda feryâd eylese incinme kim  
'Âşık-ı dîvânedan terk-i edeb olmaz 'aceb
- 3 Yûsuf-ı dil gabgabun çâhından olmazdı halâs  
Olmasa ger rişte-i zülf-i dil-âvîzün sebeb
- 4 Rûz u şeb zülf ü ruh-ı yâruñ nedür cem'iyeti  
Ey münecim ger kırân itmezler ise rûz u şeb
- 5 Ey Sehâbî bâda virdi yakdı hâkî cismümi  
Âteş-i 'isyân ile âb-ı ciger-sûz-ı 'ineb

31

Fâ'ilâtün Fâ'ilâtün Fâ'ilâtün Fâ'ilün

26a

- 1 Çîn-i zülfünden sabâ kapdı nesîm-i müşg-i nâb  
Rûzgâr itdi anı mahbûs-ı zindân-ı habâb
- 2 Dil serâyın cilve-gâh itmek dilerdi şâh-ı 'ışk  
Tîrûñi gönderdi evvel geldi kıldı feth-i bâb
- 3 Bulmaz bir meh saña mânend her gün gerçi kim  
Yidi eflâki varup tokuz tolanur âfitâb
- 4 Gönlümi yakan gözumdür şu'le-i cân-sûz ile  
Dîde-i gam-dîde olmışdur baña 'ayn-ı 'azâb
- 5 Ey Sehâbî bir şeh-i 'âlî-cenâbuñ kulıyam  
Kim sa'âdet andan eyler sa'd-i ekber iktisâb

## 32

Mef'ûlü Fâ'ilâtü Mefâ'ilü Fâ'ilün

- 1 Her geh dökülse câm-ı meye lâle-gün şarâb  
Virür fenâ nişânesini anda her habâb
- 2 Yâd-ı lebûñle hûşî ferâmûş eyledüm  
Ma'lûm oldu kim katı nisyân virür şarâb
- 3 Yâr ile aramızda hicâb oldu müdde'î  
Gelmez ecel ki ref' ola bu aradan hicâb
- 4 Hercâyî olsa yâr ne var itme 'ayb kim  
Her câya sâye salsa virür nûr âfitâb
- 5 Yir yok gözümde h<sup>w</sup>âba Sehâbî ki gam şebi  
Seylâb-ı eşk eyledi ol hâneyi harâb

## 33

Mefâ'ilün Fe'ilâtün Mefâ'ilün Fe'ilün

- 1 Olursa kâse-i ser hem eger sebû-yi şarâb  
Henûz gitmeye göñlümünden ârzû-yı şarâb
- 2 Cüdâ olursa tenümden gam-ı humâr ile cân  
Der-i mugâna varup ide cüst ü cûy-ı şarâb
- 3 Geyerdi hil'at-i "yuhyi'l-'izâm" 'azm-i "remîm"<sup>75</sup>  
Meşâm-ı ehl-i kubûra ger irse bûy-i şarâb
- 4 Şarâbı âb ile memzûc kılma ey sâkî  
Dökülmesün yire bi'llâh âb-ı rûy-i şarâb
- 5 Sehâbî tâyibüm ammâ henûz bâkîdür  
Dilümde hasret-i mey dilde güft ü gûy-i şarâb

HARFU'T-TÂ'

## 34

Mefâ'ilün Mefâ'ilün Mefâ'ilün Mefâ'ilün

- 1 Tabîbüm gel tekellüm kıl dil-i bîmâra tîmâr it  
Lebûñ depret Mesîhâ mu'cizin 'âlemde izhâr it
- 2 Hırâm it gül-şeni ey serv zindân eyle şimşâda  
Tebessüm eyle ey gül gül-sitânı gonceye dar it
- 3 Kemend it târ-ı gîsûñî dil-i mecnûnı bend eyle  
Çözüp zencîr-i zülfüñ gerden-i cânı giriftâr it
- 4 Ümîdüñ goncesi handân ola dirseñ bu gül-şende  
Sirişk-i al ile etrâfuñı ey dîde gül-zâr it
- 5 Şeb-i mihnetde veh kim yalıñuz kaldum gel ey nâle  
Yüri h<sup>w</sup>âb-ı 'ademden Vâmık u Mecnûn'ı bîdâr it

<sup>75</sup>"Çürümüş kemikleri kim diriltecek", **Kur'ân**, Yâsîn sûresi, 26/78.

- 6 Habersüz üstüme hicrân şebîhun itse lutf eyle  
Beni bir dem öñürdi ey ecel gel sen haber-dâr it
- 7 Felek mir'ât-ı mihri ger mukâbil kılssa mâhumla  
Sehâbî dūd-ı âh-ı subh ile âyînesin târ it

## 35

- 27a
- Mefâ'ilün Fe'ilâtün Mefâ'ilün Fe'ilün
- 1 Tekellüm itmeyüp olsam 'aceb midür mebhût  
Ki agzuma leb-i dil-dâr urdı mühr-i sükût
- 2 Safâ-yı çâh-ı zenahdân-ı yâri görse idi  
İderdi eşk ile pür çâh-ı Bâbil'i Hârût
- 3 Kapuñda cennete dil ragbet eylemez itmez  
Fezâ-yı mülkde pervâz tâyir-i melekût
- 4 Hevâ-yı dâne-i hâlûñle çıkdı eflâke  
Sadâ-yı sübha-i zü'l-kibriyâ-yı ve'l-ceberût
- 5 Yiter güvâh-ı mahabbetde iki dîde-i ter  
Sehâbî lâzım olursa bu müdde'âya sübût

## 36

- Mef'ûlü Mefâ'ilü Mefâ'ilü Fe'ûlün
- 1 Sepmezdi eger dîde dile âb-ı mahabbet  
Yakardı ten-i pür-tebümi tâb-ı mahabbet
- 2 Senden idemem kat'-ı te'alluk ki olupdur  
Her bir ham-ı zülfüñ baña kullâb-ı mahabbet
- 3 'İşkuñ dile geldükde irişdi gam u mihnet  
Cem' oldı yine bir yire esbâb-ı mahabbet
- 4 'Uşşâka merâtib yazıcak hâme-i takdîr  
Yazdı beni ser-defter-i erbâb-ı mahabbet
- 5 Çâk itdi Sehâbî tenümi tîg-ı gam-ı 'ışk  
Açıldı yine dil yüzine bâb-ı mahabbet

## 37

- 27b
- Mefâ'ilün Mefâ'ilün Fe'ûlün
- 1 Göricek dâne-i eşküm güler dost  
Güherden hazz ider lâ-büd güher-dost
- 2 Göz aglar ey gönül sen dahi iñle  
Kim eşk ü âh-ı 'uşşâkı sever dost
- 3 Gönülde tâb kalmaz tende tâkat  
Dil-i miskîne rahm itmezse ger dost
- 4 Bütün dünyâ benümle düşmen olsun  
Tek itsün ben hakîre bir nazar dost

- 5 Nihân itdüm gönülden râz-ı ‘ışkı  
Ki mahrem olıma esrâra her dost
- 6 Sever zâhid ruh-ı zerd ile eşkin  
Fenâ ehli olur mı sîm ü zer-dost
- 7 Şu kim seyr itdi çeşmüm çeşme-sârın  
Sehâbî ‘aynına gelmez apar dost

## 38

Fâ‘ilâtün Fâ‘ilâtün Fâ‘ilâtün Fâ‘ilün

- 1 Dest-i hattun pençe-i Yâkût’a virmişdür şikest  
Bu mesel meşhûrdur kim dest ber-bâlâ-yı dest
- 2 Çeşm-i mestün kanımı dökdi baña rahm itmedi  
Kimseye rahm eylemezmiş vâkı‘â cellâd-ı mest
- 3 Câmda seyr eyledüm bir şûh-ı tersâ ‘aksini  
Zâhidâ mey-hânede olsam ‘aceb mi mey-perest
- 28a 4 Çekme zahmet itme tedbîr-i cünûnum ey tabîb  
Hiç zâyil ola mı keyfiyyet-i câm-ı Elest
- 5 ‘İşk-ı pâkûn eyledi kalb-i Sehâbî’den zuhûr  
Matla‘-ı envâr-ı mihr-i enver oldu hâk-i pest

## 39

Fâ‘ilâtün Fâ‘ilâtün Fâ‘ilâtün Fâ‘ilün

- 1 Veh ki kendin eyledi ahabbdan bî-gâne dost  
Düşmen oldu âşinâlarla olup bî-gâne dost
- 2 Kanı ol demler ki eylerdi bizi lutf ile yâd  
Kanda kim ahabb ile nûş eylemiş peymâne dost
- 3 Şerh-i şevkum mutribâ takrîr kıl bir gice kim  
Hvâb-ı nâza meyl idüp gûş eyleye efsâne dost
- 4 Kesr idüp ‘ahdi yine peymâne dutdum zâhidâ  
‘Ahd ü peymân üzre sâbit olıma peymâne-dost
- 5 İtme ey dil iltifât-ı yârdan kat‘-ı ümîd  
Dosta hâşâ ki cevri ide be hey dîvâne dost
- 6 Hirkat-i pervâneye yanmazdı şem‘ün yüregi  
Olmayaydı vâkı‘â ger şem‘ ile pervâne dost
- 7 Ey Sehâbî olsa farzâ cümle ‘âlem düşmenüm  
Yokdurur bâküm tek olsun ol gözi mestâne dost

HARFU’S-SÂ’

## 40

Fe‘ilâtün Fe‘ilâtün Fe‘ilâtün Fe‘ilün

28b

- 1 Dime Ferhâd ile Mecnûn'a bulunmaz sâlis  
Sâlisem şol iki dîvâneye ben hem vâris
- 2 Şeyh-i şehir idemedi fark hevâdan 'ışkı  
Hayf kim olmadı temyîz kıdemden hâdis
- 3 Kıldı ben haste-dili yâr 'iyâdet veh kim  
Bir nefes olmadı şol 'ömür emi mâkis
- 4 Ben de zâhid gibi bir 'âkil-i ferzâne idüm  
Beyle mecnûnlığuma bir perî oldı bâ'is
- 5 Hüsn-i 'ahd umma dilâ müdde'î-i nâ-kesden  
Ne bilür şîve-i erbâb-ı vefâyı nâkes
- 6 Olmasa sâbıka-i lutf-ı ezel fâyide ne  
Saña ger olsa peder Nûh u birâder Yâfes
- 7 Mezra'-ı sebz-i felek hâsılı ma'lûm degül  
Anda bilmem bu hubûbı neden ekmiş hâris
- 8 Ma'nî-i hüsn-i hat-ı yâri hıreddeden sorma  
Sebak-ı 'ışkı Sehâbî ne bilür her bâhis

41

Fe'ilâtün Fe'ilâtün Fe'ilâtün Fe'ilün

29a

- 1 'İşk-ı yâre n'ola olsa dil-i mahzûn bâ'is  
Şöhret-i Leylî'ye oldı gam-ı Mecnûn bâ'is
- 2 Devr-i la'lünde beni sanma ki meyden geçdüm  
Beyle keyfîyyetüme oldı ol afyon bâ'is
- 3 Sâkıyâ la'l-i lebûnden diledümse bûse  
Baña incinme ki oldı mey-i gül-gûn bâ'is
- 4 Mutribâ çeng-i belâdan beni iñler sanma  
Oldı feryâduma destûndeki kânûn bâ'is
- 5 'Âlemi tutdı Sehâbî kelimâtum olalı  
Lutf-ı eş'âruma ol kâmet-i mevzûn bâ'is

42

Fâ'ilâtün Fâ'ilâtün Fâ'ilâtün Fâ'ilün

- 1 Dil fûnûn-ı gamda itmez Kays-ı mahzûn ile bahs  
Sâhib-i idrâk olan eyler mi mecnûn ile bahs
- 2 Eyleyen devr-i lebûnde bâdeyi hikmetle nûş  
Bû 'Alî-i vakt olup eyler Felâtün ile bahs
- 3 Bahr ü kân öykünmesün bu çeşm-i gevher-bâra kim  
Her ganî lâıyk degüldür k'ide Kârûn ile bahs
- 4 Olıma ebrûsuna yâruñ mukâbil mâh-ı nev  
İdebilmez her riyâzet ehli Zü'n-nûn ile bahs
- 5 Şâh medhinde Sehâbî yiridür ger eylese  
Hâme-i ma'nî-nigârum tîr-i gerdûn ile bahs



## HARFU'L-CÎM

43

Fâ'ilâtün Fâ'ilâtün Fâ'ilâtün Fâ'ilün

- 29b
- 1 Her kimi zülfüñ hevâsı kıldı sevdâyî-mizâc  
İnse gökden yire 'Îsâ idemez aña 'ilâc
  - 2 Her gedâ kim irdi hâk-i dergehüñ iksîrine  
Eylemez sultân-ı 'âlî-şâna 'arz-ı ihtiyâc
  - 3 'Ârızuñ seyr eyledükçe hayret alur 'aklumu  
Kim ne yüzden anda kılmış âb u âteş imtizâc
  - 4 Kûşe-i halvetde gördi oldı hayli münkesîr  
Destümüzde şîşe-i mey zâhid-i nâzûk-mizâc
  - 5 'Arz ider 'uşşâka zer ruhsâr-ı zerdinden rakîb  
Leşker-i İslâma 'âdetdür virür kâfir harâc
  - 6 Şem' gibi mîr-i bezm-i 'âşıkân oldum yine  
Şu'le-i âh-ı şeb-efrûzumdurur başumda tâc
  - 7 La'l-i yâre âb-ı hayvânı Sehâbî beñzeden  
Şerbet-i 'azb ile birdür zann ider milh-i 'ücâc

44

Mefâ'ilün Mefâ'ilün Fe'ülün

- 30a
- 1 Olaldan derd-i 'ıskuñ bî-gerân genc  
Taleb eyler dil ü cân her zamân genc
  - 2 Metâ'-ı hüsnüñi göz görse bir kez  
Virür sîm-i sirişkünden revân genc
  - 3 Gönül peykânlaruñla sînem içre  
Şu müflisdür ki bulmuş nâ-gehân genc
  - 4 Şebâb eyyâmınuñ bil kadrini kim  
Yigitlik çağıdur ey nev-civân genc
  - 5 Hazân bergin gören gül-şende sanur  
Ki olmuş hâkden bir bir 'ıyân genc
  - 6 Hazân bergi degül kim ehl-i 'ayşa  
Nisâr itmek diler bâd-ı hazân genc
  - 7 Şu kim ser virdi sırr-ı 'ışkı bildi  
Cihânda kimse bulmaz râygân genc
  - 8 Kanâ'at kıl cihân içre Sehâbî  
Eger bulmak dilersin câvidân genc
  - 9 Yıkık dillerden it himmet taleb kim  
Olur vîrâne küncinde nihân genc

Mef'ûlû Fâ'ilâtû Mefâ'ilû Fâ'ilûn

- 1 Dil hânesinde yakmış idi 'ışk odı sirâc  
Cism ile rûhum eylemedin dahi imtizâc
- 2 Ger 'aks-i hüsnî olmasa âyîneden yaña  
Olurdu âb u tâb-ı ruh-ı yârdan zücâc
- 3 Kapuñda şol gedâ ki yatup hâra yasdānūr  
Sultân-ı vaktür dilemez taht birle tâc
- 4 Hattuñ Hıtâ vilâyetini tutdı vechi var  
Haddüñde alsa memleket-i Rûmdan harâc
- 5 Olalı dil gedâ-yı der-i devletüñ şehâ  
İtmez sipîhr serverine 'arz-ı ihtiyâc
- 6 Nâsıh yûri Sehâbî'yi men' itme 'ışkdan  
Zîrâ ki ol marîz degül kâbil-i 'ilâc

HARFU'L-HÂ'

Mefâ'ilûn Fe'ilâtûn Mefâ'ilûn Fe'ilûn

- 1 Şarâb kîş-i Mesîhâ'da oldu çünki mübâh  
Salâh ehlini bâdeyle idelüm ıslâh
- 2 Cemâl-i yâr 'ıyân oldu h'wâbdan gözin aç  
Sabûhı eyleyelüm sâkî oldu vakt-i sabâh
- 3 Beyâna gelse idi vâ'izâ me'ânî-i 'ışk  
Bu bâbı eyler idi feth sâhib-i miftâh
- 4 Fûrûg-ı lem'a-i şem'-i hidâyet olmayıcak  
Münevver eyleyimez kalbî zav ile mısâh
- 5 Mukârin olduğınun nakd-i 'akl u dînin alur  
Degül mi duhter-i rez kanı ey fakîh mübâh
- 6 Göñül esîr idi hicrân şebinde veh ki yine  
Sabâh perdesini açdı fâliku'l-asbâh
- 7 Sehâbî dîn ü dil ü sabr u hûşa virdi talâk  
Aña çü rez kızını pîr-i deyr kıldı nikâh

30b

[HARFU'L-HÂ']

Fâ'ilâtûn Fâ'ilâtûn Fâ'ilâtûn Fâ'ilûn

- 1 'Âlemi kıldı sirişkümle tolu seyyâre çerh  
'Ayn-ı 'ibretle kılur her şeb baña nezzâre çerh
- 2 Görinen zulmetleri şebden 'alâmet sanma kim  
Bir güneş yüzlü firâkında geyüpdür kara çerh

- 3 Eyledi bir mâh-ı şehr-âşûb ‘ışkıyla beni  
Kendi şehr ü menzilümden ‘âkıbet âvâre çerh
- 4 Bes ki âh eyler gönül hicrân şebinde korkaram  
Berk-ı âhum şu‘lesinden yana bir gün nâra çerh
- 5 Mâh-rûlar şâm-ı hecrinde kara gün gösteren  
Ben za‘îfe tâli‘ümdür n’eylesün bîçâre çerh
- 6 Ebr ü bârân sanma gökde kim Sehâbî hastenüñ  
Penbe ile agzına su tamzurur hem-vâre çerh

## HARFU’D-DÂL

48

- 31a
- Fâ‘ilâtün Fâ‘ilâtün Fâ‘ilâtün Fâ‘ilün
- 1 Câna gamzeñden ne deñlü gelse tîr-i bî-‘aded  
Biñde birin kâfirem itsem eger ey şûh red
- 2 Ölmeyen yoluñda cânâ kıldı kendü cânını  
Çâr dîvâr-ı tabî‘at içre mahbûs-ı ebed
- 3 Yâr ile vahdet müyesser kıl diyü her subh u şâm  
Zikr ü fikrüm gâh vâhiddür benüm gâhî ehad
- 4 ‘Âşıkın agyârdan fark itmese olmaz ‘aceb  
Tıfıldur ol gonçe-i nev-reste bilmez nîk ü bed
- 5 ‘Akl bâzârında kâsiddür metâ‘-ı sûz ü derd  
Kıymet-i kâlâ-yı ‘ışkı bilmez erbâb-ı hîred
- 6 Dil mekân-ı yârdur kıl gayr fikrinden tehî  
Halvet-i hâs-ı Süleymânîde n’eyler dîv ü ded
- 7 Her neye kılrsa nazar görürdi yâri cilve-ger  
Olmasaydı çeşm-i zâhidde Sehâbî ger remed

49

- Mef‘ûlü Fâ‘ilâtü Mefâ‘ilü Fâ‘ilün
- 1 Rûy-i nigûden olsa n’ola dîr çeşm-i bed  
Âyîneye nazar idemez sâhib-i remed
- 2 Mislüñ felek getürmedi gül-zâr-ı ‘âleme  
Bir serv-i mâh-tal‘at u bir mâh-ı serv-kad
- 3 Mirât-ı dilde sûret-i dil-dârı seyr iden  
Geyse ‘aceb mi egnine âyîne-veş nemed
- 4 Aldı dehânı gönülümü zülfeyni cânımı  
Ol cevri çok vefâsuz elinden meded meded
- 31b
- 5 Cevr-i rakîbi bir meh içün çekdi ‘âkıbet  
Oldı Sehâbî mazhar-ı eltâf-ı bî-‘aded

## 50

Mef'ûlû Fâ'ilâtü Mefâ'ilü Fâ'ilün

- 1 Sürh idi kanlu yaşum ile dîde-i ümîd  
Anı hevâ-yı mihr-i ruhuñ eyledi sefid
- 2 Şâdam ki kıldı za'f ile cânâ beni gamuñ  
Çeşm-i rakîbden ser-i kûyuñda nâ-bedîd
- 3 Peymânemüz pür eylemedin sâkî-i ecel  
Gel ey refik nûş idelüm sâgar-ı nebîd
- 4 Hâmûş iken kelâma şürû' itdi 'andelîb  
Gûyâ ki irdi makdem-i gülden aña nüvîd
- 5 Pürdür Sehâbî bâgda erbâb-ı 'ayş ile  
Etrâf-ı cûy u sâhat-i gül-zâr u pâ-yı bîd

## 51

Mef'ûlû Fâ'ilâtü Mefâ'ilü Fâ'ilün

- 1 Bâg-ı cihânda irmesün ey serv-i ser-bülend  
Hergiz mizâc-ı nâziküñe âfet ü gezend
- 2 Sen ol tabîb-i haste-dilânsın ki her nefes  
Bulur hayât lutfuñ ile nice derd-mend
- 3 Kalbün gubâr-ı hâdiseden bulmasun keder  
Âlâm-ı dehr hâtıruñı kılmasun nijend
- 4 Göz degmesün saña diyü her şeb yakar sipihr  
Nâr-ı şafakda encüm [ü] seyyâreden sipend
- 5 Olur yakın Sehâbî mukârin icâbete  
Bî-şek du'â-yı merdüm-i mazlûm u müste-mend

32a

## 52

Mef'ûlû Fâ'ilâtü Mefâ'ilü Fâ'ilün

- 1 Geldi yine hilâl ü getürdi nişân-ı 'ıyd  
Eyyâm-ı rûze geçdi vü irdi zamân-ı 'ıyd
- 2 Esbâb-ı 'işret ile müheyyâ ki irişür  
Sâkî safâ-yı tal'at ile mihmân-ı 'ıyd
- 3 Pest oldı savt-ı mukrî-yi savm olalı bülend  
Sıyt u sadâ-yı mutrib-i şîrîn-zebân-ı 'ıyd
- 4 Saldı felek muhîtime fülk-i zerîn hilâl  
Kıldı 'ubûr anuñ ile kârbân-ı 'ıyd
- 5 Kaçdı meh-i sıyâm şihâb u hilâlden  
Sandı Sehâbî anları tîr ü kemân-ı 'ıyd

## 53

Fâ'ilâtün Fâ'ilâtün Fâ'ilâtün Fâ'ilün

- 1 Encümi her şeb şafak nârında çerh eyler sipend  
İrmesün ol mâha tâ kim dîde-i bedden gezend
- 2 Ol Mesîhâ-dem ki nutkı cân bağışlar mürdeye  
Bister-i mihnetde lâyıkm mı ki ola derd-mend
- 3 Gül-şen-i nâz u riyâz-ı şîveden eksilmesün  
Yâ Rab ol serv-i hırâmân ol nihâl-i ser-bülend
- 4 Şerbete meyl itdi gûyâ ol Mesîh-enfâs kim  
Lebleri memzûc kılmış âb-ı hayvân birle kand
- 32b 5 Ey Sehâbî kıl bu şükran ile kurbân cânuñı  
Kim icâbet kasrına dest-i du'â saldı kemend

## HARFU'Z-ZÂL

54

Mef'ûlü Fâ'ilâtü Mefâ'ilü Fâ'ilün

- 1 Başdan ayaga dek ger ola ney-şeker lezîz  
Nahl-i kadûñ gibi degül ey sîm-ber lezîz
- 2 Peykân-ı tîrûñe n'ola dil ragbet eylese  
Virür nihâl-i tâze olıcak semer lezîz
- 3 İçmem şarâb-ı telh lebûñ şehdi var iken  
Tiryâkiyem gelür baña halvâ-yı ter lezîz
- 4 Dil vuslatuñda bî-hod olur vâkı'â gelür  
Bîdâr-ı şâm-ı mihnete h'wâb-ı seher lezîz
- 5 Dest-i kazâ saña ne sunarsa rızâyıla  
Nûş it Sehâbî anı eger telh eger lezîz

## HARFU'R-RÂ'

55

Mef'ûlü Fâ'ilâtü Mefâ'ilü Fâ'ilün

- 1 Her nahl-i verd-i tâze ki bezm-i çemendedür  
Bir şem'dür ki bâd-ı sabâ ile zindedür
- 2 Zülf-i nigâre karmadı ise benefşe el  
Hacletle ya çemende neden ser-fikendedür
- 3 Oldum esîr bir kadi şimşâda kim añâ  
Sünbül gulâm u sûsen-i âzâd bendedür
- 4 Kıldı hezâr pîreheni çâk gül gibi  
Nâzûk teni henûz teh-i pîrehendedür
- 33a 5 Sanma ki 'andelîb ile gül gülüp açılır  
Evzâ'-ı kâyinâta anuñ kârı handedür
- 6 Maksûd gevherin sade-i kâyinâtdan  
Kılma taleb ki ol dūr-i nâ-yâb sendedür
- 7 Kadri Sehâbî kalmadı kûyında eşkümün  
Zî-kıymet olmasa 'aceb olmaz 'Aden'de dūr

## 56

Fâ'ilâtün Fâ'ilâtün Fâ'ilâtün Fâ'ilün

- 1 Oldı sûz-ı sîneden leb huşk ü yaşıdan dîde ter  
Devlet-i 'ıškuñda oldum pâdişâh-ı bahr ü ber
- 2 Yâd kıldukça leb ü dendânuñı giryân iken  
Sîm-i eşküm gâh la'l-i nâb olur gâhî güher
- 3 Sabra gördüm kalmadı hecrüñde cânâ tâkatüm  
'Âkıbet itdüm fenâ iklîmine 'azm-i sefer
- 4 Ser-bülend olmaz serîr-i gamda tâc-ı 'ışk ile  
İtmeyen Mansûr-veş dâr-ı belâda terk-i ser
- 5 Sûrete hayrân olup kalsak bizi 'ayb eyleme  
Ey Sehâbî şâhid-i ma'nîdür anda cilve-ger

## 57

Mefâ'ilün Mefâ'ilün Mefâ'ilün Mefâ'ilün

33b

- 1 Göñül Hârût-veş çâh-ı zenahdânuñda kalmışdur  
Şehâ lutf it ki ol bî-çâre zindânuñda kalmışdur
- 2 Degüldür 'ârızuñda hâller nezzâre vaktinde  
Gözüm merdümeleri ruhsâr-ı tâbânuñda kalmışdur
- 3 Dagıtmışdur sabâ zülfüñde diller mecma'ın ancak  
Bizüm dîvânemüz ca'd-i perîşânuñda kalmışdur
- 4 İgen açılma kim bed-nâm olursın ey gül-i ra'nâ  
Nişân-ı hûn-ı bülbül den ki dâmânuñda kalmışdur
- 5 Isırmış la'lüñi dendân-ı şeb-nem ey lebi gonce  
Henûz anuñ nişânı la'l-i handânuñda kalmışdur
- 6 Yenüñde hancer-i hûn-rîz ile biñ 'âşıkı her dem  
Helâk itmişsin ey hûnî velî yânuñda kalmışdur
- 7 Nisâr it şâh-râhında yiridür her le'âli kim  
Sehâbî bahr-ı tab'-ı gevher-efşânuñda kalmışdur

## 58

Mef'ûlü Fâ'ilâtü Mefâ'ilü Fâ'ilün

- 1 Sâkî piyâle sun içelüm devr-i lâledür  
Her lâle bezm-i bâgda gül-gûn piyâledür
- 2 Döndi sipihr ü encüme ezhâr ile zemîn  
Gül anda mâh u sahn-ı çemen aña hâledür
- 3 Evrâkına gülüñ nazar it gül-sitâna gel  
Kim vâsf-ı hüsn-i yârda rengîn risâledür
- 4 Çıkmazdı bîkr-i gonce gül-istâna ger aña  
Bilseydi âşiyâne-i bülbül havâledür

- 5 Ben ey Sehâbî bülbül-i gül-zâr-ı mihnetem  
Zîrâ ki subh u şâm işüm âh u nâledür

## 59

Fâ'ilâtün Fâ'ilâtün Fâ'ilâtün Fâ'ilün

34a

- 1 Husrevâ bir beytdür dîvân-ı medhûñde bahâr  
Kim ber-â-ber oldı anda mısra'-ı leyl ü nehâr  
2 Müşterî elkâbuñı sordı 'Utârid didi kim  
Mâh-ı Keyvân-menzilet Cemşîd-i hurşîd-iktidâr  
3 Merdüm-i çeşmüm dem-â-dem serv-i kaddûñ yâdına  
Akıdur her cânibe kanlu yaşımdan cûy-bâr  
4 Haddûñi vechindeki hattûñla seyr itdüm didüm  
Nûr ile mestûr bir mushafdur âyet-ber-kenâr  
5 Ey Sehâbî yolına îsâr iderdüm her nefes  
Nakd-i cânım olmayaydı tende cins-i müste'âr

## 60

Mef'ûlü Fâ'ilâtü Mefâ'ilü Fâ'ilün

- 1 Bî-derd şevk-ı âteş-i 'ışkı neden bilür  
Kadr-i gül-i şükûfteyi mürğ-ı çemen bilür  
2 Sorma hadîs-i tîşe-i Ferhâd'ı Husrev'e  
Bu ser-güzeşti kendü başından geçen bilür  
3 Dil zevk ider işitse lebûñden cevâb-ı telh  
Kadr-i nebâtı tûtî-i şîrîn-sühan bilür  
4 Hâl-i şehîd-i hancer-i hûn-rîz-i 'ıškuñı  
Sahrâ-yı gamda lâle-i hûnîn-kefen bilür  
5 Dil fûrkatûñde çekdüğü âlâmı dostum  
Yûsuf'dan ayru sâkin-i beytû'l-hazen bilür  
6 Vâ'iz kelâm-ı 'ışk degül kâbil-i beyân  
Her kimse anı fehm idebilmez bilen bilür  
34b 7 Sor şâh-ı nûkte-dâna Sehâbî nûkâtını  
Husrev me'ânî-i kelimâtı hasen bilür

## 61

Mef'ûlü Fâ'ilâtü Mefâ'ilü Fâ'ilün

- 1 Ney gibi sanma nâlemi her diñleyen bilür  
Anı enîn-i fûrkat ile iñleyen bilür  
2 Hâl ehlinüñ makâlini 'ârifdür añlayan  
Erbâb-ı kâl kavlini her diñleyen bilür  
3 Agyâr ilen rakîb-i bed-endîş hâlini  
Siñ siñ kapuñ kilâbı gibi sekleyen bilür  
4 Nerrâd-ı dehr elinde benüm hâl-i zârımı  
Arada tâs-veş kulagı çekilen bilür

- 5 Fikr-i dehânuñ ile Sehâbî hayâlini  
Esrâr-ı gayb nüktesini añlayan bilür

## 62

Mef'ûlü Fâ'ilâtü Mefâ'ilü Fâ'ilün

- 1 Sînem ki tîr-i gamze-i yâre nişânedür  
Gûyâ hümâ-yı devlete bir âşiyânedür
- 2 Sûz-ı dilüm sözümnden olur her nefes 'ıyân  
Ol âteş-i belâya zebânum zebânedür
- 3 Şem'a sirâyet itmedi ise harâretüm  
Meclisde sûz u giryesi her gice ya nedür
- 4 Olsa 'aceb mi sübha-i mürgân-ı bâg-ı Kuds  
Mercân yaşum ki sübha gibi dâne dânedür
- 35a 5 Cân-gâhdur Sehâbî gönül nâlesi velî  
Bezm-i belâda 'âşîka dil-keş terânedür

## 63

Fâ'ilâtün Fâ'ilâtün Fâ'ilâtün Fâ'ilün

- 1 'Anberîn zülfün ki şol gül-gün yañag üstindedür  
Dûda beñzer vâkı'â kim şeb-çerâg üstindedür
- 2 Kalb-i 'uşşâkı ider ihrâk mânend-i sipend  
Dâne-i hâl-i siyeh kim ol yanag üstindedür
- 3 Agdan seçmez karayı hâl ü haddüñsüz gözüm  
Dostum şol kara hakkıyçün ki ag üstindedür
- 4 Kankı bir meclisde kim oldı kadeh-peymâ lebün  
Câm-ı mey anda surâhî-veş ayag üstindedür
- 5 Külbe-i târumda şem'-i şâm-ı'ayşumdur benüm  
Şol fetîl-i âteşin kim tende dâg üstindedür
- 6 Başum üzre dâg-ı hûn-âlûde görseñ bil kim ol  
Lâle-i endûh u mihnetdür ki tag üstindedür
- 7 Gözleri üstinde seyr itdüm Sehâbî kaşını  
Bâz-ı müşğîn-bâldur sandum ki zâg üstindedür

## 64

Fâ'ilâtün Fâ'ilâtün Fâ'ilâtün Fâ'ilün

- 1 Dîde mihr-i 'ârızuñdan dem-be-dem pür-âbdur  
Merdüm-i çeşmüm garîk-ı bahr-ı hûn-ı nâbdur
- 2 Dürr-i eşk-i 'âşîkuñ bil kadrini kapuñda kim  
Dîde bahr-i dilden almış gevher-i nâ-yâbdur
- 35b 3 Gül-şen-i 'ıškuñ ki ezharı virür bûy-i fenâ  
Goncesi hûn-ı dil-i 'uşşâk ile sır-âbdur



- 4 Veh ki târâc itdi sabr u hûşumı bir şûh kim  
Gamzesi gâret-ger-i ‘akl-ı ülü’l-elbâbdur
- 5 Mâhumuñ şâm-ı firâkında Sehâbî âhumuñ  
Her şerârı gökde bir hurşîd-i ‘âlem-tâbdur

## 65

Fâ‘ilâtün Fâ‘ilâtün Fâ‘ilâtün Fâ‘ilün

- 1 Hasret-i la‘l-i lebûñle cân u dil kan oldılar  
Gözlerüm lü’lü-veşüñ fikriyle ‘ummân oldılar
- 2 Kankı cem‘iyyetde kim zülfüñle gönüm hâlini  
Söyledüm hep ehl-i cem‘iyyet perîşân oldılar
- 3 Âsitânuñ hâkine yüz sürmeden hurşîd ü mâh  
Evc-i ‘izzet üzre nûr-ı çeşm-i devrân oldılar
- 4 ‘İşk elinden Vâmık u Ferhâd-veş mecnûn olup  
Niceler ser-geşte-i kûh u beyâbân oldılar
- 5 Vâkıf-ı keyfiyyet-i esrâr olan abdâllar  
Tekye-i tecrîdde medhûş u hayrân oldılar
- 6 Şâhid-i maksûd ile anlar hem-âgûş oldı kim  
Bezl idüp cânı şehîd-i ‘ışk-ı cânân oldılar
- 7 Münzevî olan gedâlar künc-i fakr u fâkada  
Ey Sehâbî milket-i dünyâya sultân oldılar

## 66

Fâ‘ilâtün Fâ‘ilâtün Fâ‘ilâtün Fâ‘ilün

36a

- 1 Mihr-i hüsnüñ vâlihîdür sâye-veş üftâdeler  
Serv kaddüñ bendesîdür dünyede âzâdeler
- 2 Düşdiler dâmânuña etfâl-i eşküm rahm kıl  
Hor ola lâyıık mîdur yanuñda merdüm-zâdeler
- 3 Câm-ı çeşmüm geh tolar hûn-âb ile geh âb ile  
İçerüz bu devr içinde dürlü dürlü bâdeler
- 4 Sorma nakş-ı hatt-ı yârüñ sırrını zühhâddan  
Levh-i Mahfûzuñ rumûzun kanda bilsün sâdeler
- 5 Dime dil virdi Sehâbî yoluma cân virmedi  
Cân virürler yoluña cân virmege<sup>76</sup> dil-dâdeler

## 67

Mef‘ûlü Mefâ‘ilü Mefâ‘ilü Fe‘ûlün

- 1 Oldı ser-i kûyuñda başum hâke ber-â-ber  
Kadrüm ne ‘aceb ger ola eflâke ber-â-ber

<sup>76</sup>Metinde “virmağa” şeklindedir.

- 2 Aransa bulunmaz gibi gül-zâr-ı belâda  
Bir gonce-i pür-hûn dil-i sad-çâke ber-â-ber
- 3 Dil-ber bulunur dünyede ammâ ki bulunmaz  
Dil almada ol dil-ber-i çâlâke ber-â-ber
- 4 Her dem irişür feyzi safâ ehline var mı  
Bir pîr-i safâ-bahş u mey-i tâke ber-â-ber
- 5 İzi tozını kuhl idinür ehl-i basîret  
Yolında Sehâbî olalı hâke ber-â-ber

## 68

36b

- Mefâ'ilün Fe'ilâtün Mefâ'ilün Fe'ilün
- 1 Gönül müdâm hat-ı sebz-i yâre mâyildür  
Hemîşe bülbül-i şeydâ bahâre mâyildür
- 2 'Aceb mi râgıb ola yâr katl-i 'uşşâka  
Ki pâdişâh hemîşe şikâre mâyildür
- 3 Nihâl kâmetinüñ çeşm-i zâredür meyli  
Çemende servi belî çeşme-zâre mâyildür
- 4 Gül itse meyl saña gırre olma ey bülbül  
Ki ol senüñ gibi çendîn hezâre mâyildür
- 5 Sehâbî gönli temâşâ-yı gülden açıla mı  
Anuñ ki hâtırı bir gül-'izâre mâyildür

## 69

- Mefâ'ilün Fe'ilâtün Mefâ'ilün Fe'ilün
- 1 Hayât nakdini bir rind kim şarâba virür  
Binâ-yı 'ömrini seylâb ile harâba virür
- 2 Virür metâ'ını kendü eliyle yagmaya  
Şeb-i visâlde şol kim özini h<sup>w</sup>âba virür
- 3 Sınuk sifâl-i harâbâtı rind-i dürd-âşâm  
Tasavvur eyleme kim câm-ı âfitâba virür
- 4 Kadehde bâde-i hamrâyı seyr iden 'ârif  
Habâb-ı kemterini sanma nüh kıbâba virür
- 5 Sehâbî böyle akarsa sirişk-i bârânî  
Vücûd hânesini seyl-i mihnet âba virür

## 70

37a

- Mef'ûlü Fâ'ilâtün Mef'ûlü Fâ'ilâtün
- 1 Deryâ-yı hüsnüñ üzre zülfüñ nehenge beñzer  
Ebrûlaruñla çeşmüñ bebr ü pelenge beñzer
- 2 Âmac-gâh-ı tende dâgumdurur nişâne  
Ya kaşlaruñ kemâna gamzeñ hadeñge beñzer

- 3 İtmez dil-i rakîbe te'sîr nâr-ı âhum  
Kalbi o saht cânûñ bildüm ki senge beñzer
- 4 Olma meges-veş ey dil lezzât-ı dehre mâyl  
Balı belâdur anuñ şehdi şerenge beñzer
- 5 Cânâ Sehâbî her ân umar lebûñden ihsân  
Bî-çârenüñ hayâli efkâr-ı benge beñzer

## 71

Fe'ilâtün Fe'ilâtün Fe'ilâtün Fe'ilün

- 1 Râzımı fâş kılan dîde-i nem-nâkümdür  
Sûzımı zâhir iden sîne-i sad-çâkümdür
- 2 Eyleyen şu'le-i nâr-ı gam-ı 'ışkî tahrîk  
Beden adlu bir avuç hâr ile hâşâkümdür
- 3 Âb-ı eşk ile iden dâmen-i âlûdemi pâk  
'İşk-ı pâküñle nigârâ nazar-ı pâkümdür
- 4 Gösteren 'âleme ebkâr-ı me'ânî suverin  
Hâtır-ı sâf ile âyîne-i idrâkümdür
- 5 Gird-bâd-ı gam ile zerre-sıfat ser-gerdân  
Deşt-i mihnetde Sehâbî bu ten-i hâkümdür

## 72

Mefâ'ilün Mefâ'ilün Mefâ'ilün Mefâ'ilün

37b

- 1 Tenümde tâze dâgum kevkeb-i bahtum misâlidür  
Hamîde kâmetüm çerh-i gam u mihnet hilâlidür
- 2 Melâmet gül-şenidür sîne-i sad-çâk-i pür-hûnum  
Elifler sînde bu gül-şenüñ nev-res nihâlidür
- 3 Güneş mâhum senüñle da'vî-i hüsn ü cemâl itse  
'Aceb olmaz ki ol ser-geştenüñ vakt-i zevâlidür
- 4 Melâhat gül-şenüñde 'ârızuñ berg-i gül-i terdür  
Letâfet bûstânında kadüñ bir serv talıdur
- 5 Sehâbî sâhat-i meyhâne bir der-gâhdür 'âlî  
Hilâl-i kubbe-i gerdûn anuñ sınımış sifâlidür

## 73

Mefâ'ilün Mefâ'ilün Mefâ'ilün Mefâ'ilün

- 1 Gel ey sâlik tarîk-i 'ışkî seyr it gör ne vâdîdür  
Fenâ iklîmine irmek dilersen 'ışk hâdîdür
- 2 Kabâ kıl cübbeñi terk eyleyüp tâcî başuñdan geç  
Sebük-bâr ol yûri zîrâ bu vâdî özge vâdîdür
- 3 Nihâyet buldı hicrân şâm-ı mihnet irdi pâyâna  
Sevin ey dil ki gam eyyâmı geçdi vakt-i şâdîdür

- 4 Ser-â-ser dâglar cismümde bir şâhâne hil‘atdûr  
Fetîl-i dâg başum üzre tâc-ı Keykubâdîdür
- 5 Sorarsın ger Sehâbî’nün şehâ ‘ışkuñda ahvâlin  
Mukîm-i künc-i gam kûy-ı felâket nâ-murâdîdür

74

Fâ‘ilâtün Fâ‘ilâtün Fâ‘ilâtün Fâ‘ilün

38a

- 1 Oklaruñdan cân u dil biñ dîde peydâ kıldılar  
Hüsnüñi biñ çeşm ile mâhum temâşâ kıldılar
- 2 Oldı zâhir mushaf-ı hüsnüñde vahdet âyeti  
Ehl-i ma‘nî ‘âlemi pür-sûz u gavgâ kıldılar
- 3 Gökde mâh-ı nev midür yâ kaşlaruñ resmin yazup  
Âb-ı zerle safha-i çerhi muhaşşâ kıldılar
- 4 Sâ‘idüñ ‘arz-ı yed-i beyzâ-yı Mûsâ eyleyüp  
Leblerüñ ihyâ-yı i‘câz-ı Mesîhâ kıldılar
- 5 Ey Sehâbî sürme-i çeşm-i cihân-bîn itmege  
Ehl-i bîniş hâk-i der-gâhın temennâ kıldılar

75

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kanda ‘azm itseñ n’ola kaçsa ‘adû bî-ihtiyâr  
Şimdi mi rûbâh kıldı şîr-i cengîden firâr
- 2 Saltanat evcindesin hurşîd-i ‘âlem-tâbsın  
Kıl musahhar ‘âlemi bir gün çıkup hurşîd-vâr
- 3 Muhtasar her sayda meyl itmez hümâ-yı himmetüñ  
İtmeseydi ‘âr iderdi çerh ‘ankâsın şikâr
- 4 Tâc-dâr olmak dilermiş düşmen-i bed-gevherüñ  
Olıcakdur ‘âkıbet anuñ vücûdı tâc-ı dâr
- 5 Ey Sehâbî ‘ârızın ‘arz itse mahv olur güneş  
Nitekim mihr olsa tâli‘ kevkeb olmaz âşikâr

76

Fâ‘ilâtün Fâ‘ilâtün Fâ‘ilâtün Fâ‘ilün

38b

- 1 Tîg-ı ‘ışk-ı yâr ile anlar ki maktûl oldılar  
Çekdiler cân nakdini dil-dâra makbûl oldılar
- 2 Nâzır-ı mülk-i cemâl olmışdı çeşmüm merdümi  
Düşmedi hıdmetleri makbûl u ma‘zûl oldılar
- 3 Ceyş-i mihnet üstüme geldükde tenden cân u dil  
Ol sipâha çıkdılar karşı karavul oldılar
- 4 Kul olan sen şâha gamdan gördiler âzâd olur  
Geldiler der-gâhuña âzâdeler kul oldılar
- 5 Şâhumuñ gûş itmege benden Sehâbî medhini  
Ehl-i diller ‘âzim-i şehir-i Sitanbul oldılar

77

Fâ'ilâtün Fâ'ilâtün Fâ'ilâtün Fâ'ilün

- 1 'İşk u hayret başda 'akluñ nükte-dânın yıkdılar  
Ma'rifet vâdîsinüñ bebr-i beyânın yıkdılar
- 2 Hayl-i endûh üstine üşdi harâbât erleri  
Bir ayakla evvelâ gam pehlivânın yıkdılar
- 3 Taş üşürdi kavm-ı Leylî Kays-ı mecnûn üstine  
Mürg-ı endûhuñ başından âşiyânın yıkdılar
- 4 İtdiler pâmâl-ı mihnet cism-i hûn-âlûdemi  
Gül-şen-i derdûñ dıraht-ı erguvânın yıkdılar
- 5 Gördiler dükkân-ı mekr-i 'aklı erbâb-ı cünûn  
Başına ol hîle-perdâzuñ dükânın yıkdılar
- 6 Nev-bahâr oldu yine sâkî uranlar lâf-ı zühd  
Tevbenüñ seylâb-ı meyle hânümânın yıkdılar
- 39a 7 Bîşe-i dehri Sehâbî seyr kıl havf itme kim  
Mûrlar ol bîşenûn şîr-i jeyânın yıkdılar

78

Fâ'ilâtün Fâ'ilâtün Fâ'ilâtün Fâ'ilün

- 1 Egnümüzde hırkamuz zâhid şarâb-âlûdedür  
Pâk olmaz âb-ı tevbeyle harâb-âlûdedür
- 2 Bu ten-i hâkîde ey dil gevher-i nâ-yâb-ı rûh  
Gerçi bî-mânenddür ammâ türâb-âlûdedür
- 3 Cân fidâ itsem yiridür lutf u kahr-ı yâre kim  
Kahrı lutf-âmîzdür lutfi 'itâb-âlûdedür
- 4 Âteş-i meyden 'arak-rîz oldu sanma 'ârız  
Kim o gül-berg-i riyâz-ı cân gül-âb-âlûdedür
- 5 Dîde vü dilden Sehâbî'nüñ karâr u h'vâbını  
Eyleyen yagma begüm ol çeşm-i hâb-âlûdedür

79

Mefâ'ilün Fe'ilâtün Mefâ'ilün Fe'ilün

- 1 Garîk-ı lücce-i gam âşinâ-yı 'ışkuñdur  
Harîk-ı nâr-ı elem mübtelâ-yı 'ışkuñdur
- 2 Mekân-ı âteş u âb eyleyen bu ben hâküñ  
Göz ile göñlini cânâ hevâ-yı 'ışkuñdur
- 3 Tabîbden taleb itmez gamuñda dil dermân  
Bu derd-mende müdârâ devâ-yı 'ışkuñdur
- 4 Esîr-i kayd-ı elemdür cihâna ser-ver olan  
Serîr-i 'âleme sultân gedâ-yı 'ışkuñdur

- 39b
- 5 Ta‘accüb itme felek dönse Mevlevî-mânend  
Ki nüh kubâbı anuñ pür-sadâ-yı ‘ışkınıdır
- 6 Halâlet ehline mâdâm deşt-i hayretde  
Delîl-i râh-ı hüda reh-nümâ-yı ‘ıškuñdur
- 7 Mis-i vücûdunı zer eyleyen Sehâbî’nüñ  
Safâ-yı mihrüñ ile kîmyâ-yı ‘ıškuñdur

## 80

Fâ‘ilâtün Fâ‘ilâtün Fâ‘ilâtün Fâ‘ilün

- 1 Dâg-ı sînem dest-i ‘ıškuñla dem-â-dem tâzedür  
Tîg-ı hecrüñden elifler tende bî-endâzedür
- 2 Bâg-ı dehri eşk-i gül-gûnumla tezyîn eyleyen  
Şîve bûstânında bitmiş bir nihâl-i tâzedür
- 3 Dime kim gül-gûn şafakdur gökde peydâ her seher  
Gün ‘arûsı sürinür yüzine rengîn gâzedür
- 4 Görinen eflâkde kavs-i kuzahdur sanma kim  
Defter-i pür-hîle-i eflâke ol şîrâzedür
- 5 Zâhide sorma Sehâbî sırr-ı “Esrâ”dan<sup>77</sup> haber  
Kim işi rûz u şeb anuñ h<sup>w</sup>âb ile hamyâzedür

## 81

Mef‘ûlü Fâ‘ilâtü Mefâ‘ilü Fâ‘ilün

- 1 Şâdam ki tîg-ı yâr ile dil pâre pâredür  
Zîrâ ki keşf-i hâlüm iden yâre yâredür
- 2 Eflâk sanma dûd-ı dilümdür ‘ıyân olan  
Encüm degüldür anda görinen şerâredür
- 40a 3 Şâm-ı sıyâm-ı hecrde bu âh-ı pür-şerâr  
Kandillerle zeyn olunmuş menâredür
- 4 Peykân-ı tîr-i cevri aña te’sîr eylemez  
Beñzer göñül didükleri bir seng-i hâredür
- 5 Viren Sehâbî encüm-i eşkümler dehre zeyn  
Evc-i sipîhr-i nâzda bir mâh-pâredür

## 82

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kalbe peykânın irişse ey şeh-i hûbân batar  
Yagsa lâbûd hâke yir yir katre-i bârân batar

<sup>77</sup>“Bir gece, kendisine âyetlerimizden bir kısmının gösterelim diye kulunu (Muhammed’i) Mescid-i Haram’dan, çevresini mübârek kıldığımız Mescid-i Aksâ’ya götüren Allah noksan sıfatlardan münezzehtir; O gerçekten işitendir, görendir”, **Kur’ân**, İsrâ sûresi, 17/1. Burada Hz. Peygamber’in Mi‘râc’ından bahsedilmektedir.

- 2 Mihr-i hüsnüñ var-iken hurşide baksam ‘aynuma  
Tîre-veş her dem şu‘â-i mihr-i nûr-efşân batar
- 3 Fikr-i müjgânuñla her şeb bister-i endûhda  
Cism-i râza nîş-i mihnet subha dek ey cân batar
- 4 Dil hayâl-i vasl ile ‘azm itse bâg-ı kûyuña  
Pâyine geh hâr-ı gam geh sûzen-i hicrân batar
- 5 Zevrak-ı cismin Sehâbî saldı bahr-i mihnete  
Mevc-i gamdan korkaram ol fûlk-i ser-gerdân batar

40b

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Kâkülün ruhsâruñ üzre dilleri her dem kapar  
Bahr içinden baş çıkarmış ol neheng âdem kapar
- 2 Tâc u taht-ı dehre dil vîrme göñül kim rûzgâr  
Gâh evreng-i Süleymân gâh taht-ı Cem kapar
- 3 Açma ‘irfân sırrını nâ-dâna kim ehl-i hîred  
Defter-i idrâkini bakdukça nâ-mahrem kapar
- 4 Târem-i a‘lâya pervâz it ki ‘ankâ-yı ecel  
Mürg-ı rûhı hâk-dân-ı tenden ey hem-dem, kapar
- 5 Yâre gösterme Sehâbî dîde-i giryânuñı  
Sakın ol fûlâd-dilden kim bulutdan nem kapar
- 6 Ben ki çâbü-k-dest-i idrâkem harîm-i fikrete  
Şâh-ı bâd-evreng ma‘nîden varup hâtem kapar
- 7 Dimezin k’ol tıfl gördükde Celâlî-veş beni  
İçerü kaçup kapusın karşuma muhkem kapar

- Mef‘ûlü Fâ‘ilâtü Mefâ‘ilü Fâ‘ilün
- 1 Meylüm benüm ne hûriyedür ne behiştödür  
Meylüm cihânda sen büt-i hûrî-siriştödür
- 2 Kapuñ koyup şu kim Harem’e niyyet eyleye  
‘Azmi harîm-i Ka‘be’ye meyli küniştödür
- 3 Dil mürgı bâl açup nice uçsun ki sen şehüñ  
Sevdâ-yı zülfî gerden-i cânında riştödür
- 4 Hâlün sevâdı ile hâtuñ nakş-ı dil-keşi  
‘Aynum beyâzı üzre ezelden nüviştödür
- 5 ‘Aynumda gâh zâhir olur gâh gizlenür  
Beñzer hayâl-i yâr Sehâbî ferîştödür

Fâ‘ilâtün Fâ‘ilâtün Fâ‘ilâtün Fâ‘ilün

41a

- 1 Her kimüñ ‘âlemde bir bî-rahm u hûnî yâri var  
İstemez kendü hayâtın zindelikden ‘ârı var
- 2 Gonçe vü serv istemez gönül benüm ey bâg-bân  
Gonçe-leb bir serve mâyildür ki hoş-reftârı var
- 3 Katre-i bârân-ı eşkin seyr kılsañ añlanur  
Her kimüñ bahr-i dilinde gevher-i esrârı var
- 4 Âteşîn dâg u elifler birle cânâ kâmetüm  
Gül-bün-i gül-zâr-ı gamdur hem güli hem hârı var
- 5 Mâh-ı nev gibi gamından zâr olan dil hâlini  
Kaşlaruñdan sor ki onlaruñ iki bîmârı var

86

Mef‘ûlü Fâ‘ilâtü Mefâ‘ilü Fâ‘ilün

- 1 Deyr-i muganda bir kişi kim dürrden çeker  
Derd ü gam-ı zamâne[y]i bilsem neden çeker
- 2 Mısr-ı mahabbete beni Ken‘ân-ı hecrden  
Şevk-ı cemâl-i Yûsuf-ı gül pîrehen çeker
- 3 Su gibi akıdur eridüp bî-sütûn taşın  
Her âh kim harâret ile Kûh-ken çeker
- 4 Her lahza merdümi gözümüñ bahr-i dîdeden  
Sen şâha pîş-keş diyü dürr-i ‘Aden çeker
- 5 Özler Sehâbî der-gehüñi tavg-ı Ka‘be’dan  
Lâ-büd yirine âdemi hubb-i vatan çeker

87

Fe‘ilâtün Fe‘ilâtün Fe‘ilâtün Fe‘ilün

41b

- 1 Kim ki ‘ışkuñda elifler ten-i ‘uryâna çeker  
Sîneye şâhid-i maksûdını merdâne çeker
- 2 Câm gibi irişür kâma leb-i dil-berden  
Dem-be-dem hûn-ı cigerden şu ki peymâne çeker
- 3 Bister-i gamda gönül cân çekişür hecrüñde  
Kıl ‘ıyâdet gör e şol hasteyi cânâ ne çeker
- 4 Şem‘-i bezme nazar it girye-i cân-sûzını gör  
Yalıñız sanma harâret dil-i pervâne çeker
- 5 Ey Sehâbî güher-i nazmum ile cân nakdin  
Pîş-keş itmege dil der-geh-i sultâna çeker

88

Fe‘ilâtün Fe‘ilâtün Fe‘ilâtün Fe‘ilün

- 1 Gâh meşşâta dutar zülfüñi geh şâne çeker  
Kimse bilmez ki arada dil-i şeydâ ne çeker



- 2 Bezm-i gamda benem ol rind ki ser kâsesini  
Hûn-ı dîdeyle kılur pür mey ü merdâne çeker
- 3 Devr câmindan içer derd ile hûn-âbe-i gam  
Şol ki hecr-i leb-i dil-dâr ile peymâne çeker
- 4 Kaşuñı kaddûñ ile aña dil abdâl-sıfat  
Dem-be-dem na'l ü elif sîne-i 'uryâna çeker
- 5 Ka'be'ye 'azm iderin yine beni mey-kedeye  
Cezbe-i âb u hevâyı mey ü mey-hâne çeker
- 42a 6 Tûtiyâ-veş ser-i kûyuñda Sehâbî şeb ü rûz  
Ayaguñ toprakını dîde-i giryâna çeker

## 89

Fe'îlâtün Fe'îlâtün Fe'îlâtün Fe'îlün

- 1 Dil gubâr-ı kademüñ dîde-i giryâna çeker  
'Aynına kuhl cilâ itmez ise ya ne çeker
- 2 Gam çeker mi 'acabâ gam-kede-i 'âlemde  
Sâkî-i meh-veş elinden şu ki peymâne çeker
- 3 Saçı zencîrine dil virmez idüm dil-dâruñ  
Beni ol silsileye bu dil-i dîvâne çeker
- 4 Dem-be-dem zülf nikâbın ruh-ı cânânemden  
Seyr kıl dest-i sabâyı niçe rindâne çeker
- 5 Ma'rifet mâyidesin tab'-ı Sehâbî her dem  
İder ihzâr varup hıdmet-i yârâna çeker

## 90

Mef'ûlü Fâ'îlâtü Mefâ'îlü Fâ'îlün

- 1 Âzâddur kapuñda belâdan esîrler  
Tâc-ı gınâya başların egmez fakîrler
- 2 Virmez 'abâ-yı zilleti dîbâ-yı devlete  
Âyîne-veş safâyıla rûşen-zamîrler
- 3 Basduk reh-i fenâya kadem terk idüp seri  
Kıldı bizi bu resm ile irşâd pîrler
- 4 'İşkuñ yolında kesret-i agyârdan ne bâk  
Meydân-ı rezmden hazer itmez dilîrler
- 42b 5 Beñzer Sehâbî sâhire âhû-yı çeşm-i yâr  
Kim baksa sayd olur aña her lahza şîrler

## 91

Fâ'îlâtün Fâ'îlâtün Fâ'îlâtün Fâ'îlün

- 1 Oldılar 'ışkuñda mecnûn nev-civânum pîrler  
Sübhadur gerdenlerinde bend olan zencîrler

- 2 Göz yüzünden ırmazam ey kaşı ya ger fi'l-mesel  
Çeşm-i 'âlem-bînüme müjgânum olsa tîrler
- 3 Mihre ger mânend kılsam âfitâb-ı hüsnüñi  
Boynuma olsun şu'â'ı dem-be-dem şemsîrler
- 4 Bâdeye rehn oldı zâhid hırkamuz zîrâ bizi  
Böyle irşâd itdiler râh-ı fenâda pîrler
- 5 Ey Sehâbî müdde'î lâf-ı güzâfindan ne bâk  
Hamle-i rûbâhdan itmez tevehhüm şîrler

## 92

Mefâ'îlün Mefâ'îlün Mefâ'îlün Mefâ'îlün

- 1 Tabîbüm derdüñi dil-hasteler dermâna virmezler  
Metâ'-ı mihnetüñ 'uşşâk nakd-i câna virmezler
- 2 Sirişk-i la'l-i 'uşşâkuñ kapuñda kadrini bil kim  
Anuñ her dânesin biñ gevher-i galtâna virmezler
- 3 Rakîbe itmezüz izhâr sırr-ı nükte-i 'ışkı  
Ki idrâk ehli 'irfân gevherin nâ-dâna virmezler
- 4 Safâ-yı câm ile ihyâ olan dil-haste 'âşıklar  
Mey-i nâbı zülâl-i Çeşme-i Hayvâna virmezler
- 5 Sehâbî fakr kûyında gedâlar himmetin gör kim  
Ferâgat küncini gencîne-i sultâna virmezler

43a

## 93

Mefâ'îlün Mefâ'îlün Mefâ'îlün Mefâ'îlün

- 1 Yaşumla yiryüzi hicrân şebinde pür-kevâibdür  
Şerâr-ı âteş-i âhum felekde necm-i sâkıbdur
- 2 'Aceb midür garîk-ı lücce-i eşk olsa her sâ'at  
Taleb bahrinde şol kim gevher-i maksûda tâlibdür
- 3 Mahabbet ehline mihr ü vefâ eyle cefâ itme  
Güzel şâhum güzellerden vefâ resmi münâsibdür
- 4 Hevâ-yı kâmetüñle şevk-ı ruhsâruñdur ey gonce  
Ki göñlüm serve mâyl hâtırum gül-zâre râgıbdur
- 5 Sehâbî secde kıldum bir büt-i zîbâya kim anuñ  
Sücûdı mezheb-i 'uşşâkda her şey'e vâcibdür

## 94

Mef'ûlü Fâ'ilâtü Mefâ'îlü Fâ'ilün

- 1 Başum ki şâh-râh-ı vefâda türâbdur  
Hâk-i reh-i şehen-şeh-i 'âlî-cenâbdur
- 2 Ol âsitâna da'vet iden halkı Ka'be'den  
Râh-ı Hüdâ'da kâid-i ehl-i savâbdur

- 3 İden hevâ-yı mihri ile raks zerre-vâr  
Evc-i şerefde gün gibi rif'at-me'âbdur
- 4 Kurdî gözümde hayme hayâl-i cemâl-i dost  
Kırpüklerüm o haymeye müşgîn tınâbdur
- 43b 5 Baş çekmezüz kemend-i ser-i zülf-i yârdan  
Kim serverân-ı 'âleme mâlik-rikâbdur
- 6 Bârân-ı eşki yolına durmaz nisâr ider  
Çeşmüm Sehâbî giryede gûyâ sehâbdur

## 95

- Fe'ilâtün Fe'ilâtün Fe'ilâtün Fe'ilün
- 1 Şeref-i kûy-ı nigârumdan o kim âgehdür  
Harem-i Ka'be'ye 'azm eyler ise güm-rehdür
- 2 Beñzedür kim ki o bâlâ-yı bülendi serve  
Himmeti pestdürür hem nazarı kûtehdür
- 3 Baña sensüz sanemâ zülf ü zenahdân-ı bütân  
Dâm-ı endûh ile bir ka'rı belürsüz çehtür
- 4 Sîne-i teng-i harîminde dil-i dîvânem  
İnzivâ gûşesini mesken idinmiş şehdür
- 5 Bûse cerr itse Sehâbî 'aceb olmaz senden  
Ey şeh-i hüsn gedânuñ işi 'şey li'llâh'dur <sup>78</sup>

## 96

- Mefâ'ilün Mefâ'ilün Mefâ'ilün Mefâ'ilün
- 1 Benem ol Hüdhüd-i hâdî ki himmetden kanadum var  
Sirişküm dânesi gibi tarîk-ı Hak'da zâdum var
- 2 'Aceb mi eylesem tekmîl fenn-i 'ışkî 'âlemde  
Ki gam gibi debistân-ı belâda üstâdum var
- 3 Beni eşküm gibi gözden bırakduñ dimedüñ bir gün  
Ki râh-ı meskenet üftâdesi bir nâ-murâdum var
- 44a 4 Gam u derdüñle hoşdur hâtırum mesrûrdur göñlüm  
Ki 'ıškuñ devletinde anlaruñla ittihâdum var
- 5 Beyâz-ı rûy-i zerde nâme-i şevk iderem inşâ  
Sehâbî tâ sevâd-ı dîde-i terden midâdum var

## 97

- Fâ'ilâtün Fâ'ilâtün Fâ'ilâtün Fâ'ilün
- 1 Şeh-süvârum her seher kim 'âzim-i meydân olur  
Gûy-veş yolında durmaz başlar galtân olur

<sup>78</sup> Allah için bir şey. Doğrusu 'şey'en li'llâh'dır. Şair burada vezin gereği kısaltarak kullanıyor.

- 2 Cân u dil ol hancer-i hûnrîz için eyler nizâ'  
Korkaram kim ara yirde nâ-gehân bir kan olur
- 3 Acısı cânımda kaldı geçdi dilden nâveki  
Şimdi bildüm kim soñı her vuslatuñ hicrân olur
- 4 Ay olur gün yüzini görmem kaçan kılsam nazar  
Tâli'üm za'findan ol dem gözlerüm giryân olur
- 5 Çâk kılsam dostlar pîrâhenüm 'ayb itmeñüz  
Cevherin eyler 'ıyân şemşîr çün 'uryân olur
- 6 'Âfiyetden hazz iden varsun ferâgat milkine  
'İşk ikliminde zîrâ zulm bî-pâyân olur
- 7 Görse ruhsârında hat çeşmüm Sehâbî yaş döker  
Kaplâsa hurşîdi zulmet vâkı'â bârân olur

44b

- Fe'ilâtün Fe'ilâtün Fe'ilâtün Fe'ilün
- 1 Râzıyam eyle baña cevr ü cefâ ikide bir  
İtme tek müdde'îye mihr ü vefâ ikide bir
- 2 Zıkr ü fikrüm gice gündüz hat ile haddüñdür  
Aglaram anuñ için subh u mesâ ikide bir
- 3 Nâveküñdür dil ü cân derdine râhat virici  
Olsalar tañlama cûyâ-yı devâ ikide bir
- 4 'Âşıkı öldürüp agyârı idersen ihyâ  
Zulmdür bu kerem it itme şehâ ikide bir
- 5 Yâr hod-gâmlara sâfî-i vaslın sunıcak  
Derd-i hicrân içürür devr baña ikide bir
- 6 Oldı âşüfte gönül kim ruh-ı dil-dârı neden  
Öpe yüzün süre bu zülf-i dûtâ ikide bir
- 7 Ey Sehâbî olalı hırs u hevâdan hâlî  
Dil olur mehbit-i envâr-ı Hudâ ikide bir

- Fe'ilâtün Fe'ilâtün Fe'ilâtün Fe'ilün
- 1 Eylemezsen baña çün mihr ü vefâ ikide bir  
Gel e bâri kerem it itme cefâ ikide bir
- 2 Hasret-i zülf ü temennâ-yı ruhuñla ne 'aceb  
Çıksa nâlem felege subh u mesâ ikide bir
- 3 Hâk-i râhuñ olıcak gözlerüme 'ayn-ı devâ  
Olsalar tañ mı taleb-kâr-ı devâ ikide bir
- 4 Agladursuñ beni cevr ile güler baña rakîb  
Lutf idüp bendeñi aglatma şehâ ikide bir
- 5 Kıldı bî-hod beni keyfiyet-i hüsnüñ sâkî  
Leblerüñ dahi sunar bâde baña ikide bir

45a

- 6 Genc-i hüsne el uzadur katı küstâh olmuş  
Başın ortaya kor ol zülf-i dü-tâ ikide bir
- 7 Sıdk ile Hakk’a teveccüh idicek cân u dile  
Ey Sehâbî irişür feyz-i Hudâ ikide bir

100

Fe‘ilâtün Fe‘ilâtün Fe‘ilâtün Fe‘ilün

- 1 Ol lebi gonce kaçan nâz ile güftâr eyler  
Deheni gayb rumûzın gülüp izhâr eyler
- 2 Geçinür la‘l-i revân-bahş Mesîhâ ammâ  
Cân bağışlar kimine kimini bîmâr eyler
- 3 Bilmezin kime şikâyet ideyin kim o tabîb  
Beni bîmâr idüp el derdine tîmâr eyler
- 4 ‘Akla râz açdı gönül çekdi belâlar lâ-büd  
Gam çeker gayrı şu kim mahrem-i esrâr eyler
- 5 Nâleñi itme Sehâbî şeb-i hecrinde bülend  
Hwâbdan korkaram ol meh-veşi bîdâr eyler

101

Mef‘ûlü Fâ‘ilâtü Mefâ‘îlü Fâ‘ilün

- 1 ‘İşkuñda dostum baña eglence derddür  
Künc-i belâda hem-nefesüm âh-ı serddür
- 2 Gül-zâr-ı mihnetüñ gül-i sîr-âb u lâlesi  
Bu tâze kanlu dâgum ile rûy-i zerddür
- 3 Mihrüñde yok sebât-ı kadem âfitâbda  
Ey mâh-ı evc-i hüsn o bir herze-gerddür
- 4 Âl ile halk-ı ‘âlemi aldar ‘arûs-ı dehr  
Aldanmayan firîbine ‘âlemde merddür
- 5 Gözüm yaşın Sehâbî gül-âb eyleyen benüm  
Gül-zâr-ı nâz u şîvede bir tâze verddür

45b

102

Mef‘ûlü Fâ‘ilâtü Mefâ‘îlü Fâ‘ilün

- 1 Mecnûn’ı deşte Kûh-ken’i taga saldılar  
Şehr-i belâdan anları ırğa saldılar
- 2 Dâm-ı belâyı zülf-i dil-ârâmdan kurup  
Mürg-ı dili şikâr idüp ol aga saldılar
- 3 Zâhid ki mürğü idi riyâz-ı riyâzetüñ  
Uçmak hevâsın eyledi uçmaga saldılar
- 4 Çeşmümde ‘aks-i hancer-i dil-dârı seyr iden  
Sandı ki bîd bergini ırmaga saldılar

- 5 Baş üzre yir idindi Sehâbî-sıfat şu kim  
Kûyında hâk-veş anı ayaga saldılar

## 103

Mef'ûlü Fâ'ilâtü Mefâ'ilü Fâ'ilün

- 1 Öyküdi lâle 'ârızına taga saldılar  
Lâf urdı gonce agzı ile бага saldılar
- 2 Kıldı rakîb-i rû-siyehe hûblar nazar  
Lâg ile şâh-bâzların zâga saldılar
- 3 Bu eşk-i sürha bakmadılar iltifât idüp  
Yâkût-ı nâbumı kara topraga saldılar
- 46a 4 Bülbul-veş itmesün mi gönül mürğü nâle kim  
Bir gül-'izârdan anı ıraga saldılar
- 5 Yirden götürdi göge çıkardı Sehâbî'yi  
Gördi rakîbler anı ayaga saldılar

## 104

Mef'ûlü Fâ'ilâtü Mefâ'ilü Fâ'ilün

- 1 'Uşşâka bezm-i gamda kaçan bâde virdiler  
Endûh câmını dil-i nâ-şâda virdiler
- 2 Şîrîn visâlinün şekerin Husrev itdi nûş  
Zehr-âb-ı telh-i hecrini Ferhâd'a virdiler
- 3 Gam çekme bâde iç ki harâbât erenleri  
Gam hırmenini bâdeyle bâda virdiler
- 4 Gönlümi kıldı ruhlarına gözleri esîr  
Bir bî-günâhı şol iki cellâda virdiler
- 5 Dîvâne dil edîb-i debistân-ı 'ışk idi  
Ol gün ki Kays u Vâmık'ı üstâda virdiler
- 6 Nakş-ı cihâna itmedi 'ârifler iltifât  
Cân u dili o hüsn-i Hudâ-dâda virdiler
- 7 Vir nâm-ı nîke 'ömr metâ'ın ki ehl-i 'ışk  
Cân nakdini Sehâbî eyü ada virdiler

## 105

Fâ'ilâtün Fâ'ilâtün Fâ'ilâtün Fâ'ilün

- 1 Kankı bî-dil kim visâlinden şehâ mehcûrdur  
Beñzer ol bir cisme kim cân sohbetinden dûrdur
- 46b 2 Mübtelâ-yı mihnet-i hicrân olan dil-hastenün  
Kalb-i mahzûnı nüvîd-i mevt ile mesrûrdur
- 3 Kâmetün üstinde hurşîd-i cemâlün gûyiyâ  
Vâdî-i Eymen dırahtı üzre lâmi' nûrdur

- 4 Âfitâb-ı tal‘atũn olalı çeşmümden nihân  
Rûz-ı rûşen ‘aynuma misl-i şeb-i deycûrdur
- 5 Cânını senden Sehâbî eyleye sanma dirîg  
Yoluña mebzûldür her nesne kim makdûrdur

## 106

Mefâ‘ilün Mefâ‘ilün Mefâ‘ilün Mefâ‘ilün

- 1 Ruhuñda hâl u hattũ fitne vü âşûb-ı ‘âlemdür  
Saña hüsn ü melâhat kişveri şâhum müsellemdür
- 2 Binâ-gûşında mengûşuñdaki rahşende gevher mi  
Ya hod berg-i gül-i terden asılmış ‘ıkd-i şeb-nemdür
- 3 Sanemler gibi şol kim meyl idüp mihrâba baş egmez  
Kaşuñ yanında kadd-i tâ‘ati mihrâb-veş hamdur
- 4 Mey-i sâfide seyr it kâyinâtuñ sûret-i hâlin  
Ki câm-ı bâde-i sâfî dilâ âyîne-i Cem’dür
- 5 Çog olsun çeşm-i pür-hûnumda yaşı merdümüñ zîrâ  
Sehâbî eşküümüñ eytâmına lutfi dem-â-demdür

## 107

Mefâ‘ilün Fe‘ilâtün Mefâ‘ilün Fe‘ilün

47a

- 1 Kapuñdan özge nazar-gâh-ı tâ‘atüm yokdur  
Aña irişmege ammâ bizâ‘atüm yokdur
- 2 Koyup cenâbuñı varmam harîm-i Ka‘be’ye kim  
Sefer seferlemege istitâ‘atüm yokdur
- 3 Gelüp yoluñda şehâ cân fedâlıgum görsüñ  
Beni tasvîr iden kim şecâ‘atüm yokdur
- 4 Fütâde-i der-i mey-hâne[y]em bi-hamdi’llâh  
Ki şeyh-i savma‘a gibi şenâ‘atüm yokdur
- 5 Ne deñlü ‘âsî isem zâhidâ benüm senden  
Cezâ güninde recâ-yı şefâ‘atüm yokdur
- 6 Visâli dilde hayâli gözümde dâim  
Beni görüñ ki bunuñla kanâ‘atüm yokdur
- 7 Sehâbî bir şeh-i hüsnüñ muhibbi bendesiyem  
Benüm zamânede gayra itâ‘atüm yokdur

## 108

Fâ‘ilâtün Fâ‘ilâtün Fâ‘ilâtün Fâ‘ilün

- 1 Müdde‘î yanınca gerçi dil-sitânın gezdürür  
Durmadan ‘ömri geçer bî-çâre cânın gezdürür
- 2 Cân metâ‘ın ‘arz ider durmaz göñül dil-berlere  
Kimse almaz anı miskîn armagânın gezdürür

- 3 Kıl tekellüm mürdeler nutkuñla cân bulsun disem  
Ol Mesîhâ-dem dehânında zebânın gezdürür
- 4 Hurrem ol ‘âşık ki tîg-ı yâr ile oldu şehîd  
Zâglar deşt-i belâda üstüh<sup>w</sup>ânın gezdürür
- 5 Seyr ider kûyın Sehâbî bu dil-i bîmâr ile  
Bir misâfirdür yanınca nâ-tüvânın gezdürür

## 109

Mef’ûlü Mefâ’îlü Mefâ’îlü Fe’ûlün

47b

- 1 Cân okları peykânına cismin hedef eyler  
Dil dürcini ol gevher-i râza sadef eyler
- 2 Yâd-ı dehenüñle dür-i eşkin ider îsâr  
Yok yire gözüm merdümü varın telef eyler
- 3 Her zerreye kim bir nem irer bahr-i kefüñden  
Fi’l-hâl anı ebr-dil ü bahr-i kef eyler
- 4 İnandı şu kim Yûsuf’ın ebnâ-yı zamâna  
Ya’kûb’layın vird-i zebân vâ-esef eyler
- 5 Gûş eyle Sehâbî güher-i nazmını zîrâ  
İhyâ-yı kelâm-ı fusahâ-yı selef eyler

## 110

Fâ’ilâtün Fâ’ilâtün Fâ’ilâtün Fâ’ilün

- 1 Ellere va’d-ile vâ’iz cennetü’l-me’vâ satar  
Rind-i müstagnî behîşt-i nakde istignâ satar
- 2 Çehrem üzre dâne-i eşkümle çeşmüm merdümü  
Rûma gelmiş cevherîdür lü’lü-i lâlâ satar
- 3 Çîn-i zülfinden gelür hindû-yı hatt-ı dil-keşi  
Nakd-i câna müşg-i Çîn ü ‘anber-i sârâ satar
- 4 Şîve bâzârında sevdâyîlere hâl-i lebi  
Gâh şekker ‘arz ider geh habbetü’s-sevdâ satar
- 5 Ey Sehâbî şâha ahvâlümü ‘arz eylesem  
Geh tegâfûl gösterür geh nâz u istignâ satar

## 111

Fe’ilâtün Fe’ilâtün Fe’ilâtün Fe’ilün

48a

- 1 Zâhidâ kalbüñi bâdeyle ferah-nâk idegör  
Jeng-i gamdan gönül âyînesini pâk idegör
- 2 Ben saña savma‘adan gel dimezin mey-kedeye  
Sen eger ‘âkıl iseñ gözüñ aç idrâk [idegör]<sup>79</sup>

<sup>79</sup>Metinde yazılı değildir.



- 3 Ger dilerseñ ki ola verd-i ümîdüñ handân  
Çeşm-i giryân ile yir yüzini nem-nâk idegör
- 4 Yirüñ olsuñ dir iseñ dîde-i erbâb-ı nazar  
Kendüñi ‘ışk tarîkında bugün hâk idegör
- 5 Ol elif-vâr mücerred bu cihân kaydından  
Ey gönül kendüñi tâc-ı ser-i eflâk idegör
- 6 Sûret-i şâhid-i maksûda nazar kıl ya’nî  
Ey Sehâbî gönül âyînesini pâk idegör

## 112

Fâ‘ilâtün Fâ‘ilâtün Fâ‘ilâtün Fâ‘ilün

- 1 Devlet-i dîdârsuz firdevs ü Rıdvândan n’olur  
Rûy-i zîbâsuz temâşâ-yı gül-istândan n’olur
- 2 Sıhhat-i ten isteme hergiz marîz-ı ‘ışk iken  
Ey gönül ger merd iseñ derd iste dermândan n’olur
- 3 Şâh-ı ‘ışka menzil olsun dil evin ma‘mûr kıl  
Anı vîrân eyleyüp ta‘mîr-i eyvândan n’olur
- 4 Mûrg-ı rûha eyle evc-i lâ-mekânı âşiyân  
Var tecerrüd mülkine bu kasr-ı vîrândan n’olur
- 5 Ey Sehâbî çün soñı vîrân olup berbâd imiş  
Milket-i İskender ü taht-ı Süleymân’dan n’olur

## 113

Mefâ‘ilün Mefâ‘ilün Mefâ‘ilün Mefâ‘ilün

48b

- 1 Nazarda sîm-i eşk ü sînem üzre tâze dâgum var  
Şeh-i ‘iklîm-i ‘ışkam sîm ile zerden ferâgum var
- 2 Gehî kûh-i belâdur meskenüm geh vâdî-i mihnet  
Cihânda sanmañuz kim bellü başlu bir yatagum var
- 3 Şeb-i târîkdür hecrüñde gerçi rûz-ı ümmîdüm  
Velî şem‘-i ruhuñ yâdiyle bir rûşen çerâgum var
- 4 Elifler dâgıdır dîdeyle dilde serv ile lâle  
Ne pervâ-yı çemen sensüz ne meyl-i seyr-i bâgum var
- 5 Sehâbî pâdişâh-ı vakt olup Cemşîd’e baş egmez  
Benüm kim gûşe-i mey-hânede elde ayagum var<sup>80</sup>

## 114

Fâ‘ilâtün Fâ‘ilâtün Fâ‘ilâtün Fâ‘ilün

- 1 Öykünür meclisde la‘l-i yâre câmı gördiler  
Sâkîye emr itdiler ol demde anı sürdiler

<sup>80</sup>Bu gazelin 1, 2 ve 5. beyitleri 245 numaralı gazelin aynı numaralı beyitleri ile aynıdır.

- 2 Sûz-ı ‘ışkı rûşen itmiş gâlibâ bezm içre şem‘  
Kim götürüp bir ayag üstinde boynın vurdılar
- 3 Nice kurtulsun göñül tîr-i belâdan kim yine  
Kaşları ol pür-cefânuñ fitne yayın kurdılar
- 4 Tâ belürdi safha-i haddinde hattından nişân  
Gül-şen içre sünbül ü gül defterini dürdiler
- 5 Râm oldı itmedi rem bizden ol vahşî gazâl  
Müdde‘îler durmadan seg gibi gerçi ürdiler
- 49a 6 Gîtmedi anlar ki râh-ı râstda tanbûr-vâr  
Râh-zenler anlaruñ bir bir kulagın burdılar
- 7 Ey Sehâbî ehl-i ma‘nî itmediler iltifât  
Sûret-i zîbâya çün kim bî-vefâdur gördiler

## 115

Mef‘ûlü Fâ‘ilâtü Mefâ‘ilü Fâ‘ilün

- 1 Kûyında gerçi kâse-i ser pâ-y-mâldür  
Şâdam hele ki itleri içün sıfâldür
- 2 Hüsnuñle mihr eyleyeli da‘vî-i kemâl  
Ser-geşte-i kûsûf u karîn-i zevâldür
- 3 Ben ideyin cefâña tahammül saña begüm  
İnsâf vire kim bile Hak ihtimâldür
- 4 Sanma cihânda kurtula kayd-ı melâlden  
Ey h<sup>w</sup>âce kim ki beste-i mâl ü menâldür
- 5 Rif‘atde gördi kendüyi eksildi kadr-i bedr  
Noksân viren kişiye gurûr-ı kemâldür
- 6 Şi‘rüm Sehâbî ‘ışk ile hâlüm beyân ider  
Erbâb-ı ‘ışka her gazelüm hasb-i hâldür

## 116

Fâ‘ilâtün Fâ‘ilâtün Fâ‘ilâtün Fâ‘ilün

- 1 Bâde-peymâ ‘âşıkam ser-menzilüm mey-hânedür  
Kanlu yaşum lâle-gûn mey gözlerüm peymânedür
- 2 Yiridür ârâm kılma kalb-i sad-çâkümde ‘ışk  
Kim mekân-ı genc ekser gûşe-i vîrânedür
- 49b 3 Kûy-ı Leylâ’yı koyup sahrâda vahş u tayr ile  
Vardı ülfet bagladı Mecnûn ‘aceb dîvânedür
- 4 Mahrem olmaz ‘akl-ı nâ-mahrem harîm-i ‘ışkda  
Âşinâ kılma tasavvur anı kim bî-gânedür
- 5 Ey Sehâbî sînem içre besledüm dil mürğünü  
Dâne-i eşkümle kim hem âbdur hem dânedür

## 117

Mef'ûlû Fâ'ilâtü Mefâ'ilü Fâ'ilün

- 1 Sabr it cefâ-yı yâre ki şart-ı vefâ budur  
Cân ile derdin iste ki 'ayn-ı devâ budur
- 2 Dil mübtelâ-yı derddür ammâ belâ degül  
Dil-dâr hâl-i zârumı sormaz belâ budur
- 3 Olsa ciger kebâbı ta'âmum 'aceb degül  
Bîmâr-ı 'ışk olana cânâ gıdâ budur
- 4 'Aynumda kaşı 'aksini zâhid nezâre kıl  
Cân kıblesini görmege kible-nümâ budur
- 5 Sorma Sehâbî'nün gam ile mâ-cerâsını  
Gör yaşını gamuñla geçen mâ-cerâ budur

## 118

Fâ'ilâtün Fâ'ilâtün Fâ'ilâtün Fâ'ilün

- 1 Câm-ı la'l-i yârsuz bir rind kim sâgar çeker  
Kan yudar mihnetle evvel soñra derd-i ser çeker
- 2 Dil ki her dem nûş ider hûn-âbe-i derd ü gamı  
Rind-i dürd-âşâma beñzer kim mey-i ahmer çeker
- 50a 3 İçerüz câm-ı leb-â-leb la'l-i dil-ber yâdına  
Zâhid-i leb-teşne hasretle gam-ı Kevser çeker
- 4 Serv beñzer kadd-i yâre öykünürmiş kim aña  
Hârdan gül nîze sûsenden çemen hancer [çeker]<sup>81</sup>
- 5 Cünd-i hattın cem' kılmış hüsn-i dil-ber gâlibâ  
Rûm sultânı diyâr-ı maşrıka 'asker çeker
- 6 Tîg-ı gayretle keser başın zebânın kat' idüp  
Hâme-veş anuñ ki sevdâ-yı hatından ser çeker
- 7 Dil Sehâbî ma'rifet bahrinde bir gavvâsdur  
Silk-i nazma dem-be-dem andan dür ü gevher çeker

## 119

Mefâ'ilün Mefâ'ilün Mefâ'ilün Mefâ'ilün

- 1 Egerçi ehl-i ma'nî sûretâ ey dil gedâlardur  
Yakîn bil kim hakikat 'âleminde pâdişâlardur
- 2 'Aceb mi olsalar vâsıl sadev-veş dürr-i maksûda  
Şu 'ârifler ki bahr-i ma'rifetde âşinâlardur
- 3 Harâbât ehline zinhâr inkâr itme ey zâhid  
Ki mest-i bâde-i vahdet riyâsuz pârsâlardur
- 4 Zekât-ı hüsn için şâhum nazar kıl hâl-i 'uşşâka  
Ki şehriñde garîb ü nâ-tüvân ü bî-nevâlardur

<sup>81</sup>Metinde yazılı değildir.

- 5 Sehâbî gül gibi eş'âruña agyâr ta'n itse  
Ta'accüb itme zîrâ hâr-ı cehle mübtelâlardur

120

Mef'ûlü Fâ'ilâtü Mefâ'ilü Fâ'ilün

50b

- 1 Ten zulmetinde cân leb-i cânân dirisidür  
Ol zinde âb-ı Çeşme-i Hayvân dirisidür
- 2 Sıhhat viren marîz-ı gama derd-i yârdur  
Sanma tabîb anı ki dermân dirisidür
- 3 Eşkümle buldı neşv ü nemâ 'ârızuñda hat  
Zîrâ ki sebze bâgda bârân dirisidür
- 4 Peykânun ile dil dirilür tende kim sadev  
'Ummân içinde katre-i nîsân dirisidür
- 5 Cân virse ger Sehâbî lebûñsüz 'aceb degül  
Rûh-ı revânum âdem olan cân dirisidür

121

Mef'ûlü Fâ'ilâtü Mefâ'ilü Fâ'ilün

- 1 Açdı harîm-i bâgda güllerle lâleler  
Vasf-ı ruhuñda her biri rengîn risâleler
- 2 Câm-ı lebûñ firâkiyile sahn-ı bâgda  
Toldurdu lâle hûn-ı cigerden piyâleler
- 3 Gül 'âlemine gül-şene tahsîl-i mâl için  
Şâh-ı bahâr bâd ile saldı havâleler
- 4 Her kime kim piyâleyi râhat içürdi devr  
Ardınca zehr-i kahr ile sundı nevâleler
- 5 Tende Sehâbî cân gibi saklardı göñlini  
Âl ile aldılar bir alay gözi alalar

122

Fâ'ilâtün Fâ'ilâtün Fâ'ilâtün Fâ'ilün

51a

- 1 Dâr-ı dünyâ gerçi ey dil sûretâ âbâddur  
İ'tibâr itme aña kim soñı anuñ bâddur
- 2 Çerh-i bî-mihr ile mihr-i çerhe aldanma sakın  
Mihr ise bir bî-vefâ çerh ise bî-bünyâddur
- 3 Cûy-ı şîrîn sanma ey dil Bî-sütûn dâğında kim  
Reh-güzâr-ı seyl-i âb-ı dîde-i Ferhâd'dur
- 4 Hem-demüm yok âhdan gayrı şeb-i endûhda  
'Âşıkâ gam gicesi feryâd-res feryâddur
- 5 Kaçmazuz ger müdde'î atsa melâmet taşını  
Kim bizüm vîrânemüz ol seng ile âbâddur

- 6 Kadd-i ‘âşık kim olupdur zîr-i bâr-ı gamda ham  
Serv-i bâg-ı ‘ışkdur her kayddan âzâddur
- 7 Yad olalıdan Sehâbî bezm-i hâs-ı yârdan  
Hwîşden bî-gâne olmuş âşinâdan yaddur

123

Fâ‘ilâtün Fâ‘ilâtün Fâ‘ilâtün Fâ‘ilün

- 1 Hâne-i cismüñ esâsı gerçi bî-bünyâddur  
Ol binâ seng-i cefâ vü cevır ile âbâddur
- 2 Zâhidâ mey-hânedür var ise râhat me’meni  
Kim esâs-ı savma’a pür-havf u bî-bünyâddur
- 3 Hûn-ı ‘uşşâkı döker yârüñ dem-â-dem gamzesi  
Ey gönül baş koşma anuñla ki bir cellâddur
- 4 Kalmadı bir mürğ-ı dil ‘âlemde kim sayd itmedi  
Ol güzeller şâhınuñ çeşmi ‘aceb sayyâddur
- 5 İtmese mahbûb u mey terkin Sehâbî zâhidâ  
Anı ta’yîb eyleme zîrâ aña mu’tâddur

51b

124

Fâ‘ilâtün Fâ‘ilâtün Fâ‘ilâtün Fâ‘ilün

- 1 Söyledükçe dür dışın ol pâk gevher gösterür  
Dürc-i yâkût içre gûyâ lü’lü-i ter gösterür
- 2 Hüsn-i yâri nice seyr idem ki bakdukça baña  
Gamzesi tîr-i belâ ebrûsı hancer gösterür
- 3 Âfitâbum itse benden yüzini bir kez nihân  
Kevkeb-efşân gözlerüm biñ dürlü ahter gösterür
- 4 ‘Arz ider hûn-âbe-i dil dîde gûyâ mey-fürûş  
Halka şîşeyle şarâb-ı sâf-ı ahmer gösterür
- 5 Yudmasun mı hûn-ı dil ‘âşık ki bezm-i vaslda  
Mey sunar dil-dâr gayra aña sâgar gösterür
- 6 Kendinüñ eksüklüğün beñzer ki bilmez mâh-ı bedr  
Kim özin ol âfitâb ile ber-â-ber gösterür
- 7 Vâsf-ı zülf-i yârda şî‘rûñ Sehâbî sihrdür  
Dîde-i a’dâya her harfın bir ejder gösterür

125

Fâ‘ilâtün Fâ‘ilâtün Fâ‘ilâtün Fâ‘ilün

- 1 Hecr ise virmez amân ‘ömr ise isti‘câl ider  
Ol gözi hûnî beni öldürmede ihmâl ider
- 2 Ey sabâ hâküm ilet bir yola kim ol şeh-süvâr  
Hûn-ı ‘uşşâkı döküp hâk-i rehe pâ-mâl ider

52a

- 3 Sen kebûter şâd u fârig-bâl seyrân eyle kim  
Yâre cân mürgıyla göñlüm nâmesin irsâl ider
- 4 Ehl-i hâli kılssa ger âşüfte zülfüñ vechi var  
Bilmezin hâlüñ neden diller perîşân-hâl ider
- 5 Dîde levh-i sîneme her dem döker yaşıdan rakam  
Nokta-i hâl-i lebüñ âhır beni remmâl ider
- 6 Her hadeng-i gam ki kavs-i çerhden bulur küşâd  
Karşular göñlüm Sehâbî anı istikbâl ider

126

Fâ'ilâtün Fâ'ilâtün Fâ'ilâtün Fâ'ilün

- 1 Ruhları üstinde ebrû-yı hilâl-âsâyı gör  
Müşg-i terden safha-i hüsnindeki tigrâyı gör
- 2 Görmedüñse mihr-i tâbân üzre ger müşgîn-sehâb  
'Ârız-ı dil-berde ey dil zülf-i 'anber-sâyı gör
- 3 Gözle nahl-i kâmet-i yâr üzre fettân gözlerin  
Bir nihâl üstinde iki nergis-i şehlâyı gör
- 4 Gevher-i maksûd kim oldu nazardan nâ-bedîd  
Dîde gözler sen dahi ey eşk var arayı gör
- 5 Zâhidâ mey-hâneye bir kez güzer kıl dünyede  
Hûrî seyr it bak kusûra cennetü'l-me'vâyı gör
- 6 'Âşık u ma'sûk remzin aña seyr it bezmde  
Hâl-i pervâneyle sûz-ı şem'-i bezm-ârâyı gör
- 7 Cân nisâr eyler Sehâbî yolına bakmaz geçer  
Ol şeh-i hûbâna bak bu nâz u istignâyı gör

127

Mefâ'ilün Mefâ'ilün Mefâ'ilün Mefâ'ilün

52b

- 1 Elif kaddüm ham iden ya gibi kaşuñ kemânıdur  
Degül sînemde dâgum nâvek-i gamzen nişânıdur
- 2 Gelüp ihyâ ider gitdükçe bî-cân cism-i 'uşşâkı  
Hadengüñ ey kaşı ya 'âşikuñ rûh-ı revânıdur
- 3 Dile pervâz idüp gelse 'aceb mi tîr-i gam her dem  
Ki bu vîrâne bûm u derd ü mihnet âşiyânıdur
- 4 Sararmış beñzi âh-ı serd idüp gözden akar yaşı  
Rakîbüñ nev-bahâr-ı 'ömrinüñ vakt-i hazânıdur
- 5 Sehâbî şi'rini 'arz itse hâk-i pâyiñe şâhum  
Kabûl it anı zîrâ 'âlem-i gayb armağanıdur

128

Mefâ'ilün Mefâ'ilün Mefâ'ilün Mefâ'ilün

- 1 Senüñ peykân-ı tîr-i nâveküñ cismümde cânumdur  
Hadengüñ ey kemân-ebrû benüm rûh-ı revânumdur
- 2 Dü-tâ kaddümle âhumdan rakîbâ kıl hazer kim ben  
Şikâr-endâz-ı ‘ışkam ol benüm tîr ü kemânumdur
- 3 Binâ-yı bî-bekâ-yı dehre göñlüm ola mı mâyl  
Benüm kim fakr mülkinde fenâ kasrı mekânumdur
- 4 ‘Acebdür ger vücûdumdan ecel dahi nişân bulsa  
Ki ‘âlemde ‘adem didükleri nâm u nişânumdur
- 5 Sehâbî beñzedürsem hancer-i şâha ‘aceb sanma  
Fesâhat mülkini teshîr iden tîg-ı zebânumdur

## 129

Mef’ûlû Fâ’ilâtü Mefâ’ilü Fâ’ilün

53a

- 1 Giryeyle yir yüzün tolu seyyâre kıldılar  
Anlar ki hâl-i zâruma nezzâre kıldılar
- 2 Sen mâh olalı felek-i hüsne ey perî  
Kaddüm hilâl ü eşkümi seyyâre kıldılar
- 3 Tîr-i cefâyı sîneme gönderdi hûblar  
Derdüm bilüp terahhum idüp çâre kıldılar
- 4 Göñlüm benümle yâr idi ‘âlemde âh kim  
Anı dahi benüm gibi âvâre kıldılar
- 5 Mutrib Sehâbî şî’rini gûyâ okudı kim  
Bezm ehli gül gibi yakalar pâre kıldılar

## 130

Mefâ’ilün Mefâ’ilün Mefâ’ilün Mefâ’ilün

- 1 Görinen fark-ı Mecnûn üzre sanma berk-i âhıdır  
Şeh-i mülk-i gam olmuş başda ol zerrîn külâhıdır
- 2 Hilâl-i ‘ıyd-veş zâr olmadan evc-i mahabbetde  
Murâdı Vâmık-ı âşüftenüñ ‘Azrâ nigâhıdır
- 3 Bulınmaz yir hayâl-i gayra çeşmüm çeşme-sârında  
Ki bu ser-çeşme şimdi bir perînüñ halvet-gâhıdır<sup>82</sup>
- 4 Meh-i ruhsârını pinhân iden agyâr çeşminden  
Degül zülf-i siyâhı ehl-i ‘ışkuñ dûd-ı âhıdır
- 5 Sevâd-ı a‘zam-ı ehl-i hakîkatdür dil-i ‘ârif  
Buña inkâr iden sûfî tarîkat rû-siyâhıdır
- 6 Dür-i dendân ile la’l-i leb-i yâr ârzûsından  
Dökerler çehrem üzre gözlerüm geh la’l gâhî dür
- 7 Halâs itdi kılıcı cânımı kayd-ı vücûdumdan  
Zebân-ı hâl ile yârüm Sehâbî ‘özü-h<sup>w</sup>âhîdür

<sup>82</sup>Metinde “halvet” şeklinde yazılmıştır.

## 131

Mef'ûlû Fâ'ilâtü Mefâ'ilü Fâ'ilün

53b

- 1 Kaddüñ riyâz-ı nâzda bir nahl-i mîvedür  
Kim bergi nâzdur güzelüm bârı şîvedür
- 2 Her kişi kendüyi zen-i dünyâya er sanur  
Bu turfe-hâldür ki o mekkâre bîvedür
- 3 Ten tagın aşmayan varamaz 'ışk mülkine  
Zîrâ ki ten bu yolda hatarlu girîvedür
- 4 Râh-ı talebde gûşîş-i perrân ne fâyide  
Keyhusrev'üñ çü hâtırınıñ meyli Gîv'edür
- 5 'Âr eyleme Sehâbî ile ihtilâtdan  
Anı şehâ rakîb-sıfat sanma lîvedür

## 132

Mefâ'ilün Mefâ'ilün Mefâ'ilün Mefâ'ilün

54a

- 1 Füsûn-ı 'ışkumı halk-ı cihân efsânedür dirler  
Perî-veşler beni mecnûn sanup dîvânedür dirler
- 2 Mahabbet nakdini âşüfte-dillerden taleb kıl kim  
Mekân-ı genc ekser gûşe-i vîrânedür dirler
- 3 Hümâ-yı 'ışk seyr itmez fezâ-yı zühd ü takvâda  
Anuñ pervâz-gâhı sâhat-i mey-hânedür dirler
- 4 Görenler sûziş-i şem'-i şeb-efrûzı nedendür kim  
Tutuşup âteş-i 'ışka yanan pervânedür dirler
- 5 Sehâbî mürğ-ı rûhı sayd ider sayyâddur gerdûn  
Nücûm ü keh-keşânı anda dâm u dânedür dirler

## 133

Fâ'ilâtün Fâ'ilâtün Fâ'ilâtün Fâ'ilün

- 1 Ol sehî-kad kim elif-veş hasreti cânumdadur  
Cilve-gâhı cûy-bâr-ı çeşm-i giryânumdadur
- 2 Göñlümüñ ebvâb-ı rahmetdür açılmış üstine  
Çâkler kim hancerinden cism-i 'uryânumdadur
- 3 Sîneme gönderdi tîrin geldi ârâm itmedi  
Geçdi göñlümünden velîkin acısı cânumdadur
- 4 Bagladum Ya'kûb-veş 'ışkuñla ülfet şöyle kim  
Yûsuf'um gûyâ benümle beytû'l-ahzân'umdadur
- 5 Bir münevver dîdedür gözler visâl eyyâmını  
Her şerer kim şâm-ı gamda âh-ı sûzânumdadur
- 6 Ey Sehâbî mahzen-i genc-i me'ânîdür gönül  
Bil ki miftâhı kefi şâh-ı sühan-dânumdadur



## 134

Mefâ'ilün Fe'ilâtün Mefâ'ilün Fe'ilün

54b

- 1 Kemend-i âh ile dil kasr-ı dilsitâna çıkar  
O nerdübân ile dîvâne âsumâna çıkar
- 2 Tıbâk-ı çerhe şeb-i gamda za'f ile nâlem  
Çıkar şu resm ile kim tıfl nerdübâna çıkar
- 3 Çü sem'-i yâre mekânında irmedi âhum  
Baña ne fâyide andan ki lâ-mekâna çıkar
- 4 Zebân degül dehenümden 'ıyân ki şu'le-i şevk  
Yakar vücûdumı ol rahnedden zebâne çıkar
- 5 Sehâbî seyr idelüm bûstânı ol sâ'at  
Ki tıfl-ı gonce-i nev-reste gül-sitâna çıkar

## 135

Mefâ'ilün Fe'ilâtün Mefâ'ilün Fe'ilün

- 1 Rakîb gelse kenârumdan ol nigâr gider  
Hazân bürûdeti irişse nev-bahâr gider
- 2 Sipâh-ı sabr u karâr ile varsa kûyına dil  
Sipâh-ı sabr perîşân olur karâr gider
- 3 Sunulsa mey baña zâhid içerssem eyleme 'ayb  
Ayag gelse ele elden ihtiyâr gider
- 4 Akar yaşı gözümüñ cân revân olur tenden  
O demde kim nazarumdan o gül-'izâr gider
- 5 İkâmet itme cihân gül-şeninde kim her dem  
Sehâbî anda hezârân gelür hezâr gider

## 136

Fâ'ilâtün Fâ'ilâtün Fâ'ilâtün Fâ'ilün

55a

- 1 Dil katı mesrûrdur beñzer yine cânân gelür  
Hâne-i merdüm-nişîn çeşmüme mihmân gelür
- 2 Kalbe 'ışk itdi 'azîmet gitdi andan sabr u hûş  
Kıldılar hâlî sarâyı gördiler sultân gelür
- 3 Seyr-i gül-şenden ne hâsıl rûy-i zîbâ olmasa  
Bâg-ı cennet 'âşıkâ dîdârsuz zindân gelür
- 4 'İşk yolında baña ey Hızır hem-râh olma kim  
Terk-i cân itmek saña müşkil baña âsân gelür
- 5 Ey Sehâbî derd haylinden melâlet çekme kim  
Vâris-i mülk-i Süleymân 'Îsî-i devrân gelür

## 137

Mefâ'ilün Fe'ilâtün Mefâ'ilün Fe'ilün

- 1 Yitişdi bâd-ı sabâ dehre virdi bûy-i bahâr  
Ziyâde oldu gönüllerde ârzû-yı bahâr
- 2 Meşâm-ı cân-ı cihânı mu‘attar itdi yine  
Nesîm-i gâliye-âmîz [ü] müşg-i bûy-i bahâr
- 3 Dürüldi defter-i dey kondı künc-i nisyâna  
‘Anâdil ideli âgâz-ı güft ü gûy-ı bahâr
- 4 Şükûfe-i gül ü lâleyle seyr kıl ki yine  
Derildi bâga civânân-ı sâde-rûy-i bahâr
- 5 ‘Adem riyâzına pervâz kıldı mürg-ı şitâ  
Sehâbî sem‘ine irişdi hây u hûy-ı bahâr

## 138

Mefâ‘îlün Mefâ‘îlün Mefâ‘îlün Mefâ‘îlün

- 1 Beni zillet türâbında koyan serv-i revânumdur  
Vücûdum gark iden kana nihâl-i erguvânumdur
- 2 Bükülse kâmetüm dâl olsa sanma pîrlikden<sup>83</sup> kim  
Ham iden ya gibi anı büt-i ebrû-kemânumdur
- 55b 3 Civân u pîrden kim taht-ı fermânundadır ‘ışkuñ  
Birisi ‘akl-ı pîrûmdür biri baht-ı civânumdur
- 4 Senüñ gül-gûn olup çehreñ benüm zerd oldu ruhsârüm  
Senüñ fasl-ı bahâruñdur benüm vakt-i hazânumdur
- 5 Cünûn erbâbı añmazlar hadîs-i Kays-ı mecnûnı  
Sehâbî söylenen dillerde şimdi dâstânumdur

## 139

Fe‘ilâtün Fe‘ilâtün Fe‘ilâtün Fe‘ilün

- 1 Sanma kim sûret ile yâr Mesîhâ-demdür  
Rûhdur sûret ü ma‘nîde Mesîh âdemdür
- 2 Dir gören hokka-i la‘l içre dür-i dendânın  
Sadef-i goncede pinhân güher-i şeb-nemdür
- 3 Dîde vü dil ola mı mâhuma menzil heyhât  
Dil tolu âteş-i gam dîde ise pür-nemdür
- 4 Bâde ten hânesini virse ne gam seyl-âba  
Sînede ‘ışk esâsı katı müstahkemdür
- 5 Añmazuz nâm-ı hilâli göricek ebrûsın  
Ey Sehâbî bilürüz kadr-i meh-i nev kemdür

## 140

Mef‘ûlü Fâ‘ilâtü Mefâ‘îlü Fâ‘ilün

<sup>83</sup>Metinde ‘pîrlikden’ şeklindedir.

56a

- 1 Hüsni'n şeb-i firâkda subh-ı necâtdur  
Gîsûlaru'n nümûne-i Kadr u Berâtdur
- 2 Rûşen-fürûg lem'a-i mihrüñledür senüñ  
Ger hân-kâh-ı şeyh u eger Sûmnât'dur
- 3 Tîguñ şehîd-i 'ıřka bağıřlar hayât-ı nev  
Oldı 'ıyân ki 'ayn-ı zülâl-i hayâtdur
- 4 Kor zülf-i yâri turre-i havrâyı vasf ider  
Vâ'iz fesânesi ne 'aceb türrehâtdur
- 5 Sürme bisât-ı 'ıřka feres kim bu 'arsada  
Ferzâne-i yegâne olan şâh mâtdur
- 6 Dil zâtınuñ sıfâtına vâkıf degül hîred  
Kim mazhar-ı tecellî-i zât u sıfâtdur
- 7 Şi'rüm Sehâbî vird-i zebân olsa vechi var  
Zîrâ füsûn-ı sihr degül vâridâtdur

141

Fâ'ilâtün Fâ'ilâtün Fâ'ilâtün Fâ'ilün

- 1 Dil-hırâşın sînem üzre yârelerden bildiler  
Bagrumuñ kan oldugın bu çeşm-i terden bildiler
- 2 Dilde pinhân itdügüm 'ıřkı gözi câdûlara  
Âşikârâ itmeyem dirdüm nazardan bildiler
- 3 Kûyını giryân tavâf itdüm nihân agyârdan  
Anda çeşmümden akan hûn-ı ciğerden bildiler
- 4 Bilmedi mûy-i miyânuñ remzini vehm ü hayâl  
Hallini ol 'ukdenüñ 'akd-i kemerden bildiler
- 5 Çekdügüm derdi firâkuñ gicesi bîdârlar  
Nâle-i şeb-gîr ile âh-ı seherden bildiler
- 6 Ey Sehâbî zâhid-i huřk añlamışdı il beni  
Şimdi lutf-ı tab'umı bu şi'r-i terden bildiler

142

Fâ'ilâtün Fâ'ilâtün Fâ'ilâtün Fâ'ilün

56b

- 1 Eřk-i agyârı görenler sîm-i bî-gıř sandılar  
Vech-i 'uřřâkı zer-i magşûř [u] rû-keř sandılar
- 2 Şu'le-i dil kûy-ı yâr etrâfın aldı şöyle kim  
Mâhımuñ egnindeki dîbâyı zer-keř sandılar
- 3 Çerha âhum dün gice bir vech ile çekdi 'alem  
Kim yakar âfâkı ser-tâ-ser bu âteř sandılar
- 4 Pâre kıldı dil mahabbet-nâmesin mahbûblar  
Bilmeyüp mazmûnını anı müşevveř sandılar
- 5 Şöyle deng oldı Sehâbî bengden sûfî ki halk  
Muhtesib gibi görüp anı da serhoř sandılar

143

Mef'ûlû Fâ'ilâtü Mefâ'ilü Fâ'ilün

- 1 Râh-ı gamuñda ey gül-i ra'nâ şükûfe-vâr  
Oldı sefid hasret ile çeşm-i intizâr
- 2 Eyler nezâre çeşm-i şehîdân-ı 'ışkdur  
Sahrâda lâle kim görünür mevsim-i bahâr
- 3 Mecnû'a-i güle nazar it bezm-i bâga gel  
Rengîn gazeller ile işit nagme-i hezâr
- 4 Mir'ât-ı âba her yaña nezzâre itmege  
Gül-çihrelerle doldı yine tarf-ı cûy-bâr
- 5 Zânû-yı gamdadur başı miskîn benefşenüñ  
Olmuş benüm gibi gam-ı zülfüñde sûgvâr
- 57a 6 Dâg-ı siyâh sanma derûnında lâlenüñ  
Olmuş şafakda kevkeb-i bahtumdur âşikâr
- 7 Bâga seher sabâ gelicek kıldı yolına  
Ebr ü gül ü şükûfe dür ü sîm ü zer nisâr
- 8 Virdi meger nüvîd ki 'azm itdi gül-şene  
Mîhr-i sipîhr-i devlet ü dîn zıll-i Kirdigâr
- 9 Sultân-ı Rûm u şâh-ı 'Acem ser-ver-i 'Arab  
Fermân-dih-i mülûk ü selâtîn-i rûzgâr
- 10 Olmuş Sehâbî şâm u seher sahn-ı bâgda  
Vird-i zebân-ı fâhte vü nagme-i hezâr
- 11 Olsun müdâm gül-bün-i ikbâl ü devleti  
Handân u sebz ü tâze vü sîr-âb ber-karâr

144

Mefâ'ilün Mefâ'ilün Fe'ûlün

- 1 Diyâr-ı hüsne hattüñ çekdi 'asker  
Melâhat kişverin kıldı müsahhar
- 2 Sipîhr ü seb'a-i seyyâre gibi  
Saña oldı müsahhar heft kişver
- 3 'Îtâbuñ cân-sitân lutfuñ revân-bahş  
'Îzâruñ dil-rübâ gamzeñ dil-âver
- 4 Kadüñ Tûbâ cemâlüñ bâg-ı Rıdvân  
Lebüñ Kevser kelâmuñ âb-ı Kevser
- 5 Letâfetde dehânuñ çeşme-i nûş  
Tekellümde lebüñ şehd-i mükerrer
- 57b 6 Ne semte kim kılur râyüñ teveccüh  
Se'âdet reh-berüñdür baht yâver
- 7 Teninden başı dür olsun Sehâbî  
Rikâbından şu kim dür olmak ister

145

Mefâ'ilün Fe'ilâtün Mefâ'ilün Fe'ilün

- 1 Dem ola mı ki 'anâdil terennüm eyleyeler  
Harîm-i bâgda güller tebessüm eyleyeler
- 2 Zebân-ı hâl ile hayl-i şükûfe şâh-ı güle  
Cefâ-yı cünd-i şitâdan tazallüm eyleyeler
- 3 Bahâr mu'cize izhâr kılrsa 'Îsî-vâr  
Bizümle gonce-dehenler tekellüm eyleyeler
- 4 Derilse mecma' idüp bir yire perî-veşler  
Rakîbi dîv-sıfat aradan güm eyleyeler
- 5 Sehâbî berd-i deyi def' iderdi âteş-i mey  
Bolay ki mey-kede ehli terahhum eyleyeler

146

Mefâ'ilün Mefâ'ilün Mefâ'ilün Mefâ'ilün

- 1 Gam-ı hicrân-ı yâri haste-i hicrân olandan sor  
Şitânuñ şiddet-i keyfiyyetin 'uryân olandan sor
- 2 Ten-i hâkümle hâl-i bâd-ı âhı gird-bâd-âsâ  
Belâ deşinde Mecnûn-vâr ser-gerdân olandan sor
- 3 Hayâl-i nergisüñle mâ-cerâ-yı çeşm-i bîdârı  
Ser-i kûyuñda her şeb-tâ-seher giryân olandan sor
- 4 Gubâr-ı hatt u zülfüñle benüm keyfiyyet-i hâlüm  
Göñül didükleri âşüfte vü hayrân olandan sor
- 5 Hakîkat gevheri mâhiyyetin ger bilmek isterseñ  
Sehâbî cûy-bâr-ı dîdesi 'ummân olandan sor

58a

HARFU'Z-ZÂ'

147

Mefâ'ilün Mefâ'ilün Mefâ'ilün Mefâ'ilün

- 1 Cünûnum mübtelâ-yı zülf-i cânân olmayan bilmez  
Perîşân-hâturuñ hâlin perîşân olmayan bilmez
- 2 Ne bilür müdde'î kapuñda hıdmet resmini kıblem  
Tarîk-ı hacc-ı İslâmı müselmân olmayan bilmez
- 3 Lebûñsüz gül gibi nûş itdügüm hûn-âbeyi her dem  
Derûnı gonce-veş endûh ile kan olmayan bilmez
- 4 Taleb deşinde ehl-i derd hâlin gird-bâd-âsâ  
Dilâ ser-geşte-i kûh u beyâbân olmayan bilmez
- 5 Vefâ erbâbına eyler cefâ ol bî-vefâ zîrâ  
Ki rahmet çâşnîsin ehl-i 'isyân olmayan bilmez

- 6 Mahabbet tekyesinde dostum abdâllık resmin  
Libâs-ı ‘âfiyetden cismi ‘uryân olmayan bilmez
- 7 Sehâbî kadr-i subh-ı dil-güşâ-yı vasl-ı cânânı  
Giriftâr-ı belâ-yı şâm-ı hicrân olmayan bilmez

148

Mef’ûlü Mefâ’îlün Mef’ûlü Mefâ’îlün

- 1 ‘Uşşâka neden sâkî bu lutf-ı ‘itâb-âmîz  
Keyfiyyet igen virmez mey kim ola âb-âmîz
- 2 Gül-berg-i terüñ meyden gark-ı ‘arak oldukça  
Olur leb-i şîrînüñ cüllâb-ı gül-âb-âmîz
- 3 Pejmürde tenüm cânâ bulurdı hayât-ı nev  
Cür‘añla eger hâküm olsa mey-i nâb-âmîz
- 4 Cân u ten ile gönüm yâre nice irsün kim  
Cân ise gubâr-âlûd cism ise türâb-âmîz
- 5 Nakl itdi Sehâbî’nüñ cânı ten-i zârından  
Nukl-i leb-i dil-dârı tâ gördi şarâb-âmîz

149

Fâ’îlâtün Fâ’îlâtün Fâ’îlâtün Fâ’îlün

- 1 Sanma hâlîdür künûz-ı ma‘rifetden sînemüz  
Gevher-i esrâr ile pürdür bizüm gencînemüz
- 2 Biz saña ‘arz-ı mahabbet ideli agyâra hem  
Sînemüzde kalmayupdur zerre deñlü kînemüz
- 3 Dün bize lutfuñ görüp çok derd-i ser virdi rakîb  
Bâ’is-i renc-i humâr oldı mey-i dûşînemüz
- 4 Salsa hüsnüñ kalbüme pertev ‘aceb mi dostum  
Saykal-ı mihrüñle sâf olmışdurur âyînemüz
- 5 Geymedük zâhid Sehabî-veş melâmet hil‘atin  
Bâdeye rehn olmayınca hırka-i peşmînemüz

150

Fâ’îlâtün Fâ’îlâtün Fâ’îlâtün Fâ’îlün

- 1 Olalı deyr-i mugân sûfî ‘ibâdet-gâhumuz  
Deyr pîri şeyhümüzdür hem şefâ‘ât-h<sup>w</sup>âhumuz
- 2 Zînhâr ey dil ‘ubûdiyyetde taksîr itme kim  
Bende-perverdür bizüm minnet Hudâ’ya şâhumuz
- 3 Âsitân-ı yârdan kim evc-i ‘izzetdür bizi  
Yire çalma ey felek kim yirde kalmaz âhumuz
- 4 Bizden evvel gitdi ‘âşıklar bakâ iklîmine  
Biz fenâ deşinde kalduk kalmadı hem-râhumuz

- 5 Öpmek ister hâk-i der-gâhuñ Sehâbî rûz u şeb  
Budur ey şâh-ı kerem kapuñda ‘şey li’lîlâh’umuz<sup>84</sup>

## 151

Mef’ûlü Fâ’ilâtü Mefâ’ilü Fâ’ilün

- 1 Benden firâk gicesi ahhâb ider gürîz  
Bilmem şeb-i firâk mı yâ rûz-ı rûste-hîz
- 2 Âh idemem firâkda korkum bu nâ-gehân  
Eflâki yaka odlara bu âh-ı germ-hîz
- 3 Hat mı ‘izâr-ı yârda yâ ol sahîfeyi  
Zeyn itdi müşg-i nâb ile bu zülf-i müşg-bîz
- 4 Devr-i ruhuñda aglasam ey mâh itme ‘ayb  
Gül mevsimi ‘aceb mi sehâb olsa katre-rîz
- 5 Dil rûzgâr cevrine mu’tâddur yûri  
Sen eyle rûzgâr ile ey müdde’î sitîz
- 6 Bir zann ider kelâmum ile nazmını hasûd  
Altun ile yanında ber-â-ber gibi peşîz
- 7 Şi’rüm selâsetin göricek eylemezdi kâl  
Ger müdde’îde olsa idi kıl kadar temîz
- 59b 8 Hecrûñde hor görme Sehâbî sirişkini  
Zîrâ ki huşk sâlde bârân olur ‘azîz

## 152

Mefâ’ilün Mefâ’ilün Mefâ’ilün Mefâ’ilün

- 1 Reh-i dil-dârda cân nakdini şol kim nisâr itmez  
Mahabbet âteşinde zer gibi kalbin ‘ayâr itmez
- 2 Var ey bülbül mahabbet resmini pervânededen öğren  
Ki yanar şem’a karşı sırr-ı ‘ışkî âşîkâr itmez
- 3 Kılan âvâre kûyuñdan beni agyâr cevridür  
Kişi öz ihtiyârıyla şehâ terk-i diyâr itmez
- 4 Sabâdan dil nesîm-i vasluñı gûyâ işitmiş kim  
Yeler her cânibe bir yirde bir sâ’at karâr itmez
- 5 Dür-i eşkin kapuñda şöyle bezl itdi Sehâbî kim  
O bezli bâgda bârân ile ebr-i bahâr itmez

## 153

Fâ’ilâtün Fâ’ilâtün Fâ’ilâtün Fâ’ilün

- 1 ‘Âşık-ı sâbit-kadem dil-dârını terk eylemez  
Biñ cefâ vü cevır görse yârini terk eylemez

<sup>84</sup> Allah için bir şey. Doğrusu ‘şey’en li’lîlâh’dır. Şair burada vezin gereği kısaltılarak kullanıyor.

- 2 Bâg-bân-ı dehrden her dem çeker biñ dürlü cevır  
Fâhte serv-i sehî-reftârını terk eylemez
- 3 Gül gerekse istimâ' itsün gerek gûş itmesün  
Bülbül-i âşüfte âh u zârını terk eylemez
- 4 Bağladı zünnâr gönüm küfr-i zülfüñ yâdına  
Kâfir-i 'ışk oldu ol zünnârını terk eylemez
- 60a 5 Dem-be-dem artursa derdüñ ey gönül gam çekme kim  
Ol tabîb-i cân u dil bîmârını terk eylemez
- 6 Vâz gelmem yârdan her nice kim baña rakîb  
Ey Sehâbî cevır idüp âzârını terk eylemez
- 7 İsterem Hak'dan yok olsun bulmasun gamdan necât  
Ol şehüñ yolında her kim varını terk eylemez

## 154

Fe'ilâtün Fe'ilâtün Fe'ilâtün Fe'ilün

- 1 Şem'-veş şu'le-i cân-sûz ile bezm-ârâyuz  
Âteşe varmaga pervâne-i bî-pervâyuz
- 2 Bizi mahkûm u gedâ sanma ki biz<sup>85</sup> ma'nîde  
Hâkim-i mahkeme-i kişver-i istignâyuz
- 3 Telh-kâmuz ne 'aceb huşk-leb olsak zîrâ  
Ma'rifet gevher-i bî-kıymetine deryâyuz
- 4 Bizi ebnâ-yı zamândur diyü zann eyleme kim  
Ümmehâtına cihân kişverinüñ âbâyuz
- 5 Ey Sehâbî bizi ednâ diyü kem bakma ki biz  
Vâkıf-ı sırr-ı "denâ"<sup>86</sup> kâşif-i "ev ednâ"<sup>87</sup>yuz

## 155

Fâ'ilâtün Fâ'ilâtün Fâ'ilâtün Fâ'ilün

- 1 Fikr-i hâl-i yâr ile hoş-hâl olup hurremlerüz  
Cenneti bir dâne içün terk iden âdemlerüz
- 2 Hûn-i dilden gâh pürdür gâh hâlî çeşmümüz  
Şöhret-i câm-ı mey-i gül-güne bâ'is Cem'lerüz
- 60b 3 Sürme nâ-mahrem sanup vâsluñ harîminden bizi  
Halvet-i esrâr-ı "mâ evhâ"<sup>88</sup> biz mahremlerüz

<sup>85</sup>Metinde "bezm" şeklinde yazılıdır, bu durum vezni bozduğu ve beytin anlamı bu şekilde daha tutarlı olacağı düşüncesiyle "biz" olarak okunmuştur.

<sup>86</sup>"Sonra (Muhammed'e) yaklaştı, derken daha da yaklaştı", **Kur'ân**, en-Necm sûresi, 53/8. Burada Hz. Peygamber'in Mi'râc'ından bahsedilmektedir.

<sup>87</sup>"O kadar ki (birleştirilmiş) iki yaya arası kadar, hatta daha da yakın oldu", **Kur'ân**, en-Necm sûresi, 53/9. Burada Hz. Peygamber'in Mi'râc'ından bahsedilmektedir.

<sup>88</sup>"Bunun üzerine Allah, kuluna vahyedeceğini vahyetti", **Kur'ân**, en-Necm sûresi, 53/10. Burada Hz. Peygamber'in Mi'râc'ından bahsedilmektedir.



- 4 Şevk-ı esrâr-ı lebûñle tekye-i tecrîdde  
‘Âlemüñ zevk u sürûrından geçen bî-gamlaruz
- 5 İsteme bizden Sehâbî ‘akl etvârın ki biz  
Vâdî-i hayretde ser-gerdân olan ser-semmlerüz

## 156

Fâ‘ilâtün Fâ‘ilâtün Fâ‘ilâtün Fâ‘ilün

- 1 Subh-ı sâdıkdur fûrûg-ı câm ile her şâmumuz  
‘Ayn-ı mihr-i ‘âlem-ârâ olsa tañ mı câmumuz
- 2 Sâfi-yi vasl olmaz ise derd-i hecre kânî‘üz  
Biz belâ-keş ‘âşıkuz nâ-kâmlıkdur kâmumuz
- 3 Dâne-i eşküm cihânı dutdı ser-tâ-ser velî  
Mürg-ı tâli‘ olmadı bir dem dirîgâ râmumuz
- 4 Cân meşâmın nûkhet-i zülfüñ mu‘attar ideli  
Ey gül-i ra‘nâ sabâ-veş kalmadı ârâmumuz
- 5 Turfe-hâletdür Sehâbî bu ki bezm-i yârda  
Okınur eş‘ârumuz ammâ añılmaz nâmumuz

## 157

Fâ‘ilâtün Fâ‘ilâtün Fâ‘ilâtün Fâ‘ilün

61a

- 1 Yâr mahzûn göñlümi feryâd kim şâd istemez  
Bendesin ol husrev-i bî-dâd âzâd istemez
- 2 Ârzû-yı makdemüñle göñlüm ey genc-i murâd  
Çâr-tâk-ı cismi vîrân ister âbâd istemez
- 3 Gûş iden hüsnüñle göñlüm kıssa-i şîrînini  
Dâstân-ı dil-keş-i Şîrîn ü Ferhâd istemez
- 4 Kıldı sabr u hûşdan hâlî hayâlün göñlümi  
Kişverinde şâh-ı ‘âdil ehl-i bî-dâd istemez
- 5 Çeşmüñi gamzeñle yâr itme Sehâbî katline  
Kim sitem kılmakda ol cellâd imdâd istemez

## 158

Fâ‘ilâtün Fâ‘ilâtün Fâ‘ilâtün Fâ‘ilün

- 1 Şîve vü nâz ile aldı göñlümi bir serv-i nâz  
Kim cefâ vü cevri bî-haddür vefâ vü mihri az
- 2 Kıldı kûteh ‘ârızında zülfünü bildüm yakîn  
Kim kamer devrinde olmaz kimsenüñ ‘ömri dırâz
- 3 İrmesün maksûda göñlüm kıbleden dönsün yüzüm  
Ger idersem Ka‘be-i kûyın koyup ‘azm-i Hicâz
- 4 ‘İşkuma zühhâd vechi var inkâr itseler  
Kim hakîkatdür anı fehm eylemez ehl-i mecâz

- 5 El çeküp âzâde olgıl bûstân-ı dehrden  
Serv-veş ger olmag istersin Sehâbî ser-firâz

## 159

Fâ'ilâtün Fâ'ilâtün Fâ'ilâtün Fâ'ilün

- 1 Sanma kim zâhid gibi genc-i selâmet beklerüz  
Şahne-i şâh-ı gamuz şehr-i melâmet beklerüz
- 2 Subha dek her gice tañ mı eylesek feryâd kim  
Kal'a-i vîrâne-i 'âlemde nevbet beklerüz
- 61b 3 Gözlerüz kûh-ı belâdan kârbân-ı gussayı  
Vâdî-i endûhda der-bend-i mihnet beklerüz
- 4 Saklaruz dil kişverinde mihnet ü derd ü gamı  
Pâdişâh-ı 'âlem-i 'ışkuz velâyet beklerüz
- 5 Ey Sehâbî gice vü gündüz kilâb-ı yâr ile  
Âsitân-ı devlet ü bâb-ı sa'âdet beklerüz

## 160

Fâ'ilâtün Fâ'ilâtün Fâ'ilâtün Fâ'ilün

- 1 'Ârız-ı dil-dârsuz dil seyr-i bûstân istemez  
Tâlib-i dîdâr olan fîrdevs-i Rıdvân istemez
- 2 Gizle zülfün aç yüzün zîrâ Kelîmullâh'dan  
Şol ki nâzırdur Yed-i Beyzâ'ya su'bân istemez
- 3 Âyet-i "fe'l-yedhikû"<sup>89</sup> esrârını fehm eyleyen  
Durmaz aglar kendüyi 'âlemde handân istemez
- 4 Merd-i câhil aldanur dünyâ vü "mâ-fihâ" sına<sup>90</sup>  
Mûr-ı sâhib-ma'rifet mülk-i Süleymân istemez
- 5 Zâhid-i hod-bîn hadîs-i 'ışkı itmez istimâ'  
Dîve beñzer fi'l-mesel k'âvâz-ı Kur'ân istemez
- 6 Müdde'iden 'ışk esrârın Sehâbî sorma kim  
Rind-i sâhib-ma'rifet şeytândan îmân istemez

## 161

Fâ'ilâtün Fâ'ilâtün Fâ'ilâtün Fâ'ilün

- 1 Görmeyelden la'lüñ ey gonce-i sır-âb göz  
Çehrem üzre gül gibi her dem döker hûn-âb göz
- 62a 2 Sanma kim aglar hayâlün yolına eyler nisâr  
Gâh la'l-i nâb u gâhî gevher-i sır-âb göz
- 3 İtdi seylâb-ı sirişkünden 'ıyân deryâ-yı hûn  
Oldı ol deryâda âhir kendüsi nâ-yâb göz

<sup>89</sup>“Artık kazanmakta olduklarının cezası olarak az gülsünler, çok ağlasınlar”, **Kur'ân**, Tevbe sûresi, 9/82.

<sup>90</sup>Orada bulunan.

- 4 Hwâbdan bir tarfetü'l-‘ayn olmadı bîdâr baht  
Veh ki hergiz uyhu yüzün görmedi bî-hwâb göz
- 5 Merdüm-i çeşmüm Sehâbî oldı gark-ı bahr-i hûn  
Olalı tûfân-ı endûh u gama gird-âb göz

## 162

Fâ‘ilâtün Fâ‘ilâtün Fâ‘ilâtün Fâ‘ilün

- 1 Yâr kûyın istemez göñlüm cemâl-i yârsuz  
Cennetü'l-Me'vâ-yı ‘âşık n'eylesün dîdârsuz
- 2 Gözde her bir kirpügüm biñ hâr-ı verd olsun eger  
Seyr-i gül-zâr eylesem ol serv-i gül-ruhsârsuz
- 3 Alıbilmezsiz metâ‘-ı vaslı nakd-i zühd ile  
Tutalum zâhid cihânda mâlik-i dînârsuz
- 4 Ol büt-i Çîn ger bu yüzden gösterürse zülfini  
Ehl-i takvâ içre kalmaz bir kişi zünnârsuz
- 5 Dil hezârân cevri ile gitmez der-i dil-dârdan  
Şimdi bildüm ki olur ‘âşık Sehâbî ‘ârsuz

## 163

Fâ‘ilâtün Fâ‘ilâtün Fâ‘ilâtün Fâ‘ilün

62b

- 1 Eyledüñ mihr-i cemâlünle müşerref hânemüz  
Reşk-i gül-zâr-ı cinân oldı yine kâşânemüz
- 2 Sûretâ ma‘mûre-i dil gerçi bir vîrânedür  
Mahzen-i genc-i mu‘âyendür velî vîrânemüz
- 3 Çeşm-i ter her dem sunar hûn-âbe-i hasret bize  
Bir nefes olmaz tehî ol bâdeden peymânemüz
- 4 İltifât itmez göñül dehrün harâb-âbâdına  
Degme bir vâdîde eglenmez bizüm dîvânemüz
- 5 Hwâba vardılar Sehâbî Vâmık u Ferhâd u Kays  
‘İşk bezminde meger gûş itdiler efsânemüz

## 164

Mef‘ûlü Fâ‘ilâtü Mefâ‘ilü Fâ‘ilün

- 1 Hakkâ ki bir dem ol ruh-ı ferhunde-fâlsuz  
Göñlüm degül elemsüz ü cânım melâlsüz
- 2 Fûrkatde umsa vasluñı göñlüm ‘aceb degül  
Olmaz firâk gicesi rûz-i visâlsüz
- 3 Kıl tîr-i cevri sîne-i pür-hûnumı nişân  
Lâyık mıdır ki ola bu gül-şen nihâlsüz
- 4 Gül-şende bûy-i sünbül-i zülf-i nigârdan  
Var mı ki bir benefşe ‘aceb infî‘âlsüz

- 5 Mest-i müdâma zecr neden muhtesib gibi  
Ey şeyh-i savma‘a hele siz ehl-i hâlsiz
- 6 Sanma Sehâbî kim ola makbûl-i ehl-i tab‘  
Bir şi‘r-i tâze kim ola rengîn hayâlsüz
- 7 Dil virmez ehl-i dil ne kadar dil-rübâyise  
Bir mâh-rûya kim ola gunc u delâlsüz

## 165

Mef‘ûlü Fâ‘ilâtü Mefâ‘îlü Fâ‘ilün

63a

- 1 Bezm-i safâda gâh kadeh-nûşlardanuz  
Geh dürd-i câm-ı derd ile bî-hûşlardanuz
- 2 Fûrkatde âh-ı nâlemüzi zâhir itmezüz  
Bûlbûl-sıfat harîfde hâmûşlardanuz
- 3 Yârân [u] âşinâ bizi yâd itmez oldılar  
Hayli dem oldu hayl-i ferâmûşlardanuz
- 4 Dâmân-ı vasluña elüm irmezse irmesün  
Her şeb hayâlün ile hem-âgûşlardanuz
- 5 Rûşen-zamîr ü sâf-derûn olsa öz ne var  
Âyîne-veş Sehâbî ‘abâ-pûşlardanuz

## 166

Mef‘ûlü Fâ‘ilâtü Mefâ‘îlü Fâ‘ilün

63b

- 1 Fâş oldu râz-ı dil olıcak çâk sînemüz  
Açıldı halk-ı ‘âleme karşı defînemüz
- 2 Biz şol Sikender-âyet [ü] Cemşîd-meşrebiz  
Kim câm-ı sâf-bâdedürür âb-gînemüz
- 3 Tûfân-ı eşk fûlk-i tene itmedi zarar  
Beñzerse tañ mı keştî-i Nûh’a sefînemiz
- 4 Hâsid ider bizümle ‘adâvet velî bizüm  
Yok sînemüzde kimseye bir zerre kînemüz
- 5 Sâkî sabûhı eyleyelüm irdi vakt-i subh  
Şâyed ki zâyil ola humâr-ı şebînemüz
- 6 Saçdı yolında dîde güher olmadı müfîd  
Yok yire oldu sarf Sehâbî hazînemüz

## 167

Mef‘ûlü Fâ‘ilâtü Mefâ‘îlü Fâ‘ilün

- 1 Sûfî safâ-yı kalb bulunmaz şarâbsuz  
Bulur mı hâne nûr u ziyâ âfîtâbsuz
- 2 Teb-hâle zâhir olsa lebûnde ‘aceb degül  
Zîrâ zülâl degmede olmaz habâbsuz

- 3 Dil tîrûñi hisâb idemez tende kim olur  
Bârân-ı rahmetüñ katarâtı hisâbsuz
- 4 Zâhid bizi şarâb ile ta'yîb eyleme  
Biz gerçi bâde-nûşlaruz siz harâbsuz
- 5 Âh-ı Sehâbî sem'üñüze tañ mı irmese  
Ey sâkinân-ı mey-kede 'âlî-cenâbsuz

[HARFU'S-SÎN]

168

Fâ'ilâtün Fâ'ilâtün Fâ'ilâtün Fâ'ilün

- 1 Ben gedâ 'âlemde itmem saltanat tâcın heves  
Başum üzre tâc-ı devlet hışt-ı kûy-ı fakr bes
- 2 Ehl-i hâlûñ añlamaz râzın meger kim ehl-i hâl  
Ney zebânın bilmez illâ 'ârif-i sâhib-nefes
- 3 Yaksa cismüm câna te'sîr itse 'ışk olmaz 'aceb  
Âteşe olur mı hâyil bir avuç hâşâk u has
- 4 Hızra baş egmez getürmez 'aynına hayvân suyn  
Hâk-i pâ-yî yâre şol 'âşık ki buldı dest-res
- 64a 5 Bî-nihâyetdür kavâfil şâh-râh-ı 'ışkda  
Turfe-hâletdür ki irmez kimsenüñ sem'ine ses
- 6 Ka'be-i maksûda varan kârbân-ı derd ile  
Şöhret için istemez bî-hûde feryâd-ı ceres
- 7 Dutdı etrâfum Sehâbî tîr-i bârân-ı belâ  
Mürg-ı câna cism-i hâkî oldı mânend-i kafes

169

Fâ'ilâtün Fâ'ilâtün Fâ'ilâtün Fâ'ilün

- 1 Göñlümüñ kıl mâ-cerâsın çeşm-i pür-hûndan kıyâs  
Şiddet-i hâl-i derûnı eyle bîrûndan kıyâs
- 2 Görmeyen ol meh-veşi görsün benüm şeydâlıgum  
Eylesün Leylî cemâlin 'ışk-ı Mecnûn'dan kıyâs
- 3 Kûy-ı yâre irebilmezsüñ kemend-i âh ile  
Ey dil anuñ irtifâ'ın eyle gerdûndan kıyâs
- 4 Bilmek isterseñ eger fakr u gınânuñ rütbesin  
Eyle anı hâlet-i 'Îsî vü Kârûn'dan kıyâs
- 5 Sorma dil hâlin Sehâbî dîde-i giryânı gör  
Göñlümüñ kıl mâ-cerâsın çeşm-i pür-hûndan kıyâs

170

Fâ'ilâtün Fâ'ilâtün Fâ'ilâtün Fâ'ilün

64b

- 1 La'lüñi dil ârzû eyler dem-â-dem cân heves  
Baldan zenbûr usanmaz şehd ü şekkerden meges
- 2 Sînemi yir yir ki deldüñ nâvek-i bî-dâd ile  
Şimdi mûrg-ı mihnete olmuş müşebbek bir kafes
- 3 Gamzeden itmez hazer gönlüm tolanur zülfüñi  
Eylemez şeb-gerd olan 'ayyâr pervâ-yı 'ases
- 4 Gülme her dem açılup ey gonce-fem agyâr ile  
Sen gül-i tersin saña hem-dem yaraşmaz hâr u has
- 5 Cân diler bir dem cemâlün seyr idüp teslîm ola  
Gitme ârâm eyle ey rûh-ı revânum bir nefes
- 6 Mihnet-i gurbetle yâr oldu gam u endûh u derd  
Hayli müşkil ger baña yâr olmasa feryâd-res
- 7 Ger tarîk-i 'ışka sâlikseñ hevâdan vâz gel  
Ey Sehâbî menzil-i maksûda irmez bü'l-heves

171

Mef'ûlû Fâ'ilâtü Mefâ'ilü Fâ'ilün

65a

- 1 Yüz virme gelse karşıña âyîne-vâr şems  
İster ki ola hüsnüñe âyîne-dâr şems
- 2 Hecrüm şebinde rûşen olan şem'-i âhdan  
Her subh-dem çerâgını ey meh yakar şems
- 3 Zülfün 'izâruñ âteşine salmayaydı na'l  
Yanmazdı nâr-ı şevka olup bî-karâr şems
- 4 Hurşîd nûr alur meh-i ruhsâr-ı yârdan  
Gerçi ki mâha nûr virür müste'âr şems
- 5 Bir gün ki salsa 'arsa-i da'vâya esb-i nâz  
Fi'l-hâl ider hisâr-ı felekden firâr şems
- 6 'Arz eylese 'izârını ma'dûm olur yaşum  
Encüm nihân olur olıcak âşikâr şems
- 7 İrdi Sehâbî cezbe baña Mevlevî-misâl  
Zâhir olalı 'aynuma meczûb-vâr şems

HARFU'Ş-ŞÎN

172

Fâ'ilâtün Fâ'ilâtün Fâ'ilâtün Fâ'ilün

- 1 Ey gönül ser-menzilün hâk-i der-i dil-dâr imiş  
Hâlüne reşk eyledüm devletlû başuñ var imiş
- 2 Çeşm ü dilden âb u tâb eksük degül vuslat demi  
Vasl hem feryâd kim hicrân gibi hûn-h'wâr imiş
- 3 Eyledi dil-dâr râz-ı 'ışkumı agyâra fâş  
Yâr sanurdum ben anı ol baña agyâr imiş

- 4 Dil hıred nakdin virüp almış cünûn kâlâsını  
Veh ki ol dîvâne bu sevdâya minnet-dâr imiş
- 5 Zühd ilinden eyledüm cem‘iyyet-i hâtır taleb  
Bilmedüm kim yiri anuñ hâne-i hammâr imiş
- 6 Zâhid-i zâhir-perestüñ rişte-i tesbîhini  
Gördüğüm sâ‘atde bildüm halka-i zünnâr imiş
- 7 Eylemez assı zer-i ruhsâr sîmîn-berlere  
Tutalum zâhid Sehâbî mâlik-i dînâr imiş

## 173

Fâ‘ilâtün Fâ‘ilâtün Fâ‘ilâtün Fâ‘ilün

- 1 ‘İşk ile şevk ehlinüñ biñ dürlü râzı var imiş  
Şem‘ ile pervânenüñ sûz u güdâzı var imiş
- 2 Meclis-i meyde sürâhî birle câmuñ dem-be-dem  
‘Âşık u ma‘şûk-veş nâz u niyâzı var imiş
- 65b 3 Mâ-sivâdan el yudum kıldum tahâret eşk ile  
Mezheb-i ‘ışkuñ bu şart üzre namâzı var imiş
- 4 Göz yumup açınca yagma kıldı göñlüm kişverin  
Gamze-i yârüñ ‘acâyib türk-tâzı var imiş
- 5 Dil şikâr oldı kebûter-veş kapuñda zülfüñe  
Bu fezânuñ dil-rübâ bir şâh-bâzı var imiş
- 6 Kaddüñe dil baglayup zülfüñe ber-dâr olanuñ  
Devlet-i pâyende vü ‘ömr-i dırâzı var imiş
- 7 Ey Sehâbî yârdan kâm istemez göñlüm ki halk  
Dimesünler ‘ışkınuñ bûy-i mecâzı var imiş

## 174

Fâ‘ilâtün Fâ‘ilâtün Fâ‘ilâtün Fâ‘ilün

- 1 Bezm-i ‘ışkuñ bir dolu kanlu şarâbı var imiş  
Kim ser-i ‘uşşâkdan anuñ habâbı var imiş
- 2 Ârzû-yı dâne-i hâl-i lebüñle ey perî  
Mürg-ı cânuñ habs-i tende ıztırâbı var imiş
- 3 ‘Âşık oldum ârzû-yı vuslatuñla bilmedüm  
Kim gam-ı hicrân gibi ‘ışkuñ ‘azâbı var imiş
- 4 Tutdı dünyâyı yaşum yakdı sipihri nâr-ı âh  
Gözlerümle göñlümün hoş âb u tâbı var imiş
- 5 Cür‘a-i vasl içmeden peymâne-i ‘ömr oldı pür  
Bilmedüm hayfâ ki devrânuñ şitâbı var imiş
- 6 Mâni‘ oldı rûy-i yâri görmeden kayd-ı vücûd  
Dîde-i cânuñ dirîgâ kim hicâbı var imiş
- 66a 7 Ey Sehâbî katre katre eşkümi seyr eyleyen  
Didi bu bahruñ ‘aceb dürr-i hoş-âbı var imiş

175

Mefâ'îlün Mefâ'îlün Mefâ'îlün Mefâ'îlün

- 1 Ten-i fersûde hâk olmuş yoluñda üstüh<sup>w</sup>ân kalmış  
Melâmet tîrine ol hâk içinde bir nişân kalmış
- 2 Kurudı eşk-i gül-gûnum ruh-ı zerdüm gören dir kim  
Sovılmışdur bu bâğuñ gülleri berg-i hazân kalmış
- 3 Zamândan soñra şol dil-haste[y]i sorsam gerek dirmiş  
Yakîn bildüm ki 'ömrüm müddetinden bir zamân kalmış
- 4 Benem ser-geşte-i sahrâ vü kûh-ı 'ışk 'âlemde  
Hemân Ferhâd u Mecnûn'dan kuru nâm u nişân kalmış
- 5 Sehâbî hasteñi sor kim senüñ fikr-i dehânuñla  
Vücûdından benüm rûh-ı revânüm bir kemân kalmış

176

Mefâ'îlün Mefâ'îlün Mefâ'îlün Mefâ'îlün

- 1 Lebûñsüz gonce-veş dem-beste göñlüm gark-ı hûn olmuş  
Sirişküm ey gül-i ra'nâ gamuñdan lâle-gûn olmuş
- 2 Beyabân-ı belâda kârbân-ı mihnet ü derdde  
Vücûdum mülkine âhum şu'â'ı reh-nümûn olmuş
- 3 Binâsı olmasun vîrân diyü seyl-i sirişkümünden  
Hadeng-i âh-ı sînem hâne-i çerhe sûtûn olmuş
- 4 Felekden umma resm-i mihr ü âyîn-i vefâ ey dil  
Mey-i 'ayş isteme bir şîşeden kim ser-nigûn olmuş
- 5 Sehâbî üzre ey ebr-i kerem bârân-ı ihsânuñ  
Teraşşuh itmeyelden âteş-i gamdan zebûn olmuş

66b

177

Mefâ'îlün Mefâ'îlün Mefâ'îlün Mefâ'îlün

- 1 Döker hecrüñde çeşmüm âb-ı hasret h<sup>w</sup>âbdan geçmiş  
Ter olmuş dâmen-i merdüm meger ol âbdan geçmiş
- 2 Nezâketle beni pîr-i mugâna geçmek isterler  
Baña bühtân idenler kim şarâb-ı nâbdan geçmiş
- 3 Şinâverlik tarîkin tıfl-ı eşkümünden su'âl it kim  
Gözüm bahrî gibi bir pür-hatar gird-bâddan geçmiş
- 4 Ziyâlendürmege dil hânesin bir turfa revzendür  
Nişân-ı tîr-i cevruñ kim ten-i pür-tâbdan geçmiş
- 5 Melâmet külhanı 'uryânına 'arz-ı libâs itme  
Ki ol hâkisterî hil'at geyüp sincâbdan geçmiş
- 6 Serî'u's-seyr bir peyk-i cihân-peymâdurur âhum  
Ki meydân-ı felekde mihr-i 'âlem-tâbdan geçmiş



- 7 Sehâbî'nüñdürür şâhum bu gün meydân-ı da'vâ kim  
Semend-i tab' ile hayl-i ülü'l-elbâbdan geçmiş

178

Fâ'ilâtün Fâ'ilâtün Fâ'ilâtün Fâ'ilün

67a

- 1 Neşvesüz her cânibe meyl itme ey dil âb-veş  
Âteş-i cân-sûz ile cûş it şarâb-ı nâb-veş  
2 Kûze-i eflâkden her katre kim nûş eyledüm  
Nâle-i zâr ile dökdi gözlerüm tolâb-veş  
3 Dün gice seyrümde gördüm ol perî-veş dilberi  
Gitmedi veh kim hayâli gözlerümden h<sup>w</sup>âb-veş  
4 Kaşları mihrâbını görseydi zâhid bir nazar  
Döndürürdi kıble semtinden yüzün mihrâb-veş  
5 İstemez sincâb 'âşık kim fenâ hâkisteri  
Ey Sehâbî cismüm üzre görünür sincâb-veş

179

Fâ'ilâtün Fâ'ilâtün Fâ'ilâtün Fâ'ilün

- 1 Gamzesin ol kaşı ya tîrine peykân eylemiş  
Sînemüñ dâgın gönül ol tîre kalkan eylemiş  
2 Zülfünü kılmışdur evvel mecma'-ı erbâb-ı dil  
Soñradan gönülüm gibi anı perîşân eylemiş  
3 Gonce la'linden haber almış gibi gül-şende kim  
Bagrı gamdan hûn olup çâk-i girîbân eylemiş  
4 Manzar-ı çeşmümde ârâm eyle ey göz merdümü  
Kim gönül ma'mûresin gam hayli vîrân eylemiş  
5 Encüm-i eşküm 'ıyân olmuş durur tâ dîdeden  
Tal'atüñ hurşîdini eflâk pinhân eylemiş  
6 Mısr-ı hüsnüñ iftirâkı ey meh-i Yûsuf-likâ  
Çeşm-i 'âlem-bînüme dünyâyı zindân eylemiş  
7 Tende dâg-ı âteşin sanma Sehâbî kim baña  
Ol şeh-i hûbân kızıl altunlar ihsân eylemiş

HARFU'S-SÂD

180

Mefâ'ilün Fe'ilâtün Mefâ'ilün Fe'ilün

67b

- 1 Belâ-yı zühd ü riyâdan şu kim dilerse halâs  
Kadeh du'âsını vird eylesün ma'a'l-ihlâs  
2 'Avâm kavlini gûş eyleyüp kabûl itme  
Dilerseñ olmaga makbûl-i nâs misl-i havâs  
3 Belâ vü derd ile şâdam ki lutf-ı 'âmından  
Harîm-i dilde şeh-i 'ışk itdi sohbet-i hâs

- 4 Ümîd gevherine irmedüm velî oldum  
Bihâr-ı eşküm içinde gözüm gibi gavvâs
- 5 Sehâbî dökdi yire hûn-ı merdüm-i çeşmi  
Efendi hancer-i gamzeñle anı eyle kısâs

181

Mef'ûlü Fâ'ilâtü Mefâ'ilü Fâ'ilün

- 1 Himmetle ayaguñ yûri bu nüh kıbâba bas  
Ya'nî yüzüñ cenâb-ı şeh-i kâm-yâba bas
- 2 Kayd ile ey dil olma mukayyed mücerred ol  
Pâyüñ elif-misâl ser-i âfitâba bas
- 3 Virânedür ümîd-i kudûmüñle mülk-i dil  
Ey genc-i hüsn gel kerem it ol harâba bas
- 4 Ey serv-i ser-firâz ten oldı yoluñda hâk  
Nâz ile cilve kıl kademüñ bu türâba bas
- 5 Gelse rakîb bezme Sehâbî habîb ile  
Yâri kenâre çekmege anı şarâba bas

182

Mef'ûlü Fâ'ilâtü Mefâ'ilü Fâ'ilün

68a

- 1 Yâ nâz ile ayaguñı çeşm-i pür-âba bas  
Yâ genc-vâr genc-i derûn-ı harâba bas
- 2 Döndi rikâba yâd-ı kudûmüñle gözlerüm  
Ey şeh-süvâr-ı hüsn ayaguñ rikâba bas
- 3 Kat' itse yâr başuñı ey zülf vechi var  
Kim dir saña ayaguñ uzadup kitâba bas
- 4 Yâr añlamış nifâkuñı bir dahi ey rakîb  
Cânuñ var ise ol der-i devlet-me'âba bas
- 5 Bildüñ Sehâbî kıble-i 'ışk ol cenâb imiş  
Var 'acz ile niyâz yüzün ol cenâba bas

HARFU'H-HÂD

183

Fâ'ilâtün Fâ'ilâtün Fâ'ilâtün Fâ'ilün

- 1 La'l-i dür-bâruñ degül mi cevher-i cândan garaz  
Lutf-ı güftâruñ degül mi âb-ı hayvândan garaz
- 2 Telh ise sûfî mey-i sâfî safâsın seyr kıl  
Kim ziyâ vü nûrdur hurşîd-i rahşândan garaz
- 3 Gâfil olma dost zikrinden dilâ hecrinde kim  
Yâd-ı dilberdür dem-i âhirde îmândan garaz

- 4 Yâre yir yir yâresin ‘arz eylemekdür sînemüñ  
Her taraftan gül gibi çâk-i girîbândan garaz
- 5 Sür yüzüñ bir vech ile ol mest-i nâzuñ pâyına  
Ey Sehâbî kim ‘adû fehm itmesün andan garaz

HARFU’T-TÂ’

184

Fâ‘ilâtün Fâ‘ilâtün Fâ‘ilâtün Fâ‘ilün

68b

- 1 Zâhir olsa hâller yirinde haddüñ üzre hat  
Vechi var zîrâ ki hattüñ noktadur aslı fakat
- 2 Mihr-i hüsnüñ üzre hâlûñden ta‘accüb kılmazın  
Resmdür kim yazılır şems üstine mâhum nukat
- 3 Buldî zînet âsitânüñ seyl-i eşkümden velî  
Mısr’a âb-ı Nîl’dür revnak viren Bagdâd’a Şat
- 4 Mâh-ı ‘ıydı gökde eylermiş müneccim cüst ü cû  
Tâk-ı ebrûñı görüp sanmış hilâl itmiş galat
- 5 Ey Sehâbî mâ-sivâ elvâhına çekdüm kalem  
Şimdi müsbet levh-i dilde nâm-ı dil-berdür fakat

HARFU’Z-ZÂ’

185

Mefâ‘ilün Fe‘ilâtün Mefâ‘ilün Fe‘ilün

- 1 Mizâca virdi humâr-ı seher keder vâ‘iz  
Zamân-ı pend degül va‘zuñı gider vâ‘iz
- 2 Döner cahîme na‘îm irer anda hûra kusûr  
Cezâ güninde çekersem ben âh eger vâ‘iz
- 3 Baña rahîk ile tesnîmden haber virme  
Ki râh-ı ‘ışk beni itdi bî-haber vâ‘iz
- 4 Meger hadîs beyân itdüñ ol dehenden kim  
Mutavvel-i sühanüñ oldu muhtasar vâ‘iz
- 5 Mezâd-ı ‘ışka ilet sûz u derd ecnâsın  
Degül metâ‘-ı riyâ anda mu‘teber vâ‘iz
- 6 ‘Azâb-ı rûz-ı cezâdan bizi ider tahvîf  
Bizümle anda bulışmaz gibi meger vâ‘iz
- 7 Semâ‘ u va‘z ile zühhâd vecd ü hâl itsün  
Beyâz-ı şeyb Sehâbî baña yiter vâ‘iz

69a

HARFU’L-‘AYN

186

Mef‘ûlü Fâ‘ilâtü Mefâ‘ilü Fâ‘ilün

- 1 Baş çekdi yâre karşı meger encümende şem‘  
Kim oldu tîg-i haclet ile ser-fikende şem‘
- 2 Ma‘nîde göyinür özi pervâne hâline  
Eyler egerçi sûret-i zâhirde hande şem‘
- 3 Gül efserin güc ile sabâ kapmasun diyü  
Fânûs yakdı lâle vü nergis çemende şem‘
- 4 Ger olmayaydı şu‘bede ehli sabâha dek  
Saklar mı idi her gice âteş dehende şem‘
- 5 Âb-ı hayât isteyü ‘azm itdi zulmete  
İster Hızır gibi ola câvîd zinde şem‘
- 6 Gam-hânemüz çerâg-ı şeb-efrûz istemez  
Besdür şu‘â‘-ı mâh bu beytü’l-hazen’de şem‘
- 7 Geçmiş serîr-i ‘izzete zerrîn külâh ile  
Olmış gibi Sehâbî şeh-i Rûma bende şem‘
- 8 Fermân-revâ-yı dehr ki emr itse Rûmdan  
Bâd-ı sabâ yakardı söyünse Hutun’de şem‘

187

Fâ‘ilâtün Fâ‘ilâtün Fâ‘ilâtün Fâ‘ilün

69b

- 1 Külbe-i târumda bir şeb kim yakar ahbâb şem‘  
Dûd-ı âh-ı subh-gâhumdan olur nâ-yâb şem‘
- 2 Teb deminde olımaz bir dem benümle hem-nişîn  
Kim erir sûz-ı derûnumdan getürmez tâb şem‘
- 3 Şu‘le-i sûz-ı dil-i pervâneyi teskîn için  
Dîde-i terden döker meclisde her dem âb şem‘
- 4 Âfitâbumla münevver olmayan bezmi göñül  
İstemez ger olsa anda mihr-i ‘âlem-tâb şem‘
- 5 Oldılar vâkıf Sehâbî sûz u eşkinden meger  
Kim yanar pervâne aglar dem-be-dem hûn-âb şem‘

188

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kâşki kılsaydı cânım cism-i mahzûnı vedâ‘  
Girmeyeydi yâr ile araya tîg-i inkıtâ‘
- 2 Yâre dil hâlin yazup ‘arz itmek isterdüm velî  
İstemem kim hâme ol ahvâle bulsun ıttılâ‘
- 3 İki dillidür kalem eyler ‘ıyân dil râzını  
Kim dimişler “küllu sırrın câveze’l-isneyni şâ”<sup>91</sup>
- 4 Ger cebîn ü ‘ârızuñdan hayret alsam vechi var  
Bedr ile hurşîd mâ-beyninde olmaz ictimâ‘

<sup>91</sup>Bir sır ikinci kişiye geçerse yayılır.

- 5 Tîrûñ ucından nizâ‘ eylerdi tende cân u dil  
Hançerûñ araya girdi eyledi kat‘-ı nizâ‘
- 6 Var iken mutrib sadâsı kimse gûş itmez sözüñ  
Va‘izâ bîhûde feryâd eyleme virme sudâ‘
- 7 Ey Sehâbî hâr u hâşâk-i vücûdumdur viren  
Şu‘le-i cân-sûz-ı nâr-ı ‘ışka her dem irtifâ‘

## HARFU’L-GAYN

189

70a

- Fe‘ilâtün Fe‘ilâtün Fe‘ilâtün Fe‘ilün
- 1 Mey kılur âdemi endûh-ı cihândan fârig  
Sâkıyâ sun içelüm olalum andan fârig
- 2 Pîr kıldı beni bir tâze civânuñ ‘ışkı  
Eyledi ser-zeniş-i pîr ü civândan fârig
- 3 Lutf u kahrı baña manzûr degüldür halkuñ  
Oldum ey hwâce ben ol sûd u ziyândan fârig
- 4 Ne eser kaldı göñülde ne nişân cânımdan  
‘Işk kıldı beni fikr-i dil ü cândan fârig
- 5 Lâ-mekân zirvesine kıldı Sehâbî pervâz  
Mürg-ı dil oldu yine kayd-ı mekândan fârig

190

- Fâ‘ilâtün Fâ‘ilâtün Fâ‘ilâtün Fâ‘ilün
- 1 N’eylesün şem‘-i münîri sâkin-i künc-i ferâg  
Şu‘le-i şem‘-i derûnîdür aña her şeb çerâg
- 2 Tende bir yir kalmadı dâg-ı gamuñla yanmaduk  
Âteş-i hecrûñde kor şimdi yine dâg üzre dâg
- 3 Sünbül-i zülfüñ esîri olalı kûyuñda dil  
Gitdi başımdan hevâ-yı gül-şen ü sevdâ-yı bâg
- 4 Gül ruhuñ seyr eyleyüp âvâzuñı gûş itmege  
Nergis ü gül oldılar bezm-i çemende göz kulag
- 5 Nazm üslûbında bahs eyler Sehâbîyle rakîb  
Öykünür refâtarda kebk-i hırâmân ile zâg

## HARFU’L-FÂ’

191

70b

- Fe‘ilâtün Fe‘ilâtün Fe‘ilâtün Fe‘ilün
- 1 Sa‘y ile şol ki harîm-i haremüñ kıldı metâf  
Eylemez Ka‘beyi ‘ömrinde safâyile tavâf
- 2 Seyr-i ruhsâruñ içün sînemi kıldı göñlüm  
Nâvek-i âh-ı seher-gâh ile yüz yirde şikâf

- 3 Tabl-ı sînem dögülüp çekdi gönül sancak-ı âh  
İtmek ister bu gice ahter-i bahtumla mesâf
- 4 İtse dil ‘ışkuñı izhâr ta‘accüb kılma  
Bâde-i rûşeni pinhân idemez şîşe-i sâf
- 5 Ma‘nî-i âyet-i ruhsârını vâ‘iz baña sor  
Ki anuñ müşkilini keşf idebilmez Keşşâf
- 6 Eylemez bâde-fürûş ile diyânet bahsin  
Var ise muhtesib-i şehrde zâhid insâf
- 7 Kıymet-i ‘ışkuñı añlarsa Sehâbî añlar  
Kimse bilmez güherüñ kadrini illâ sarrâf

192

Fâ‘ilâtün Fâ‘ilâtün Fâ‘ilâtün Fâ‘ilün

71a

- 1 İrdi rûz-ı ‘ıyd zâhid rûzeden olduk mu‘âf  
Gûşe-i mey-hânede kılsak yiridür i‘tikâf
- 2 Ka‘be tavfi sa‘yile hâcî müyesser olmadı  
Gel berü deyr-i mugânı idelüm bârî tavâf
- 3 Bâdenüñ gül-gûn kümeytin sâkıyâ meydâna sal  
Kim sipâh-ı hecr ile gönülüm mesâf ister mesâf
- 4 Tîredür jeng-i küdüretten gönül âyînesi  
Saykal-ı câm-ı neşât-efzâyile kıl anı sâf
- 5 Havf-ı hicrân mâni‘-i zevk-ı huzûr-ı vasldur  
“Yâ gıyâse’l-müstegîsîn neccinâ min mâ-nehâf”<sup>92</sup>
- 6 Sırr-ı gaybîden dehânuñ nükte-perdâz olmasa  
Olmaz idi ehl-i diller içre bunca ihtilâf
- 7 Var iken cânuñ Sehâbî ‘ışkdan lâf urma kim  
Mecma‘-ı ‘uşşâkda lâyık degül lâf-ı güzâf

193

Mef‘ûlü Fâ‘ilâtü Mefâ‘ilü Fâ‘ilün

- 1 Peykân-ı yâre idemedüm sînemi hedef  
Nakd-i hayâtum oldu bu sevdâ ile telef
- 2 Ruhsâr-ı zerdi sürdi şu kim hâk-râhına  
Buldı cihânda mihr-i dırahşân gibi şeref
- 3 Hûn-âb-ı zahm-ı hecr ile bir bahrdür derûn  
Kim anda ‘ışk-ı yâr güherdür gönül sadef
- 4 Her şeb çıkar bu beyt-i hazenden feleklere  
Zahm-ı firâk-ı Yûsuf ile bâng-i vâ-esef<sup>93</sup>

<sup>92</sup>Ey sığınanların sığılanı, bizi korktuğumuzdan kurtar.

<sup>93</sup>Mısra metinde “Yûsuf zahm-ı firâkiyle bâng-i vâ-esef” şeklindedir, vezin uymadığı için yukarıdaki şekilde değiştirilmiştir.

- 5 Cân riştesine ceng-i ecel virdi pîç ü tâb  
Zülfüñle olmadı gönül ahvâli ber-taraf
- 6 İhzâr ider müdâm gönül şâh-ı ‘ışk içün  
Sîm-i sirişk ile zer-i ruhsârdan tuhaf
- 7 Bezm-i belâda kâmet ile âh u sînemi  
Kıldı Sehâbî devr-i felek çeng ü nây u def

## HARFU’L-KÂF

194

Fâ‘ilâtün Fâ‘ilâtün Fâ‘ilâtün Fâ‘ilün

71b

- 1 Oldı gam gönülümde efzûn olmadı kem iştiyâk  
Gönlümi hem âteş-i mihnet yakar hem iştiyâk
- 2 Eşk-i gül-gûnumla rûy-i zerdüme eyler rakam  
Mâcerâ-yı ‘ışk-ı dil-dârı dem-â-dem iştiyâk
- 3 Ger binâ-yı ten harâb olursa bulmaz ihtilâl  
Dilde kalmışdur esâsı şöyle muhkem iştiyâk
- 4 Şerh-i şevkum ger zebân-ı ‘ışk takrîr itmese  
Kimseler fehm itmeyüp kalurdu mübhem iştiyâk
- 5 Çerh bir mâhuñ Sehâbî olalı ser-geştesi  
Kâmetin kılmış benüm kaddüm gibi ham iştiyâk

195

Fâ‘ilâtün Fâ‘ilâtün Fâ‘ilâtün Fâ‘ilün

- 1 ‘İyddden il şâd olup irdi baña nâ-şâdlık  
Kim benümle itmedi ol meh mübârek-bâdlık
- 2 Ey sa‘âdet mülkinüñ şâhı ne hâletdür bu kim  
Bende olanlar kapuñda istemez âzâdlık
- 3 Sayd idüp cân mürgın eyler hûn-ı ‘uşşâkı sebîl  
Hem bilür sayyâdlık ol gamze hem cellâdlık
- 4 Oldı zülfüñden gönül şîrîn lebüñ şûrîdesi  
İtdi ey Leylî-sıfat mecnûn iken Ferhâd’lık
- 5 Ey Sehabî zû-fünûnısın cünûn etvârınuñ  
‘İşk fenninde müsellemdür saña üstâdlık

196

Fâ‘ilâtün Fâ‘ilâtün Fâ‘ilâtün Fâ‘ilün

72a

- 1 Bahr-i ‘îrfân seyr iderseñ hâtır-ı dânnâya bak  
Tâlib-i dürr-i me‘ânîyseñ var ol deryâya bak
- 2 Başum üzre dâg-ı âteş-nâkümi nezzâre kıl  
Kûhsâr-ı gamda açılmış gül-i hamrâya bak

- 3 Pest-himmet olma ey dil baglama Tûbâ'ya dil  
Kâmet-i dil-dârı seyr it 'âlem-i bâlâyâ bak
- 4 'Ârız-ı yâr üzre zülfeyn-i kemend-âsâyı gör  
Genc-i hüsni hıfz ider şol iki ejderhâyâ bak
- 5 Göñlüñ açılson gözüñ görsün dilerseñ zâhidâ  
Zevrak-ı câma nazar kıl la'l-gûn deryâyâ bak
- 6 Nâvek-i gamzeyle del ey kaşı ya dil hânesin  
Kıl o revzenden nazar hâl-i dîl-i şeydâyâ bak
- 7 Bilmek isterseñ Sehâbî inkılâb-ı 'âlemi  
Kıssa-i İskender ü efsâne-i Dârâ'ya bak

197

Fâ'ilâtün Fâ'ilâtün Fâ'ilâtün Fâ'ilün

- 1 Hâr-ı gamla gonce-veş bagrumı kan itdi firâk  
'Ayn-ı hûn-bârumdan ol kanı revân itdi firâk
- 2 Çehrem üzre zerdlik k'olmışdı zâhir za'fdan  
Eşk-i gül-gûnumla ser-tâ-ser nihân itdi firâk
- 3 Haste-i 'ışka müfîd olmaz 'ilâcuñ ey tabîb  
Kim anı gâyetde zâr u nâ-tüvân itdi firâk
- 72b 4 Ten yuvasından uçurdu mürğ-ı cânı seng-i hecr  
Anda mürğ-ı rûh gibi âşiyân itdi firâk
- 5 Kalb-i mecrûhı melâmet tîrine kıldı nişân  
Ey Sehâbî ölmegüm hâtır-nişân itdi firâk

198

Fâ'ilâtün Fâ'ilâtün Fâ'ilâtün Fâ'ilün

- 1 Olmayan ey dil sadef-veş garka-i deryâ-yı 'ışk  
Ola mı hergiz karîn-i gevher-i yektâ-yı 'ışk
- 2 Cûy-bâr-ı eşküñi ey dîde deryâ eyle kim  
Bulınur ol bahr içinde dürr-i bî-hemtâ-yı 'ışk
- 3 Kat' olinmaz bâd-pây-ı 'akl-ı çâbüke-seyr ile  
Sa'bdur ey dil reh-i peydâ-yı nâ-peydâ-yı 'ışk
- 4 Kûh-ı mihnetdür başum sînem beyâbân-ı belâ  
Sînem üzre kanlu dâgum lâle-i sahrâ-yı 'ışk
- 5 Ben eger rüsvâ-yı 'ışk oldumsa ta'yîb itme kim  
Oldı ey zâhid hezârân pârsâ rüsvâ-yı 'ışk
- 6 Benden olmazdı 'ıyân keyfîyyet-i 'ışk u cünûn  
Olmayaydı kâse-i ser pür mey-i sevdâ-yı 'ışk
- 7 Genc-i 'ışkı arayan göñlümde kılsun cüst ü cû  
Ey Sehâbî şimdi bu vîrânedür me'vâ-yı 'ışk

HARFU'L-KÂF



199

- Mef'ûlû Fâ'ilâtü Mefâ'ilü Fâ'ilün
- 73a
- 1 Şol rinde kim müdâm mey-i erguvân gerek  
Dâyim mücâvir-i ser-i kûy-ı mugân gerek
  - 2 Bir tâyir-i huçeste-kademdür hayâl-i yâr  
Ârâm-gâh-ı dîde aña âşiyân gerek
  - 3 Sâkî münevver olmaga zulmet-serây-ı dil  
Mey sun ki anda şem'-i mey-i erguvân gerek
  - 4 Def' idemez harâretümi câm-ı hoş-güvâr  
Ol dem humârdan baña rıtl-ı girân gerek
  - 5 Cân vormeyen irişmedi dil-dâr vaslına  
Cânân visâlin istemesün kime cân gerek
  - 6 Cûyâ-yı neng ü nâm idi Mecnûn u Kûh-ken  
Râh-ı fenâya sâlik olan bî-nişân gerek
  - 7 Olma Sehâbî hâdise-i dehrden melûl  
'Ârif gam-ı zamâneyle şâdmân gerek
  - 8 Def'-i şedâyid-i elem-i rûzigâr içün  
Vird-i zebân du'â-yı şeh-i kâm-rân gerek
  - 9 Hurşîd-i âsumân-ı şeref kim kamer-misâl  
Bâb-ı sa'âdetinde Zuhal pâs-bân gerek

200

- Fâ'ilâtün Fâ'ilâtün Fâ'ilâtün Fâ'ilün
- 73b
- 1 Mihr-i 'âlem-tâba virdi 'ârızuñ şermendelik  
Meh saña 'arz eylese şâhum yiridür bendelik
  - 2 Fûrkatüñ şâmında gerçi ölmedüm feryâd kim  
Vuslat eyyâmında öldürdi beni şermendelik
  - 3 Âh idersem dem-be-dem aglar gözüm bî-ihtiyâr  
Rûzigâr esdükçe fi'l-vâkı' olur bârendelik
  - 4 Rûz-ı hicrân oldu lutf it ey ecel gel cânım al  
Mübtelâ-yı fûrkat-i dil-dâr n'eyler zindelik
  - 5 Kıldı rûşen külbemi bir mâh-tal'at vechi var  
Tâli'-i sa'dümden alsa Müşteri ferhundelik
  - 6 Vâdî-i gamda nesîm-âsâ dil-i mecnûnumuñ  
'Âdeti peyvendelikdür san'ati cûyendelik
  - 7 Oldı gök ser-geşte vü yir tutdı ârâm ideli  
Ey Sehâbî çerh ser-keşlik zemîn efgendelik

201

- Fâ'ilâtün Fâ'ilâtün Fâ'ilâtün Fâ'ilün
- 1 Hâk-i râhuñdan kılur her gez kim 'azm felek  
'Aynına anı felekde tûtiyâ eyler melek

- 2 Çekme gönülünden çıkarma hancer-i hûn-rîzûnî  
Ey dür-i bahr-i kerem deryâda lâıkdur semek
- 3 Safha-i cân üzre vahdet harfını sebt itdiler  
Eyleyenler levh-i dilden mâ-sivâ hattını hakk
- 4 Çeşm-i bî-nûr-ı ‘adûda görinen merdüm degül  
Anda kılmış mühresin heycâ günü pinhân tüfek
- 5 ‘Asker-i mansûruñı gördi Sehâbî didi kim  
“Ey sipâhet râ zafer leşker-keş ü nusret bezek”<sup>94</sup>

## 202

Fe‘ilâtün Fe‘ilâtün Fe‘ilâtün Fe‘ilün

74a

- 1 Kâşki olsa idüm hâk-i rehi sen sanemüñ  
Ki hırâm eyledüğünce öpe idüm kademüñ
- 2 Râh-ı zilletde idüm sebze-sıfat pejmürde  
Hâk-i rehden beni kaldırdı sehâb-ı keremüñ
- 3 Bedenüm cânuma sînem dilüme oldu kubûr  
İkisinden olalı dûr hadeng-i elemüñ
- 4 Baña dil-cûluk idüp oldu gamuñ gam-h‘wârum  
Gönlüme gördi hücum itdi cefâ vü sitemüñ
- 5 Çekdi devr içre Sehâbî elem-i renc-i humâr  
Câm için minnetini çekmedi ‘âlemde Cem’üñ

## 203

Mefâ‘ilün Mefâ‘ilün Mefâ‘ilün Mefâ‘ilün

- 1 Te‘alluk hârı çün kim dutdı bu gül-şende dâmânuñ  
Demidür çâk olursa gonce-veş ey dil girîbânuñ
- 2 Beni lutfuñ yiridür hâkden kaldırsa çün her dem  
İrişür kâyinâta ey güneş zerrât-ı ihsânuñ
- 3 Cemâlüñ mihrine hurşîd-i ‘âlem-tâb beñzerdi  
Cebîninde eger dâg-ı kûsûfı olmasa anuñ
- 4 Sen ol Cemşîd-i sâhib-câmsın kim rûz u şeb gerdûn  
Meh ü hurşîd ile bezmünde olmuş kâse-gerdânuñ
- 5 Gubâr-ı bâd-pâyüñ kuhl-i ‘ayn eylerdi görseydi  
Şeh-i encüm ki bir çâbü-k-süvâridur bu meydânuñ
- 6 Muhît-i dîde-i gevher-feşânum cûşa geldükçe  
Döküldi âb-ı rûyî yirlere deryâ-yı ‘Ummânuñ
- 7 Nevâyî-veş Sehâbî nûş idelden cür‘a Câmî’den  
Sözi keyfiyyetinden mestdür ehli Horâsân’uñ

<sup>94</sup>Ey ordusu sırtında zafer taşıyan ve [İlâhi] yardımına süslenen.

## 204

Mef'ûlû Fâ'ilâtü Mefâ'ilü Fâ'ilün

74b

- 1 Gelse ne deñlü kim dil ü câna belâlaruñ  
Anı 'atâ bilür güzelüm mübtelâlaruñ
- 2 Zillet türâbınuñ ser-i kûyuñda zerresin  
Virmez serîr-i 'izzete şâhum gedâlaruñ
- 3 Ey bahr-i cûd gevher-i vasluñ ümîdine  
Oldı garîk-ı lücce-i gam âşinâlaruñ
- 4 Etbâk-ı çerha irmez idi ihtilâl eger  
Yazılsa ol sahâyife medh ü senâlaruñ
- 5 Ferhâd u Kays'a eyleme nisbet Sehâbî  
Ma'lûmdur hikâyeti ol hod-nümâlaruñ

## 205

Mef'ûlû Fâ'ilâtü Mefâ'ilü Fâ'ilün

- 1 Olmaz nasîb bendeñe çün kim vefâlaruñ  
Bâri göñülde eyleme eksük cefâlaruñ
- 2 Bir yaña devr cevır kılur bir yaña rakîb  
Lâyık mı bu hakârete şâhum gedâlaruñ
- 3 Bîgâneye vefâdur işüñ âşinâya cevır  
Bîgâne olmasun mı begüm âşinâlaruñ
- 4 Altun kalemle safha-i sîmîn çerhe mihr  
Her gün yazar sahâyif-i medh ü senâlaruñ
- 5 Kıldı Sehâbî cevır-i 'ad[û]<sup>95</sup> kaddüñi kemân  
Cehd eyle kâr-ger ola tîr-i du'âlaruñ

## 206

Fâ'ilâtün Fâ'ilâtün Fâ'ilâtün Fâ'ilün

75a

- 1 Gördiler mir'ât-ı Hak-bîn oldı ruhsâruñ senüñ  
Oldı erbâb-ı nazar müştâk-ı dîdâruñ senüñ
- 2 Çerh-i râbî'de Mesîhâ eylemezdi i'tikâf  
Olmasa ey âfitâbum ger giriftâruñ senüñ
- 3 Sen sipihr-i nâzda hurşîd-veş tâbân iken  
Çerh ser-gerdân olup olmış taleb-kâruñ senüñ
- 4 Sunsa Eflâtün eger şerbet zülâl-i Hızır ile  
Nûş kılmaz ey Mesîh-enfâs bîmâruñ senüñ
- 5 Ger Sehâbî'nüñ vire hâk-i vücûdın bâda çerh  
Haşre dek her zerresi ola hevâ-dâruñ senüñ

<sup>95</sup>Metinde "ad" şeklindedir. Bu şekilde düzeltilmiştir.

## 207

Fâ'ilâtün Fâ'ilâtün Fâ'ilâtün Fâ'ilün

- 1 Hüsn ile ol meh-veşi meşhûr-ı eyyâm eyledüñ  
'İşk ile ben bî-dili ey çerh bed-nâm eyledüñ
- 2 Oldılar devründe her hod-kâm olanlar kâm-rân  
Kande bir kâm ehlini bulduñsa nâ-kâm eyledüñ
- 3 Hasret-i kevserle kılduñ ehl-i zühdi telh-kâm  
'Âşık-ı dürdî-keşi leb-teşne-i câm eyledüñ
- 4 Âşiyân-ı dîde-i terden rem itdi mürğ-ı h<sup>w</sup>âb  
Ey hayâl-i yâr çün sen anda ârâm eyledüñ
- 5 Mürğ-ı vaslı sayd içün beñzer Sehâbî kim yine  
Dâne saçduñ eşkden cân riştesin dâm eyledüñ

## 208

Fâ'ilâtün Fâ'ilâtün Fâ'ilâtün Fâ'ilün

75b

- 1 Zindeyi bî-cân ider nâz ile refâtârûñ senüñ  
Mürdeyi ihyâ kılur lutf ile güftârûñ senüñ
- 2 Sen elif-veş sâkin-i halvet-serâ-yı cân iken  
Turfâ hâletdür ki cân olmış taleb-kârûñ senüñ
- 3 Ey tabîb-i cân dil-i bîmâra tîmâr itme kim  
Sıhhat itmez ârzû 'âlemde bîmârûñ senüñ
- 4 İrişürdi der-geh-i yâre vücûduñ topragı  
Olsa ger bâd-ı sabâ ey dil hevâ-dârûñ senüñ
- 5 Bahr-i 'ummânı Sehâbî ebr-veş kıldı hacil  
Gevher-efşân olalı çeşm-i güher-bârûñ senüñ

## 209

Fâ'ilâtün Fâ'ilâtün Fâ'ilâtün Fâ'ilün

- 1 Sen ne cevhersin nedür mâhiyyetüñ ey 'ışk-ı pâk  
Kim gehî ihyâ idersin 'âşıkı gâhî helâk
- 2 Dil degül ancak girîbân-çâk senden kim kılur  
Ceyb-i cânı her seher eflâk hem mihrüñle çâk
- 3 Zerre deñlü itmedi te'sîr yârûñ göñline  
Gerçi yakdı kalb-i eflâki bu âh-ı sûz-nâk
- 4 La'l-i dilber-veş mey-i nâbuñ safâ-bahş oldugın  
'Ârife söyler zebân-ı hâl ile her berg-i tâk
- 5 Ey Sehâbî hâsıl itdi halk içinde âb-rû  
Kendüyi şol kim kanâ'at yollarında kıldı hâk

## 210

Mef'ûlü Fâ'ilâtü Mefâ'ilü Fâ'ilün

76a

- 1 Seyr it gamuñda şu'lesini sîne dâgınuñ  
Gör lâle-i pür-âteşini derd tagınuñ
- 2 Hâr-ı gamuñdan ey gül-i ter kaçmazam ki ben  
Bir bülbül-i belâ-keşiyem 'ışk bâgınuñ
- 3 Gûyâ iletdi bâga sabâ bûy-i zülfüñi  
Kim kılca kadri kalmadı sünbül budâgınuñ
- 4 Cism-i şehîd-i 'ışkdurur tu'mesi müdâm  
Sahrâ-yı gamda vâdî-i endûh zâgınuñ
- 5 Ma'nî Sehâbî nazm-ı Hayâlî'de isteme  
Zîrâ fûrûgı olmaz Işık'lar çerâgınuñ

211

Mefâ'ilün Mefâ'ilün Mefâ'ilün Mefâ'ilün

- 1 Lebûndür gonçe-i handân-ı gül-zâr-ı cinândan yeg  
Hırâmân kâmetüñ serv-i revân-ı bâg-ı cândan yeg
- 2 Gül-istân-ı ser-i kûyuñ 'acâyib ravzadur k'anuñ  
Zemînidür letâfetde fezâ-yı âsumândan yeg
- 3 Dile geldükçe tîrûñ gitdi cân şâdam bi-hamdi'llâh  
Ki tenden gerçi cân gitdi yirine geldi andan yeg
- 4 Şehâ der-gâhuñi takbîl iden hayl-i selâtînuñ  
Başında âsitânuñ ferşidür tâc-ı keyândan yeg
- 5 Ruhüñ evsâfını gûş it Sehâbî'den ki her vâsıf  
Gülü vasf idebilmez bülbül-i şîrîn-zebândan yeg

212

Fâ'ilâtün Fâ'ilâtün Fâ'ilâtün Fâ'ilün

76b

- 1 Gün gibi sen evc-i istignâda seyrân eyledüñ  
Sâye-veş üftâdeñi hâk ile yeksân eyledüñ
- 2 Sen hırâmân 'âlemi seyr itdün ey vahşî gazâl  
'Âşıkı ser-geşte-i kûh u beyâbân eyledüñ
- 3 Gâyib olduñ Yûsuf'um ben hasteñe Ya'kûb-veş  
'Âlemüñ dâru's-sürûrın beytü'l-ahzân eyledüñ
- 4 Vasl-ı yâre irmedin ölmek katı düşvâr idi  
Veh ki ben bîmâra ol düşvârı âsân eyledüñ
- 5 Yâd-ı gül-zâr-ı visâlûñle Sehâbî'nüñ gözin  
Ey gül-i handân misâl-i ebr-i giryân eyledüñ

213

Fâ'ilâtün Fâ'ilâtün Fâ'ilâtün Fâ'ilün

- 1 'İyd irişdi n'ola ben giryânı handân eyleseñ  
Kanımı dökseñ ser-i kûyuñda kurbân eyleseñ

- 2 Pây-bûsuñla ser-efrâz olmag içün başumı  
Der-gehüñde sâye-veş hâk ile yeksân eyleseñ
- 3 Âşikârâ cevruñe incinmezem ey şüh eger  
Geh gehî ben nâ-tüvâna lutf-ı pinhân eyleseñ
- 4 Vasldur dirler devâ-yı derd-i hicrân ey felek  
Derdüme bir gün n'ola devrüñde dermân eyleseñ
- 5 Gonçe-veş bagrı Sehâbî'nüñ tolıdur kan ile  
Gül gibi şâhum demidür anı handân eyleseñ

## 214

77a

- Fâ'ilâtün Fâ'ilâtün Fâ'ilâtün Fâ'ilün
- 1 Öldürüp ben nâ-tüvânı soñra ihyâ eyledüñ  
Ey perî izhâr-ı i'câz-ı Mesîhâ eyledüñ
- 2 Zerre-veş nâçîz idüm ey âfitâbum üstüme  
Sâye salduñ ben za'îfî âşikârâ eyledüñ
- 3 Hamdü-li'llâh oldı vâsıl gevher-i maksûda dil  
Dîde-i gevher-feşânı gerçi deryâ eyledüñ
- 4 Âb ile gilden yed-i kudretle ey üstâd-ı sun'  
Servi meh-ruhsâr u mâhı serv-i bâlâ eyledüñ
- 5 Heçr şâmında Sehâbî'nüñ nücûm-ı eşkinüñ  
Her birin bir mâh-tâb-ı 'âlem-ârâ eyledüñ

## 215

77b

- Mefâ'ilün Mefâ'ilün Mefâ'ilün Mefâ'ilün
- 1 Baña sensüz gelür endûh u gam 'ayş u tarabdan yeg  
Ciger hûn-âbesin nûş eylemek âb-ı 'inebden yeg
- 2 Dem-â-dem mürdeler ihyâ idersin kimse 'âlemde  
'İyân itmez Mesîhâ mu'cizin sen gonçe-lebden yeg
- 3 Visâlün subhına irişmege şâm-ı firâkuñda  
Ne var 'uşşâk-ı bî-h<sup>w</sup>âba du'â-yı nîm-şebden yeg
- 4 Tabîbâ gerçi hem-demdür dil-i zâr ile gam ammâ  
Sorar yok hâlümi germiyyet ile kimse tebden yeg
- 5 Esîr-i 'ışka zindân-ı gamuñla nâr-ı âhıdur  
Sevâd-ı mülk-i Şâm u sancak-ı mîr-i Haleb'den yeg
- 6 Ma'ârif hâsıl it ey dil ki 'irfân ehli var bî-had  
Nesebden 'ârî ammâ fazlı yok 'âlî-nesebden yeg
- 7 Taleb kılma Sehâbî şâhdan her lahza dil-h<sup>w</sup>âhın  
Edeb gözle ki erkân-ı edeb hüsn-i talebden yeg

## 216

Fâ'ilâtün Fâ'ilâtün Fâ'ilâtün Fâ'ilün

- 1 Germ olan şem‘-i cemâl-i dil-bere şeydâ gerek  
Âteşe karşı varan pervâne bî-pervâ gerek
- 2 Tende dilden sûfiyâ hırs u hevâyı dûr kıl  
Halvet içre zâhid-i halvet-nişîn tenhâ gerek
- 3 Ger mülebbes ölmek isterseñ libâs-ı fakr ile  
Zâhidâ evvel gınâ ehline istignâ gerek
- 4 Kanda görsün tal‘at-ı dil-dâr ‘aksin şeyh-i şehir  
Bakmaga mir‘âta zâhir dîde-i bînâ gerek
- 5 ‘Andelîbüñdür Sehâbî kıl ri‘âyet anı kim  
Gül-şen içre ey sehî-kad bülbül-i gûyâ gerek

## 217

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kıldı rûşen ‘âlemi ruhsâr-ı tâbânuñ senüñ  
Matla‘-ı mihr-i sa‘âdetdür girîbânuñ senüñ
- 2 Cân bağışlar mürdeye bir dem tekellüm eylese  
Ey büt-i ‘Îsî-nefes la‘l-i sühan-dânuñ senüñ
- 3 Tâb-ı hurşîd-i havâdisden ne gam çün kim benüm  
Sâye saldı üstüme serv-i hırâmânuñ senüñ
- 4 Cismümi yoluñda hâk itdüm velî korkum bu kim  
Ola hâk-âlûde nâ-geh pâk dâmânuñ senüñ
- 5 Sensin ol ebr-i kerem kim kişt-zâr-ı ‘âlemi  
Sebz ü handân eyledi bârân-ı ihsânuñ senüñ
- 6 Pâdişâhum var Sehâbî gibi her bir gûşede  
Cân u dilden biñ du‘â-gûyüñ senâ-hwânuñ senüñ

78a

## 218

Mef‘ûlü Fâ‘ilâtü Mefâ‘ilü Fâ‘ilün

- 1 Âb-ı rez olmasa beni eylerdi gam helâk  
Olsun müdâm sebz İlâhî nihâl-i tâk
- 2 Pür-derddür derûn u birûnum ‘aceb degül  
Bî-ihliyâr itsem eger âh-ı derd-nâk
- 3 Ger pertev-i eşi‘‘a-i dîdâr olmasa  
Hâkî ten içre menzil idinmezdi cân-ı pâk
- 4 Sümm-i semendüñ öpmek ile bulalı şeref  
A‘yân-ı çerh gözlerine sürme oldu hâk
- 5 Düşmiş Sehâbî bister-i mihnetde yârsuz  
Bîmâr u cân-fikâr u ciger-rîş ü sîne-çâk

## 219

Fâ‘ilâtün Fâ‘ilâtün Fâ‘ilâtün Fâ‘ilün

- 78b
- 1 Ey nesîm-i çîn-i zülfünden mu‘attar bûy-i müşg  
Hâk-i pâyûñ hûn-behâ-yı nâfe-i âhû-yı müşg
  - 2 Zülfüñi kılduñ<sup>96</sup> nihân bûyinden oldı âşıkâr  
Gizledüñ miski velîkin zâhir itdi bûy-i müşg<sup>97</sup>
  - 3 ‘Anber-efşân zülfüne öykündi ey dil-ber meger  
Kim kararmış ehl-i ‘ısyân yüzi gibi rûy-i müşg
  - 4 ‘Ârızuñda hâl-i müşgînüñ görüp sandum meger  
Çîn gül-istânında düşmüş nâfe-i âhû-yı müşg
  - 5 Ey Sehâbî çîn-i zülf-i yâr vasfı var iken  
Eylemek bil kim hatâdur şimdi güft ü gû-yı müşg

## 220

- Fe‘ilâtün Fe‘ilâtün Fe‘ilâtün Fe‘ilün
- 1 Sanma kim hırka-i erbâb-ı riyâdur kepenek  
Pûşış-i zümre-i ashâb-ı safâdur kepenek
  - 2 Câme-i atlas ile n’eyleyeyin kemhâyı  
Ehl-i tecrîde cihân içre kabâdur kepenek
  - 3 Kepenek-pûşdurur mazhar-ı Esmâ vü Sıfât  
Belki âyîne-i envâr-ı Hudâ’dur kepenek
  - 4 Aña zinhâr hakâretle nazar eyleme kim  
Kisvet-i mu‘tekid-i âl-i ‘abâdur kepenek
  - 5 Fâsık u müfsid ü magrûra yaraşmaz zîrâ  
Ki libâs-ı sulehâ vü fukarâdur kepenek
  - 6 Dehr-i fânîde nemed geydügümi eyleme ‘ayb  
Ey Sehâbî peneh-i ehl-i fenâdur kepenek

## 221

- Mefâ‘ilün Mefâ‘ilün Mefâ‘ilün Mefâ‘ilün
- 79a
- 1 Rikâbuñdan gerekmez ‘âşık-ı şûrîde-hâl eksük  
Cenâbuñdan yaraşmaz kim ola ehl-i kemâl eksük
  - 2 ‘İyândur kâmetüñ resmi elif-mânend ‘aynumda  
Bu nehrüñ olmasun yâ Rab yanından ol nihâl eksük
  - 3 Gubâr-ı hat ruhuñ mir’âtı üzre olalı zâhir  
Göñül âyînesinden olmadı jeng-i melâl eksük
  - 4 Kemâle irdi hüsnüñ olma mahzûn ger hatuñ gelse  
Ki zîrâ mihr-i ‘âlem-tâbdan olmaz zevâl eksük
  - 5 Hamîde-kâmetüm hâk oldı kûy-ı yârda ammâ  
Ne gam hurşîde ger olsa felekden bir hilâl eksük
  - 6 Nazîre düşdi bir ‘âlî-cenâbuñ şi‘rine nazmum  
Göñülde olmadı ammâ Sehâbî infi‘âl eksük

<sup>96</sup>Metinde yanlışlıkla “kaddüñ” şeklinde yazılmıştır.

<sup>97</sup>Metinde “misk” şeklindedir.



## 222

Mef'ûlü Fâ'ilâtü Mefâ'ilü Fâ'ilün

- 1 Erbâb-ı 'ışka yârdan ey dil vefâ gerek  
Ehl-i kemâle terbiyet-i pâdişâ gerek
- 2 Senden müdâm 'âşika lâyık degül cefâ  
Ey pâdişâh-ı hüsn güzelde vefâ gerek
- 3 Bahr-i fenâda gevher-i maksûd isteyen  
'Ummân-ı 'ışk içinde dilâ âşinâ gerek
- 4 İsterseñ ola mazhar-ı 'aks-i cemâl-i yâr  
Mir'ât-ı dilde su gibi sûfî safâ gerek
- 5 Cân yüzine dilerseñ açılsun der-i murâd  
Kalb-i rızâ nişâne-i tîr-i kazâ gerek
- 6 Telh ise gerçi bâde nazar kıl safâsına  
Kim gülde reng ü bûy güneşde ziyâ gerek
- 79b 7 Senden Sehâbî bûse taleb kılsa itme 'ayb  
Ey şâh-ı hüsn şâ'ir olanlar gedâ gerek

## 223

Mef'ûlü Mefâ'ilü Mefâ'ilü Fe'ûlün

- 1 Ey şeyh makâlâtunı sen hâl mı sanduñ  
Çehreñde riyâ noktasını hâl mi sanduñ
- 2 Yükletme 'amel bâr-ı girânın baña vâ'iz  
Bî-kayd-ı cihânem beni hammâl mı sanduñ
- 3 Mecnûn-ı belâ-dîde gözi perdeleridür  
Sen hayme-i Leylâ'yı siyeh şâl mı sanduñ
- 4 Cânı dem-i vasluñda dilerdüm idem îsâr  
Te'hîrini hicrân şebi ihmâl mi sanduñ
- 5 Kan agladı yaş yirine hecrüñde Sehâbî  
Rahm eylemedüñ kanlu yaşın âl mı sanduñ

## 224

Mef'ûlü Fâ'ilâtü Mefâ'ilü Fâ'ilün

- 1 Yıllardurur ki zâr u giriftârûñam senüñ  
Rahm eyle ey tabîb ki bîmârûñam senüñ
- 2 Sen gayr ile tekellüm idersüñ beni görüp  
Ben vâlih-i halâvet-i güftârûñam senüñ
- 3 Eyler tavâf kûyuñı hâküm sabâ ile  
Olsam gubâr yine hevâ-dârûñam senüñ
- 4 Geh kişver-i vücûdda gâhî 'ademdeyin  
Ya'nî 'ale'd-devâm taleb-kârûñam senüñ

80a

- 5 Ey serv-i hoş-hırâm hırâm it ki sâye-veş  
Üftâde-i nezâket-i reftâruñam senüñ
- 6 Sen mısır-ı dilde Yûsuf u ben nakd-i cân ile  
Ey 'ışk-ı dil-peżîr harî-dâruñam senüñ
- 7 Var gît Sehâbî durma kapumda didüñ baña  
Di kanda varayın ki giriftâruñam senüñ

## HARFU'L-LÂM

225

Mefâ'ilün Fe'ilâtün Mefâ'ilün Fe'ilün

- 1 Şeb-i gamumda söyündürse mâh eger kandîl  
Şerâr-ı âteş-i âhum baña yiter kandîl
- 2 Degülse şu'le-i şevkuñla mürğ-ı âteş-bâl  
Felek yüzine melek-veş neden uçar kandîl
- 3 Kuşandı biline zünnâr u nârdan dem urar  
Mecûsî oldı tapar âteşe meger kandîl
- 4 Kerâmet issi zamîri münîr sûfidür  
Ki âb u âteşi bir yire cem' ider kandîl
- 5 Harîm-i sîne şehâ câmi'-i mahabbetdür  
İçinde âteş-i mihrüñle dil yanar kandîl
- 6 Gamuñdan özgeye kalbümde sanma kim yir idem  
Harîm-i Ka'be'ye lâyük olur mı her kandîl
- 7 Göñül harâreti vasluñ zamânı sâkin olur  
Ki şevk virmez olıcak dem-i seher kandîl
- 8 Kalur mı tâb Sehâbî güneşde görse yüzün  
Virür mi mihr tulû' itse nûr u fer kandîl

226

Fâ'ilâtün Fâ'ilâtün Fâ'ilâtün Fâ'ilün

80b

- 1 Gâh sî-murg-ı fezâ-yı lâ-mekânîdür göñül  
Gâh 'ankâ-yı mahabbet âşiyânıdur göñül
- 2 Kavs-i mihnetden ne deñlü atılır tîr-i belâ  
Sînemüñ âmâc-gâhında nişânıdur göñül
- 3 Gûş-i dehri kıldı memlû gevher-i 'irfân ile  
Dostlar gavvâs-ı deryâ-yı me'ânîdür göñül
- 4 Dem-be-dem andan hakâyık ahteri eyler tulû'  
Bil hakîkat kim hakâyık âsumânıdur göñül
- 5 Göñlüñe izhâr kılma sırr-ı 'ışk-ı yâri kim  
Ey Sehâbî kâşif-i râz-ı nihânîdür göñül

## 227

Fâ‘ilâtün Fâ‘ilâtün Fâ‘ilâtün Fâ‘ilün

- 1 Ger mahabbet nârına gül gibi ey dil gül-şen ol  
Yan yakıl ehl-i safâ bezminde şem‘-i rûşen ol
- 2 ‘İşk nûrından zamîrûñ ola isterseñ münîr  
Tîr-i dil-dûz-ı mahabbet birle revzen revzen ol
- 3 Yile virür kâh-veş âhır seni bâd-ı fenâ  
Sen gerekse cism-i sengînüñle kûh-ı âhen ol
- 4 Olımazsın zâl-i çerhün tîr-i mekrinden halâs  
Rüstem’i nîrûyile maglûb iden Rûyin-ten ol
- 5 Görmek isterseñ leb ü dendânını ey çeşm-i ter  
Gevher-i sîr-âba bahr ol la‘l-i nâba ma‘den ol
- 6 Ey Sehâbî sakla kalbûñde mahabbet nakdini  
Genc-i bî-pâyân-ı “küntü kenz”e<sup>98</sup> ya‘nî mahzen ol

## 228

Mefâ‘ilün Fe‘ilâtün Mefâ‘ilün Fe‘ilün

81a

- 1 Göñül esîr-i firâk olduñ ise çekme melâl  
Bilinmez olmasa rûz-ı firâk kadr-i visâl
- 2 Tasavvur ile hayâlüm visâldür heyhât  
Zehî tasavvur-ı bâtil zehî hayâl-i muhâl
- 3 Olalı dîde şehâ dîr hâk-râhuñdan  
Olupdurur gice gündüz nedîm h<sup>w</sup>âb-ı hayâl
- 4 Metâ‘-ı vuslatuñâ dîde müşterî olalı  
Nazarda zâhir ider dürlü dürlü ‘akd-i le’âl
- 5 Sehâbî nûş ideli bâde câm-ı vahdetden  
Göñül visâl ile hicrândan oldı fârig-bâl

## 229

Fe‘ilâtün Mefâ‘ilün Fe‘ilün

- 1 Dil ki tîr-i gama nişâne degül  
Mürg-ı maksûda âşiyâne degül
- 2 Benden ayrılma yâr çâre mi var  
Kimsenüñ ‘ömri câvidâne degül
- 3 Çekdüğüm gicelerle hecrûñde  
Âh-ı cân-sûzdur terâne degül
- 4 Dil-i miskîni eyleyen mecrûh  
Kâkülüñdür efendi şâne degül

<sup>98</sup>Bu sözün versiyonlarından birisi şöyledir: “Küntü kenzen lâ u‘rafu fe ehbabtu en u‘rafe fe halaqtu halkan fe ‘arraftuhum bi fe ‘arefûñi.” “Ben gizli, bilinmeyen bir hazine idim, bilinmeyi istedim, bundan dolayıdır ki halkı yarattım, ben onları onlar da beni bildi.” (İsmail Aclûni, **Keşfü’l-hafâ**, Beyrut 1983, c. 2, s. 173). Hadis-i Kudsî olarak rivâyet edilen bu söz hadislerle ilgili kaynaklarda yer almamaktadır.

- 81b
- 5 Kelimâtum beyân-ı şevkumdur  
İl hayâli gibi fesâne degül
- 6 Ben Sehâbî kalenderem ammâ  
Tarz-ı şî'rûm kalenderâne degül

## 230

Fâ'ilâtün Fâ'ilâtün Fâ'ilâtün Fâ'ilün

- 1 Görđi la'l-i rûh-bahşı halka cân eyler sebîl  
Şermden cennetde pinhân oldu âb-ı selsebîl
- 2 Âsitân-ı yâra yüz sürmek ne haddümdür benüm  
K'olmaz cânûb ol der-gâha perr-i Cebre'îl
- 3 Mülk-i Dârâ'yıla tâc-ı Husrev'i 'arz itseler  
Ragbet itmez baş egüp kûyında bir ednâ zelîl
- 4 Gel tarîk-ı 'ışka vâ'iz güft ü gûdan vâz gel  
Hâl tahsîl it ki bunda assı itmez kâl u kîl
- 5 Müdde'î nazmın Sehâbî beñzedür eş'âruña  
Nâr-ı Nemrûd'ı sanur bî-çâre gül-zâr-ı Halîl

## 231

Fâ'ilâtün Fâ'ilâtün Fâ'ilâtün Fâ'ilün

- 82a
- 1 Mısır-ı hüsn-i yâre karşı 'aynum oldu rûd-ı Nîl  
Yoluña sakkâ-yı çeşmüm eyledi anı sebîl
- 2 'Ârız u la'lûñ temâşâ ideli ey hûr-veş  
Gitdi dilden meyl-i cennet düşdi gözden selsebîl
- 3 Şâm-ı gamda dil belâ bezminde sûzân şem'dür  
Rişte-i cânım benüm ol şem'a olmışdur fetîl
- 4 İtmezem 'ışkuñda cevri müdde'iden ictinâb  
Havf ider mi âteş-i Nemrûd'dan hergiz Halîl
- 5 Kıl sefer zâdın müheyyâ h'âbdan ey dil uyan  
Kârbân-ı 'ömr eyler nâ-gehân 'azm-i rahîl
- 6 Habs-i tenden kurtarup göndermege cân mürğını  
Semt-i gül-zâr-ı fenâya 'ışk-ı yâr oldu delîl
- 7 Nâzil olur gaybdan şî'rûñ Sehâbî dem-be-dem  
Oldı gûyâ bâg-ı tab'ûñ cılve-gâh-ı Cebre'îl

## 232

Fâ'ilâtün Fâ'ilâtün Fâ'ilâtün Fâ'ilün

- 1 Nâle-i bûlbûlden oldu h'âbdan bîdâr gül  
Hâline rahm itmese gül-şende vechi var gül
- 2 'Iyş içün 'işret-geh-i gül-şende mi'mâr-ı sabâ  
La'lden bir hâne yaptı eyledi zer-kâr gül
- 3 Gör ne sihr itdi seher vaktinde nakkâş-ı bahâr  
Kim çemen levhinde oldu nokta-i zengâr gül

- 4 ‘Ârızuñla olalı hem-reng ey sultân-ı hüsn  
Oldı gül-şende reyâhîn hayline ser-dâr gül
- 5 Bâga gûyâ bûy-i hulkuñ ırgürür kim her seher  
Açılup bâd-ı sabâ birle güler oynar gül
- 6 Gül gül oldı tâb-ı mülden gül-sitân-ı ‘ârızuñ  
Gül yüzinde zâhir itdûñ sâkıyâ tekrâr gül
- 7 Dâg-ı hûn-âlûd ile yârem Sehâbî sînede  
Hâr-ı gül-zâr-ı belâdur kim getürmiş bâr gül

## 233

82b

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Kurdı sahn-ı gül-şene taht-ı zümür-rüd-fâm gül  
Lâle-veş aldı ele yâkût-ı terden câm gül
- 2 Hıdmete serv oldı kâyim gonce dutdı câm-ı mey  
Bâga gönderdi kudûmüyle meger peygâm gül
- 3 Dâne-i mihr ü mahabbet ‘arz ider gül-zârda  
Bülbülü anuñla itmişdür esîr-i dâm gül
- 4 Taht-ı gül-zârı müsahhar eyleyüp husrev-misâl  
Mesned-i çübîne geçdi eyledi ârâm gül
- 5 Hâr-ı derde mübtelâ olmazdı bu gül-zârda  
Hüsnüñe öykünmese ey serv-i sîm-endâm gül
- 6 Ey gül-i nâzûk-beden ‘uşşâkdan ‘âr itme kim  
‘İşk-ı bülbül den olubdur şöhre-i eyyâm gül
- 7 Ey Sehâbî âb-ı gül-gûn içelüm kim ‘âkıbet  
Hâkümüzden bitürür bu çerh mînâ-fâm gül

## 234

83a

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Yârsuz âşüfte göñlüm mâyil-i gül-şen degül  
Gül-şeni n’eyler anuñ kim göñli ey gül şen degül
- 2 Her kimüñ göñlinde yokdur ‘ışk nûrından ziyâ  
Zulmet-âbâd-ı vücûdı tîredür rûşen degül
- 3 Gün gibi her zerreden eyler tecellî vech-i yâr  
Mev‘id-i dîdâr ancak Vâdî-i Eymen degül
- 4 Cism-i pür-dâg üzre yapışmış ser-â-ser penbedür  
Görinen cânâ benüm egnümde pîrâhen degül
- 5 Niçe bir çeksün cefâsın ol büt-i sîmîn-berüñ  
Katre-i hûndur Sehâbî bu göñül âhen degül

## 235

Mef‘ûlü Fâ‘ilâtü Mefâ‘ilü Fâ‘ilün

- 1 Virür müdâm bâde-i sâfî safâ-yı dil  
Kıl câm-ı cân-fezâyile sûfî devâ-yı dil
- 2 Seylâb-ı eşk itmedi bir zerre fâyide  
Ben hâk-sârı odlara yakdı hevâ-yı dil
- 3 ‘İşkuñda dil iderdi gam u derd ârzû  
Şâdam ki hâsıl oldu bu gün müdde‘â-yı dil
- 4 Kapuñdan özge yirde şehâ eylemez karâr  
Her menzili nişîmen idimez hümâ-yı dil
- 5 Ey nûr-ı dîde çeşm-i Sehâbî’de sâkin ol  
Kim teng ü tîredür katı halvet-serây-ı dil

## 236

Fâ‘ilâtün Fâ‘ilâtün Fâ‘ilâtün Fâ‘ilün

- 1 Bâg seyri dâfî‘-i hüzn-i dil-i pür-gam degül  
Bâg hurremdür velîkin hâtırum hurrem degül
- 2 Gül-şeni bârân-ı eşkümdür seher nem-nâk iden  
Görinen gül bergi üzre katre-i şeb-nem degül
- 3 Dem mi vardur kim gubâr-ı hâk-râhuñsuz benüm  
Gözlerüm hûn-âbe-i endûh ile pür-nem degül
- 4 ‘Arz-ı hâlüm yâre kâsıd nice irsâl eylesün  
Kim harîm-i âşiyânında sabâ mahrem degül
- 5 Münhanî olmuş egerçi devr cevrenden hilâl  
Kâmetüm gibi Sehâbî bâr-ı gamdan ham degül

83b

## 237

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kanda kim salınsa ol serv-i riyâz-ı i‘tidâl  
Fark-ı a‘dâ hâk-veş yolında olsun pâ-y-mâl
- 2 Eyledi yaşum mukârin ol mehi ben zâr ile  
Necm-i eşküm olsa tañ mı ahter-i ferhunde-fâl
- 3 Hâke düşdi her taraf sâyeñ gibi üftâdeler  
Olalı mâhum cemâlûñ âfitâb-ı bî-zevâl
- 4 Kaşlaruñ resmi misâl çerhe tugra oldugın  
Añladur baksañ göge îmâyile şekl-i hilâl
- 5 Kıllet-i vech-i ma‘îşetden Sehâbî aglama  
Böyle olmuşdur mukadder rûzî-i ehl-i kemâl

## 238

Fâ‘ilâtün Fâ‘ilâtün Fâ‘ilâtün Fâ‘ilün

- 84a
- 1 Buldı hüsnüñ safhası hatt-ı gubâruñdan cemâl  
Konmasun andan o nâzûk-hâtıra gerd-i melâl
  - 2 Sen geyelden gül gibi ey gonçe rengîn câmeler  
Lâle-veş şerh itdi rûy-i zerdümi bu eşk-i al
  - 3 Korkaram nâ-geh ecel câmin sunar hicrân baña  
İçmeden devrân elinden cür'a-i bezm-i visâl
  - 4 Zindedür mihrüñle dil yâduñla gûyâdur zebân  
Şâhid-i hâlüm yiter cânâ benüm sıdk-ı makâl
  - 5 Ey Sehâbî ârzû-yı ebrû-yı dil-dâr ile  
Oldı kaddüm münhanî kûyında mânend-i hilâl

## 239

Mefâ'îlün Mefâ'îlün Mefâ'îlün Mefâ'îlün

- 1 Gehî çeşm-i terümdür menzilüñ ey mâh gâhî dil  
Ne sâhirsın ki âb u âteş olmışdur saña menzil
- 2 Ne var 'ayn-i 'inâyetle nazar kılsañ güzel şâhum  
Yetîm-i eşküme kim yoluña her-dem olur sâyil
- 3 Kadüñ meyl itmedi ben hâk-sâra bâd-ı âhumdan  
Egerçi serv olur bâd-ı hevâdan her yaña mâyil
- 4 Tahammül idemez bî-çâre göñlüm bâr-ı hicrâna  
Dil ise nâ-tüvân sabr ise müşkil 'ömr müsta'cil
- 5 Sehâbî Vâmık u Mecnûn benümle 'ısk bezminde  
İçerken gam şarâbın oldılar ser-mest ü lâ-ya'kil
- 6 Muvâfık rûzigâr irseydi ger deryâ-yı lutfuñdan  
Bulurdi fülk-i dil girdâb-ı mihnetden reh-i sâhil
- 7 Kemâl-i za'f idi mâni' tavâf-ı kûy-ı dil-dâra  
Bihâr-ı 'âb-ı çeşmüm dahi oldı arada hâyil

## 240

Fâ'ilâtün Fâ'ilâtün Fâ'ilâtün Fâ'ilün

- 84b
- 1 Yâ beni tîg-ı cefâ vü cevri ile yüz pâre kıl  
Yâ 'inâyet 'aynı birle hâlûme nezzâre kıl
  - 2 Eyle yâ ben zerreyi sâhib-vücûd ey âfitâb  
Yâ 'adem mülkine gönder dünyeden âvâre kıl
  - 3 Firkatüm şâmın münevver kılmaga ey nâr-ı âh  
Her şerâruñ âsumân-ı mihre bir seyyâre kıl
  - 4 Mâh-ı bedr olmuş mukâbil mihr-i hüsn-i yâr ile  
Gökde dûd-ı âh ile ey çerh yüzün kara kıl
  - 5 Ey tabîb-i cân firâkuñdan Sehâbî hastedür  
Derdine ol derd-mendüñ lutf ile bir çâre kıl

## 241

Fâ'ilâtün Fâ'ilâtün Fâ'ilâtün Fâ'ilün

- 1 Ten za'îf oldu gamuñdan durma cânım gitme gel  
Üstüme irişmeden hicrân ile hayl-i ecel
- 2 Sîneme geldükçe tîrûñ oldu tenden cân revân  
Şâddur göñlüm ki geldi yirine ni'me'l-bedel
- 3 Âfitâbum tal'atinden nûr iderdi iktibâs  
İnse gökden ger yire hurşîd-i tabân fi'l-mesel
- 4 Sîne-i mecrûhuma olurdu merhem sâkıyâ  
Olsa ger hışt-ı ser-i hum bâde lâyı birle hall
- 5 Agladur gerdûn beni bilmez ki bir gün irişür  
Tâk-ı zengârîsine seyl-âb-ı eşkümden hâlel
- 6 İtmesün benden taleb zâhid salâh u zühdi kim  
'Işk u rüsvâlık nasîb oldu baña rûz-i ezel
- 7 Olmasa ger sihr itmezdi Sehâbî'nüñ sözi  
Beyle ol vahşî gazâli mâyl-i şî'r u gazel

## 242

Fe'ilâtün Fe'ilâtün Fe'ilâtün Fe'ilün

85a

- 1 Oldı çün silsile-i 'ışk ile pâ-beste göñül  
Kayd-ı 'âlemden olursa n'ola vâreste göñül
- 2 Ey tabîb-i dil ü cân hâline bir kez nazar it  
Ki ser-i râh-ı mezelletde yatur haste göñül
- 3 Za'f bî-çâreye bir vech ile müstevlîdür  
Ki gamuñda idemez nâlişi âheste göñül
- 4 Kaşlaruñ 'aksi nazardan gide mi kim anı  
Nakş ider gözlerüm elvâhına peyveste göñül
- 5 Nâvekûñ gül-büni ucındaki peykânuñdan  
Sînede gonçe-i nevreste kılur deste göñül
- 6 Kıl mekân dîdemi dilden güzer it kim cânâ  
Mesken olmaga degüldür saña şâyeste göñül
- 7 Ey Sehâbî ne 'aceb ravza imiş bâg-ı vücûd  
K'oldı ol ravzaya bir gonçe-i nev-reste göñül

## 243

Fâ'ilâtün Fâ'ilâtün Fâ'ilâtün Fâ'ilün

- 1 Safha-i çerh üzre yazmış kıl-k-i kudret bir hilâl  
Ebrû-yı dil-dârdan beñzer ki almişdur misâl
- 2 Levh-ı gerdûn üzre âb-ı zerle itmişdür rakam  
Bü'l-'aceb bir nûn ki ol nûn oldu 'ayn-ı 'ıyde dâl
- 3 Merdüm-i bârîk-bîn bulmuş sevâd-ı leylde  
Ma'nî-i bârîk u rengîn rûşen ü nâzûk hayâl



85b

- 4 Bahr-i Nîl'ün fülk-i zerrîni çekildi sâhile  
Kârbân-ı savm gûyâ itdi 'azm-i irtihâl
- 5 Gûşe-i ebrûsını izhâr kıldı var ise  
Şâhid-i 'ıyd itmek ister 'âşıkâ 'arz-ı cemâl
- 6 Ey Sehâbî na'l-i zerrîn-i semend-i şâhdur  
Kim felek 'izzetle başı üzre saklar mâh u sâl
- 7 Kurretü'l-'ayn-i selâtîn şeh Süleymân-ı zamân  
Âfitâb-ı evc-i 'izzet zıll-ı lutf-ı Kirdigâr<sup>99</sup>
- 8 Nice kim maşrıkdén eyler husrev-i hâver tulû'  
Görmesün hurşîd-i 'ömr ü devleti hergiz zevâl
- 9 Her sabâhı 'ıyd ola her gicesi Kadr ü Berât  
Tâ ola efvâhda mezkûr eyyâm u leyâl
- 10 Baht u devlet hem-'inân ikbâl u nusret hem-rikâb  
Şâdumân olsun ehibbâsı 'adûsı pây-mâl

## HARFU'L-MÎM

244

Mef'ûlü Fâ'ilâtü Mefâ'ilü Fâ'ilün

- 1 Gamzeñ kılıcınıñ güzelüm sîne-çâkiyem  
Korkutma hancerüñle ki anuñ helâkiyem
- 2 Derd ü elemden ide beni sanma ihtirâz  
Derdüñ ölümlüsi elemüñ derd-ñâkiyem
- 3 Pîr-i mugân ayagina yüz süreyüm diyü  
Yıllardurur tarîk-ı harâbât hâkiyem
- 4 Ehl-i fenâya neş'e-i vahdet virür sözüm  
Bâg-ı cihânda bâde-i tevhîd tâkiyem
- 5 İtdi beni halâs Sehâbî gumûmdan  
Sâfî meyüñ firîfte-i tab'-ı pâkiyem

245

Mefâ'ilün Mefâ'ilün Mefâ'ilün Mefâ'ilün

86a

- 1 Nazarda sîm-i eşk ü sînem üzre tâze dâgum var  
Şeh-i iklîm-i derdem sîm ile zerden ferâgum var
- 2 Gehî ser-menzilüm kûh-i belâ geh vâdî-i gamdur  
Cihânda sanmañuz kim bellü başlu bir yatagum var
- 3 Yürekde dâgdur lâle gözümde nişter sebze  
Ne meyl-i lâle-zâr u ne hevâ-yı seyr-i bâgum var
- 4 Egerçi subh-ı 'ayşum şâm-ı gamdan tîredür ammâ  
Hayâl-i şem'-i ruhsâruñla bir rûşen çerâgum var
- 5 Sehâbî pâdişâh-ı vakt olup Cemşîd'e baş egmez  
Benüm kim gûşe-i mey-hânede elde ayagum var<sup>100</sup>

<sup>99</sup>Bu mısra gazelin kâfiyesine uymamaktadır.

## 246

Fe‘ilâtün Fe‘ilâtün Fe‘ilâtün Fe‘ilün

- 1 Yandı bes kim tutuşup nâr-ı mahabbetle tenüm  
‘Âkıbet oldu semender gibi âteş vatanum
- 2 Gonçe-veş hâr-ı gamuñla yüregüm kan oldu  
Gül gibi çâk olursa ne ‘aceb pîrehenüm
- 3 İtdi zâhir dem-i vuslatda müjem hûn-ı ciger  
Nev-bahâr oldu yine virdi gül-i ter dikenüm
- 4 ‘Işk bâğında ben ol lâle-i hûnîn-kefenem  
Ki nikâb-ı ruh-ı havrâ olacakdur kefenüm
- 5 Husrev-i mülk-i sühan dirdi Nevâyî baña ger  
Ey Sehâbî işideydi kelimât-ı hasenüm

## 247

Mefâ‘ilün Mefâ‘ilün Mefâ‘ilün Mefâ‘ilün

86b

- 1 Fesâhat deştine fikret semendiyle güzâr itdüm  
O vâdîde olan ma‘nî gazâlin hep şikâr itdüm
- 2 İşitdüm tîşe urmuş sûret-i Şîrîn’e Ferhâd’uñ  
Mezârın Bî-sütûn dagında buldum seng-sâr itdüm
- 3 Cihân vîrânesin itmeme nişîmen bûm-veş hergiz  
Ki ben ‘Ankâ-sıfat Kâf-ı kanâ‘at ihtiyâr itdüm
- 4 Binâ-yı ‘âlemi tarh itmeden takdîr bennâsı  
Esâs-ı hâne-i ‘ışkî şehâ ben üstüvâr itdüm
- 5 Şikâf-ı sîneden çekdi zebâne âteş-i pinhân  
Zebân-ı hâl ile dil-dâra sûzum âşikâr itdüm
- 6 Sehâbî kanda kim itdüm beyân vasf-ı leb-i yâri  
Hezârân zâhid-i perhîz-kârı bâde-h<sup>w</sup>âr itdüm

## 248

Mefâ‘ilün Mefâ‘ilün Mefâ‘ilün Mefâ‘ilün

- 1 Rakîbî bezm-i vasla mahrem itdi yâr ‘âr itdüm  
Visâlinden geçüp hicrân belâsın ihtiyâr itdüm
- 2 Meşâma irmedi bûy-i vefâ çün hüsn bâğında  
Sabâ-veş bir nefes eglenmedüm andan güzâr itdüm
- 3 İçerken gayr ile yârı görüp kan agladı çeşmüm  
Surâhî-veş gönül râzın o demde âşikâr itdüm
- 4 Kadûñ yâdiyle çekdüm bir elif bu sîne-i çâke  
Güzel bir serv-kad mahbûb gûyâ der-kenâr itdüm

<sup>100</sup>‘Râ’ harfî ile sona eren ve o harfte yer alması gereken bu gazel yanlışlıkla ‘mim’ hafinde yer verilmiştir. bu gazelin 1, 2 ve 5. beyitleri ‘Râ’ harfinde yer alan 113 numaralı gazelin aynı numaradaki beyitleri ile aynıdır.

- 87a 5 Sehâbî lâle-zâra meyl idelden ol sehî-kâmet  
Sirişk-i al ile etrâfımı hep lâle-zâr itdüm

## 249

Mefâ'ilün Fe'ilâtün Mefâ'ilün Fe'ilün

- 1 Nigâr vaslını fasl-ı bahâra beñzetsdüm  
Fırâkını elem-i rûzigâra beñzetsdüm
- 2 Hayâl-i şerbet-i la'lûñle çeşm-i pür-hûnumı  
Bu dâne dâne yaşumla enâre beñzetsdüm
- 3 Fırâk tıgıyile çâk çâk olan cismi  
Bu kanlu dâgum ile lâle-zâra beñzetsdüm
- 4 Başımı kaldurabilmem hacâletümden kim  
Benefşeyi hat-ı miskîn-i yâra beñzetsdüm
- 5 Bu âh-ı pür-şereri şâm-ı savm-ı hecrinde  
Çerâglar ile müzeyyen menâra beñzetsdüm
- 6 Dürer gibi sade-i çeşm-i terde galtândur  
Sirişkümü güher-i âb-dâra beñzetsdüm
- 7 Bitürdi sebze-i hatt-ı nigârı aglayarak  
Sehâbî çeşümü ebr-i bahâra beñzetsdüm

## 250

Mef'ûlü Fâ'ilâtü Mefâ'ilü Fâ'ilün

- 87b
- 1 Hûn-âb-ı gamla toptoludur gonce-veş tenüm  
Çâk olsa gül gibi n'ola ceybümle dâmenüm
  - 2 Virdi şikest şîşe-i çerhe degül nücûm  
Atıldı şâm-ı gam göge seng-i felâhanum
  - 3 Sanma beni mukayyed-i dâm-ı cihân ki ben  
Şeh-bâz-ı evc-i ma'rifetem Sidre meskenüm
  - 4 Pervâz-gâh-ı 'izz ü kıdemden nüzûl idüp  
Oldı çehâr-tâk-ı 'anâsır nişîmenüm
  - 5 Gezdüm mücerredâne cihânı Mesîh-vâr  
Gerd-i te'alluk itmedi âlûde dâmenüm
  - 6 Rûhu'l-kudüs benümle Sehâbî karîn iken  
Hâşâ ki dîv-i nefis ü hevâ ola reh-zenüm

## 251

Fâ'ilâtün Fâ'ilâtün Fâ'ilâtün Fâ'ilün

- 1 Devr-i güldür sâkıyâ gel bâde sun nûş idelüm  
Mest olup bir dem gam-ı dehri ferâmûş idelüm
- 2 'Azm-i gül-zâr eyle ey mutrıb ki hengâm-ı sabûh  
'Andelîbi nagme-i nâleyle hâmûş idelüm

- 3 Baht uyanmaz bir nefes ey dîde sen hem h<sup>w</sup>âba var  
H<sup>w</sup>âbda şâyed ki ol mâhı der-âgûş idelüm
- 4 ‘İşk bezminde degüldür ‘akl mahrem sâkıyâ  
Bir kadeh sun anı başdan mest ü bî-hûş idelüm
- 5 Ey Sehâbî gûş idüp ney içelüm mey niçe bir  
Vâ‘izüñ varup kuru efsânesin gûş idelüm

252

Mefâ‘ilün Fe‘ilâtün Mefâ‘ilün Fe‘ilün

88a

- 1 Terahhum eylemedi hâlûme habîb benüm  
Meded ki aňlamadı derdümi tabîb benüm
- 2 Yakardı şu‘le-i âh ile gül gibi çemeni  
Figânum itse idi gûş ‘andêlb benüm
- 3 Esirge yaşımı gör geçme ol nigâra beni  
Gelüp di yüzüme nem gördüñ ey rakîb benüm
- 4 Tabîb sabr u şikîb ile çâre itme baña  
Ki arturur gamımı sabr ile şekîb benüm
- 5 Sihâm-ı cevre nişân itdi âl ile aldı  
Sehâbî göñlümi bir şûh-ı dil-firîb benüm

253

Fâ‘ilâtün Fâ‘ilâtün Fâ‘ilâtün Fâ‘ilün

- 1 Hûn-ı dilden hâlî olmaz bir nefes câmum benüm  
Bilmezem kim nic’olur<sup>101</sup> âhır ser-encâmum benüm
- 2 Nice bir zülfüñle ruhsârüñ gamında dostum  
Âh u efgân ile geçsün subh ile şâmum benüm
- 3 Dem-be-dem dest-i sabâya virme miskîn zülfüñi  
Gitmesün bâd-ı hevâya sabr u ârâmum benüm
- 4 Nâ-tüvân olmuş sabâ çeşmüm gibi ey dil meger  
Mürg-ı rûhum irgüre dil-dâra peygâmum benüm
- 5 Pâyına yüz sürdi gül baş egdi serv-i [ser-]büleñ<sup>102</sup>  
Seyr-i gül-zâr ideli serv-i gül-endâmum benüm
- 6 Bâde-i sâfi koyup vâf itme vâ‘iz Kevser’i  
Şerbet-i şîrîn ile telh eyleme kâmum benüm
- 7 Şi‘r-i pür-sûzumdan özge hıdmetinde şâhımuñ  
Kimse yâd itmez Sehâbî hayr ile nâmum benüm

254

Mefâ‘ilün Mefâ‘ilün Mefâ‘ilün Mefâ‘ilün

<sup>101</sup>Metinde “nice olur” şeklindedir, vezin tutmadığı için bu şekilde değiştirildi.

<sup>102</sup>Metne vezin gereği ilâve edilmiştir.

88b

- 1 Mahabbet sâgarından mey diyü hûn-ı ciger çekdüm  
Helâk oldum humârından o deñlü derd-i ser çekdüm
- 2 Büküldi bâr-ı gamla hecr yayın çekmeden kaddüm  
Sen ey ebrû-kemânum bilmedüñ kim ben neler çekdüm
- 3 Selâmet hırkasın zühhâd-veş geydümse ‘ayb itme  
Ki tîr-i ta‘ne-i a‘dâya karşı bir siper çekdüm
- 4 İşit benden nasîhat açma râzuñ kimseye kim ben  
Kimi kim mahrem-i râz eyledüm andan zarar çekdüm
- 5 Geçersem ben ne var mahbûb ile mey ârzûsından  
Sehâbî câm-ı mihnetden ciger kanın yiter çekdüm

255

Fâ‘ilâtün Fâ‘ilâtün Fâ‘ilâtün Fâ‘ilün

- 1 Gayrlar sözüyle sanma şem‘-veş germiyyetüm  
Âteş-i sûz-ı dilümdendür tenümde hırvatüm
- 2 Âşiyân-ı mürğ-ı endûhı alaldan başına  
Oldı Mecnûn hânekâh-ı ‘ışkda hem-kisvetüm
- 3 Ten şikâfindan çıkan sûz-ı derûnum şu‘lesi  
Şâm-ı hecr-i yârda olmuş çerâğ-ı halvetüm
- 4 Benden ey ‘âkıl hıred resmin temennâ itme kim  
Bir perî nezzâresinden her dem artar hayretüm
- 5 Encümün eflâk etbâkındaki gevherlerin  
Habbeye saymaz Sehâbî şâh-bâz-ı himmetüm

256

Mefâ‘ilün Mefâ‘ilün Mefâ‘ilün Mefâ‘ilün

89a

- 1 Segân-ı kûy-ı dil-dâra vefâ itdüm cefâ gördüm  
Cefâ vü cevri-yârânı dil ü câna revâ gördüm
- 2 Sözüüm tut ihtirâz it ey gönül mahbûb sevmekden  
Ki ben sevdüm nasîhat tutmadum hayli belâ gördüm
- 3 Felekden bâde-i râhat taleb kılma ki câmında  
Mey-i ‘ayş aradum zehr-i gam u derd ü ‘anâ gördüm
- 4 Ta‘accüb kılma ger inkâr idersem şeyh-i sâlûsa  
Ki delk-i zerkını âlûde-i gerd-i riya gördüm
- 5 Harâbât erlerin bî-gâne sanma fakr kûyında  
Sehâbî anları bahr-i fenâda âşinâ gördüm

257

Fâ‘ilâtün Fâ‘ilâtün Fâ‘ilâtün Fâ‘ilün

- 1 Sûretâ ehl-i fenânuñ gerçi hâk-râhıyam  
Ma‘rifet eflâkinüñ ma‘nî yüzinden mâhıyam

- 2 Benden öñ Mecnûn ki geçdi âh-ı âteş-nâk ile  
Ol ‘alem-dârumdurur ben mülk-i ‘ıškuñ şâhıyam
- 3 Kulle-i ‘ıškuñ peleng ü şîr-i saydı bil beni  
Sanma deşt-i hîlenüñ zâhid-sıfat rûbâhıyam
- 4 Zerre-veş virsem hevâya kendümi olmaz ‘aceb  
Hirmen-i derdüñ ruh-ı zerdümle berg-i kâhıyam
- 5 Neş’e-i şevkum Sehâbî dem-be-dem olur füzûn  
Cür‘a-h‘wâr-ı ‘ârif-i Câm’em ‘Ubeydullâh’îyem

## 258

- 89b Fâ‘ilâtün Fâ‘ilâtün Fâ‘ilâtün Fâ‘ilün
- 1 Tâb-ı tebden germ olaldan cism-i cânânum benüm  
Şem‘-veş yanar dem-â-dem rişte-i cânum benüm
- 2 Ditredür gam cism-i gam-perverdümü her gâh kim  
Tâb-ı tebden ditrese serv-i hırâmânum benüm
- 3 Mihr tâbından mı bilmem yâ hevâ te’sîridür  
Kim kızarmış lâle-veş gül-berg-i handânum benüm
- 4 İtdüğüm âhuñ felekde şu‘lesinden gâlibâ  
Eyledi kesb-i harâret mihr-i tâbânum benüm
- 5 Âteş-i tebden Sehâbî dil yanardı şem‘-vâr  
Ger aña su sepmeyeydi çeşm-i giryânnum benüm

## 259

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Niçe bir hecrüñ beyâbânında ser-[ger]dân<sup>103</sup> olam  
Vuslatuñ ‘ıydında kıblem isterem kurbân olam
- 2 Menzil-i sultân-ı ‘ıškuñdur vücûdum kişveri  
Kıl beni ma‘mûr şâhum koma kim vîrân olam
- 3 İtme ben hâkîden ey ebr-i kerem feyzüñ dirîg  
Tâ ki ednâ katre iken bahr-i bî-pâyân olam
- 4 Ben gedâ kûyuñda zillet hâkin ey Yûsuf-likâ  
Virmezem bi’llâh ki Mısr-ı ‘izzete sultân olam
- 5 Cânuma ten hırkası bâr-ı girândur isterem  
Ey Sehâbî yakasın çâk eyleyüp ‘uryân olam

## 260

- 90a Mef‘ûlü Mefâ‘ilü Mefâ‘ilü Fe‘ûlün
- 1 Şevkuñla seher gül-şene giryân güzere itdüm  
Gül ruhlarını şeb-nem-i eşkümle ter itdüm

<sup>103</sup>Metne vezin gereği ilâve edilmiştir.

- 2 Bir dem işigün'den olalı dūr vüçûdum  
Biñ kez 'adem-âbâd-ı fenâyâ sefer itdüm
- 3 Göz merdümüne nūr viren hūr u perîden  
Gördükçe senüñ hüsñüñi kat'-ı nazar itdüm
- 4 Tavf itmege gül-zâr-ı ser-i kûy-ı nigârı  
Cân bülbulini hem-reh-i bâd-ı seher itdüm
- 5 Zülfinde kelâm oldu Sehâbî çü mutavvel  
Evsâf-ı dehânında sözüm muhtasar itdüm

## 261

Fâ'ilâtün Fâ'ilâtün Fâ'ilâtün Fâ'ilün

- 1 Hâk-i râhuñ dem-be-dem eşkümle nem-nâk isterem  
Dâmenüñ ya'nî gubâr-ı gayrdan pâk isterem
- 2 İçdügüm hûn-âbeyi ey gül saña 'arz itmege  
Gonce-veş her dem dil-i pür-hûnumı çâk isterem
- 3 Eylerem hicrân deminde şerbet-i vasluñ ümîd  
Zehrden ya'nî halâs olmaga tiryâk isterem
- 4 Gül-şen-i 'âlemde ben her serve olmam pây-bend  
Bir yüzi gül gonce-leb reftârı çâlâk isterem
- 5 Der-gehinden kim gubârı çeşm-i câna sürmedür  
Ey sabâ iki gözümçün bir avuç hâk isterem
- 6 Gözlerümden eylerem seyl-âb-ı hûn her dem revân  
Ey Sehâbî hırka-i âlûdemi pâk isterem

90b

## 262

Mefâ'ilün Mefâ'ilün Mefâ'ilün Mefâ'ilün

- 1 Metâ'-ı derd-i cânânı getürdüm câna tapşurdum  
İletdüm nakd-i cânı mihnet-i cânâna tapşurdum
- 2 Mukayyed eyledüm dil hânesinde'ışk-ı dil-dârı  
Zelîhâ gibi ya'nî Yûsuf'um zindâna tapşurdum
- 3 Mahabbet nakdini gencîne-i sînemde câ kıldum  
Nihân itdüm o genci menzil-i vîrâna tapşurdum
- 4 Gelüp mihrüñ derûn-ı dilde mihmân-ı 'azîz oldu  
Revân cân Mısır'ını ol Yûsuf-ı Ken'ân'a tapşurdum
- 5 Ferâgat gül-şeninde gül gibi sen şâd u handân ol  
Ki ben gitdüm nesîm-âsâ seni Yezdân'a tapşurdum
- 6 Rakîbî mahrem-i râz eyledüm fâş oldu esrârım  
Hatâ itdüm dirîgâ gevheri nâ-dâna tapşurdum
- 7 İletdüm nazm-ı gevher-bârımı dergâh-ı sultâna  
Sehâbî lû'lü-i nâ-süfsemi 'Ummân'a tapşurdum

## 263

Mefâ'ilün Mefâ'ilün Mefâ'ilün Mefâ'ilün

91a

- 1 Zebâne âteş-i sûz-ı derûnumdan ‘ıyân itdüm  
Zebân-ı hâl ile dil-dâra ahvâlüm beyân itdüm
- 2 Metâ‘-ı vasl-ı yârı nakd-i câna almak isterdüm  
Müyesser olmadı veh kim tasavvurdan ziyân itdüm
- 3 Yakup kâl eyledüm nâr-ı mahabbetde dil-i zârı  
Bu kalb-i hâlisi ol âteş içre imtihan itdüm
- 4 Şikâyet itmek için ol sanemden gökde ‘Îsâ’ya  
Kemend-i âhumı kasr-ı sipihre nerdübân itdüm
- 5 Melekler görmesün ‘aks-i cemâlin diyü reşkünden  
Duhân-ı âh ile mir’ât-ı hurşîdi nihân itdüm
- 6 Sehâbî çıkmazam mey-hânedden şimden girü zîrâ  
Hayâtum nakdini vakf-ı harâbât-ı mugân itdüm

264

Fâ‘ilâtün Fâ‘ilâtün Fâ‘ilâtün Fâ‘ilün

- 1 Kayd-ı ‘âlemden diler gönlüm ki fârig-bâl olam  
Tekye-i tecrîdde bî-kayd bir abdâl olam
- 2 Sâkin olup künc-i cem‘iyyetde fârig niçe bir  
Sebz-hatlar zülf ü hâlinden perîşân-hâl olam
- 3 Fark-ı ehl-i fakrda tutup gubâr-âsâ karâr  
Meskenet yolında ya‘nî hâk-veş pâ-mâl olam
- 4 Ten nuhâsı kâbil-i iksîr-i ‘ışk olsun diyü  
Fikrüm oldur kim kanâ‘at pûtasında kâl olam
- 5 Ey Sehâbî bes degül mi bu sa‘âdet baña kim  
Bende-i şâh-ı felek-kadr ü hümâyûn-fâl olam

265

Fe‘ilâtün Fe‘ilâtün Fe‘ilâtün Fe‘ilün

91b

- 1 Kûh-ı endûh ile ser-geşte-i hâmûn oldum  
Yitiş ey Leylî-i gül-çehre ki Mecnûn oldum
- 2 Demidür kim irişe kalbüme râhat zîrâ  
Ki bu gün dehr gamından katı mahzûn oldum
- 3 İnledür rişte-i cânı ten-i zârumda belâ  
Nagme-i nâle-i dil-sûz ile kânûn oldum
- 4 N’ola dîvâne-sıfat her yaña baksam ki yine  
Bir perî nergis-i fettânına meftûn oldum
- 5 Li’llâhi’l-hamd Sehâbî ki gazâ niyyetine  
Hem-reh-i ‘asker-i mansûr-ı hümâyûn oldum

266

Fâ‘ilâtün Fâ‘ilâtün Fâ‘ilâtün Fâ‘ilün



- 1 Mûy-i jûlîdemle âh-ı âteşînüm ey sanem  
Seyr idenler sandı oldum sâhib-i tûg u 'alem
- 2 Tîrûnî geh dil çeker pehlûya gâhî cân-ı zâr  
Serv-kad mahbûb olur her yirde lâ-bûd muhterem
- 3 İtme benden cür'a-i câmuñ dirîg ey mug-beçe  
Sâyilin mahrûm kılmaz sâhib-i lutf u kerem
- 4 Rû-sefid olsun gözüm kim za'ferânî çehremi  
Eşk-i gül-gûnumla eyler erguvânî dem-be-dem
- 5 Sabr kalbümde firâr eyler Sehâbî gelse 'ışk  
Eyle kim sultân-ı mülk-i Rûmdan şâh-ı 'Acem

267

Mefâ'îlün Mefâ'îlün Mefâ'îlün Mefâ'îlün

92a

- 1 Senüñ leylî saçuñ vasfın kılurken ey perî şî'rüm  
İder mecnûn-sıfat 'ışk ehlini dilden berî şî'rüm
- 2 Me'ânî âfîtâb-ı tal'atından olalı tâlî  
Hacâletden tere gark itdi mihr-i hâveri şî'rüm
- 3 Kelâmumdan mübeyyendür me'ânî mülk-i ma'nîde  
Benem İskender ü âyîne-i İskenderî şî'rüm
- 4 Bağışlar mürdeye i'câz-ı nazmum rûh 'Îsâ-veş  
İderdi sihrden tevbe işitse Sâmirî şî'rüm
- 5 Yakardı defterin dîvânı birle nâr-ı sûzâna  
Harâretle eger görseydi bir gün Âzerî şî'rüm
- 6 Elifler nîze mîmi bir dogan her beyti bir safdur  
Fesâhat mülki teshîrine çekmiş 'askeri şî'rüm
- 7 Kuru efsâne zann itme Sehâbî sihr-i mutlak bil  
Ki nazma mâyl itmiş serv-kad dil-berleri şî'rüm

268

Mefâ'îlün Mefâ'îlün Mefâ'îlün Mefâ'îlün

- 1 Nazardan olalı gâyib nihâl-i nâz-perverdüm  
Hazân bergi gibi gamdan sarardı çehre-i zerdüm
- 2 Güneş nûr iktibâs eylerdi sâyemden eger bir gün  
Bıraksa üstüme sâye nihâl-i nâz-perverdüm
- 3 İrişmez sem'üme gül-şende bûlbûl nâlesi gûyâ  
Ki hâmûş oldu gûş eyler benüm efsâne-i derdüm
- 4 Uyarma ey felek kandîl-i mâhı şâm-ı hecrümde  
Ki anı söndürür âh eylesem nâ-geh dem-i serdüm
- 5 Beni Mecnûn-sıfat kıldı taleb deştinde âvâre  
Sehâbî seyre 'âzim olalı mâh-ı cihân-gerdüm

269

- Fâ'ilâtün Fâ'ilâtün Fâ'ilâtün Fâ'ilün
- 92b
- 1 Sanma dil mürğin lebüñ vafında hâmûş eyleyem  
Hâse li'llâh kim nemek hakkın ferâmûş eyleyem
  - 2 Bende-i ednâ diyü bir gün hitâb itseñ baña  
Der-gehüñde mihr ü mâhı halka-der-gûş eyleyem
  - 3 Şîşe-i dil bâde-i şevkuñla mâl-â-mâldur  
Humm-ı mey gibi 'aceb mi dem-be-dem cûş eyleyem
  - 4 Sun demidür ey şeker-leb şerbet-i la'lüñ baña  
Niçe bir hûn-âbe-i endûh u gam nûş eyleyem
  - 5 Tâli' olup ger şeb-i vasluñda mâhum âfitâb  
Gökde dûd-ı âh ile anı siyeh-pûş eyleyem
  - 6 İsterem sâkî cünûn bezminde câm-ı 'ışk ile  
'Aklımı lâ-ya'kıl idüp hûşı bî-hûş eyleyem
  - 7 Ey Sehâbî istemem bahtum gibi bî-dârlık  
Hwâbda bir şeb ki ol mâhı der-âgûş eyleyem

270

- Mefâ'ilün Mefâ'ilün Mefâ'ilün Mefâ'ilün
- 93a
- 1 Meded kim geçdi 'ömrüm bir civân 'ışkında pîr oldum  
Hayâtum nakdini yolında harc itdüm fakîr oldum
  - 2 Felek ben nâ-tüvânı dûr idelden âfitâbumdan  
Felâket yollarında sâye-veş hwâr u hakîr oldum
  - 3 Fenâ hâkisterin gam külhanında ideli bister  
Cihânda sanuram kim husrev-i gerdûn-serîr oldum
  - 4 Livâ-yı âhı kaldurdum sirişkünden çeküp 'asker  
Melâmet kişverin zabt eyledüm ya'nî emîr oldum
  - 5 Uyardum dilde şem'-i mihrini bir mâh-ruhsârûñ  
Sehâbî gün gibi bir 'âşık-ı rûşen-zamîr oldum

271

- Fâ'ilâtün Fâ'ilâtün Fâ'ilâtün Fâ'ilün
- 1 Hırkamı yakdum ridâmı bâde-pâlâ eyledüm  
Kendümi sûfî mugân deyrinde rüsvâ eyledüm
  - 2 Görmege ruhsârını bir kaşı yânuñ sînde  
Zahm-ı tîrinden hezârân rahne peydâ eyledüm
  - 3 Cân gözin açdum ruhı mir'âtına kıldum nazar  
Anda gördüm sûret-i cânı temâşâ eyledüm
  - 4 Kıldı ihyâ resm-i 'ışkı Kays u Vâmık benden öñ  
Gitdi anlar şimdi ben ol resmi ihyâ eyledüm
  - 5 Vâli itdüm şahne-i 'ışkı vücûdum şehrine  
Düzd-i 'aklı beste-i zencîr-i sevdâ eyledüm

- 6 Sürdi rahş-i fikreti tab‘um fesâhat mülkine  
Gevher-i ma‘nâya irdüm anda yagmâ eyledüm
- 7 Ey Sehâbî mihnet-i hicrâna oldum mübtelâ  
Her kaçan kim devlet-i vaslın temennâ eyledüm

## 272

Fâ‘ilâtün Fâ‘ilâtün Fâ‘ilâtün Fâ‘ilün

93b

- 1 Göñlümi zencîr-i zülf-i yâr ile bend eyledüm  
Târ-ı zülfin rişte-i cân birle peyvend eyledüm
- 2 Hâk-i zillet içre kaldum nâ-tüvân mânend-i serv  
Tâ ki servi nahl-i kadd-i yâra mânend eyledüm
- 3 Çün müyesser olmadı gördüm visâlün devleti  
Göñlümi vasluñ hayâli birle hursend eyledüm
- 4 İtmedi pendüm dil-i mecnûna te’sîr ey hakîm  
Pend ile hayli cünûn ehlin hired-mend eyledüm
- 5 Tu‘me kılsunlar diyü şâyed kilâb-ı kûy-ı yâr  
Ey Sehâbî cismümi pergend pergend eyledüm

## 273

Fâ‘ilâtün Fâ‘ilâtün Fâ‘ilâtün Fâ‘ilün

- 1 Gam beni yakmazdı ger âhumla dem-sâz olmasam  
Ugramazdum derde ger gam birle hem-zâr olmasam
- 2 Yüz tutup baña gelür miydi belâ vü derd ü gam  
Zümre-i ‘uşşâkdan ‘ışk ile mümtâz olmasam
- 3 Kanda olurdu me‘ânî mürğî saydum dem-be-dem  
Âsumân-ı ma‘rifet evcinde şeh-bâz olmasam
- 4 Vahş u tayr etrâfım almazdı benüm Dâvûd-vâr  
Ger Zebûr-ı ‘ışk kavlinde hoş-âvâz olmasam
- 5 Sâz ehli gibi olurdu benümde ragbetüm  
Ey Sehâbî bezm-i ‘uşşâk içre nâ-sâz olmasam

## 274

Mefâ‘ilün Mefâ‘ilün Mefâ‘ilün Mefâ‘ilün

94a

- 1 Hadüñden lâle-i hamrâ hacil berg-i gül-i ter hem  
Kadüñden şâh-ı Tûbâ münfa‘il serv-i sanavber hem
- 2 Gören ruhsâruñı zülfüñ şebinde vechi var dirse  
Meh-i zulmet-nişîmen âfitâb-ı sâye-perver hem
- 3 Sen ol Mısr-ı melâhat Yûsuf’ısın kim Zelîhâ-veş  
Cihân mâlikleri fermân-berüñdür belki çâker hem
- 4 Gamuñda girye-i pinhânumı sûz-ı derûnumla  
Leb-i huşk itdi veh kim âşikârâ dîde-i ter hem

- 5 Te‘accüb eyleme ger yârem üzre dâg yakdumsa  
Ki oldu her fetîli dâgumuñ bir yâreme merhem
- 6 Göñül ser-germdür bir şem‘-i bezm-efrûza bir yirde  
Ki anda idemez pervâz pervâne semender hem
- 7 Sabâ bi’llâh lutf it yâre sen peygâmumı ırgür  
Ki sûzumdan yanar Hüdhüd kebâb olur kebûter hem
- 8 Yirüm geh medrese geh hân-kâh olurdı ey vâ‘iz  
Eger rehn olmayaydı bâdeye hırkayla defter hem
- 9 Sehâbî çün benüm yârüm muvâfıkdur ne bâküm var  
Benümle ger muhâlif olsa farzâ çerh u ahter hem
- 10 Bi-hamdi’llâh diyâr-ı Rûmda bir şâha kul oldum  
Ki ednâ bendesidür Kisrâ [vü] Fagfûr u Kayser hem

## 275

Mef‘ûlü Fâ‘ilâtü Mefâ‘îlü Fâ‘ilün

94b

- 1 Gamdan halâs olup gün olur mı ki şâd olam  
Devründe ey felek niçe bir nâ-murâd olam
- 2 Lâyık mıdur şehâ ki cenâbuñda rûz u şeb  
Bîgâne âşinâ ola ben bende yad olam
- 3 ‘İlm-i cedelde eylemezem kimse ile bahs  
Hâşâ ki müdde‘î gibi ehl-i ‘inâd olam
- 4 Sultân-ı Rûm bendesine bendelik baña  
Yegdür ki şâh-ı memleket-i Keykubâd olam
- 5 Zikrüm Sehâbî vird-i zebân ide şeyh u şâb  
Bir gün eger segân ile kûyında yâd olam

## 276

Fâ‘ilâtün Fâ‘ilâtün Fâ‘ilâtün Fâ‘ilün

- 1 Nev-bahâr oldu hîred şimdi zebûnumdur benüm  
Kıl hazer ‘âkil ki hengâm-ı cünûnumdur benüm
- 2 Dil hîred efsânesin gûş itmez oldu kim aña  
Bâ‘is-i teşvîş ‘akl-ı pür-füsûnumdur benüm
- 3 Gice gündüz mihr ü meh kandîline viren ziyâ  
Sûz-ı dilden şu‘le-i şem‘-i derûnumdur benüm
- 4 Dâmen-i eflâki pür-hûn eyleyen şâm u seher  
Gül ruhuñ yâdiyle eşk-i lâle-gûnumdur benüm
- 5 ‘Âlem-i ‘ışkuñda ‘Ankâ-veş şehâ ma‘dûm olan  
İntizâr-ı vasl ile sabr u sükûnumdur benüm
- 6 Nâvek-i cevruñledür cismüm binâsı pâ-y-dâr  
Hâne-i gamdur tenüm tîrûñ sûtûnumdur benüm
- 7 Ey Sehâbî devlet-i vaslına mâni‘ ol mehûñ  
Tâli‘-i bergeşte vü baht-ı nigûnumdur benüm

## 277

Mefâ'îlün Mefâ'îlün Mefâ'îlün Mefâ'îlün

- 95a
- 1 Hoşâ ol dem ki gark-ı lücce-i bahr-i fenâ olsam  
Vücûdum zevrakı mahv olsa benlikden cüdâ olsam
  - 2 İderdi deyr pîri cür'a-i feyzin baña ihsân  
Harâbât içre ger sınmış sıfâlümle gedâ olsam
  - 3 Tenümde kâşki ey şem' yüz biñ cânım olsaydı  
Saña pervâne-veş her cân ile biñ kez fedâ olsam
  - 4 İderdüm reft ü rev cârûb-ı müjgânumla hâşâkin  
Eger seyr-i ser-i kûyuñda hem-râh-ı sabâ olsam
  - 5 'Uyûn-ı hûr-ı 'îne gerd-i râhum sürme olurdu  
Sehâbî ger gubâr-ı der-geh-i ehl-i safâ olsam

## 278

Me'ûlü Fâ'ilâtü Mefâ'îlü Fâ'ilün

- 1 Bir meh-veşüñ mukayyed [ü] miskîn kemendiyem  
Bir ser-bülend serv-kadüñ pây-bendiyem
- 2 Nâr-ı ruhında görelî hâl-i siyâhını  
Yıllardurur ki âteş-i sevdâ sipendiyem
- 3 Kûyında pây-mâl-i cefâ olalı başum  
İklîm-i 'ışk beglerinüñ ser-bülendiyem
- 4 Geh reh-neverd-i vâdî-i hûn-h'wâr-ı mihnetem  
Geh bahr-i bî-kerâne-i 'ışkuñ levendiyem
- 5 Rind-i sebû-keşem beni sanma Sehâbî kim  
Zühhâd gibi kûy-ı riyâ hod-pesendiyem

## 279

Me'ûlü Fâ'ilâtü Mefâ'îlü Fâ'ilün

- 95b
- 1 Dil zâhidin mücâvir-i mey-hâne eyledüm  
Kandîl-i zühdi bâdeye peymâne eyledüm
  - 2 Peymâne-i şikesteyi bâdeyle hall kılup  
Ehl-i riyâyâ sübha-i sad-dâne eyledüm
  - 3 Açdum hadîs-i halka-i zencîr-i zülfüñi  
Da'vâ-yı 'akl idenleri dîvâne eyledüm
  - 4 'İşkuñla eyledüm dil-i hoş-yâri âşinâ  
Ya'nî ki hûşdan anı bî-gâne eyledüm
  - 5 Oldum Sehâbî gerçi ki efsâne 'ışk ile  
Ehl-i füsûnı mâyil-i efsâne eyledüm

280

Mef'ûlü Fâ'ilâtü Mefâ'ilü Fâ'ilün

- 1 Gördi temevvüc eyledi bahr-i muhît-i Rûm  
Oldı garîk-ı lücce-i hayret 'adû-yı şûm
- 2 Saytuñdan oldı bûm harâb-ende husrevâ  
Bâng-i rahîl gûş-i 'adûya sadâ-yı bûm
- 3 Ceyş-i 'adû hezîmet idüp târ u mâr olur  
Bir şahs kılsa 'asker-i mansûrdan hücûm
- 4 Hurşîd tîg-ı heybet ile olıcak 'ıyân  
Fi'l-hâl nâ-bedîd olur leşker-i nücûm
- 5 Kılsa Sehâbî kanda ki rezm ehli bezm olur  
Mey gibi anda hûn-ı 'adû dâfi'ü'l-gumûm

281

Mef'ûlü Fâ'ilâtü Mefâ'ilü Fâ'ilün

96a

- 1 Sâkî harîm-i mey-kededür bârgâh-ı Cem  
Rindân-ı kûy-ı mey-kede hayl ü sipâh-ı Cem
- 2 Vir câm-ı la'l-i nâb ile dil hânesine tâb  
K'ol câm ile münevver idi bârgâh-ı Cem
- 3 Taht ile tâcın alalı Hahhâk-i rûzigâr  
Arz u semâyı dutmuş idi eşk ü âh-ı Cem
- 4 Yâkût-gûn şarâb ile câm-ı zümürürüdi  
Olmuşdı vâkı'â sebeb-i 'izz u câh-ı Cem
- 5 Olsun Sehâbî nâm-ı Cem oldukca yâd şâd  
Şol vâris-i serîr-i Süleymân u gâh-ı Cem

282

Fâ'ilâtün Fâ'ilâtün Fâ'ilâtün Fâ'ilün

- 1 Rûz u şeb yârûñ seg-i kûyı gibi der-bânıyam  
Hamdû li'llâh dostlar ol ravzanuñ rıdvânıyam
- 2 Deşt-i bî-pâyân-ı 'ışka sanma Kays irdi hemân  
Niçe yıllardur ki ben ol deşt ser-gerdânıyam
- 3 İçmedümse bâde tab'ûñ bulmasun benden gubâr  
Sâkiyâ keyfiyyet-i bezm-i ezel hayrânıyam
- 4 Dürr-i me'ânî ki bahr-i jerf aña zarf olımaz  
Kıl taleb benden ki ben ol gevherüñ 'ummânıyam
- 5 Ey Sehâbî bir hasen-sûret nebî-sîret şehüñ  
Der-gehinde gâh Hassân'ı gehî Selmân'ıyam

283

Mefâ'ilün Mefâ'ilün Mefâ'ilün Mefâ'ilün

96b

- 1 Gamuñdan hâtırum mahzûn idi dil şâd olup geldüm  
Giriftâr-ı belâ-yı hecr iken âzâd olup geldüm
- 2 Temennâsıyla bir şîrîn-lebüñ şehir-i selâmetden  
Melâmet bî-sütûnın kazmaga Ferhâd olup geldüm
- 3 Rakîbüñ cevri kılmışdı beni âvâre kûyuñdan  
Cefâ vü mihnete şimden girü mu'tâd olup geldüm
- 4 Tûrâb-ı vâdî-i nisyân iken şâdem ki âhumla  
Gubâr-âsâ harîm-i kûyuña berbâd olup geldüm
- 5 Sehâbî 'akl-ı kül ta'lîm-i 'ışkı benden alsun kim  
Ezelden ben bu san'at-hâneye üstâz olup geldüm

## HARFU'N-NÛN

284

Fâ'ilâtün Fâ'ilâtün Fâ'ilâtün Fâ'ilün

- 1 Nâz bûstânında bitmiş serv-i gül-ruhsârsın  
Şîve gül-zârında açılmış gül-i bî-hârsın
- 2 İçürürsin câm-ı vaslı gayra ammâ 'âşıkuñ  
Kâm-ı 'ayşın telh iden bir şûh-ı şîrîn-kârsın
- 3 Baş koyup ey dil akarsın serv-kadler pâyına  
Su gibi beñzer ki sen de 'âşık-ı dîdârsın
- 4 Oldı câmuñla münevver hâne-i târîk-i ten  
Ey sebû-yi bâde bî-şek matla'-ı envârsın
- 5 Bir kadeh sun kim helâk itdi beni renc-i humâr  
Ey ki rûz u şeb mukîm-i hâne-i hammârsın
- 6 Merdümüñ dâmânını ey dîde kılduñ pür-güher  
Bilmezem bahr-i kerem yâ ebr-i gevher-bârsın
- 7 Olmadan dînâra mâlik iremezsen vuslata  
Ey Sehâbî zühd ile ger Mâlik-i Dînâr'sın

97a

285

Fâ'ilâtün Fâ'ilâtün Fâ'ilâtün Fâ'ilün

- 1 Biz 'ibâdet ehliyüz ol iki ebrû kıbleteyn  
Kıbleteyne secde vâcibdür bize bel farz-ı 'ayn
- 2 Hâl-i müşgînüñ görüp çeşmüm 'aceb mi aglasa  
Noktaya olsa mukârin 'ayn olur elbette gayn
- 3 Serv ise nâ-mu'tedildür sûsen-i âzâde pest  
Nahl-i kaddüñ i'tidâlîdür arada beyn beyn
- 4 Olalı menzil-geh-i hayl-i hayâlüñ kıldılar  
Göz sarâyın eşk-i gül-gûnumla her dem zîb ü zeyn
- 5 Haste-i hecrüñ 'ilâcî sabr yâhud vasl imiş  
Vasl ise 'Ankâ-sıfat ma'dûmdur es-sabru eyn

- 6 Nakd-i dînüm deyn idi bir şûh-ı tersâ-zâdeye  
Vârını virdüm bi-hamdi'llâh edâ oldu bu deyn
- 7 Ol makâm pîşe-i lu'b-ı nerde mâyl olalı  
Tâsa döndi gözlerüm merdümle anda ke'abteyn
- 8 Zühd ü takvâyı dil-i mecnûna teklîf eyleme  
İsteme şeydâdan ey halvet-nişîn şeyd ile şeyn
- 9 Ben Sehâbî bir hasen-sîret şehûñ Hassân'ıyam  
Ger Nevâyî oldıyse mâdih-i Sultân Hüseyin

## 286

- Fâ'ilâtün Fâ'ilâtün Fâ'ilâtün Fâ'ilün
- 97b 1 Seyl-i eşkümden harâb olurdu kasr-ı âsumân  
Olmayaydı ger sûtün-ı tîr-i âh-ı 'âşıkân
- 2 Hâk olubdur anda yir yir rûy-i zerd-i ehl-i derd  
Görinen bir şâh-râhıdur degüldür keh-keşân
- 3 Eşk-i sürhum bir büt-i gül-gûn-kabânunñ yâdına  
Bitürür her kanda kim aksa nihâl-i erguvân
- 4 Revzen-i kasrından ol mâhı çıkup seyr itmege  
Dil kemend-i âhumı her gice eyler nerdübân
- 5 Ey Sehâbî oda yakmazdı gönül ten hırkasın  
Olmayaydı şahs-ı cânunñ boynına bâr-ı girân

## 287

- Mefâ'ilün Mefâ'ilün Mefâ'ilün Mefâ'ilün
- 1 Egerçi bî-sütûnuñ rahne kıldı Kûh-ken taşın  
Sîpihr-i Bî-sütûn âhır kodı ol rahneye başın
- 2 Gözüm nûr-ı taleb-kâruñ olalı merdüm-i çeşmüm  
Seni her gûşede aratmaga itmiş revân yaşın
- 3 Reh-i 'ıškuñda bir dem derd ü gam gönülümde ayrılmaz  
Koyup gitmez hatar-nâk olsa yol yoldaş yoldaşın
- 4 Ruhunñda nûr-ı vechu'llâhı gördüm çün nazar kıldum  
Yakîn oldu baña kim gösterür her nakş nakkâşın
- 5 Sehâbî kalbine bir vech ile 'ışk oldu müstevlî  
Ki tutdı ol perîşân rûzigâruñ hep için taşın<sup>104</sup>

## 288

Fâ'ilâtün Fâ'ilâtün Fâ'ilâtün Fâ'ilün

<sup>104</sup> Mısranın anlamı bize bu kelimenin, bir şeyin 'içini dışını tutmak, kaplamak' şeklinde söylenen sözün içinde yer alan 'dış' kelimesi olmasından hareketle, "taşın" olması gerektiğini, kafiye için bu şekilde yazıldığını düşündürüyor.



98a

- 1 Devr-i güldür sun bize sâkî mey-i gül-fâmdan  
Hâne-i târîk-i dil bulsun ziyâ ol câmdan
- 2 Eşkûme rahm it beni gark-âba virme kıl halâs  
Zevrak-ı bâdeyle girdâb-ı gam-ı eyyâmdan
- 3 Almak ister cennetü'l-me'vâyı nakd-i zühd ile  
Puhtedür zâhid velî geçmez hayâl-i hâmdan
- 4 'Âşık-ı rüsvâyâ ey nâsîh nasîhat eyleme  
İsteme nâm-ı nigû dîvâne-i bed-nâmdan
- 5 Şüst ü şû eyler zülâl-i 'afv ile pîr-i mugân  
Her hatâ kim sâdır olsa rind-i dürd-âşâmdan
- 6 Çîn-i zülfinden gönül seyr eyledi ruhsârını  
Ka'be oldı hâcîya zâhir sevâd-ı şâmdan
- 7 Ey Sehâbî 'ışk hâlâtın ne bilsün şeyh-i şehir  
Sorma 'akluñ var ise esrâr-ı hâsı 'âmdan

289

Fâ'ilâtün Fâ'ilâtün Fâ'ilâtün Fâ'ilün

98b

- 1 Her şerer kim zâhir olsa âh-ı âteş-nâkden  
Fark olunmaz gök yüzinde encüm-i eflâkden
- 2 Şu'le-i cân-sûz ile yakar dem-â-dem cismümi  
Gam ne ister bilmezem bu bir avuç hâşâkden
- 3 Geh harîk-ı nâr-ı derdem geh garîk-ı bahr-i gam  
Sîne-i pür-âteşümle dîde-i nem-nâkden
- 4 Eşk-i sürhumla ruh-ı zerdi nihân itdüm velî  
Çâk-i sînem görünür pîrâhen-i sad-çâkden
- 5 Ten gubâr oldı ilet yârûñ harîm-i kûyına  
Ey sabâ lutf it götür ben nâ-tüvânı hâkden
- 6 Pây-bûs-ı esb-i şâha dest-res buldı şu kim  
Sayd gibi ser-nigûn asıldı ol fîtrâkden S
- 7 Ey Sehâbî saykal-ı câm-ı neşât-efzâyile  
Jeng-i endûhı gider âyîne-i idrâkden

290

Mefâ'ilün Mefâ'ilün Mefâ'ilün Mefâ'ilün

- 1 Kılâm sanma harâbât-ı mugânûñ sûfî ben terkin  
İder mi ihtiyâriyle kişi hergiz vatan terkin
- 2 Bahâr-ı vasl-ı dil-bersüz n'ola terk-i diyâr itsem  
Hazân faslında lâbüd 'andelîb eyler çemen terkin
- 3 Ferâgat eyle halvetden gel ey zâhid harâbâta  
Eger dârü's-sürûr isterseñ it beytü'l-hazen terkin
- 4 Münevver eyle bir şeb külbe-i târîk-i 'uşşâkı  
Degüldür lâyık ey meh şem'e itmek encümen terkin

- 5 Garîbüñdür Sehâbî iltifât it hâline şâhum  
Bilürsin kim senüñçün ihtiyâr itmiş vatan terkin

## 291

Mefâ'ilün Fe'ilâtün Mefâ'ilün Fe'ilâtün

- 1 Meger nesîm-i visâl irdi serv-i sîm-berümden  
Ki zâhir oldu yine şu'le-i âteş cigerümden
- 2 Uyarma şem'üñi târîk sanma gicemi ey meh  
Ki dehr rûşen olur her dem âh-ı pür-şererümden
- 99a 3 Diyâr-ı gamda benem reh-zen-i tarîk-ı melâmet  
Selâmet ehli hazer eyle geçme reh-güzerümden
- 4 Giceyle varımazın kûy-ı yâra korkarın andan  
Ki h<sup>w</sup>âbdan ola bîdâr nâle-i seherümden
- 5 Gözüm Sehâbî göricek Süheyl-i tal'at-i yâri  
Harîm-i kûyını kıldı Yemen 'akîk-i terümden

## 292

Fâ'ilâtün Fâ'ilâtün Fâ'ilâtün Fâ'ilün

- 1 Yâd-ı hatt u 'ârızuñla eylesem seyr-i çemen  
Sebzeler nişter görünür 'aynuma güller diken
- 2 Câme-i al ile çeşmüm göricek ol gonce[y]i  
Hûn-ı dilden egnüme geydürdi gül-gûn pîrehen
- 3 Âteş-i sûzân ile sûzum görüp pervâne-veş  
Yanup aglar hâlüme her gice şem'-i encümen
- 4 Nâle-i cân-gâhdur kûh-i belâda hem-demüm  
Tîşesidür bî-sütûnda hem-zebân-ı Kûh-ken
- 5 Buldı ruhsârûñ Sehâbî'nüñ yaşımdan reng ü bû  
Girye-i ebr-i bahârîdür güle revnâk viren

## 293

Fâ'ilâtün Fâ'ilâtün Fâ'ilâtün Fâ'ilün

- 1 Bes ki dökdi gözlerüm kûyuñda eşk-i lâle-gûn  
Hâk-i kûyuñdan gelür ey şûh her dem bûy-i hûn
- 2 Eyledükçe bâd kûyuñdan ten-i hâkî cüdâ  
İrişür seyl-âb-ı eşküm olur aña reh-nümûn
- 99b 3 Perde-i nîlîde pinhân oldu hacletden kamer  
Sen geyelden gün gibi ey meh kabâ-yı nîl-gûn
- 4 Zulmet-i fûrkatde kalurdi gönül güm-râh eger  
Reh-nümûnı olmayaydı şu'le-i şem'-i derûn
- 5 Görse küfr-i zülfüñi bir kez olurdi zâhidüñ  
Gerdeninde rişte-i tesbîhi zencîr-i cünûn

- 6 Bâde-i râhat felek câmindan ey dil umma kim  
Zehr-i mihnetden degül hâlî bu tâs-ı ser-nigûn
- 7 Bâr-ı hicrân ile cevri-rûzigârı çekmege  
Ey Sehâbî kalmadı sabrum zebûn oldum zebûn

## 294

Mef'ûlû Fâ'ilâtü Mefâ'ilü Fâ'ilün

- 1 Ey bâde rûh-perver-i ehl-i necâtsın  
Vey câm-ı bâde menba'-ı âb-ı hayâtsın
- 2 'Âciz dürür sıfât-ı kemâlünde 'akl-ı küll  
Ey 'ışk-ı pâk-tab' bilinmez ne zâtsın
- 3 Dil vasfuñı ne vech ile kılsun dilâ ki sen  
Âyîne-i tecellî-i zât u sıfâtsın
- 4 Ey 'ömr eylemez saña 'âkiller i'tibâr  
Kim sen de rûzigâr gibi bî-sebâtsın
- 5 Ey şâh-ı hüsn herkese eylersin iltifât  
Bilmem neden Sehâbî'ye bî-iltifâtsın

## 295

Mef'ûlû Fâ'ilâtü Mefâ'ilü Fâ'ilün

100a

- 1 İzûñ tozını kuhl-ı Sıfâhân'a virmezin  
Hâk-i rehûñi Çeşme-i Hayvâna virmezin
- 2 La'lüñ gamıyla gözden akan eşk-i sürhumı  
Yâkût-ı âb-dâr ile mercâna virmezin
- 3 Ebrûlaruñla gün yüzünüñ zıkr ü fikrini  
İklîm-i<sup>105</sup> Çîn ü mülk-i Horasân'a virmezin
- 4 Hicrân şebinde şu'le-i sûz-ı derûnumı  
Kandîl-i mâh u şem'-i şebistâna virmezin
- 5 Sînemde tâze dâgumı kim yakdı dest-i 'ışk  
Mühr-i nigîn-i hükm-i Süleymân'a virmezin
- 6 Ol serv-kâmetüñ has u hâşâk-i kûyını  
Gül-şende ey sabâ gül ü reyhâna virmezin
- 7 Kâşânemüñ Sehâbî ki gamdur mücâviri  
Bir hışt-i köhnesin Kum u Kâşân'a virmezin

## 296

Fe'ilâtün Fe'ilâtün Fe'ilâtün Fe'ilün

- 1 N'ola bir lâle-ruhuñ sînede dâgın yakasın  
Ey gönül lâle-sıfat 'ışk çerâgın yakasın

<sup>105</sup>Metinde "iqlîme" şeklinde yazılmıştır.

- 100b
- 2 Çün fenâ odı ile yandı kuyûd esbâbı  
Demidür tekye-i tecrîdde ocagın yakasın
  - 3 Niçe bir sabr idelüm cevrine türk-i felegüñ  
Bir şeb ey âh-ı seher-hîz ocagın yakasın
  - 4 Öykünürse kad-i dil-dâra çemende ey gül  
Şu'le-i âteş olup serv budagın yakasın
  - 5 Şem' yirine Sehâbî şeb-i fikretde meger  
Müdde'înüñ eridüp yüregi yagıñ yakasın
  - 6 Meş'al-i mâhı söyindürse eger sarsar-ı âh  
Şu'le-i âteş-i mihr ile çerâgın yakasın

## 297

Mef'ûlü Fâ'ilâtü Mefâ'ilü Fâ'ilün

- 1 Añlar cefâ vü cevrüñi cevr ü cefâ çeken  
Bilür belâ vü derdümi derd ü belâ çeken
- 2 Mecnûn bilür firâkda ben çekdügüm gamı  
Bilmez belâlu hâlini illâ belâ çeken
- 3 Çekdüm cefâñı 'âkıbet itdüñ beni helâk  
Bildüm vefâya âhir irürmiş cefâ çeken
- 4 Zülfüñ kemendi rişte-i cânumdurur benüm  
Cân riştesidürür beni senden yaña çeken
- 5 'Âlemde kimseyi gözine kestürür mi hîç  
Hâk-i rehûñle 'aynına kuhl [ü] cilâ çeken
- 6 Derd-i firâk neş'esini kanda zevk ider  
'İşret-geh-i visâlde câm-ı safâ çeken
- 7 Bulur Sehâbî dünyede bâkî na'îmini  
Kûy-ı fenâda zillet-i fakr u fenâ çeken

## 298

Mef'ûlü Mefâ'ilü Mefâ'ilü Fe'ülün

- 101a
- 1 Hod-gâm safâ-yı gam-ı cânânı ne bilsün  
Bî-derd olan lezzet-i dermânı ne bilsün
  - 2 Tefsîr-i hat-ı 'ârızını vâ'ize sorma  
Elfâz okuyan ma'nî-i Kur'ân'ı ne bilsün
  - 3 İdrâk idemez 'ışk sözün zâhid-i nâ-dân  
Hayvân şeref-i gevher-i insânı ne bilsün
  - 4 Gel 'âşka cevr itme habîbüm kerem eyle  
Zîrâ ki cefâ ehli degül anı ne bilsün
  - 5 Söz nüktelerini müdde'îye açma Sehâbî  
Bâkıl sühan-i dil-keş-i Sehbân'ı ne bilsün

299

Fâ'ilâtün Fâ'ilâtün Fâ'ilâtün Fâ'ilün

- 1 Kayd-ı 'âlemden geçüp 'ışkuñla hoş-hâlem bu gün  
Tekye-i tecrîdde sâkin bir abdâlem bu gün
- 2 Sor baña seyr-i nükât-ı encümüñ eşkâlini  
Kim ben anı hall idüp bilmekde remmâlem bu gün
- 3 Hâlümi dil-dâra dün dirdüm bu gün 'arz ideyin  
Hayretümden veh ki takrîr itmede lâlem bu gün
- 4 Hâk-i râhuñdan tenüm bir niçe gün mehcûr idi  
Hamdü-li'llâh kim ser-i kûyuñda pâ-mâlem bu gün
- 5 İstemez gönlüm cihân lezzâtını sî-murg-vâr  
Kâf-ı 'uzlet gûşesinde fârigu'l-bâlem bu gün
- 6 Subh-ı mahşerde Sehâbî tañ mı olsam sürh-rû  
Çün ruh-ı zerdümle hâk-i der-geh-i Âl'em<sup>106</sup> bu gün

300

Fâ'ilâtün Fâ'ilâtün Fâ'ilâtün Fâ'ilün

101b

- 1 Devr-i güldür sun bize sâkî mey-i gül-fâmdan  
Bir dem âzâd olalum bend-i gam-ı eyyâmdan
- 2 Va'de-i vasl eyleyüp dilden taleb kılma şekîb  
İsteme ârâm ya'nî kalb-i bî-ârâmdan
- 3 İdebilmez ehl-i 'irfân içre hâsıl nâm-ı nîk  
Geçmeyen bed-nâmlık yolında neng ü nâmdan
- 4 Deyr pîrî eyledi bir câm ile fârig beni  
İztrâb-ı küfr ile endîşe-i İslâmdan
- 5 Ey Sehâbî olalı gönlüm mürîd-i şeyh-i câm  
Neş'e-i feyz irişür kalbe dem-â-dem câmdan

301

Fâ'ilâtün Fâ'ilâtün Fâ'ilâtün Fâ'ilün

- 1 Rûz-i bahtum tîredür bir mâh-ı mihr-efrûzdan  
Subh-ı 'ayşum şâmdur bir şem'-i 'âlem-sûzdan
- 2 Niçe bir kalsun şitâ faslında hâmûş ey sabâ  
Bülbülü söylet haber vir mevsim-i nev-rûzdan
- 3 Sûzen-i gamzeyle peyvend eyle çâk-i sînemi  
Cânı minnet-dâr kıl ol nâvek-i dil-dûzdan
- 4 Sâkıyâ gam zulmetinden tîredür dil hânesi  
Rûşen eyle anı bir câm-ı neşât-endûzdan
- 5 Kâküli gâhî nihân olur Sehâbî geh ıyân  
Ögrenür gûyâ füsûn ol çeşm-i sihr-âmûzdan

<sup>106</sup>Hz. Peygamber'in ehli, âilesi. Rahat anlaşılabilmesi için büyük harfle yazıldı.

## 302

- Fâ'ilâtün Fâ'ilâtün Fâ'ilâtün Fâ'ilün
- 102a
- 1 Gark-ı hûn oldı gözüm bir gamze-i hûn-rîzden  
Lâle-gûn oldı yaşum bir la'l-i reng-âmîzden
  - 2 Oldı efzûn hatt-ı sebzinden gözüm nûrî belî  
Rûşen olur dîde seyr-i sebze-i nev-hîzden
  - 3 İl mezâkın itdi şîrîn lebleri ammâ benüm  
Kâm-ı 'ayşum telhdür ol şehd-i şûr-engîzden
  - 4 Dökme kanlu yaşumı ey müdde'î kim rûzigâr  
Hakkumı alur komaz sen kâtil-i hûn-rîzden
  - 5 Cevr ile Pervîz Ferhâd'ı helâk itdi velî  
Çerh çekdi intikâmın 'âkıbet Pervîz'den
  - 6 Zühd ü takvâ menşe'i bildüm riyâ vü zerk imiş  
Sâkıyâ mey sun ki geçdüm tevbe vü perhîzden
  - 7 İctinâb itme Sehâbî'den ki itmez neng ü 'âr  
Mihr-i enver ittisâl-i zerre-i nâ-çîzden

## 303

- Mef'ûlü Fâ'ilâtü Mefâ'ilü Fâ'ilün
- 1 Yüzlenmedi ferah baña vasl-ı habîbden  
Şâd olsa hâtırum n'ola merg-i râkîbden
  - 2 Dil-dâra eyleşem n'ola dil râzını 'ıyân  
İtmez marîz derdini pinhân tabîbden
  - 3 Çün nev-bahâr-ı 'ömr geçer ân u hüsn ile  
Ey gül bu ictinâb nedür 'andelîbden
  - 4 İtme şekîb ü sabr ile dil derdini 'ilâc  
Umma tabîb fâyide sabr u şekîbden
  - 102b 5 Hwân-ı belâda lokma-i gam sunsalar saña  
Redd itme anı kaçma Sehâbî nasîbden

## 304

- Fâ'ilâtün Fâ'ilâtün Fâ'ilâtün Fâ'ilün
- 1 Sür ayagı elde ey sâkî şarâb eglenmesün  
Âteş-i gam üzre gelsün sepsün âb eglenmesün
  - 2 Râh bir yâkûtdur kim rûha râhatlar virür  
Fursatı fevt itme ol yâkût-ı nâb eglenmesün
  - 3 Dîde göñlümnden kebâb isterdi dil gözden şarâb  
Hâzır itdi dîde mey gelsün kebâb eglenmesün
  - 4 Nâle-i dil-sûz-ı 'uşşâk ile dem-sâz olmaga  
Mutribâ tahrîk kıl söylet rebâb eglenmesün
  - 5 Seyl-i eşk itdi Sehâbî hâne-i çeşmi pür-âb  
Kim şeb-i vuslatda kaçsun anda hwâb eglenmesün

## 305

Mefâ'ilün Fe'ilâtün Mefâ'ilün Fe'ilün

- 1 Müşerref ideli bâğı kudûm-ı fasl-ı hazân  
Sarardı çehre-i 'uşşâk gibi reng-i rezân
- 2 Görindi her yaña elvân-ı muhtelif gûyâ  
Ki oldı sahn-ı çemen kâr-gâh-ı reng-i zerân
- 3 Bahâra döndi hazân mevsimi ki 'Îsî-vâr  
Çemende mürdeler ihyâ ider nesîm-i vezân
- 4 Kad-i nigâruma dik gelmeyeydi serv-i sehî  
Çemende bîd-veş olmazdı bîmden lerzân
- 103a 5 Sehâbî mevsim-i deydür irişmeden içelüm  
Bahâr-ı 'ömrümüze tünd-bâd-ı fasl-ı hazân

## 306

Mefâ'ilün Mefâ'ilün Mefâ'ilün Mefâ'ilün

- 1 Bu çeşm-i mest ile âşûb-ı erbâb-ı nazarsın sen  
Bu hâl u hatt ile ser-fitne-i devr-i kamersin sen
- 2 Eser kılmaz saña seylâb-ı eşküm nâr-ı âhumla  
Sanemler zümresinde seng-dil bir sîm-bersin sen
- 3 Yoluñda hâk olan üftâdeñ üzre salmayup sâye  
Sipîhr-i nâzda hurşîd gibi cilve-gersin sen
- 4 Murâduñ goncesi handân iken gül-zâr-ı kûyında  
Sabâ-veş niçe bir her cânibe ey dil yilersin sen
- 5 Ham olsa kâmetüñ bâr-ı belâdan bâg-ı 'âlemde  
Sehâbî çekme gam zîrâ nihâl-i bâr-versin sen

## 307

Fâ'ilâtün Fâ'ilâtün Fâ'ilâtün Fâ'ilün

- 1 Gerçi kim vîrânesin yâd eylemez dîvânesin  
Şâdem ey dil kim segân-ı yâr ile hem-hânesin
- 2 Âşinâdan dostum yad eyleyen sensin beni  
Şimdi benden bilmezem sen de neden bî-gânesin
- 3 Lâf-ı 'ışk-ı yâr urup da'vâ-yı kâzib niçe bir  
Gel berü ey müdde'î meydâna ger merdânesin
- 4 Yakdı şevk-ı 'ârızuñ meclisde ehl-i meclisi  
Şem' nârı yansa lâ-büd nûr ider pervânesin
- 103b 5 Külbe-i târîkine virdüñ Sehâbî'nüñ ziyâ  
Hüsn ile ger şem'-i bezm-ârâ degülsen sen nesin

## 308

Mef'ûlû Fâ'ilâtü Mefâ'ilü Fâ'ilün

- 1 Agzuñ haber vire n'ola mantıkda mîmden  
Kaddüñ 'alâmet oldı hat-ı müstakîmden
- 2 Hüsnüñ kemâli zülf iledür nitekim cemâl  
Nâkıs kalur cüdâ olıcak harf-i cîmden
- 3 'İşkuñ ber-â-ber itdi baña vasl u fûrkati  
Âsûde eyledi benî ümmîd ü bîmden
- 4 İtme hilâf-ı va'de-i ihsân u lutfi kim  
Lâyık degül hilâf-ı mürüvvet kerîmden
- 5 Raks ura zerre-vâr Sehâbî gubâr-ı ten  
Ger bûy-i vasl-ı yâr işitsem nesîmden

## 309

Fe'ilâtün Fe'ilâtün Fe'ilâtün Fe'ilün

- 1 N'ola bir cür'a 'atâ eylesin câmuñdan  
Beni hoş-hâl idesin bâde-i in'âmuñdan
- 2 Biz du'â ile Hudâ'dan dilerüz düşnâmuñ  
İtme mahrûm bizi devlet-i düşnâmuñdan
- 3 Sen gidelden berü dûr olmuş idi tenden cân  
Tâze cân buldı yine nâme vü peygâmuñdan
- 4 İdeli şâm u seher nâle-i zârî ey dehr  
Oldı bîzâr gönül subhuñ ile şâmuñdan
- 5 Aglama derdüñi dil-dâra Sehâbî zinhâr  
Hâtır-ı nâzüki incinmesün âlâmuñdan

104a

## 310

Fâ'ilâtün Fâ'ilâtün Fâ'ilâtün Fâ'ilün

- 1 Olalı mehcûr gönülüm bezm-i vasl-ı yârdan  
Akıdur hûn-âbe-i gam dîde-i hûn-bârdan
- 2 Kûyını terk itmezem biñ cevır kılsa müdde'î  
Sâkin-i gül-zâr incinmez cefâ-yı hârdan
- 3 Böyle serv-i gül-şene olmazdı mâyil fâhte  
Vâkıf olsaydı eger ol kadd-i hoş-refîârdan
- 4 Ruhlaruñ 'aksi şikâf-ı sîneden düşdi dile  
Kûlbemüz oldı münevver pertev-i envârdan
- 5 Aldı sünbül den sabâ tâtâr-ı zülfüñ bûyını  
Urmaz oldı dem nesîm-i nâfe-i Tâtâr'dan
- 6 Va'de-i firdevs ile aldandı yârı görmedi  
Veh ki mahrûm oldı zâhid devlet-i dîdârdan
- 7 Bâde-i câm-ı lebûñden sâkıyâ bî-hûş olup  
Bir kadem çıkmaz Sehâbî hâne-i hammârdan



## 311

- Fâ'ilâtün Fâ'ilâtün Fâ'ilâtün Fâ'ilün
- 104b
- 1 'Âşık-ı dürdî-keş ü rind-i şarâb-âlûdeyin  
Bu kühen deyr-i harâb içre harâb-âlûdeyin
  - 2 Kana ger müstagrak oldumsa 'aceb mi lâle-veş  
Küşte-i çeşm-i sitem-kâr [u] 'itâb-âlûdeyin
  - 3 Gerçi 'uryânem baña teşrîf yitmez mi bu kim  
Cism-i 'uryânumla kûyuñda türâb-âlûdeyin
  - 4 Dil virelden dostum ol çeşm-i h<sup>w</sup>âb-âlûdeye  
Geh humâram gâh mestem gâh h<sup>w</sup>âb-âlûdeyin
  - 5 İsteme benden Sehâbî zühd ü takvâyı ki ben  
'Âşık-ı dürdî-keş ü rind-i şarâb-âlûdeyin

## 312

- Fâ'ilâtün Fâ'ilâtün Fâ'ilâtün Fâ'ilün
- 105a
- 1 'İşkdur âyîne-i hüsnî mücellâ eyleyen  
Dîde-i 'uşşâk ile anı temâşâ eyleyen
  - 2 'İşkdur zencîr iden 'Azrâ vü Leylî zülfini  
Vâmık'ı âşüfte vü Mecnûn'ı şeydâ eyleyen
  - 3 'İşkdur sûret viren Şîrîn-i dil-keş nakşına  
La'l-veş Ferhâd'a mesken seng-i hârâ eyleyen
  - 4 'İşkdur îcâd-ı mevcûdâta bâ'is 'ışkdur  
'Âlemi ketm-i 'ademden âşikârâ eyleyen
  - 5 'İşkdur nûr-ı tecellâ-yı cemâl-i Yûsuf'a  
Cilve-geh âyîne-i çeşm-i Zelîhâ eyleyen
  - 6 'İşkdur ehl-i münâcât eyleyen mey-h<sup>w</sup>âreyi  
Zâhid-i perhîz-kârı rind ü rüsvâ eyleyen
  - 7 'İşkdur zülf ü hat-ı hûbâna viren zîb ü zînet  
Pîr-i 'aklı beste-i zencîr-i sevdâ eyleyen
  - 8 'İşkdur bir zerreyi ser-geşte-i ednâ iken  
Hem-nişîn-i âfitâb-ı 'âlem-ârâ eyleyen
  - 9 'İşkdur peyk-i sabâ gibi Sehâbî göñlini  
Rûz u şeb ser-geşte-i vâdî vü sahrâ eyleyen

## 313

- Mefâ'ilün Mefâ'ilün Mefâ'ilün Mefâ'ilün
- 1 Tenümde tâzelendi yâreler nezzâre-i gülden  
Figânum hadden aşdı nâle vü feryâd-ı bülbül den
  - 2 Gören bu eski göyneklerle dâg-ı tâzemi tende  
Usandı seyr-i lâleyle temâşâ-yı karanfülden

- 3 Geçer zülf-i nigâruñ ey sabâ âşüftesi dirler  
Perîşân-hâtır olursam ta‘accüb kılma sünbül den
- 4 Hadeng-i ta‘n ile tîr-i melâmetden elüm çekmem  
Velîkin hâtırum mecrûhdur tîg-ı tegâfülden
- 5 Nigâristân-ı Çîn kim añılur bâg-ı İrem birle  
‘İbâretdür Sehâbî gâlibâ şehr-i Sitanbul’dan

## 314

- Fe‘ilâtün Fe‘ilâtün Fe‘ilâtün Fe‘ilün
- 1 Ölicecek hecrüñ ile dîde-i nem-nâküm den  
Çeşmeler cârî ola her tarafa hâküm den
- 2 Beni yâr öldüricek yârelerüm âgız açup  
‘Özr mi dileyeler kâtil-i bî-bâküm den
- 3 Yârdan gizler idüm yâremi derdâ ki bu gün  
Gül gibi oldu ‘ıyân pirehen-i çâküm den
- 4 Hâk olıcek ser-i kûyında vücûdum umarın  
Pây-mâl eyleye ol kâmeti çâlâküm den
- 105b 5 Oldı ‘âlemde vücûdum sebep-i şöhet-i ‘ışk  
Yandı âfâk benüm hâr ile hâşâküm den
- 6 Saykal-ı câm-ı safâ-bahş ile sâkî kerem it  
Jeng-i hüznî gider âyîne-i idrâküm den
- 7 Nâr-ı dûzahdan üşenmezdi Sehâbî zâhid  
Bir kadeh içse idi âb-ı tarab-nâküm den

## 315

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Sînemi çâk itme kanum her yaña saçılmasun  
Dil belâ gam-hânesidür kapusı açılmasun
- 2 Olalı bî-hûş hâmûş oldu göñlüm nâleden  
Nâ-tüvânem sâkıyâ kıl çâre kim ayılmasun
- 3 Her ne deñlü cevır idersin âşikârâ kıl baña  
Lutf eger var ise pinhân it şehâ il bilmesün
- 4 Hem-dem olmış nâfe ey meşşâta zülf-i yâr ile  
Bu sözi açma sabâya ‘âleme yayılmasun
- 5 Mey bile gasl it ben öldükde Sehâbî cismümi  
İncinürse gelmesün zâhid namâzum kılmasun

## 316

- Mefâ‘ilün Mefâ‘ilün Mefâ‘ilün Mefâ‘ilün
- 1 Kalem-veş baş çeker kıblem şu kim kapuñ sücûdından  
Başın kat‘ ide kim anuñ ‘adem yegdür vücûdından

- 106a
- 2 Şeb-i târîk-i gamda encüm-i eflâke beñzetdüm  
Şererler k'oldı zâhir âh-ı âteş-nâk dûdından
  - 3 Beni bir mug-beçe deyr içre bî-hûş ideli geçdüm  
Riyâ küncinde şeyh u zâhidüñ şûrb-i yehûdından
  - 4 Metâ'ından elüm çekdüm cihân bâzârınuñ zîrâ  
Ziyânından zarar bî-had velî yok assı sûdından
  - 5 Sehâbî rind-i ser-mestüñ sücûd-ı sehvi râcihdür  
Riyâyî zâhidüñ her dem kıyâm ile ku'ûdından

## 317

Mefâ'îlün Mefâ'îlün Mefâ'îlün Mefâ'îlün

- 1 Ko yansun sûz-ı dilden gök yüzi pür-dûd-ı âh olsun  
Şeh-i 'ışkam başum üstinde ol çetr-i siyâh olsun
- 2 Sarây-ı dîde hüsnüñ cilve-gâhıdur benüm 'aynum  
Harîm-i dil de tîr-i gamzeñe âmâc-gâh olsun
- 3 Gam-ı 'ışkuñda göñlüm kenz-i bî-pâyâna mâlikdür  
Yürisün kişver-i 'ışka yiridür pâdişâh olsun
- 4 Hatuñ geldi diyü yüz döndürürse yârdan 'âşık  
Hat-ı hûbân gibi 'âlemde yâ Rab rû-siyâh olsun
- 5 Semend-i nâz ile her kanda cevân eyleseñ şâhum  
Sehâbî-veş ser-i a'dâ yoluñda hâk-râh olsun

## 318

Fe'ilâtün Fe'ilâtün Fe'ilâtün Fe'ilün

- 106b
- 1 Sanma elden vire dünyâda beni yâr etegin  
Ölem elden komıyam ol gül-i bî-hâr etegin
  - 2 Virdi Pervîz eline dâmen-i vaslın Şîrîn  
Tutdı Ferhâd gam u derd ile taglar etegin
  - 3 Dem-be-dem hâk-i reh-i yâra nisâr itmek içün  
Toldurur gevher ile çeşm-i güher-bâr etegin
  - 4 Câme-i atlas u şâlî 'acabâ fark ide mi  
Şol ki çâk eyledi gayret yakasın 'âr etegin
  - 5 Ey Sehâbî yakasın şevk ile çâk eyledi gül  
Demidür gel dutalum biz dahi gül-zâr etegin

## 319

Mefâ'îlün Mefâ'îlün Mefâ'îlün Mefâ'îlün

- 1 Egerçi sûretâ gam pây-mâli hâk-râham ben  
Velî ma'nî yüzinde tâc-ı fark-ı mihr ü mâham ben

- 2 Salın nâz ile hâküm üzre ey [serv-i]<sup>107</sup> ser-efrâzum  
Ki pâ-bûsuñ temennâsıyla hâk olmuş giyâham ben
- 3 Günehsüz ‘âşık-ı miskîni öldürmekdür âyînüñ  
Baña zulm eyleme şâhum esirge bî-günâham ben
- 4 Bu mihnet-hânede âh ile ey dil olma hem-dem kim  
Belâ küncinde ser-tâ-pâ harîk-ı nâr-ı âham ben
- 5 Elümde sâgar-ı sahbâ yanumda dilber-i ra‘nâ  
Sehâbî mesned-i Cemşîd’e geçmiş pâdişâham ben

## HARFU’L-VÂV

320

107a

- Fe‘ilâtün Fe‘ilâtün Fe‘ilâtün Fe‘ilün
- 1 ‘Âleme irse idi mihr-i ruhuñdan pertev  
Kamere mihr sıfat nûr virürdi meh-i nev
- 2 Nûr u fer almaga hurşîd-i ruhuñdan meh ü mihr  
İtdiler ‘arsa-i eflâkde hayli tek ü dû
- 3 Şafak içre göricek ke’s-i hilâli kıldum  
Hırka-i ezrakımı bâde-i hamrâya girev
- 4 Kışt-zâr-ı ‘ameli eşk ile sebz it ey dil  
İtmeden dâs-ı fenâ mezra‘a-i ‘ömri direv
- 5 Tâc-ı Kâ‘ûs’a eger itmese ‘ibretle nazar  
Terk idüp virmez idi gayra anı Keyhusrev
- 6 Berk-ı rahşân idi eflâkde sanma bu gice  
Rahnesinden tenümün âteş-i dil çekdi ‘alev
- 7 Pîr-i ashâb-ı safâ oldı Sehâbî olalı  
Rind-i Şîrâz ile ‘ârif-i Câm’a pey-rev

321

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Kıldı dil hecründe la‘lünden mey-i nâb ârzû  
Hastedür rihlet deminde eyledi âb ârzû
- 2 Ragbeti hecründe ‘uşşâkuñ ecel uyhusına  
Beñzer ol bîmâra kim eyler şeker-hwâb ârzû
- 3 Zulmet-i zülfünde kılsam tañ mı ruhsâruñ taleb  
Râh-rev eyler şeb-i muzlimde meh-tâb ârzû
- 4 Kaşlaruñ mihrâbını seyr eyleyen tâ‘at-fürüş  
Eylese sehv ile eyler künc-i mihrâb ârzû
- 5 Merdüm-i çeşm oldı mâhî-veş garîk-i bahr-i eşk  
Çîn-i zülfünden kılur bî-çâre kullâb ârzû
- 6 Külhan içre sâkin-i hâkister-i idbâr olan  
Eylemez ikbâl ile gül-şende sincâb ârzû

<sup>107</sup>Metinde yoktur, vezin ve anlamı tamamlamak için ilâve edilmiştir.

107b

- 7 Züh'd ü takvâdan mükedderdür göñül kıldum yine  
Deyr pîrinden Sehâbî bâde-i nâb ârzû

322

Fâ'ilâtün Fâ'ilâtün Fâ'ilâtün Fâ'ilün

- 1 Pârsâ dil-dâruma tâ bâde içmek oldu hû  
Düşdüm ayakdan daşıtdum bes ki başumla sebû  
2 Zâhid-i şehri tahâret itmedi makbûl-i halk  
Veh ki miskîn bulmadı âb-ı vuzûdan âb-ı rû  
3 Nakş-ı hatt-ı müşg-bâr-ı yârı tahrîr itmege  
Kıldılar merdüm sevâd-ı levh-i çeşmi şüst u şû  
4 Vaslını dil ârzû kıldı müyesser olmadı  
Gıtdi cânım veh ki dilden gitmedi bu ârzû  
5 Bulmadum ol mâh-ı şeb-gerdi Sehâbî gerçi kim  
Eşk ü âhum kıldılar arz u semâyı cüst ü cû

323

Fâ'ilâtün Fâ'ilâtün Fâ'ilâtün Fâ'ilün

- 1 Bâd ile hâkî tenüm kapuñı eyler cüst ü cû  
Beñzer ol ser-geşte itmiş pâ-y-bûsuñ ârzû  
2 Kanmadum meyden hayâtumda ölürsem yapsa kâş  
Deyr küncinde felek hâk-i vücûdumdan sebû  
3 Olmadı âlâyış-i zerk u riyâdan sâf u pâk  
Hırkasın bâdeyle zâhid itmeyince şüst u şû  
4 Ne felekden mihr gördüm ne sitâremden vefâ  
Çerh ise bir bî-vefâdur kevkeb ise kîne-cû  
108a 5 Cevr-i dilberdür Sehâbî bâ'is-i tahrîk-i 'ışk  
Şevk olur efzûn ne deñlü olsa dil-ber tünd-hû

HARFU'L-HÂ'

324

Mefâ'ilün Fe'ilâtün Mefâ'ilün Fe'ilün

- 1 Safâda kendüyi beñzetdi rûy-i cânâna  
Sabâ bu cürm ile saldı zülâli zindâna  
2 Bahâr faslı visâlûñ nümûnesi olalı  
Firâkuñ olsa müşâbih n'ola zemistâna  
3 Şarâb-ı Kevser'i la'l-i lebûñe nisbet iden  
Serâbı eyledi teşbîh âb-ı hayvâna  
4 Göñül kebûteri geçmez hevâ-yı 'ışkuñdan  
Semendere ne zarar girse nâr-ı sûzâna

- 5 Gamuñdan aglamadan ey dūr-i muhît-i kemâl  
Sehâbî dîdeleri döndi ebr-i nîsâna

## 325

Mefâ‘îlün Mefâ‘îlün Mefâ‘îlün Mefâ‘îlün

- 1 Semend-i nâza binüp gayrlarla hem-‘inân olma  
Dökersin kanımı bir dem benüm ‘ömrüm revân olma
- 2 Varup dîn kişverin târâc kılma hâl u hattuñla  
Cihânuñ cânı iken fîtn-i halk-ı cihân olma
- 3 Senüñle zindedür cân nitekim cân ile ten ey meh  
Ruhuñ ‘arz eyle ya‘nî cân gibi benden nihân olma
- 4 İrer senden tarâvet nev-bahâr-ı ‘ömr-i ‘uşşâka  
Yüri ey şâh-ı gül hergiz giriftâr-ı hazân olma
- 108b 5 Kadüm lâm oldu Kâf-ı derd-i ‘ışkı çekmeden ey gam  
Kerem eyle yüri sen de baña bâr-ı girân olma
- 6 İkilik kalmadı cân oldu cismüm vahdete irdüm  
Kesil yanımdan ey sâye benümle tev‘emân olma
- 7 Kemân-ebrû güzeller hüsnine olma igen mâyil  
Sehâbî-veş melâmet tîrine ya‘nî nişân olma

## 326

Fe‘ilâtün Fe‘ilâtün Fe‘ilâtün Fe‘ilün

- 1 Şeb ki ol mâh gelür külbe-i ahzânumuza  
Çerh pervâne olur şem‘-i şebistânumuza
- 2 Silmese gözden eger hâk-i rehi seyl-i sirişk  
Tûtiyâ eyler idük dîde-i giryânumuza
- 3 Görinen mushaf-ı hüsninde gubâr-ı hat-ı yâr  
Âyet-i rahmet imiş indi bizüm şânumuza
- 4 Cân içün gamze-i cânânum ile itme nizâ’  
Yüri ey dil kerem it girme bizüm kanumuza
- 5 Deşt-i gamda dutıcak kûh-ı selâmet yakasın  
Sarılur hâr-ı belâ her yaña dâmânumuza
- 6 Geçdi tîr-i sitem [ü] hecr Sehâbî câna  
Hâlümüz hayf ki ‘arz olmadı sultânumuza
- 7 Ol perînüñ okıyup vasfını dîvâne olur  
Nazar eylerse şu kim defter ü dîvânumuza

## 327

Fe‘ilâtün Fe‘ilâtün Fe‘ilâtün Fe‘ilün

- 109a 1 Pertev-i mâh-ı ruhuñ düşse eger hânemüze  
Hûr firdevs ile reşk eyleye kâşânemüze

- 2 Beyt-i ma'mûrına çerhuñ gönül olmaz râgıb  
Besdürür gûşe-i vîrâne bu dîvânemüze
- 3 Kays'a mecnûnlıgumuz eyleme nisbet ki bizüm  
Bûmlar vahşet ider konmaga vîrânemüze
- 4 Vardı h<sup>w</sup>âb-ı 'ademe Vâmık u Ferhâd gibi  
Mâyil olan şeb-i endûhda efsânemüze
- 5 Halkdan bâdeyi pinhân içerüz tâ ki bizüm  
Seng-i ta'n ile şikest irmeye peymânemüze
- 6 H<sup>w</sup>âbdan el yudı bu dîde-i bîdâr gibi  
Kim ki kıldı nazar ol gözleri mestânemüze
- 7 Bahr-i eşkinde Sehâbî gibi gavs eylemeyen  
İrişür sanma bizüm gevher-i yek-dânemüze

328

Mef'ûlü Fâ'ilâtü Mefâ'ilü Fâ'ilün

- 1 Vardum 'ale's-sabâh münâcât ehline  
İtdüm du'â-yı hayr harâbât ehline
- 2 Hicrân şebinde şöyle 'alem çekdi nâr-ı âh  
Kim ıztırâb düşdi semâvât ehline
- 3 Agyâra nükte açma lebûnden ki virmedi  
Nutk-ı Mesîh fâyide Tevrât ehline
- 4 Pîr-i mugâna hıdmeti biz tâ'at añlaruz  
Fahr eylerüz anuñla 'ibâdât ehline
- 109b 5 Ey şeyh urma lâf ki itmezler i'tikâd  
Rindân-ı kûy-ı mey-kede tâmât ehline
- 6 Bir câm ile hayât virür mürde-dillere  
Bak deyr gûşesinde kerâmât ehline
- 7 Virdi Sehâbî'ye gam u derd ü belâyı çerh  
Minnet Hudâ'ya degdi emânât ehline

329

Mefâ'ilün Fe'ilâtün Mefâ'ilün Fe'ilün

- 1 Yüzümde kanlu yaşumdan bîñârı seyr eyle  
Bu çeşm-i terden akan cûy-bârı seyr eyle
- 2 Gözümde 'aks-i hat u hâlini temâşâ kıl  
Gül ü benefşe ile çeşme-sârı seyr eyle
- 3 Yaşumla oldı şehâ lâle-zâr etrâfım  
Taraf taraf nazar it lâle-zârı seyr eyle
- 4 Dil-i hazîne nazar kıl kemend-i zülfünde  
Esîr-i dâm-ı gam olmış şikârı seyr eyle
- 5 Dilerseñ açıla kalbün ko halveti sûfî  
Harîm-i bâga güzer kıl bahârı seyr eyle
- 6 Cihân-ı mâ'nîye var tengnâ-yı sûretten  
Yüri tecerrüd ile ol diyârı seyr eyle

- 7 Sehâbî'nüñ çekilen ka'r-ı bahr-i eşkinden  
Dizin dizin güher-i âb-dârı seyr eyle

## 330

- Mefâ'ilün Fe'ilâtün Mefâ'ilün Fe'ilün
- 110a 1 Ruhında turre-i 'anber-feşânı seyr eyle  
Nazar kıl anda dil-i nâ-tüvânı seyr eyle
- 2 Leb-i Mesîh'ini gör hatt u hâline nazar it  
Yanınca fîtn-e-i âhir-zamânı seyr eyle
- 3 Harîm-i kûyına yâruñ eger irem dir iseñ  
Gubâr-ı râh-ı sabâ ol cihânı seyr eyle
- 4 Sirişk-i sürhumı hecrüñde rûy-i zerd ile gör  
Şitâ deminde bahâr u hazânı seyr eyle
- 5 Şikâf kıl tenümi ol şikâfdan nazar it  
Derûn-ı dildeki dâg-ı nihâmı seyr eyle
- 6 Tenümde her yaña kıl katre katre kana nazar  
Dıraht-ı gamda gül-i erguvânı seyr eyle
- 7 Tutuşdı yir şeb-i hecrinde nâr-ı âhumdan  
Sehâbî evc-i felekde duhânı seyr eyle

## 331

- Fâ'ilâtün Fâ'ilâtün Fâ'ilâtün Fâ'ilün
- 1 Ey vücûd iklîmi içre cân gibi sultân dede  
Âsumân-ı ma'rifetde ahter-i tâbân dede
- 2 'İşk-ı Leylî neş'esinden mest olup Mecnûn-misâl  
Rûz u şeb hayret beyâbânında ser-gerdân dede
- 3 Bâde-i tevhîd ü esrâr-ı hakîkatden müdâm  
Tekye-i tecrîdde hem mest ü hem hayrân dede
- 4 İstimâ' iden sanur elhân-ı Dâvûd u Zebûr  
Sen fesâhatle okurken âyet-i Kur'ân dede
- 110b 5 Gonce-veş dem-beste göñlüm gül gibi handân olur  
Gûş idicek nagmeñi ey bülbül-i hoş-hwân dede
- 6 Bitmez idi huşk-sâl-i hecrde kişt-i ümîd  
Yagmayaydı ebr-i lutfuñdan eger bârân dede
- 7 Kıl Sehâbî hâline 'ayn-ı 'inâyetle nazar  
Ey mekân-ı merhamet vey menba'-ı ihsân dede

## 332

- Mef'ûlü Fâ'ilâtün Mef'ûlü Fâ'ilâtün
- 1 Mâni'dürür sirişküm seyr-i cemâl-i yâra  
Gerçi ziyâ-yı mihri seyr idemez sitâre



- 2 Olalı kevkeb-efşân hicrân şebinde çeşmüm  
Biñ dîdesiyle gerdûn eyler baña nezâre
- 3 Rahm ide sanma yâruñ seylâb-ı eşke kalbi  
Bârân ile mülâyim olur mı seng-i hâre
- 4 Kâşâne-i mugânuñ virmem cihânda zâhid  
Bir hışt-ı âşiyânın biñ kasr-ı zer-nigâra
- 5 Bahr-i melâmet içre yok sâhil-i selâmet  
Gel tatalum Sehâbî bu lücceden kenâre

## 333

- Fe‘ilâtün Fe‘ilâtün Fe‘ilâtün Fe‘ilün
- 1 Zâhid-i şehr[e]<sup>108</sup> yine eyledi gavgâ galebe  
Gâlibâ itdi o dîvâneye sevdâ galebe
- 2 Mey-i nâb ile tutuşdı bu gice pîr-i hîred  
‘Âkıbet eyledi ol pîre bu bernâ galebe
- 111a 3 Harem-i ma‘rifete ola mı mahrem şol kim  
İtdi kalbinde gam u hasret-i dünyâ galebe
- 4 Dehre aldanma ki İskender’e maglûb itdi  
‘Âleme itmiş iken şevket-i Dârâ galebe
- 5 Gâlib olursa Sehâbî ne ‘aceb agyâra  
Şimdi mi eyledi câhillere dâna galebe

## 334

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Düşeli mecnûn gönül leylî saçuñ sevdâsına  
Haymesin kurdı ‘adem iklîminüñ sahrâsına
- 2 Kûh-ı dilde ideli Sî-murg-ı mihnet âşiyân  
Tu‘me kıldı cismümi Kâf-ı belâ ‘Ankâ’sına
- 3 Oldı câm-ı mey gibi sâfi-dil ü rûşen-zamîr  
Kim ki tuşdı pîr-i deyrüñ bâde-i hamrâsına
- 4 Âb u rengi yok vefâ vü mihreden ey ‘andelîb  
Gül-şen-i dehrüñ gönül virme gül-i ra‘nâsına
- 5 Ey Sehâbî gevher-i maksûda vâsıl olmadı  
Talmayan gavvâs-veş fakr u fenâ deryâsına

## 335

- Fe‘ilâtün Fe‘ilâtün Fe‘ilâtün Fe‘ilün
- 1 Mihr da‘vâ-yı kemâl eyler imiş mâhum ile  
Anı bir gün yakarın sâ‘ika-i âhum ile

<sup>108</sup>Metinde ‘şehr’ şeklindedir. Anlamı tamamlamak için ilave edilmiştir.

- 111b
- 2 Berg-i kâh oldu tenüm kûh-ı gamuñ çekmekden  
Göge çıksam yiridür âh-ı seher-gâhum ile
  - 3 Nâ-tüvân cismüme za‘f olmasa ger müstevlî  
Halkı uyutmaz idüm nâle-i cân-gâhum ile
  - 4 ‘İşk yolında gam-ı yâr ile hem-râh oldum  
Eyledüm ‘azm fenâ mülkine hem-râhum ile
  - 5 Ayagı tozına benden idesin ‘arz-ı niyâz  
Buluşursañ eger ey peyk-i sabâ şâhum ile
  - 6 Sırr-ı “Esrâ”ya<sup>109</sup> ki cân olmadı mahrem-dil hem  
Vâkıf oldum bu gice hâtır-ı âgâhum ile
  - 7 Âsitânında Sehâbî olalı hâk-nişîn  
Başum irdi göge bu kâmet-i kûtâhum ile

## 336

Mef‘ûlü Mefâ‘îlü Mefâ‘îlü Fe‘ûlün

- 1 Geldi gam-ı ‘ıškuñ yir idindi dil içinde  
Cân gibi karâr eyledi âb u gil içinde
- 2 Ger ‘âkil iseñ ekme emel tohmını zinhâr  
Bu mezra‘-i pür-dâne-i bî-hâsıl içinde
- 3 Mergûb cihân içre begüm şâhid ü meydür  
Durma mey ü mahbûbsuz ey ‘âkil içinde
- 4 Yâruñ zekanında dil-i şeydâmı gören dir  
Hârût’a nazar eyle çeh-i Bâbil içinde
- 5 Kaşuñ gibi za‘f ile hilâl oldu Sehâbî  
Engüşt-nümâ olsa ‘aceb mi il içinde

## 337

Mef‘ûlü Fâ‘ilâtü Mefâ‘îlü Fâ‘ilün

- 112a
- 1 Hem-dem olalı cân-ı mey ol la‘l-i nâb ile  
Sarf oldu veh ki nakd-i hayâtum şarâb ile
  - 2 Görsün ‘izârı üzre lebin görmek isteyen  
‘Îsâ ne yüzden oldu karîn âfitâb ile
  - 3 Girse ‘aceb mi cennete yarın hisâbsuz  
Yolında cân viren sitem-i bî-hisâb ile
  - 4 Yüzün duhân-ı âhum ile iderin siyâh  
Mâh itse âfitâbum ile ger mukâbele
  - 5 Zerrât-ı kâyinâtı ruhuñ şevkı yakmadan  
Ey mihr-i evc-i nâz hırâm it nikâb ile
  - 6 Seylâb-ı eşk sûz-ı dile viremez sükûn  
Sanma ki intifâ bula bu âteş âb ile
  - 7 Baş çekme istihâre içün ceyb-i gaflete  
Ey şeyh-i şehîr ‘ömrüñi giçürme h‘wâb ile

<sup>109</sup>Bk. not 77, 86, 87, 88.

- 8 Teb tutdı tâb-ı hüsni ile şem‘-i meclisi  
Seyr it Sehâbî var lebi üstinde âbile

## 338

Fâ‘ilâtün Fâ‘ilâtün Fâ‘ilâtün Fâ‘ilün

- 1 Baş koşaldan cân u dil bu zülf-i ‘anber-sâyile  
Germdür başum hemîşe âteş-i sevdâyile  
2 İtmedi hecrüñ beni bir vech ile cânâ helâk  
Kim olam ihyâ dem-i cân-perver-i ‘Îsâ’yile  
3 Germ olup beñzetdügiyçün kendüsin ruhsâruña  
Gice meclisde tutuşduk şem‘-i bezm-ârâyile  
112b 4 Gam hüçüm eylerse ey dil idelüm def‘-i melâl  
Güşe-i mey-hânede câm-ı neşât-efzâyile  
5 Ey Sehâbî oluram ser-halka-i ehl-i cünûn  
Kanda varursam dil-i şûrîde [vü] rüsvâyile

## 339

Mefâ‘ilün Fe‘ilâtün Mefâ‘ilün Fe‘ilün

- 1 Mugannî göñlümüzi şâd kıl terâneyle  
Ki başa çıkmadı kimse gam-ı zamâneyle  
2 Cinâna itme bizi kûy-ı yârdan tergîb  
Be vâ‘iz aldana sanma beni efsâneyle  
3 Çü tîr-i gamzeñi bizden şehâ dirîg itdün  
Hoş eyle göñlümüzi bârî tâziyâneyle  
4 Şu sayd kim başın itmiş fedâ o fitrâke  
Süm-i semendüñi öpmek diler behâneyle  
5 Tasavvuf ehli ile yokdurur mu‘âmelemüz  
Sehâbî eglenürüz şi‘r-i ‘âşıkâneyle

## 340

Fâ‘ilâtün Fâ‘ilâtün Fâ‘ilâtün Fâ‘ilün

- 1 Âb olurdı şermden bakdukça hüsnüñ ayına  
‘Aks-i ruhsâruñla arkalanmayaydı âyine  
2 Âsitânuñ ferşine yüzün sürüp takbîl içün  
Yiridür hurşîd-veş her gün felekden ay ine  
3 Mihr-i hüsnüñle olur beñzer mukâbil mâh-ı bedr  
Kim bulur noksân kemâl-i hüsni varmaz ayına  
113a 4 Ey müneccim çerh ay u gün ile germ olmasun  
Devr-i hüsn-i yârda günü ne anuñ ayı ne  
5 Mazhar-ı nûr-ı tecellîdür Sehâbî’nüñ gözi  
Olalı ey mâh-veş menzil cemâlün ayına

## 341

Mefâ'îlün Mefâ'îlün Mefâ'îlün Mefâ'îlün

- 1 Revân oldu dil ü cân 'azm idüp der-gâh-ı cânâna  
İrişdi zerreler ser-menzil-i hurşîd-i tâbâna
- 2 Dile irdükçe peykân-ı hadengüñ nâ-bedîd oldu  
Olur ma'dûm lâ-büd katre irse bahr-i 'ummâna
- 3 'İyân eyler ruhuñ şevkıyla her şeb sûz-ı pinhânum  
Zebân-ı hâl ile pervâneler şem'-i şeb-istâna
- 4 Yine âvâre oldu sîne-i sad-pâreden gönülüm  
Beyâbân özledi vîrâne[yi] terk itdi dîvâne
- 5 Sehâbî 'ışk tutdı cân u dil iklimini gûyâ  
Şeh-i Rûm oldu mâlik kişver-i Îrân u Tûrân'a

## 342

Mef'ûlû Mefâ'îlû Mefâ'îlû Fe'ûlün

113b

- 1 Oldı bedenüm yâr miyânı gibi ince  
Salınmadı zülfî gibi bir kerre yanınca
- 2 Kaldur tenümi hâkden ey eşk sabâ-veş  
Eglenme revân ol der-i dil-dâra varınca
- 3 Çekdi elem-i hecrini cân vuslata irdi  
Çeksün n'ola dil hem gamunı cânâ yitince
- 4 Usanmadı ol şûh cefâ itmeden ammâ  
Ben cevrine sabr eyleyeyin ol usanınca
- 5 Bülbul-veş ider her gice feryâd Sehâbî  
Ol gonçe-dehen h<sup>w</sup>âb-ı seherden uyanınca

## 343

Fâ'ilâtün Fâ'ilâtün Fâ'ilâtün Fâ'ilün

- 1 Geldi ol dem kim kadehler gül gibi handân ola  
Sâhat-i meyhâne reşk-i ravza-i Rıdvân ola
- 2 Pest olup vâ'iz sadâsı savt-ı bezm-i ehl-i 'ayş  
Hây u hûy-ı mey-perestân na'ra-i mestân ola
- 3 'İyd-i 'aynî 'âlemi pür-nûr ide hurşîd-vâr  
Savm kandîli nazardan necm-veş pinhân ola
- 4 Mâh-rûlarla zemîn ola 'adîl-i âsumân  
Anda sâkî tal'ati hurşîd-i nûr-efşân ola
- 5 Ey Sehâbî dil dem-â-dem cân-ı şevkı nûş idüp  
Ten libâsın gonçe-veş çâk eyleyüp 'uryân ola

344

Mef'ûlû Fâ'ilâtü Mefâ'ilü Fâ'ilün

114a

- 1 Mu'tâd kıldı gönümi 'ıskuñ belâyile  
Hak'dan belâ vü derdüñi ister du'âyile
- 2 Çekmiş hadeng gamze-i çeşmüñ helâküme  
Bildüm şehâ ki var nazarı ben gedâyile
- 3 Agyâr ile tolular içersin neñ eksilür  
Bir kez bizi de şâd idesen merhabâyile
- 4 Olan segân ile ser-i kûyuñda âşinâ  
Bîgâne oldu h<sup>w</sup>îş ile vü âşinâyile
- 5 Ol meh Sehâbî mest-i mey-i nâz u 'ışvedür  
Sabr eyle hâlûñ aña biraz şâyed ayıla

345

Mef'ûlû Fâ'ilâtü Mefâ'ilü Fâ'ilün

- 1 El sunmadın dahi kadeh-i ârzûmuza  
Urdı sipihr seng-i melâmet sebûmuza
- 2 Her subh u şâm çerh tek u pûy idüp yeler  
Düşmiş harâmiyâna bizüm cüst ü cûmuza
- 3 İtmez vefâ cefâdan usanmaz Hudâ meger  
İnsâf vire ol sanem-i tünd-hûmuza
- 4 Bed-nâm-ı 'âlemüz bize nâmûsı añañuz  
Kim ihtilâl vormeye nâm-ı nigûmuza
- 5 'Akla Sehâbî itmeyelüm mi muhâlefet  
Varup itâ'at eyleyelüm mi 'adûmuza

346

Fe'ilâtün Fe'ilâtün Fe'ilâtün Fe'ilün

114b

- 1 Demidür mürğ-i çemen şevk ile âvâza gele  
Gül-şen-i sînede dil bülbülü pervâza gele
- 2 Demidür kim yine nâz ile çemen haclesine  
Şâhid-i gül sürinüp çihresine gâze gele
- 3 Cânı îsâr ideler yolına erbâb-ı niyâz  
Ger benüm serv-i revânüm çemen-i nâza gele
- 4 Az olur kim gele Leylî taraf-ı Mecnûn'a  
Nâkası yolını ol semte meger aza gele
- 5 Bahrdur tab'-ı Sehâbî 'aceb olmaz her dem  
Silk-i nazma eger andan güher-i tâze gele

347

Fe'ilâtün Fe'ilâtün Fe'ilâtün Fe'ilün

- 1 Bende za‘findan eger hıdmetüñe az gele  
Senden ey pâdişehüm sanma ki ol vâz gele
- 2 Baht-ı bed ger tenümi dūr ide der-gâhuñdan  
Mürg-ı rûhum kapuña eyleye pervâz gele
- 3 Kafes-i tende göñül besleyelüm cân mürgın  
Dem ola külbemüze ol gözi şeh-bâz gele
- 4 Sayha-i kûs-i eceldür bu gice ey hem-dem  
Hücrenün revzenesinden eger âvâz gele
- 5 Sözi ırgürdi Sehâbî göge ma‘lûm degül  
Gül-şen-i ‘âleme bir böyle sühan-sâz gele

348

Fe‘ilâtün Fe‘ilâtün Fe‘ilâtün Fe‘ilün

- 1 Oldı dil şifte ol zülf-i kemend-âsâya  
Veh ki düşdi yine dîvâne ‘aceb sevdâya
- 2 Seyle virdi güher-i bînişi hecrüñde gözüüm  
Hwâce gark eyledi ser-mâyesini deryâya
- 3 Mürg-ı dil şem‘-i ruhuñ şevkına her şeb cânâ  
Ögredür yanmagı pervâne-i bî-pervâya
- 115a 4 Senden ey mug-beçe varsun göge şekvâ kılsun  
Dûd-ı âh-ı seheri göndereyin ‘Îsâ’ya
- 5 Çeşm-i terden dūr-i sîr-âb taleb kıl ey dil  
Ki anı şâhid-i maksûd kılur pîrâye
- 6 Zer u zîver gözüme hâk ile yeksân oldı  
Tâc-dâr olalı dil kişver-i istignâyâ
- 7 Tende olmuş dil ü cân yâra Sehâbî müştâk  
Eyle kim halk-ı Sitanbul şeh-i mülk-ârâya

349

Mef‘ûlü Mefâ‘ilü Mefâ‘ilü Fe‘ûlün

- 1 Zâhid dimezin ben saña evbâşlıg eyle  
Gel satma riyâyı bize kardaşlıg eyle
- 2 Sarf it reh-i tecrîdde nakd-i dil ü cânı  
Bî-kayd-ı cihân ol yûri kallâşlıg eyle
- 3 Kıl pâk reh-i dil-beri cârûb-ı müjeyle  
Su yirine ey dîde güher-pâşlıg eyle
- 4 Ten zâr u za‘îf oldı ilet kûy-ı nigâra  
Ey eşk revân ol baña yoldaşlıg eyle
- 5 Nakş eyle Sehâbî dile tasvîr-i nigârı  
Şâ‘ırlığı terk it yûri nakkâşlıg eyle

## 350

Fâ'ilâtün Fâ'ilâtün Fâ'ilâtün Fâ'ilün

- 115b
- 1 Hoş sa'âdet var imiş 'âlemde ol şeh-bâz ile  
Kim mukârin oldı ol şûh-ı şikâr-endâz ile
  - 2 Mürg-ı cân âzâd olurdı kayd-ı tenden bir nefes  
Ger mukârin olsa ol bâz-ı hü mâ-perver ile
  - 3 Gâret itdi dînümi yagmaya virdi 'aklumu  
Çeşm-i kâfir-kîşi yârüñ gamze-i gammâz ile
  - 4 Gösterür biñ dürlü ma'nî lu'betin her dem ne var  
Olsa tab'um ger mu'âriz çerh-i lu'bet-bâz ile
  - 5 Kıl tebessüm nâz ile ben mürdeñi dirgür didüm  
Ey Sehâbî güldi ol 'Îsî-nefes biñ nâz ile

## 351

Fâ'ilâtün Fâ'ilâtün Fâ'ilâtün Fâ'ilün

- 1 Sandılar [kim]<sup>110</sup> sürdi günler bâd-ı rûh-efzâyile  
Seyr ider Hızır-ı nebîdür hazret-i 'Îsâ'yile
- 2 Jâle sanma lâle berginde ki sâkî vakt-i subh  
Lâlenüñ taşlatdı câmin seng-i istignâyile
- 3 Bâda virme bâdesüz sâkî bahâr-ı 'ömrüñi  
Çün geçer 'ömrüñ geçür bâri anı sahbâyile
- 4 Sâhat-i gül-zârı seyr it bâğı me'vâ eyle kim  
Sahn-ı bag oldı mu'âdil Cennetü'l-Me'vâ'yile
- 5 Nakd-i vaktin 'işrete sarf itmedi zâhid bu gün  
'Ömrini miskîn geçürdi va'de-i ferdâyile
- 6 Ey Sehâbî olmadan pür 'ömrümüz peymânesi  
İçelüm peymâne yâd-ı şâh-ı mülk-ârâyile
- 7 Ol se'âdet mülkinüñ şâhı ki ednâ bendesi  
Kâni' olmaz mansıb-ı İskender ü Dârâ'yile

## 352

Mef'ûlü Fâ'ilâtü Mefâ'ilü Fâ'ilün

- 116a
- 1 Ey dîde rûy-i dil-bere nezzâre eyleme  
Yaşuñla yir yüzün tolu seyyâre eyleme
  - 2 Ey dil gel itme gamze-i hûn-rîz-i yâre meyl  
Tîg-ı cefâyile özüñi pâre eyleme
  - 3 Ey gül ümîd-i gül-şen-i vasluñla 'âleme  
Bâd-ı sabâ gibi beni âvâre eyleme
  - 4 Yâr ile aramızda nifâk itme ey rakîb  
Kendü elüñle kendü yüzüñ kara eyleme

<sup>110</sup>Metinde yoktur, vezin gereği ilave edilmiştir.

- 5 Dûr ol Sehâbî şu'bede-bâz-ı sipihreden  
Ya'nî ki i'timâd o mekkâre eyleme

## 353

Fâ'ilâtün Fâ'ilâtün Fâ'ilâtün Fâ'ilün

- 1 Tîg-ı kîn çekdi şebîhûn itdi hicrân üstüme  
Ey ecel yâr ol baña gel sen de bir an üstüme
- 2 Sanma bârândur yagan eflâkden kim hâlûmi  
Mâder-i eyyâm gördi oldı giryân üstüme
- 3 Yüz çevürmem âfitâbum hâk-i kûyuñdan senüñ  
Biñ belâ taşın eger yagdursa devrân üstüme
- 4 İtmezem agyâr taşından hazer kûyuñda ben  
Kûh-ı endûhum ne gam ger yagsa bârân üstüme
- 5 Kanumı dökdi tekellümsüz revân oldı dirîg  
Gitdi cân okınmadı ol demde Kur'ân üstüme
- 116b 6 Lâle sanma kabrüm üzre açılan kim acıyup  
Ey Sehâbî agladı çeşm-i felek kan üstüme

## 354

Fâ'ilâtün Fâ'ilâtün Fâ'ilâtün Fâ'ilün

- 1 Dil yine oldı mukayyed bir nihâl-i tâzeye  
Baş egüp meyl eylemez serv-i bülend-âvâzeye
- 2 Hüsni Yûsuf'dan füzûn oldı 'aceb mi olmasa  
İhtiyâcî gül gibi gül-gûne birle gâzeye
- 3 Sebzedden ibrişim-i sebz eyledi peydâ çemen  
Gördi kim evrâk-ı gül muhtâcdur şîrâzeye
- 4 Veh ki mahbûb u meye zâhid teveccüh kılmadı  
Nakd-i 'ömri virdi miskîn h'vâb ile hamyâzeye
- 5 Dîdeye dil almaga girdi Sehâbî ol perî  
Kıl hisârı hıfz kim geldi belâ dervâzeye

## 355

Fâ'ilâtün Fâ'ilâtün Fâ'ilâtün Fâ'ilün

- 1 Hûn-ı dil nûş eyledük yâd-ı leb-i cânân ile  
Gül gibi 'ayş eyledük bir gonce-i handân ile
- 2 Gonceyi beñzetdiler gûyâ dehân-ı yâra kim  
Üşdi şeb-nemler ısırdılar lebin dendân ile
- 3 Mushaf-ı hüsnüñ hatuñla şol ki nesh olmış didi  
Küfrine hükm itdi hattuñ âyet-i Kur'ân ile
- 4 Dök yire vuslat deminde kanumı kim bilürem  
Soñra öldürseñ gerekdür hancer-i hicrân ile



- 117a
- 5 Kâşkî cismümde yüz biñ cânım olsaydı benüm  
Tâ saña her lahza olsaydum fedâ bir cân ile
- 6 Kanumuz dökme lebûnsüz içdük ise câm-ı mey  
Tutalum kan eyledüñ kanı yumazlar kan ile
- 7 Virdi seyl-âba Sehâbî hânümânın merdümün  
Başa çıkmak müşkil ancak dîde-i giryân ile

## 356

- Fe‘ilâtün Fe‘ilâtün Fe‘ilâtün Fe‘ilün
- 1 Toludur çeşm-i terüm hûn ile sâgar yirine  
Dil ciger kanın içer bâde-i ahmer yirine
- 2 Nâhun-ı hecr yiri dâg-ı firâkuñla yiter  
Sînede lâle-i hamrâ vü gül-i ter yirine
- 3 Telh-kâm-ı gam-ı hecrüz yiridür agzumuza  
Ger sunarsañ leb-i şîrînüñi şekker yirine
- 4 İtdi cân mürğını sayyâd-ı ecel sayd dirîg  
Diler idüm ki vara yâra kebûter yirine
- 5 Ol perî rûh-ı musavver gibi kim insânuñ  
‘Aklı dîvâne olur baksa anuñ her yirine
- 6 Bezm-i agyârı uyardı bizi zulmetde kodı  
Hayf kim düşmedi ol şem‘-i münevver yirine
- 7 Câ-nişîn oldı Sehâbî seg-i dil-dâra rakîb  
Yiridür ger depelerseñ anı itler yirine

## 357

- Fe‘ilâtün Fe‘ilâtün Fe‘ilâtün Fe‘ilün
- 117b
- 1 Yaraşur yârelerüm tende ser-â-ser yirine  
Dâgumuñ başda fetîli yiter efser yirine
- 2 Benem ol rind-i sebû-keş ki belâ bezminde  
Eyledi nûş hum-ı bâde[y]i sâgar yirine
- 3 Sâkin-i gûşe-i mey-hâne olan rind-i gedâ  
Ser virür bir kadeh-i bâde içün zer yirine
- 4 Meh-veşüm gün gibi ‘arz eylese ger ‘ârızını  
Hûr reşk eyleye göklerde melekler yirine
- 5 Dûd-ı âhum felegün yüzini eyleyse siyâh  
Şerer-i âh-ı Sehâbî yiter ahter yirine

## 358

- Mef‘ûlü Fâ‘ilâtü Mefâ‘ilü Fâ‘ilün
- 1 Ârâm-gâh olalı vîrâneler bize  
‘Arz-ı irâdet eyledi dîvâneler bize

- 2 Biz şeyh ile savâmi‘a meyl itmezüz yiter  
Hum şeyh-i câm u savma‘a hum-hâneler bize
- 3 Cânânumuñ yolında görüp cân fedâlıgum  
Oldı mutî‘ cân ile cânâneler bize
- 4 Bezm-i belâda sâkî-i devrân sunar müdâm  
Hûn-âbe-i cefâyile peymâneler bize
- 5 Yâd itmez olalı bizi ol yâr-i âşinâ  
Ta‘n eyler oldı h<sup>w</sup>îş ile bî-gâneler bize
- 6 Biz şem‘-i bezm-i ma‘rifetüz olsa vechi var  
Mürgân-ı kuds şevk ile pervâneler bize
- 118a 7 Vâ‘iz Sehâbî‘yi idemez men‘ bâdeden  
Te‘sîr eylemez kuru efsâneler bize

## 359

Mef‘ûlû Fâ‘ilâtü Mefâ‘ilü Fâ‘ilün

- 1 Hicrân ber-â-ber itdi tenüm berg-i kâh ile  
Çıksam ‘aceb midür felege bâd-ı âh ile
- 2 Çün kim benüm visâlûñe yokdur liyâkatüm  
Bârî hoş eyle hâtırumı bir nigâh ile
- 3 Dil kişverini lutf ile şâhum müsahhar it  
Zîrâ ki bu vilâyet alınmaz sipâh ile
- 4 Hüsnuñ gibi güneş bulımaz çerhi fî‘l-mesel  
Seyr eylese müneccim eger mihr ü mâh ile
- 5 Mümkün midür ki ola müyesser Sehâbî‘ye  
Sen mâha ittisâl bu baht-ı siyâh ile

## 360

Fâ‘ilâtün Fâ‘ilâtün Fâ‘ilâtün Fâ‘ilün

- 1 Geldi hattıñ sâye saldı ol zenahdân üstine  
Kârvân-ı Mısr kondı çâh-ı Ken‘ân üstine
- 2 La‘l-i cân-bahşuñda hat mı zâhir olan yâ Hızr  
Kurdı çetr-i ‘anber-âsâ âb-ı hayvân üstine
- 3 ‘Ârızuñ üstinde zülfüñden ta‘accüb kılmazam  
Cîm harfi resmidür kim yazılır cân üstine
- 4 Sehm-i gamzeñden şu kim ya gibi olmaz gûşe-gîr  
Yagdurur tîr-i belâ her lahza devrân üstine
- 118b 5 Kişver-i Îrân’a mâyıl olmaduñ bildüm yakîn  
Sâye salmazmış hümâ her bûm-ı vîrân üstine
- 6 Ebr-i mihnetdür duhân-ı ejder-i topuñ senüñ  
Yagdurur âteş ‘adû-yı nâ-müselmân üstine
- 7 Top mıdur atılan a‘dâya yâhud recm içün  
Od saçar gerdûn Sehâbî hayl-i şeytân üstine

## 361

Mefâ'ilün Fe'ilâtün Mefâ'ilün Fe'ilün

- 1 Te'alluk eyledüm ol serv-i nev-resîde ile  
Ki besledüm çemen-i dilde âb-ı dîde ile
- 2 Riyâz-ı ravza-i cân verd-i bâg-ı Rıdvândur  
'Îzâr-ı yâr gülî hatt-ı nev-resîde ile
- 3 Remîde göñlüme benden selâmlar itsün  
Sabâ buluşsa ger ol âhû-yı remîde ile
- 4 Muhâldür ki müyesser ola visâl baña  
Bu za'f-ı tâli' vü bu baht-ı âramîde ile
- 5 Sehâbî gördi ki meclisde yâra dil uzadur  
Tutuşdı dün gice şem' zebân-ı bürîde ile

## 362

Mef'ûlü Fâ'ilâtü Mefâ'ilü Fâ'ilün

119a

- 1 Salınmadum bahârda ol dil-sitân ile  
Veh kim mübeddel oldı bahârum hüsrân ile
- 2 Pîr itdi devr cevri bu ben zârı âh kim  
Bir gün mukârin olmadum ol nev-civân ile
- 3 Kaldum mukîm künc-i felâketde bilmezem  
Kim kanda varayın bu dil-i nâ-tüvân ile
- 4 Sâkî tutuşdı şu'le-i fûrkatle cân u dil  
Gel sâkin it bu âteşi âb-ı rezân ile
- 5 Kalmazdı yarı cânı rakîbüñ Sehâbî'yi  
Görseydi bir nazar eger ol yarı cân ile

## 363

Mef'ûlü Fâ'ilâtü Mefâ'ilü Fâ'ilün

- 1 Gören bu rûy-i zerdümi âğuşte kan ile  
Olmuş didi bahâr mukârin hazân ile
- 2 Hatt-ı nigâra karşı iden seyr-i eşkümi  
Kıldı nezâre sebze[y]i âb-ı revân ile
- 3 Biñ cânı olsa yoluña îsâr iderdi dil  
Satılsa ger metâ'-ı gamuñ nakd-i cân ile
- 4 Baş unıdup visâlünüñ umsam 'aceb mi kim  
Ehl-i kemâl mansıb alur imtihân ile
- 5 Âhumla kasr-ı yâra Sehâbî irişmedüm  
Kimse göge 'urûc idemez nerdübân ile

## 364

- Mef'ûlû Fâ'ilâtû Mefâ'ilû Fâ'ilûn
- 1 Bir dil ki anda şu'le-i sûz-ı nihân ola  
Ney gibi n'ola nâle ile hem-zebân ola
- 2 Geldi mekân idindi dil-i zârı tîr-i yâr  
Cânuñ zamânı geldi ki tenden revân ola
- 119b 3 Bâr-ı gamuñ ne deñlû girân ise dil çeker  
Andan tasavvur eyleme kim nâ-tüvân ola
- 4 Cân iremez göñül gibi cânân visâline  
Tenden arada zerre kadar tâ nişân ola
- 5 Ey dil şikâyet eyleme cevri-i nigârdan  
Şâyed anuñ murâdı seni imtihân ola
- 6 Dem-beste kalsa tûtî-i gûyâ 'aceb degül  
Her kanda kim Sehâbî-i şîrîn-zebân ola
- 7 Niçün terakkî olmaya anuñ vazîfesi  
Kim subh u şâm dâ'î-i şâh-ı cihân ola

## 365

- Fe'ilâtûn Fe'ilâtûn Fe'ilâtûn Fe'ilûn
- 1 Virdi dîn nakdini dil bir büt-i kâfir-kîşe  
Ki ruh-ı dil-keşini vâsf idemez endîşe
- 2 Dîde gördi gül-i ruhsârını pür-hûn oldı  
Mevsim-i gülde mey-i la'l ile toldı şîşe
- 3 İdeli zülf-i dil-âvîzini âşüfte nesîm  
Düşdi dîvâne göñüller gam ile teşvîşe
- 4 Gönderür ikide bir sîneme tîr-i müjesin  
Eksük olmaz nazarı pâdişehüñ dervîşe
- 5 'Işk bezminde cünûn câmını dil nûş itdi  
Bakmadı vesvese-i 'akl-ı muhâl-endîşe
- 6 Bî-sütûn nâle-i cân-gâh iderdi her gâh  
Kûh-ken hâlini şerh itse zebân-ı tîşe
- 120a 7 Bağlama nesneye ferdâya göñül 'âkil iseñ  
Nakd-i 'ömri yûri sarf eyle Sehâbî 'ayşa

## 366

- Fe'ilâtûn Fe'ilâtûn Fe'ilâtûn Fe'ilûn
- 1 Dimezin dil haremin cîlve-geh-i gayr eyle  
Sûret-i gayr ile ol Ka'beyi yâ deyr eyle
- 2 Su gibi kalbünü sâfi kılup andan nazar it  
Dost ruhsârünü ol âyîne de seyr eyle
- 3 Der-i mey-hânede ey mug-beçe sâyillerüne  
İçdüğüñ câm-ı meyüñ cür'asını hayr eyle

- 4 Gonceden sormag için ol gül-i ra'nâ haberin  
Gül-şeni bâd-ı sabâyile gönül seyr eyle
- 5 Nakd-i cân birle Sehâbî alıcak ceşş-i gamın  
Baña dellâl-i fenâ didi yûri hayr eyle

## 367

Fâ'ilâtün Fâ'ilâtün Fâ'ilâtün Fâ'ilün

- 1 İnle ey bülbül ki eyyâm-ı bahâr oldu yine  
Bâglar güllerle pür-nakş u nigâr oldu yine
- 2 Husrev-i gül kurdı sahn-ı bâgda şâhâne bezm  
Mutrıb ol bezm-i dil-âsâda hezâr oldu yine
- 3 Âşikârâ bâde sun sâkî ki devr-i lâlede  
'Âlemün râz-ı nihânı âşikâr oldu yine
- 4 Nûş kıl nergis gibi zerrîn kadehden bâde kim  
Lâle gül-gûn câmlarla mey-güsâr oldu yine
- 120b 5 Ey Sehâbî şevk-ı gülden bülbül-i şeydâ gibi  
Rûz u şeb kârum benüm efgân u zâr oldu yine

## 368

Mef'ûlü Mefâ'ilü Mefâ'ilü Fe'ûlün

- 1 Yüz sürmek için hâk-i reh-i yâra şükûfe  
Geldi ser olup leşker-i ezhâra şükûfe
- 2 İrdi yine eyyâm-ı bahâr olsa 'aceb mi  
Gül-şen felek-i ahdar u seyyâre şükûfe
- 3 İşitdi sabâdan haber-i makdem-i şâhı  
Seyr itmege çıkdı ser-i eşcâra şükûfe
- 4 Başdan başa çeşm oldu vücûdı nazar itseñ  
Gül ruhlarını itmege nezzâre şükûfe
- 5 Ser-halka-i erbâb-ı hevâdur n'ola olsa  
'Âlemde Sehâbî gibi âvâre şükûfe

## 369

Fe'ilâtün Fe'ilâtün Fe'ilâtün Fe'ilün

- 1 Dili görmek dilesen âteş-i cân-sûz ile  
İşte pervâneyi gör şem'-i şeb-efrûz ile
- 2 'Aklı dîvâne kılup gönümi teshîr itdi  
Çeşm-i sehâb-veş ü şu'bede-âmûz ile
- 3 Sîne-i çâkde her rahne ki açdı tîri  
Dikdi ol kaşları ya nâvek-i dil-dûz ile
- 4 Geçdi taht-ı çemene şevket ile şâh-ı bahâr  
Virdi eşcâra şeref hil'at-i nev-rûz ile

121a

- 5 Ey Sehâbî güneşi gördi şeref evcinde  
Seyr iden şâhumuzı tâli‘-i firûz ile

370

Fâ‘ilâtün Fâ‘ilâtün Fâ‘ilâtün Fâ‘ilün

- 1 Tâb-ı meyden ‘ârızuñ ‘arz eyledi güller yine  
Geldiler feryâda gül devrinde bülbüller yine
- 2 Depredür göñlüm cünûn zencîrini her dem meger  
Aña bûy-i zülfüñi irgürdi sünbüller yine
- 3 Bülbül-i âşüftenüñ gûş itmez olduñ nâlesin  
Ey gül-i ra‘nâ nedür bunca tegâfüller yine
- 4 Kıldılar ezhâr cem‘iyyet harîm-i bâgda  
Seyre çıkdi gül-şene sâhib-tecemmüller yine
- 5 Hâtır-ı mecmû‘umı başdan perîşân kıldılar  
Ey Sehâbî bir nice âşüfte-kâküller yine

371

Mef‘ûlü Fâ‘ilâtü Mefâ‘ilü Fâ‘ilün

- 1 Gül-şende yâd-ı sünbül-i miskîn-i yâr ile  
Dil eglenür benefşe vü zülf-i nigâr ile
- 2 Zülfüñ nesîmini güle irgürmeyeydi bâd  
Gülüp açılmaz idi nesîm-i bahâr ile
- 3 Bî-ihliyâr senden ayırdı beni felek  
Cândan cüdâ olur mı kişi ihtiyâr ile
- 4 Zerrîn kadehle gel berü gül-şende sâkıyâ  
Nûş idelüm benefşeyi savt-ı hezâr ile

121b

- 5 Kıldum Sehâbî gark-ı ‘arak gül varakların  
Gül-zâr içinde bu gazel-i âb-dâr ile

372

Fâ‘ilâtün Fâ‘ilâtün Fâ‘ilâtün Fâ‘ilün

- 1 Bezm-i gamda nây dem-sâz olalı âvâzuma  
Zühre-veş rakkâsdur gerdûn gerdân-sâzuma
- 2 Her kime kim râzum açdum gün gibi fâş eyledi  
Kimse mahrem bulmadum sâyemden özge râzuma
- 3 Dâg-ı sînem göñlüme olurdu rahmet revzeni  
Ger nişân olsa hadeng-i türk-i tîr-endâzuma
- 4 Seyl-i eşküm itmeyeydi manzar-ı çeşmi harâb  
Âşiyân olurdu ol bâz-ı hümâ-pervâzuma
- 5 Ey Sehâbî oldı mûrg-ı dil kebûter-veş esîr  
Dâne-i hâl-i ruh-ı şûh-ı kebûter-bâzuma

- 6 Zühreden beñzer ‘Utârid nazmumı gûş itdi kim  
Dem-be-dem tahsîn ider tab‘-ı sühan-perdâzuma

373

Fâ‘ilâtün Fâ‘ilâtün Fâ‘ilâtün Fâ‘ilün

122a

- 1 Cism-i zârum şöyle ülfet bağlamışdur dâyle  
Kim beni tev’em sanur gören Ebû Derdâ’yile  
2 Ne gönül gamdan ne gam bir dem gönülden ayrılır  
Gam da olmuş cüz’-i lâ-yenfek dil-i şeydâyile  
3 Yâr u hem-demden belâ şâmında mihnet-hâneme  
Kimse gelmez gam gelür ol dahi istignâyile  
4 ‘Âlem-i ma’nide seyr itdüm fenâ sahrâların  
Vâmık-ı âşüfte vü Kays-ı ‘adem-peymâyile  
5 Beñzedür deryâ-yı ‘ummânı muhît-i eşküme  
Katreysi şol kim ber-â-ber zann ider deryâyile  
6 Derd-i bî-dermânuma olmazdı imkân-ı ‘ilâc  
Ger mülâkât olsa mümkün hazret-i ‘Îsâ’yile  
7 Ey Sehâbî devr cevrenden şikâyet niçe bir  
Çün bilürsin başa çıkmış kimse yok dünyâyile

HARFU’L-YÂ’

374

Mefâ‘ilün Mefâ‘ilün Mefâ‘ilün Mefâ‘ilün

- 1 Nazardan gâyib oldu ol büt-i gül-pîrehen şimdi  
Cihân dâru’s-sürûridur baña beytü’l-hazen şimdi  
2 Belâ Mecnûn zamânından berü âvâre kalmışdı  
Dil-i dîvânemüñ vîrânesin kıldı vatan şimdi  
3 Añılmaz kıssa-i pür-gussamuñ yanında ‘âlemde  
Hadîs-i derd-i Mecnûn ser-güzeşt-i Kûh-ken şimdi  
4 Ma‘ârif bâgına gûyâ hazân irmiş ki bülbül-veş  
Nevâdan oldılar hâmûş erbâb-ı sühan şimdi  
5 Dür-i nazm-ı Sehâbî virdi zînet gûş-ı gerdûna  
Metâ‘-ı kâsid oldu gevher-i bahr-i ‘Aden şimdi

375

Fâ‘ilâtün Fâ‘ilâtün Fâ‘ilâtün Fâ‘ilün

122b

- 1 Benden ayırdı şu kim cânânumı cânım gibi  
Subh-ı ‘ayşı tîre olsun şâm-ı hicrânım gibi  
2 Çâk kılsun ceyb-i ‘ömrden dest-i bî-dâd-ı ecel  
Sînemi çâk idenüñ gamdan girîbânım gibi

- 3 Tal‘atinden dîde-i giryânumı dûr eyleyen  
Kana gark olsun İlâhî çeşm-i giryânum gibi
- 4 Dâmen-i vaslın şu kim çekdi elümden cevri ile  
Pây-mâl olsun reh-i zilletde dâmânum gibi
- 5 Şu‘le-i sûz-ı derûnum ‘âlem-efrûz eyleyen  
Odlara yansun Sehâbî âh-ı sûzânum gibi

## 376

Mef‘ûlü Fâ‘ilâtü Mefâ‘ilü Fâ‘ilün

- 1 Bilmezdi yâr derd ile sûz u güdâzumı  
Meclisde şem‘ dün gice fâş itdi râzumı
- 2 Ma‘zûr tut ki mest idüm ey pîr-i mey-kede  
Sürdümse ger ayaguña rûy-i niyâzumı
- 3 Mevt-i irâdî oldı baña hâl zâhidâ  
Ervâh-ı kuds kılsa ‘aceb mi namâzumı
- 4 Su gibi akıdur gözi yaşın ayagina  
Seyr eyleyen çemende benüm serv-i nâzumı
- 5 Kesdi Sehâbî zülfîni ruhsârı üzre yâr  
Kûtâh kıldı rişte-i ‘ömr-i dırâzumı

## 377

Fe‘ilâtün Fe‘ilâtün Fe‘ilâtün Fe‘ilün

123a

- 1 Oldı sîr-âb sirişkümle vefâ bûstânı  
Gülü bagrum yaşıdur goncesi gam peykânı
- 2 Sâkin-i külbe-i ahzân ideli hecr beni  
Yûsuf-ı câna tenüm oldı belâ zindânı
- 3 İtmezdevr-i felekden gile kim bencileyin  
İtdi anı dahi ser-geşte kazâ çevgânı
- 4 Demidür devr ide meclisde kadeh ey sâkî  
Nice bir nûş idelüm câm-ı gam-ı devrânı
- 5 Yeñi başdan umarın vire Sehâbî revnak  
Gül-şen-i tab‘uma çeşm-i terümüñ bârânı

## 378

Mef‘ûlü Fâ‘ilâtü Mefâ‘ilü Fâ‘ilün

- 1 Eylerdi ‘aks-i rûy-i dil-ârâm seyrini  
Zâhid ger itse bâde-i gül-fâm seyrini
- 2 Almazdı mihr ü mâhı müneccim hisâba ger  
Meh-veşler ile eylese bayram seyrini
- 3 Sâkî beyâz-ı ‘aynını mı kıldı lâle-gûn  
İtdüñ yine şükûfe-i bâdâm seyrini



- 4 Eyler nezâre ‘aynek-i encümle pîr-i çerh  
Bir şeb ki mâhum eylese ahşam seyrini
- 5 Encâm-ı kârı gözle Sehâbî bu hânede  
Cem gibi eyle bir niçe gün câm seyrini

## 379

- Fe‘ilâtün Fe‘ilâtün Fe‘ilâtün Fe‘ilün
- 1 Sâkî-i gam kimi ser-hoş kimi bed-hâl itdi  
Cür‘a-veş ayaga saldı beni pâ-y-mâl itdi
- 123b 2 ‘Âkıbet ey gül-i ra‘nâ elem-i hâr-ı gamuñ  
Çihremüz zerd kılup eşkümüzi al itdi
- 3 Bûlbül ü sûseni evsâf-ı gül-i ruhsâruñ  
Birini bâgda elken birini lâl itdi
- 4 Nazarumdan olalı hâl-i siyâhuñ gâ-yib  
Hırkasın merdümek-i dîde siyeh-şâl itdi
- 5 Ey Sehâbî beni bir kutb-ı zamânuñ nefesi  
Seyr-i ‘âlemde bu gün hem-reh-i abdâl itdi

## 380

- Fâ‘ilâtün Fâ‘ilâtün Fâ‘ilâtün Fâ‘ilün
- 1 Dehr-i pür-kahruñ temâşâ eyleyen gül-zârını  
‘Andelîb-âsâ çeker lâ-büd cefâ-yı hârını
- 2 Bâde ihzâr eyle ey sâkî sabûhı idelüm  
‘Âkil olanlar bu gün eyler tedârük yarını
- 3 Şevkdan cân virdüm öldüm kim tabîbüm lutf ile  
Karşu tutdı agzuma âyîne-i ruhsârını
- 4 Mushaf-ı hüsnünde râhib görse hâlûñ noktasın  
Rište-i tesbîh iderdi halka-i zünnârını
- 5 Vâdî-i Eymen’de envâr-ı tecellî gözleyen  
Kûyına varsun temâşâ eylesün ruhsârını
- 6 Ey Sehâbî görse nazm-ı âb-dârum müdde‘î  
Oda yakardı hasedden defter-i eş‘ârını

## 381

- Fe‘ilâtün Fe‘ilâtün Fe‘ilâtün Fe‘ilün
- 124a 1 Yârdan istemezüz cevır ü cefâdan gayrı  
Şâd olursa n’idelüm mihr ü vefâdan gayrı
- 2 İstedüm bâde-i râhat felegüñ câmından  
Sunmadı devr bâña zehr-i ‘anâdan gayrı
- 3 Kaldum ayakda gubâr oldı tenüm kimse beni  
Hâkden yok götürür bâd-ı sabâdan gayrı

- 4 Şeb-i fürkatde benüm âh-ı seher-gâhumdan  
Kimse vâkıf degül ey dost Hudâ'dan gayrı
- 5 Ey Sehâbî viremez âyine-i câna cilâ  
Sâhat-i mey-kedede câm-ı safâdan gayrı
- 6 Varmazuz savma'a-i zâhide gelmez bilürüz  
Bûriyâsından anuñ bûy-i riyâdan gayrı

382

Mef'ûlü Fâ'ilâtü Mefâ'ilü Fâ'ilün

- 1 Togmaz dirîg başuma bir gün vefâ günü  
Feryâd kim nihâyete irmez cefâ günü
- 2 Gün yüzine sehâb-ı hatın hâyil eyledüñ  
Gösterdüñ ey felek baña âhir kara günü
- 3 'Ârif odur cihânda ki yanında bir ola  
Rûz-ı neşât u 'ayş ile derd ü belâ günü
- 4 Geçdi küdüret-i şeb-i endûh sâkıyâ  
Mey sun ki irdi 'ışret ü zevk u safâ günü
- 5 Bî-hûş kıl Sehâbî'yi meyden şu resme kim  
Ayılmaya hisâb deminde cezâ günü

383

Fâ'ilâtün Fâ'ilâtün Fâ'ilâtün Fâ'ilün

124b

- 1 Ey ecel lutf eyle gel âzâd kıl gamdan beni  
Fârig it endîşe vü gavgâ-yı 'âlemden beni
- 2 Derd ü mihnet hayline baş olmaga rûz-ı ezel  
İhtiyâr itdi kazâ evlâd-ı Âdem'den beni
- 3 'İşk odiyla yandı eczâ-yı vücûdum oldı kül  
Sanma vâ'iz havf ide nâr-ı cehennemden beni
- 4 Cür'a-i câmuñ temennâ eyledüm oldum gedâ  
Kıldı müstagnî bu mansıb câm ile Cem'den beni
- 5 Ey Sehâbî kıldı vâkıf la'l-i rûh-efzâ-yı dost  
Mu'ciz-i cân-perver-i 'Îsâ-yı Meryem'den beni

384

Fe'ilâtün Fe'ilâtün Fe'ilâtün Fe'ilün

- 1 Saydı öz bendelerinden bu gün ol şâh beni  
Sanuram 'âleme şâh eyledi Allâh beni
- 2 İhtifâ genci idi zerre-veş ârâm-gehüm  
Eyledi gün gibi 'âlemde 'ıyân âh beni
- 3 İçmeden şerbet-i cân-bahş-ı visâlûñ cânâ  
Korkaram hecr helâk eyleye nâ-gâh beni
- 4 Za'fdan varımazın kûyına yârûñ ey eşk  
Sen revân ol kerem it al bile hem-râh beni

- 5 Perde-i gaybda her râz ki mestûr olsa  
Dâmen-i yâr Sehâbî ider âgâh beni

385

Mefâ'îlün Mefâ'îlün Mefâ'îlün Mefâ'îlün

125a

- 1 Ferah bir vech ile kalbe mey-i gül-fâmdan geldi  
Ki mahv oldu ne gam kim hâtıra eyyâmdan geldi  
2 Surâhî şeyh-i câm u biz mürîd-i Câmî'yüz sâkî  
Bize feyz-i dem-â-dem kim irişdi câmdan geldi  
3 Dil-i hod-kâma ger var ise 'akluñ olma tâbî' kim  
Baña nâ-kâmlık hep bu dil-i hod-kâmdan geldi  
4 Teveccüh kıldı zülfünden gönül ruhsârûña kıblem  
Tavâf-ı Ka'be'ye hâcî bilâd-ı Şâm'dan geldi  
5 Sehâbî itmezem şekvâ sipihr ü seyr-i encümden  
Ne kim geldi baña bu baht-ı nâ-fercâmdan geldi

386

Fe'ilâtün Fe'ilâtün Fe'ilâtün Fe'ilün

125b

- 1 Dâglar yakdı gönül lâle-i sîr-âb gibi  
Tolu kan oldu gözüm câm-ı mey-i nâb gibi  
2 Görmedüm zerre kadar mihr cihân halkından  
Sabr-ı 'uşşâklayın ol dahi nâ-yâb gibi  
3 Ser-girânlık niçe bir h<sup>w</sup>âb-ı girândan ey baht  
Gözün aç sen de uyan dîde-i bî-h<sup>w</sup>âb gibi  
4 Yârı kendünde dilerseñ ki temâşâ idesin  
Sâf-dil ol yoluñı pâk idegör âb gibi  
5 Görüp ol kaşları mihrâba sücûd eyleyenün  
Kıbleden dönse yiridür yüzi mihrâb gibi  
6 Bir içim su içemez kâm ile devrânda şu kim  
Aglamaz inilemez derd ile tolâb gibi  
7 Ey Sehâbî içerüz hûn-ı ciger mey yirine  
Sunulan bezm-i ezelde bize hûn-âb gibi

387

Fâ'ilâtün Fâ'ilâtün Fâ'ilâtün Fâ'ilün

- 1 Tende gömgök çûb-ı zahmın sañmañuz kim ol perî  
Ben gedâya itdi ihsân hil'at-i nîlûferî  
2 Her nişân-ı çûb-ı dil-ber bu ten-i mecrûhda  
Bir nihâl-i tâzedür kim 'ışkdur anuñ yiri  
3 Atlas-ı çerhi bırakdum tâcını terk eyledüm  
Çerhe başın egmeyen n'eyler kabâ vü efseri

- 4   Terk-i ser kılan tarîk-ı ‘ışkda ser-dâr olur  
Başuñı terk it bu yolda sanma anı ser-serî
- 5   Görinen gerdûn degül deryâ-yı eşküm ‘aksidür  
Gevherindendür nişân yir yir görinen ahteri
- 6   Ol cihetden kim döner<sup>111</sup> dâyim murâdum ‘aksine  
Kasd ider gerdûna her dem dîd-ı âhum ejderi
- 7   Sîm-i eşk ü rûy-i zerdüñ var Sehâbî çekme gam  
Çârsû-yı ‘ışka var sarf eyle bu sîm ü zeri

## 388

Fâ‘ilâtün Fâ‘ilâtün Fâ‘ilâtün Fâ‘ilün

126a

- 1   Gird-bâd-ı gam gibi çerh itdi ser-gerdân beni  
Soñra yirden yire çaldı gerdiş-i devrân beni
- 2   Şûr-ı ‘ışkı bir büt-i Leylî-veşüñ Mecnûñ-misâl  
Eyledi hayret beyâbânında ser-gerdân beni
- 3   Bî-hod olsam geçdi meyden dimeñüz meclisde kim  
Câm-ı meyde ‘aks-i sâkîdür iden hayrân beni
- 4   Fürkatüñ Ya‘kûb-veş ey Yûsuf-ı Mısr-ı cemâl  
‘Âkıbet kıldı mukîm-i Külbe-i Ahzân beni
- 5   Gizledüm şi‘rümde dil râzın Sehâbî bilmedüm  
Kim ider rüsvâ-yı ‘âlem defter ü dîvân beni

## 389

Fâ‘ilâtün Fâ‘ilâtün Fâ‘ilâtün Fâ‘ilün

- 1   Öldürür âhır cefâ vü cevri ile devrân beni  
Kanlar agla ey kadeh vey şem‘-i meclis yan beni
- 2   Mihri ile gün gibi rif‘atde iken bir mehüñ  
Zerre-veş hâk ile yeksân eyledi devrân beni
- 3   Gûy-veş bilmem ne hâletdür ki çevgân-ı kâzâ  
Eylemiş takdîr meydânında ser-gerdân beni
- 4   Göñlümi bir şâha kul itdüñ yine ey ‘ışk-ı pâk  
Eyledüñ bir bende iken ‘âleme sultân beni
- 5   Ol şeh-i sâhib-kırân rahm itmez oldu hâlüme  
Öldürür âhır Sehâbî gayret-i akrân beni

## 390

Fâ‘ilâtün Fâ‘ilâtün Fâ‘ilâtün Fâ‘ilün

- 1   Âşinâsın veh ki ol bî-gâne-veş yâd itmedi  
Derdin efzûn kıldı gam-gîn göñlümi şâd itmedi

<sup>111</sup>Metinde “tonar” şeklinde yazılmıştır.

126b

- 2 Gönlümüñ şehrin ki yıkmışdı gamı bî-dâd ile  
'Adl ile tâ'mîr idüp dâd ile âbâd itmedi
- 3 Cânımı kılmışdı gam mahbûs-ı zindân-ı beden  
İrişüp anı ecel hayfâ ki âzâd itmedi
- 4 Olmadı hem-dem leb-i cân-perver-i hûbân ile  
Nây-veş bezm-i safâda ol ki feryâd itmedi
- 5 Bilmedi zâhid Sehâbî âteş-i mey kadrini  
Hirmen-i zühd ü riyâyı tâ ki ber-bâd itmedi

391

Mef'ûlü Mefâ'ilü Mefâ'ilü Fe'ûlün

- 1 Hecründe gözüm lâle-sıfat hûn ile toldı  
Sâkî yine cânum mey-i gül-gûn ile toldı
- 2 Şol deñlü gözüm yaşı revân oldu cihâna  
Kim rûy-i zemîn Dicle vü Ceyhûn ile toldı
- 3 Ol gül has u hâr ile olaldan berü hem-dem  
Bî-çâre gönül gonce-sıfat hûn ile toldı
- 4 Gam kişverini aldı sipâh-ı dil-i 'uşşâk  
Ol kişver içi 'âşık-ı mecnûn ile toldı
- 5 Nazmum güherin eyledüm îsâr Sehâbî  
'Âlem sadeñi lü'lü-i meknûn ile toldı

392

Mefâ'ilün Mefâ'ilün Mefâ'ilün Mefâ'ilün

127a

- 1 Gözüm nûrı nazardan gâyb oldu gözde nem kaldı  
Ferah dilden firâr itdi yirinde derd ü gam kaldı
- 2 Dil ü dîn gitdi cân nakdin de hicrân eyledi gâret  
Ecel şimdi girü benden ne ister dahi nem kaldı
- 3 Umardum irişüp dil derdine tîrûñ ide dermân  
Gelüp eglenmedi gitdi velî dilde elem kaldı
- 4 Murâduñ nâm ise 'âlemde elden koma câmı kim  
Cihân bezminde câm oldu sebep kim nâm-ı Cem kaldı
- 5 Sehâbî bendeñe niçün 'inâyet olmaya senden  
Ri'âyet olmaduk kapuñda şâhum bir 'acem kaldı

393

Mefâ'ilün Mefâ'ilün Mefâ'ilün Mefâ'ilün

- 1 Yiridür yoluña kılsam fedâ cân nakdin ey sâkî  
Ki lutfuñdan yine itdün müşerref bezm-i 'uşşâkı
- 2 Beni ser-geşte kıldı tâli'üm tâ sen se'âdetle  
Varup hurşîd-veş seyr eyledün ey mâh âfâkı

- 3 Semendüñ hâk-râhın eyledüm tahmîr eşkümle  
Ki nâfi ‘dür dil-i mecrûhuma bilürdüm ol yakı
- 4 Kapuñ ol Ka‘be-i maksûddur kıblem ki şevkından  
Taleb deştinde her dem cân virür biñ var müştâkı
- 5 Sehâbî niçe bir zehr-i gam içsün devr-i câmindan  
Edri ke’sen ve nâvilhâ elâ yâ eyyühe’s-sâkî<sup>112</sup>

## 394

Fâ‘ilâtün Fâ‘ilâtün Fâ‘ilâtün Fâ‘ilün

- 1 Dil hisârın ol ki ten şehrinde peydâ eyledi  
Göñlümi hayl-i belâ vü derde me’vâ eyledi
- 127b 2 Derdümi hecrüñde ey ‘Îsî-nefes gördi tabîb  
Şerbet-i merg ile bu derde müdâvâ eyledi
- 3 Sarsar-ı hecrüñle ben dil-haste olmışdum velî  
Ey Mesîhâ-dem nesîm-i vasluñ ihyâ eyledi
- 4 Dîde vü dil mâcerâsın gizler idüm âh kim  
Eşk ü âhum yirde gökde âşikârâ eyledi
- 5 İsteme zâhid Sehâbî’den salâh u zühd kim  
‘Işk ol dîvâneyi ‘âlemde rüsvâ eyledi

## 395

Fâ‘ilâtün Fâ‘ilâtün Fâ‘ilâtün Fâ‘ilün

- 1 Câna kasd itdüñ açup zülf-i hü mâ-pervâzuñı  
Muhtasar bir mürga salduñ şol iki şeh-bâzuñı
- 2 Tâze cân buldı açıldı gül gibi dil goncesi  
Ey büt-i ‘Îsî-nefes gûş ideli âvâzuñı
- 3 Mahzen-i râzuñdurur göñlüm anı çâk eyleme  
Fâş olur nâ-mahreme ey gonce açma râzuñı
- 4 Tutdı eflâki sadâ-yı erganûn-ı âh-ı dil  
Yire çal kim yiridür ey Zühre şimdi sâzuñı
- 5 Ger Sehâbî’den murâduñ cân ise virsün revân  
Katline tahrîk kılma gamze-i gammâzuñı

## 396

Fâ‘ilâtün Fâ‘ilâtün Fâ‘ilâtün Fâ‘ilün

- 1 Yâr ben bîmâra çün ‘arz eylemez dîdârını  
Ey ecel ma’dûm kıl lutf it vücûdum vâırını
- 128a 2 Cân bağışlar dem-be-dem emvâta ol ‘Îsî-nefes  
Bu ne hâletdür ki sormaz ‘âşık-ı bîmârını

<sup>112</sup>Ey sâkî getir kadehi de dolaştır. (Bu mısra Mu‘aviye’nin oğlu Yezîd tarafından söylenmiş ve Hâfız tarafından dîvânının başında iktibâs edilmiştir.)

- 3 ‘Akl lâ-ya‘kıl hıred medhûş u cân hayrân olur  
Bilseler ger ‘ışkumuñ keyfiyyet-i esrârını
- 4 Sübha-i zâhıdden el çekdüm ki küfr-i zülf-i yâr  
Bagladı cân biline deyr-i fenâ zünnârını
- 5 Kıldı mâhum fûrkatinde dûd-ı âhum zulmeti  
Ey Sehâbî gökde ser-gerdân felek ‘ayyârını

## 397

Mefâ‘ilün Mefâ‘ilün Mefâ‘ilün Mefâ‘ilün

- 1 Hakâretle nazar kılma görüp ben zâr-ı şeydâyı  
Begüm ahabbâb hakkında işitme kavl-i a‘dâyı
- 2 Kabûl itmez nasîhat ‘ışk ile bed-nâm olan ‘âşık  
Sözüm tut nâsihâ billâh lutf it kes bu gavgâyı
- 3 Mekân-ı ‘ışkdur gönlüm nazar kıl zerreyi gör kim  
İhâta eylemişdür âfitâb-ı ‘âlem-ârâyı
- 4 Mahabbet itme ey dil şâhid-i pür-‘işve-i dehre  
Bilürsin kimseye itmez vefâ mahbûb-ı hercâyı
- 5 Semerkand ü Buhârâ’yı Sehâbî seyr idem dirdüm  
Velî terk idemez gönlüm Sitanbûl u Galatâ’yı

## 398

Fe‘ilâtün Fe‘ilâtün Fe‘ilâtün Fe‘ilün

128b

- 1 Sûfiyâ kalbümi bir cân ile kıldı sâfî  
Mey-i sâfuñ ne ‘aceb olsam eger vassâfî
- 2 Kûy-i dil-dârı koyup cenneti her lahza öger  
Gör e billâh gör e vâ‘iz-i bî-insâfî
- 3 Bize ‘ışk âyetinüñ olalı tefsîri keşf  
İtmemişdi dahi ‘Allâme beyân Keşşâf’ı
- 4 Çihremi zer yaşımı sîm-i revân eyledi ‘ışk  
Çârsû-yı gamuñ olsam ne ‘aceb sarrâfî
- 5 Sitem ü cevır ile şâdem ki beni yâd ide yâr  
Gayra mahsûsdurur çün kerem ü eltâfî
- 6 Ol ki lâm itdi elif-kaddümi Kâf-ı sitemi  
‘Ayn-ı lutf ile baña bir nazarıdur kâfî
- 7 Gül-şen-i çeşm-i Sehâbî’de karâr it dir idüm  
Hâr-ı müjgânıyıla olmasa pür etrâfî

## 399

Fâ‘ilâtün Fâ‘ilâtün Fâ‘ilâtün Fâ‘ilün

- 1 Ey sabâ seyr eyle seyl-i dîde-i pür-hûnumı  
Söyle ol Leylî-veşe hâl-i dil-i mecnûnumı
- 2 Aglamakdan çeşm-i terde kalmadı bir katre yaş  
Eyledüm zâyî‘ dirîgâ gevher-i meknûnumı

- 3 Kıssa-i pür-gussamı gûş eylemez ‘arz eylesem  
Ol perî efsâne zann eyler benüm efsûnumı
- 4 Bunca vahşet sâkin-i kûy-ı melâmetden neden  
Gel kerem kıl ey ecel şâd it dil-i mahzûnumı
- 5 Ey Sehâbî vasl umarken hecre oldum mübtelâ  
Bak sitârem seyrine gör tâlî‘-i vârunumı

## 400

Mef‘ûlû Fâ‘ilâtün Mef‘ûlû Fâ‘ilâtün

129a

- 1 Bezm-i gamuñ vücûdum olmuş yanar çerâgı  
Her ehl-i şevk şimdi benden yakar çerâgı
- 2 Bîdâr-ı şâm-ı hecrûñ zülf ü ruhuñ gamıyla  
Âh-ı pür-âteşidür şâm u seher çerâgı
- 3 Her şâm ile seher-gâh ger âh idersem ey mâh  
Söynür felekde nâ-gâh şems ü kamer çerâgı
- 4 Nûr ruhuñ yüzinden ger olmayaydı lâmi‘  
İtmezler idi secde pervâneler çerâgı
- 5 Pîr-i felek nücûmı etrâf-ı mâha dizmiş  
Gûyâ ki zeyn olunmuş akça ile er çerâgı
- 6 Hâsid hayâli olmaz germiyyet ile makbûl  
Virmez ziyâ Sehâbî her bî-hüner çerâgı

## 401

Mefâ‘ilün Fe‘ilâtün Mefâ‘ilün Fe‘ilün

129b

- 1 Esîr kıldı yine bir kaşı kemâne beni  
Zamâne itdi belâ tîrine nişâne beni
- 2 Vücûdumı ideyin bir tarîk ile ma‘dûm  
Ki bir dahi arayup bulmaya zamâne beni
- 3 Gelür müdâm belâ ben belâ-keşe âyâ  
Belâ içün mi getürdi Hudâ cihâna beni
- 4 Hümâ-yı ravza-i kudsam ‘urûca meyl itdüm  
Mukayyed itmedi ‘âlemde âb u dâne beni
- 5 Sehâbî sîneme pervâz idüp konar tîri  
O mürğ eyledi gûyâ ki âşiyâne beni

## 402

Fâ‘ilâtün Fâ‘ilâtün Fâ‘ilâtün Fâ‘ilün

- 1 Eyledi peydâ Mesîhâ gerçi ihyâ resmini  
Kıldı ihyâ la‘l-i cân-bahşuñ Mesîhâ resmini
- 2 Dîdeden gitmez hayâlûñ gûyiyâ bu safhaya  
Çekdi nakkâş-ı ezel ol şekl-i zîbâ resmini



- 3 Ey musavvir mûy-i jülîdemle seyr it peykerüm  
Çekmek isterseñ eger Mecnûn-ı şeydâ resmini
- 4 Mülk-i dünyâyı senüñ yoluñda itmişdüm fedâ  
Çekmeden ressâm-ı kudret dahi dünyâ resmini
- 5 Ey Sehâbî ola dirseñ mehbit-i hayl-i melek  
Deyr-i dilde nakş kıl ol şûh-ı tersâ resmini

## 403

Mefâ'ilün Fe'ilâtün Mefâ'ilün Fe'ilün

- 1 Demidür eyleye gamdan cihânda şâd beni  
Zamâne niçeye dek ide nâ-murâd beni
- 2 Yolında za'f ile mânend-i berg-i kâh oldum  
Ki şâyed irgüre kûy-ı nigâra bâd beni
- 3 Benüm müdâm dilüm zikrûñ ile gûyâdur  
Neden sen eylemez olduñ efendi yâd beni
- 4 Göñül vilâyetine 'ışk olalı vâlî  
Karâr u tâkat u sabr itdi hayr-bâd beni
- 130a 5 Kapuñ na'im-i mukîmân-ı 'ışkdur bilürem  
Bihîşte irgürür âhir bu i'tikâd beni
- 6 'Aceb mi Kays ile Ferhâd ola şâkirdüm  
Ki fenn-i 'ışkda dehr itdi üstâd beni
- 7 Sehâbî olalı sâlik reh-i tevekkülde  
Melûl kılmadı hergiz hayâl-zâd beni

## 404

Mefâ'ilün Mefâ'ilün Mefâ'ilün Mefâ'ilün

- 1 Bi-hamdi'llâh ki irdi âhıra hecrûñ şeb-i târî  
Müyesser kıldı 'uşşâka visâl eyyâmını Bârî
- 2 Rakîbüñ 'âşika âzâr idi kârî bi-hamdillâh  
Ki derde mübtelâ itdi Hudâ ol merdüm-âzârî
- 3 Cefâyı kâr idinmişdi velî bilmezdi ol gâfil  
Ki dehr âhir cefâyile helâk eyler cefâ-kârî
- 4 'Adû Mansûr'luk da'vâsın eylerdi ne hâsıl kim  
Müşerref itmedi dâr-ı cihân içre ser-i dârî
- 5 Sehâbî çeşm-i a'mâ nûr alurdi mihr-i enverden  
Eger fark eyleyeydi rûz-ı rûşenden şeb-i târî

## 405

Mefâ'ilün Mefâ'ilün Mefâ'ilün Mefâ'ilün

- 1 Habâb-âsâ degül bir dem hevâ-yı 'ışkdan hâlî  
Dil-i âvâremüñ şimden girü bilmem n'ola hâlî

130b

- 2 Gıřiftârân-ı zindân-ı belâ keyfıyyet-i hâlin  
Ne bilsün gül-şen-i ikbâl ü ‘izzet fârıgu’l-bâli
- 3 Tayansa peykerüm dîvâr-ı kûy-ı yâra za‘findan  
Gören anı sanur Mecnûn-ı mihnet-dîde timsâli
- 4 Egerçi düřdi başum dûr hâk-i âsitânından  
Bî-hamdi’llâh segân-ı kûy-ı yâruñ oldu pâ-mâli
- 5 Sehâbî tekıye-i ‘âlemde bir Rûmî güzel sevdi  
‘Acem iklimini terk itdi oldu Rûm abdâli

406

Mef‘ûlü Fâ‘ilâtü Mefâ‘ilü Fâ‘ilün

- 1 Kapuñdan itdi cevır ile devrân cüdâ beni  
Kıldı belâ-yı fûrkatüñe mübtelâ beni
- 2 Benden iderdi çün seni bî-gâne kâşkî  
‘İřkuñla itmeyeydi ezel âşinâ beni
- 3 Hecrûñde kimse hâlûme rahm eylemez benüm  
Sabır ideyin esirgeye řâyed Hudâ beni
- 4 Vâ-hasretâ ki eyledi mânend-i gird-bâd  
Ser-geřte-i tarîk-ı dalâlet hevâ beni
- 5 Virdüm Sehâbî bâda vücûdum gubârını  
Kûy-ı murâda irgüre řâyed sabâ beni

407

Mef‘ûlü Fâ‘ilâtü Mefâ‘ilü Fâ‘ilün

131a

- 1 Gördi hücûm ile gam u mihnet sipâhını  
Dil dahi atdı her tarafa tîr-i âhını
- 2 Mesrûr olur belâ gelicek göñlûme belî  
Buldukça řâd olur kiři ârâm-gâhını
- 3 Olsun olursa merdüm-i çeřmümde rû-siyâh  
Misk ile kim ber-â-ber ider hâk-râhını
- 4 Her tâc-dâr kim kodı yoluñda yire baş  
Atdı güneř gibi göge zerrîn külâhını
- 5 Her kim Sehâbî ol büte bir kez ider sücûd  
Yazmaz ferîřte hařre dek anuñ günâhını

408

Fâ‘ilâtün Fâ‘ilâtün Fâ‘ilâtün Fâ‘ilün

- 1 Hıdmetüñden bendeñi eyyâm mehcûr eyledi  
Çeřm-i bed ‘âlî-cenâbuñdan beni dûr eyledi
- 2 Tîr-i bârân-ı belâ yagdırdı gamzeñ üstüme  
Sîne-i çâküm misâl-i beyt-i zenbûr eyledi
- 3 Dil mukîm-i külbe-i ahzân idi mahzûn u zâr  
Müjde-i vasluñ iriřdi anı mesrûr eyledi

- 4 Şevk-ı ruhsârûñla gönñlüm ‘âzim oldı kûyuña  
Tâlib-i dîdâr oldı ragbet-i Tûr eyledi
- 5 Fikr-i hatt u hâl-i hûbân ile dil târîk idi  
Şevk-ı nâr-ı ‘ârızuñ yakdı anı nûr eyledi
- 6 Almag isterler Sehâbî gözleri dil mürğını  
Ol iki şeh-bâz kasd-ı sayd-ı ‘usfûr eyledi

## 409

Mefâ‘ilün Fe‘ilâtün Mefâ‘ilün Fe‘ilün

131b

- 1 Rikâbıdur meh-i nev hınc-ı çerh aña tâzî  
Gazâya olalı ‘âzim şehin-şeh-i gâzî
- 2 Rikâb-ı devlete basdukça pâ-y-i himmetini  
İrişdi gûş-i dile feth u nusret âvâzı
- 3 Cihânı sâye-i lutfında kıldı âsûde  
Temûz-ı hâdisede sancak-ı ser-efrâzı
- 4 ‘Ulüvv-i şânı ile gökde meh-ce-i ‘alemi  
Yiridür olsa meh ü âfitâb hem-râzı
- 5 Müdâm feth u zafer mürğını şikâr eyler  
Fezâ-yı himmetinüñ bâz-ı ‘Arş-pervâzı
- 6 ‘Azâb-ı dünya vü ‘ukbâyile mu‘azzebdir  
Hasûd-ı rû-siyehi hasm-ı hîle-perdâzı
- 7 Müsahhar eyledi şemşîr-i şâh-ı Rûm gibi  
Sehâbî tîğ-ı zebânum ‘İrâk u Şîrâz’ı

## 410

Mefâ‘ilün Fe‘ilâtün Mefâ‘ilün Fe‘ilün

132a

- 1 Kılur kemend-i ham-ı zülfüñ ile cân-bâzî  
Cihânda görmedi kimse bu resme cân-bâzı
- 2 ‘Aceb mi mürğ-ı dili sayd kılssa bâzî ile  
Gözüñ ki oldı fezâ-yı melâhatuñ bâzı
- 3 Zebân-ı hancer-i hûn-rîz-i cân-sitânuñdur  
Derûn-ı sînede kalb-i hasûd hem-râzı
- 4 Dem urdı kankı muhâlif senüñ hilâfuñdan  
Ki soñra olmadı feryâd u âh dem-sâzı
- 5 Diler ki ‘arsa-i rezmüñde başını kıla top  
Şeh-i serîr-i ‘Acem ide gibi ser-bâzî
- 6 Müsahhar eyledi Tebrîz’i şîr-i bîşe-i Rûm  
Muhâlif özledi rûbeh-misâl Şîrâz’ı
- 7 Sehâbî âhını Tebrîz içinde sandı gören  
Çekildi mülk-i Cem’e sancak-ı şeh-i gâzî

## 411

Mef'ûlû Fâ'ilâtü Mefâ'ilü Fâ'ilün

- 1 Çâk itdi dest-i 'ışk selâmet yakasını  
Geydürdi ben gedâya melâmet 'abâsını
- 2 Ben ehl-i mihnetem baña şâl-ı belâ yiter  
Geysün huzûr tâlibi râhat libâsını
- 3 Virmez gedâ-yı der-geh-i erbâb-ı fakr olan  
Dîbâ-yı 'izz ü devlete zillet palâsını
- 4 Vâ'iz fezâ-yı kûyını görseydi bir dahi  
İtmezdi yâd ravza-i cennet safâsını
- 5 Bir şâha bende oldu Sehâbî ki gün gibi  
Dikdi felek burûcına nusret livâsını

## 412

Fâ'ilâtün Fâ'ilâtün Fâ'ilâtün Fâ'ilün

- 1 Gerçi Tûbâ oldu Rıdvân-ı Cenâb'ıñ dikmesi  
Kâmetüñdür bâg-bân-ı bâg-ı cânüñ dikmesi
- 2 Yiridür baş egmese nahl-i riyâz-ı cennete  
Gül-şen-i 'âlemde sen serv-i revânüñ dikmesi
- 3 Nahl-i tîrin beslerem hûn-ı cigerle olalı  
Bûstân-ı dilde bir ebrû-kemânüñ dikmesi
- 4 Sanma müjgânım ki hâşâk-i reh-i dil-dârdur  
Cûy-bâr-ı dîdede bâd-ı sabânüñ dikmesi
- 5 Dehri pür kıldı Sehâbî mîve-i 'irfân ile  
Nahl-i tab'um olalı şâh-ı cihânüñ dikmesi

132b

## 413

Fâ'ilâtün Fâ'ilâtün Fâ'ilâtün Fâ'ilün

- 1 Tûtiyâ itdi şu kim kûy-ı kanâ'at hâkini  
Gün gibi kıldı münevver dîde-i nem-nâkini
- 2 Dûr kıldı âfitâbumdan beni devrân velî  
Dûd-ı âhum tîre itdi encüm ü eflâkini
- 3 Bûy-i dil-dârı işitdi bâddan gül-şende gül  
Yile virdi şevkdan pîrâhen-i sad-çâkini
- 4 Cân virür hâk olmaga cismi reh-i teslîmde  
Seyr iden ol serv-i nâzuñ kâmet-i çâlâkini
- 5 N'eylesün kandîl-i mâhı ol ki yakar şem'-veş  
Kûy-ı yârüñ subha dek her şeb has ü hâşâkini
- 6 Kalbe virürken mey-i sâfî safâ sâkî neden  
Tîre kıldı zâhidüñ âyine-i idrâkini
- 7 Cevr ile kıldı Sehâbî bendesin ol şeh helâk  
Bilmedi anuñ dirîgâ kadr-i 'ışk-ı pâkini

## 414

- Fâ'ilâtün Fâ'ilâtün Fâ'ilâtün Fâ'ilün
- 133a
- 1 Hañer-i cevruñle her ki çâk kılsañ sînemi  
Göñlümi biñ pâre kıl al kîne-i dîrînemi
  - 2 Hindû-yi hâlûñ gibi dil olalı âteş-perest  
Şevk-ı ruhsâruñla âteş-hâne kıldı sînemi
  - 3 Gevher-i peykânuña dil dürcünü kıldum sadef  
Eyledüm memlû dür-i sır-âb ile gencînemi
  - 4 Jeng-i gayrı saykal-ı mihrûñ göñülde kıldı pâk  
Eyledi hurşîd-veş sâfî benüm âyînemi
  - 5 Ey Sehâbî delkumî bâd ile kıldum dâg dâg  
Eyledüm ya'nî mülemma' hırka-i peşmînemi

## 415

- Mef'ûlü Fâ'ilâtü Mefâ'ilü Fâ'ilün
- 1 Saldı sabâ-misâl kazâ der-be-der beni  
İtdi kader fütâde-i her-reh-güzer beni
  - 2 Bir mihr ü mâh-çehre hevâsında zerre-vâr  
Ser-geşte kıldı gerdiş-i devr-i kamer beni
  - 3 Bir kaşı yadan olalı mahzûn göñül cüdâ  
Tîr-i belâya eyledi devrân siper beni
  - 4 Eşküm 'akîka olsa müşâbih 'aceb degül  
La'li firâkı eyledi hûnîn-ciger beni
  - 5 Gam çekmeden Sehâbî yeñilmez gözüm yaşı  
Rüsvâ-yı 'âlem eyledi bu çeşm-i ter beni
  - 6 Çekmekden ise ke's-i gamı kâşki ecel  
İtseydi merg-i câm ile bî-haber beni

## 416

- Fâ'ilâtün Fâ'ilâtün Fâ'ilâtün Fâ'ilün
- 133b
- 1 Eyledi gerdûn cüdâ bir mâh-sîmâdan beni  
Sâye-veş ayırdı mihr-i 'âlem-ârâdan beni
  - 2 Fârig itdi sâkî-i hicrân yine bir câm ile  
Mihnet-i dünyâ ile âşûb-ı 'ukbâdan beni
  - 3 Katlûmi yarın diyü te'hîr ider hecr ey ecel  
Gel halâs it va'de-i imrûz u ferdâdan beni
  - 4 Mürde cisme geldi peygâmuñla cân virdi sabâ  
Kıldı müstagnî dem-i cân-bahş-ı 'Îsâ'dan beni
  - 5 Lücce-i hicrâna düşmedi Sehâbî fûlk-i ten  
Sarsar-ı âhum halâs itdi bu deryâdan beni

## 417

Fâ'ilâtün Fâ'ilâtün Fâ'ilâtün Fâ'ilün

- 1 İremez kûh-ı belâma Kûh-ken endîşesi  
Bî-sütün-ı 'ıška te'sîr itmez anuñ tîşesi
- 2 Şehr-i mihnetdür vücûdum kûh-sâr-ı gam başum  
Mûy-i jülîdemdürür ol kûh-sâruñ bîşesi
- 3 Gamzeñe hâcet degül ta'lîm-i bîdâd eylemek  
Kim o mekkâruñ şehâ cellâdlukdur pîşesi
- 4 Gül-şen-i dil olalı menzil-geh-i sultân-ı 'ışk  
Gonce-veş hâlî degül bir lahza meyden şîşesi
- 5 'İşk-ı Şîrîn ile Ferhâd'ıñ Sehâbî hâlini  
Bî-sütûna şerh ider bir bir zebân-ı tîşesi

## 418

Fâ'ilâtün Fâ'ilâtün Fâ'ilâtün Fâ'ilün

134a

- 1 Yakdı yandurdı derûnum âteş-i pür-tâb-ı mey  
Sâkiyâ bu âteşi def' itmez illâ âb-ı mey
- 2 Bâdeden zâl-i hired düşse 'aceb mi ayaga  
Rüstem-i Zâl'i ayakdan düşürür sürh-âb-ı mey
- 3 Matla'-ı envâra döndi zulmet-âbâd-ı vücûd  
Aña bir pertev salaldan mihr-i 'âlem-tâb-ı mey
- 4 Seng-i tevbeyle esâs-ı dînüñi kıl üstüvâr  
İtmedin vîrân binâ-yı 'ömrüñi seyl-âb-ı mey
- 5 Dûr ider halkı Sehâbî devlet-i bîdârdan  
Bâde-i 'ayş-ı sabûhı birle şeker-h<sup>w</sup>âb-ı mey

## 419

Mefâ'ilün Mefâ'ilün Mefâ'ilün Mefâ'ilün

- 1 Halâvetden dem ururmuş dururken leblerüñ kandi  
Yiridür olsa bendinden cüdâ ney-şekkerin bendi
- 2 Bulınmaz sen melek-sûret perî-zâduñ nazar kılsañ  
Meger âyînede yâ âbda misli vü mânendi
- 3 Bu hüsn ü bu melâhat kim habîbüm sende var bilmem  
Ki Yûsuf'sın ve yâhud Yûsuf'ıñ şâyeste-i ferzendi
- 4 Dehânuñ goncesi gül-zâr-ı hüsnüñ verd-i handânı  
Boyuñ servi letâfet bâğınuñ nahl-i berûmendi
- 5 Sehâbî Rûm'da bir husrev-i hûbâna dil virdüm  
Göñül den gitdi mihr ü mâh-rûyân-ı Semerkandî

420

134b

- Fâ'ilâtün Fâ'ilâtün Fâ'ilâtün Fâ'ilün
- 1 Sâyesinde kâkülün hurşîdi pinhân eyledi  
Rûz-ı 'uşşâkı şeb-i târ ile yeksân eyledi
  - 2 Şâm-ı zülfünden güzer kıldı seher vakti sabâ  
Hâtır-ı mecmû'-ı 'uşşâkı perîşân eyledi
  - 3 Gördi ruhsârûn sabûhîden şafak-gûn oldugın  
Subh-ı sâdık şevkdan çâk-i girîbân eyledi
  - 4 Görmeden cânânı cân virmek katı düşvâr idi  
Veh ki hicrân baña ol düşvârı âsân eyledi
  - 5 Her binâ kim yaptı seng-i zühd ile mi'mâr-ı 'akl  
Bâde seyl-âbıyla anı 'ışk vîrân eyledi
  - 6 Kirpigün nâvekleri kıldı Sehâbî kalbine  
Bâga gül devrinde ol lutfi ki bârân eyledi

421

- Mefâ'ilün Mefâ'ilün Mefâ'ilün Mefâ'ilün
- 1 Beni 'uşşâk mâ-beyninde gördiler fûnûn ehli  
Temennâ itdiler benden sebak 'ışk u cünûn ehli
  - 2 Girîbân-ı sükûn u ceyb-i sabrı çâk kılmazdı  
Dil-i mecnûnum olsaydı eger sabr u sükûn ehli
  - 3 Şeb-i hecründe ey hurşîd-i tal'at dûd-ı âhumdan  
Siyeh-pûş oldu ser-tâ-ser bu kasr-ı nîl-gûn ehli
  - 4 Velî bir vech ile sehhâr-ı gamzeñ itmedi bî-hod  
Ki huş-yâr ideler ta'vîz ile anı fûsûn ehli
  - 5 Cihânda olmasa kâmuñ revâ gam çekme 'âdetdür  
Hemîşe nâ-murâd eyler Sehâbî dehr-i dûn ehli

422

135a

- Fâ'ilâtün Fâ'ilâtün Fâ'ilâtün Fâ'ilün
- 1 İstemez maktûl-i şemşîr-i mahabbet türbeti  
Sâlik-i râh-ı fenâ n'eyler cihânda şöhreti
  - 2 Gitdi cânânım belâ küncinde tenhâ kaldı ten  
Gel demidür ey ecel fevt itme şimdi fursatı
  - 3 Merdüm-i bîmâra tîmâr eyleyelden leblerün  
Ârzû itmez tabîbüm haste-diller sıhhati
  - 4 Cür'a-i 'ışkuñ beni 'âlemdeñ itdi bî-haber  
Var imiş bu bâdenün sâkî 'aceb keyfiyyeti
  - 5 Tâ'atünden müdde'î baş çekse olur 'âkıbet  
Pây-mâl-i hayl-i mihnet külbe-i bî-devleti
  - 6 İdeli 'uşşâka ta'yîn-i merâtib şâh-ı 'ışk  
Gördi ben dîvâneye lâyık makâm-ı hayreti

- 7 Reh-ber oldu pîr-i deyr itdüm güzer mey-hâneye  
Müjde kim dünyâda buldum ey Sehâbî cenneti

## 423

Fâ'ilâtün Fâ'ilâtün Fâ'ilâtün Fâ'ilün

- 1 İtmeyeydüm 'ışkuñı Hak'dan temennâ kâşkî  
Almayaydum başuma biñ dürlü gavgâ kâşkî  
2 Çün esîr oldum kemend-i 'ışkuña bî-ihyâr  
Olmayaydum halk içinde beyle rüsvâ kâşkî  
3 Çünkü rüsvâlıgla devrân öldürür âhır beni  
Cennet-i kûyuñ baña olsaydı me'vâ kâşkî  
135b 4 Cennet-i kûyuñ baña me'vâ olıcak gâh gâh  
Anda kılsaydum meh-i hüsnüñ temâşâ kâşkî  
5 Ey Sehâbî sâye-veş oldu vücûdum muzmahil  
Olmayaydı dilde mihr-i 'ışk peydâ kâşkî

## 424

Fâ'ilâtün Fâ'ilâtün Fâ'ilâtün Fâ'ilün

- 1 Cevr ile şâhum kapuñdan ol ki dîr itdi beni  
Bî-huzûr olsun ki gâyet bî-huzûr itdi beni  
2 Sûz-ı 'ışkuñ itdi cism ü câna göñlümde eser  
Veh ki bu âteş ser-â-ser gark-ı nûr itdi beni  
3 Âdem-âsâ cennet-i kûyuñ temennâsı şehâ  
Ravza-i firdevs-i a'lâdan nüfûr itdi beni  
4 Şâm-ı hecri bir kıyâmet-kâmetüñ feryâd kim  
Mübtelâ-yı mihnet-i subh-ı nüşûr itdi beni  
5 Ey Sehâbî ihtiyâr itdüm melâmet şâlinı  
Çün selâmet hil'atinden 'ışk 'ûr itdi beni

## 425

Mefâ'ilün Mefâ'ilün Mefâ'ilün Mefâ'ilün

- 1 Kılup 'azm-i sefer ârâm-ı cânım benden ayrıldı  
Tasavvur eyledüm kim cân-ı şîrîn tenden ayrıldı  
2 Visâle irmeden nâ-kâm göñlüm gitdi kûyından  
Yine hasretle bülbül hayf kim gül-şenden ayrıldı  
3 Karayı agdan fark itmez oldu gözlerüm tâ kim  
Ruhuñla nakş-i hâlûñ dîde-i rûşenden ayrıldı  
136a 4 Marîz-i hecrüññ sordum tabîbe çâresin bilmez  
İrişdi derd-i bî-dermâna her kim senden ayrıldı  
5 Saf-ı 'uşşâka togrıldı Sehâbî döndi zâhidden  
Katıldı dostlar alayına düşmenden ayrıldı



426

Fâ'ilâtün Fâ'ilâtün Fâ'ilâtün Fâ'ilün

- 1 Çeşm-i câna sürme kıldı kim ki ol hâk-i deri  
Almaz oldu 'aynına ey h<sup>w</sup>âce kuhl-i agberi
- 2 Hâk-i râhın göz terâzûsiyle darta mîhr ü mâh  
Ey 'Utârid epsem ol kim Zühre olmuş müşteri
- 3 Çeşmüni ebrûn ile ruhsârûn üzre seyr iden  
Gördi mîhr üstinde Mirrîh'i elinde hanceri
- 4 'Ârîzuñ oldu hayâdan garka-i âb u 'arak  
Aña bir gün nisbet itdüm tâze gül-berg-i teri
- 5 Mâlik-i mülk-i me'ânîdür Sehâbî olalı  
Bir Hasen-sûret Nebî-sîret 'Alî'nüñ Kanber'i

427

Fe'ilâtün Fe'ilâtün Fe'ilâtün Fe'ilün

136b

- 1 Seng-i endûh ile vîrânemüz âbâd itdi  
Yine gam hâtır-ı mahzûnumuzı şâd itdi
- 2 Kıldı her hâne ki yoluñda binâ merdüm-i çeşm  
İrdi seyl-âb-ı sirişküm anı ber-bâd itdi
- 3 Sîneme kıldı şehâ nâhun-ı mihnetle gamuñ  
Bî-sütûna anı kim 'ışk ile Ferhâd itdi
- 4 Seg-i kûyuñ beni nâlân göricek kapuñda  
Subha dek gice ile durmadı feryâd itdi
- 5 Bâg-bân görmedi beñzer ruh ile zülfüni kim  
Vasf-ı ruhsâr-ı gül ü turre-i şîmşâd itdi
- 6 Benem ol rind ki mey-âba virüp hânesini  
Vardı bir hâne harâbâtı bünyâd itdi
- 7 Kafes-i tende esîr olmuş idi cân mürğ  
İrişüp hecr Sehâbî anı âzâd itdi

428

Fe'ilâtün Fe'ilâtün Fe'ilâtün Fe'ilün

- 1 Aksadan<sup>113</sup> fazl u bahâ 'arsası 'allâmesini  
Ögredürse n'ola Firdevsî'ye Şeh-nâmesini
- 2 Şâhumuz medhini her gâh ki inşâ kılsak  
Müftî-i çerh elinden çekerüz hâmesini
- 3 Nazm cem'iyetini dağıduruz Pervînüñ  
Bozaruz 'arsa-i eflâkde hengâmesini

<sup>113</sup>Bu kelime sözlüklerde 'aksatma, şaşırtma, yanıltma" şeklinde karşılanmaktadır.

- 4 Seng-i âh ile sıruz mihr ü mehûñ kandîlin  
Tende pîr-i felegûñ hark iderüz câmesini
- 5 Sûz-ı dil yakmasun ey bâd kebûter bâlin  
Sen ilet şâha Sehâbî kulnuñ nâmesini

429

Mefâ'îlün Mefâ'îlün Mefâ'îlün Mefâ'îlün

137a

- 1 Diler agyâr zevk-i vuslatı 'uşşâk hicrânı  
Meges cüllâb arar pervâne ister nâr-ı sûzânı
- 2 'Adem iklimine saldı kazâ Ferhâd u Mecnûn'ı  
Baña degdi melâmet kûh-sârı gam beyâbânı
- 3 'Aceb mi ol perî olsa rakîb-i dîv ile râmum  
Ki her bir dâğdur sînemde bir mühr-i Süleymânî
- 4 Perîşân hâlûmi zülf-i perîşânuñ bilür zîrâ  
Perîşân olmayan bilmez begüm hâl-i perîşânı
- 5 Bu şî'r-i pür-sanâyi' olalı meşhûr 'âlemde  
Sehâbî kimse yâd itmez 'Acemde nazm-ı Selmân'ı

430

Fâ'ilâtün Fâ'ilâtün Fâ'ilâtün Fâ'ilün

- 1 Safha-i hüsnünde ey mülk-i me'ânî husrevî  
İki mevzûn kaşlaruñdur şâh-beyt-i Mesnevî
- 2 Şems-i ruhsârûñ dile eyler tecellî dem-be-dem  
Çerha girsem gün gibi olsam 'aceb mi mevlevî
- 3 Yakdı yârân-ı safâyı bezm-i gayra virdi nûr  
Ey gönül seyr eyle ol şem'-i sa'âdet-pertevi
- 4 Zülf-i kâfir-kîş ile bir dil-ber-i tersâ bu gün  
Ey Muhammed ümmeti kıldı cihânı 'İsevî
- 5 Ey Sehâbî tâbî'-i tarz-ı Necâtî ola mı  
Ol ki sûz u derd ile oldu Nevâyî peyrevî

431

Fe'ilâtün Fe'ilâtün Fe'ilâtün Fe'ilün

137b

- 1 Müdde'î bâ'is-i cem'iyet-i yârân oldu  
Beñzer ol kâfir-i bî-rahm müselmân oldu
- 2 'İşk-ı Yûsuf zahmı Mısır-ı dile kıldı 'azîz  
Yir yüzi dîde-i bed-h<sup>w</sup>âhuma zindân oldu
- 3 Reşkden olmuş idi kârı hasûduñ müşkil  
İrdi âhır eceli müşkili âsân oldu
- 4 Leblerüñ şevkı ile bâdeye düşdi zühhâd  
Yine cem'iyet-i mey-hâne firâvân oldu

- 5 Eyledüm çeşm ü dile ra'd u sehâbı nisbet  
Ey Sehâbî biri nâlân biri giryân oldu

## 432

Fe'ilâtün Fe'ilâtün Fe'ilâtün Fe'ilün

- 1 Kıldı şevk-ı leb-i dil-dâr kadeh-nûş beni  
Bâde merd-efgen imiş eyledi bî-hûş beni  
2 Bir siyeh-çerde güzel oldu nazardan gâyib  
Merdüm-i dîde gibi itdi siyeh-pûş beni  
3 Söyleden âyinedür tûtî[y]i hayrânam kim  
Neden itdi ruhı âyinesi hâmûş beni  
4 Korkarın yâr ile el virmeden âgûş u kenâr  
Eyleye genc-sıfat hâk der-âgûş beni  
5 Haşre dek nazm ile yâd olur idim eylemese  
Ey Sehâbî kerem-i şâh ferâmûş beni

## 433

Fâ'ilâtün Fâ'ilâtün Fâ'ilâtün Fâ'ilün

138a

- 1 Oldı hatdan ol had-i pür-hâl bir yüzden dahi  
Dil perîşândur elemden hâl bir yüzden dahi  
2 Seyr iderdüm reml-i tâli'den ezel şekl-i ferah  
Görinür şimdi baña eşkâl bir yüzden dahi  
3 Vasl-ı yâra dâll sanurdum tarîk-i eşkümi  
Nakl ider ahkâmını remmâl bir yüzden dahi  
4 Eylemez ârâm bir sâ'at dil-ârâm olmasa  
Öldi veh kim bu dil-i meyyâl bir yüzden dahi  
5 Hâlsuz hem gerçi hâlet-bahşdur hüsn-i bûtân  
Gösterür anı velîkin hâl bir yüzden dahi  
6 Hâlet-i 'ışkî zebân-ı hâlden fehm eyle kim  
Añladur anı lisân-ı kâl bir yüzden dahi  
7 Dün Sehâbî müdde'înüñ hâlini sordum didi  
Tâli'üm idbârda ikbâl bir yüzden dahi

## 434

Fâ'ilâtün Fâ'ilâtün Fâ'ilâtün Fâ'ilün

- 1 Gonçe-veş dem-beste kılmışdı gam-ı devrân beni  
Rûzigâr oldu muvâfık eyledi handân beni  
2 Tâ gubâr itdüm vefâ yolında hâkî cismümi  
Tûtiyâ-veş gizler oldu dîdede a'yân beni  
3 Ma'rifet eflâkinüñ ben mihr-i 'âlem-tâbıyam  
Görebilmez derk idüp huffâş-veş nâ-dân beni

- 4 Ey felek mey-hânede başum sıfâlin kıl kadeh  
Gayr bezminde kadeh-veş itme ser-gerdân beni
- 5 Husrev-i ehl-i kemâl oldum Sehâbî ideli  
Ol şeh-i mülk ü me'ânî sâhib-i dîvân beni

**TÂRÎH-İ İTMÂM-I CÂMÎ-İ ŞERÎF-İ HAZRET-İ PÂDİŞÂH  
DÜNYÂ-PENÂH SELLEMA'LLÂH**

- 138b
- Fe‘ilâtün Mefâ‘ilün Fe‘ilün
- 1 Hâmî-i dîn şeh-i Süleymân-kadr  
Ol sa‘âdet serîrinüñ şâhı
  - 2 Ol ki esrâr-ı gayba mahzendür  
Dil-i pâkî zamîr-i âgâhî
  - 3 Millet ü memleket salâhı için  
Lutf ile kahrı[dur]<sup>114</sup> âmir ü nâhî
  - 4 İtdi bir câmî‘-i şerîf binâ  
Kıldı ma‘mûr Ka‘betu’llâh’ı
  - 5 Göricek kubbesiyle bünyâdın  
Kıldılar secde mâh ile mâhî
  - 6 Müncelî kıldı kubbesindeki mîl  
Tûtiyâ-vâr dîde-i mâhı
  - 7 Pestdür irtifâ‘-ı kadriyle  
Felegüñ bu refî‘-i har-gâhı
  - 8 Sâl-i târîhini Sehâbî’dan  
İstedüm k’ola tab‘-ı dil-hvâhı
  - 9 Hâtif-i gayb didi târîhin  
‘**Buldu itmâm câmi‘-i şâhî**’ (964/1556)

<sup>114</sup>Metinde yoktur, vezin gereği ilave edilmiştir.

## **Rubâ‘iyyât**

1

Ahreb

139a

Tevhîd riyâzında olup nagme-serâ  
 Mürgân-ı “ülî ecnihatin”<sup>115</sup> oldu gûyâ  
 Bu nagmeyi itdiler edâ ‘acz ile kim  
 “Sübhâneke lâ ‘ilme lenâ illâ mâ”<sup>116</sup>

2

Ahreb

Ey mülk ü melek gedâ vü muhtâc saña  
 Vey ‘arş-i berîn pâye-i mi‘râc saña  
 Sen tâc-ı ser-i hayl-i rusûlsin ne ‘aceb  
 Ger olsa “le‘amrük”<sup>117</sup> güher-i tâc saña

3

Ahreb

Müş tâkdur ey gevher-i sîr-âb saña  
 K’âş olsa sade f dîde-i ahab saña  
 Mülk ü melekûta kible-i tâ‘atdûr  
 Olalı ikâmet yiri mihrâb saña

4

Ahreb

Bülbül ger iderse verd-i handâna du‘â  
 Yâ fâhteler serv-i hırâmâna du‘â  
 Eyler melek ü ins ü perî şâm u seher  
 Sultân-ı cihân Şâh Süleymân’a du‘â

5

Ahreb

139b

Ger oldu ise makâm meyhâne baña  
 Ta’n eyleme ey vâ‘iz-i ferzâne baña  
 Kassâm-ı kader ezelde takdîr itmiş  
 Tesbîh saña sâgar u peymâne baña

6

Ahreb

Cevr ü sitem-i rakîb ile hecr-i habîb  
 Derdâ ki beni eyledi muhtâc-ı tabîb

<sup>115</sup>Bk. not. 7.

<sup>116</sup>“Melekler, ‘Yâ Rab, seni noksan sıfatlardan tenzih ederiz, senin bize öğrettiklerinden başka bizim bir bilgimiz yoktur. Şüphesiz âlîm ve hakîm olan ancak sensin’ dediler”, **Kur’ân**, Bakara sûresi, 2/32.

<sup>117</sup>“(Rasûlüm), hayâtın hakkı için, onlar sarhoşlukları içinde bocalıyorlardı”, **Kur’ân**, Hicr sûresi, 15/72.

Çün derde aña ‘ilâc sordum didi kim  
Yâ devlet-i vasl-ı yâr yâ merg-i rakîb

7

Ahreb

Ey dost benüm nasîhatum dut kerem it  
‘İzzet haremde kendüñi muhterem it  
Meyhâneden eyle ‘azm-i tavf-ı der-i yâr  
Çık beyt-i harâmdan tavâf-ı harem it

8

Ahreb

Oldı gamuma ol hadd-i dil-keş bâ‘is  
Hem cânımı yakmaga ol âteş ba‘is  
Gördükde cünûnum beni ‘ayb eyleme kim  
Bu hâlete oldı bir perî-veş ba‘is

9

Ahreb

Ey hâk-i derüñde her gedâ sâhib-i tâc  
Her sâhib-i tâc dergehüñde muhtâc  
Hindûlaruña kapuñda teslîm eyler  
Şâh-ı Hutun ü hân-ı Hıtâ bâc u harâc

140a

10

Ahreb

Olsa gam-ı rûzgâr ile dil mecrûh  
Nûş eyle şarâb-ı nâb hengâme-i sabûh  
Câm-ı mey-i cân-fezâ odurur fî’l-vâki‘  
Tûfân-ı gama nümûne-i keştî-i Nûh

11

Ahreb

Ger Rûmdurur yirüñ ü ger hıtta-i Belh  
Şîrînlık ile nûş idegör bâde-i telh  
Kıl ‘îyş u neşât irmeden ey sâkî  
‘Ömrüñ meheng-i guresine âfet-i selh

12

Ahreb

İrdi şeb-i vasl vü oldı fûrkat nâbûd  
Gam itdi bizi vedâ‘ vü mihnet bedrûd



Gelsün bu gice Zühre'ye deñ 'îyş idelüm  
İtsün meh-i nâ-kâsteyi kâse-i 'ûd

13

Ahreb

140b

Çün hattına oldı hadd-i cânân kâgaz  
Olsa ne 'aceb karîn-i Kur'ân kâgaz  
Yârûñ garazı bûy-i meyi def' gibi  
Kim dutdı dehânı içre pinhân kâgaz

14

Ahreb

Bakdı felek-i nâzdan ol gayret-i hûr  
Yakdı beni nâr-ı tal'ati eyledi nûr  
Agyâra eser itmedüğinden bildüm  
Hâşâk ü hası yakmaz imiş âteş-i Tûr

15

Ahreb

Nevrûz gelüp irişdi eyyâm-ı bahâr  
Taht-ı Hamel üzre dutdı hurşîd karâr  
Zülf ü ruh-ı manzûruma nâzır olanuñ  
Ma'lûmı olur tesâvî-yi leyl ü nehâr

16

Ahreb

Gül-zârda hengâm-ı seher bir nice yâr  
Olduk kadeh-i lâle ile bâde-güsâr  
Agyâr geçüp görindi ol lâle-'izâr  
Ya'nî 'akab-ı şitâda irişdi bahâr

17

Ahreb

141a

Ser-mestem ü destümde tolu câm henûz  
Başda heves-i bâde-i gül-fâm henûz  
Sâkî baña rez duhterini 'akd ideli  
Dûşîze idi mâder-i eyyâm henûz

18

Ahreb

İrişdi kıyâs u 'akla medhûñde hirâs  
'Âciz sıfatuñda 'akl mânend-i kıyâs

Seylâb-ı tahayyür ile vîrân oldu  
Her beyte ki tarh oldu bu ma‘nîde esâs

19

Ahreb

‘Arz ideli ol mâh-veşüm vesmelü kaş  
Kaldurdu hilâl gökde da‘vâ ile baş  
Pîr-i felege hacâlet irdi kıldı  
Ebrû-yı hilâli tîg-ı mihr ile tırâş

20

Ahreb

Dimem saña kim müdâm mânend-i havâs  
Ben zâruñı eyle mahrem-i halvet-i hâs  
Vuslat demidür kanımı dök cânımı al  
Ya‘nî elem-i firâkdan eyle halâs

21

Ahreb

Cem‘iyyet ider müdâm ashâb-ı garaz  
Meftûhdurur hemîşe ebvâb-ı garaz  
Yakdı ten-i hâksârı virdi bâda  
Nâr-ı hased ü nifâk ile âb-ı garaz

141b

22

Ahreb

Dehr içre karâr itme ki bu köhne bisât  
Hem mihnete menzildür ü hem derde ribât  
Bast itme bisâtı anda zîrâ ki degül  
Bu deyr-i harâb cây-ı ârâm u neşât

23

Ahreb

Gamzeñ olalı zulmet ile kandan mahzûz  
Cân mahbes-i tende oldu andan mahzûz  
Hazz itse gönül ‘aceb degül tîguñdan  
Leb teşne olur âb-rû andan mahzûz

24

Ahreb

Tende dil ü cân iderdi peyveste nizâ‘  
Arada çekerdüm men dil-haste sudâ‘  
Ol demde irişdi nâ-gehân şahne-i ‘ışk  
Cân tende nihân oldu vü dil kıldı vedâ‘

25

Ahreb

142a

Şevk âteşi ile tende yakup nice dâg  
 Olduk bu gice mu‘tekif-i künc-i ferâg  
 Râgıb degülüz şem‘-i şeb-efrûza yiter  
 Virânemüze pertev-i mehtâb çerâg

26

Ahreb

Çekdi mûjeden gamze-i dilber eli saf  
 Kıldı tenümi nâvek-i bîdâda hedef  
 Peykân-ı hadengi ile sînem toldı  
 Oldı dür-i şehvâr ile memlû bu sadef

27

Ahreb

Cünbiş ideli rûz-ı ezel hâme-i ‘ışk  
 Hatm oldı benüm nâmum ile nâme-i ‘ışk  
 Ger sûz-ı cigerden nefesüm olmasa germ  
 Germ olmaz idi bu resme hengâme-i ‘ışk

28

Ahreb

Göñlüm olalı ‘ışk tarîkında sadîk  
 Gam oldı aña hem-dem ü endûh refîk  
 Dil vuslatuñı tasavvur eyler ammâ  
 Erbâb-ı hîred eylemez anı tasdîk

29

Ahreb

142b

Göz yaşını veh ki lâle-gûn itdi firâk  
 Dil goncesini de gark-ı hûn itdi firâk  
 Tolmışdı şarâb-ı şevk ile şîşe-i dil  
 Ol şîşeyi dökdi ser-nigûn itdi firâk

30

Ahreb

‘İşk ehline bir tâze civân pîr gerek  
 Anuñ talebinde hüsn-i tedbîr gerek  
 Dil sünbül-i zülf-i yâre âşüfte geçer  
 Dîvâne olupdur aña zencîr gerek

31

Ahreb

Her beyte ki mi‘mâr-ı hîred urşa temel  
 Reşk itse metânetin görüp kasr-ı Zuhal  
 İm‘ân-ı nazarla anda baksañ görünür  
 Bî-terbiyet-i lutf-ı şehinşâh hâlel

32

Ahreb

Mahmûram u elde nakd-i cân dilde elem  
 Geldüm der-i meyhâneñe ey pîr-i haram  
 Çok bâde ‘inâyet eyle az ise derdüm  
 Ben kemlik idersem saña sen eyle kerem

33

Ahreb

Sâkî kerem it şarâb sun nûş idelüm  
 Bir dem gam-ı eyyâmı ferâmûş idelüm  
 Lahn-ı hoş-mutribi koyup niceye dek  
 Efsâne-i telh-i vâ‘izi gûş idelüm

143a

34

Ahreb

Sanma beni kim visâlsüz nâ-şâdam  
 Endûh u gam-ı firâk ile mu‘tâdam  
 Şâdam sanemâ ki devlet-i ‘ıskuñda  
 Endîşe-i vasl u hecrden âzâdam

35

Ahreb

Geh zâhid ile savma‘ada yâram ben  
 Geh mu‘tekif-i hâne-i hammâram ben  
 Eflâk-sıfat müdâm seyyâram ben  
 Her gûşede mâhumı talebkâram ben

36

Ahreb

Cânân talebinde ger idersen tek ü dû  
 Ten mezra‘ın it dâs-ı fenâ birle direv  
 Ger eylemese vücûdını zâr u nizâr  
 Hurşîd ile olmazdı mukârin meh-i nev

37

Ahreb

143b

Meyden idebilmez ehl-i müşrib tevbe  
 Virme aña ey sâhib-i mezheb tevbe  
 Sâkî benî subh-dem peşîmân eyler  
 İtsem elem-i humârdan şeb tevbe

38

Ahreb

Mahmûram vü leb-teşne-i câm ey sâkî  
 Vir destüme bâdeyi müdâm ey sâkî  
 Çün dehre sebât yokdur u ‘ömre devâm  
 Sun nûş idelüm ‘âle’ d-devâm ey sâkî

39

Ahreb

Ger istemese rakîb ma‘dûm benî  
 Sürmezdi kapuñdan yine mahrûm benî  
 Şâdam ki felek kıldı ‘alâ zu‘m-ı ‘adû  
 Meddâh-ı hidîv-i hıttâ-i Rûm benî

40

Ahreb

Dehr itdi esîr-i ‘ışk nâ-gâh benî  
 Esrâr-ı ezelden itdi âgâh benî  
 El-minnetü li’llâh ki kıldı mümtâz  
 Akrânumdan lutf-ı şehen-şâh benî

**KASÎDE DER VASF-I BAHÂR  
VÜ MEDH-İ HAZRET-İ HUDÂVENDİGÂR**

- Mef'ûlü Fâ'ilâtü Mefâ'ilü Fâ'ilün
- 144a
- 1 'Âşık sevindi müjde-i vasl-ı nigârdan  
Şâd oldu 'andelîb nüvîd-i bahârdan
  - 2 Emvât-ı bâg geydi yine kisvet-i hayât  
Âsâr-ı sun'-ı hazret-i Perverdigâr'dan
  - 3 Gül-zâr-ı kâyinât sarây-ı sürûrdur  
Elhân-ı 'andelîb ile savt-ı hezârdan
  - 4 Toldı şarâb-ı şeb-nem ile câmı nergisün  
Miskîn halâs oldu sudâ'-ı humârdan
  - 5 Bîdâr kıldı h<sup>w</sup>âbdan ebkâr-ı gonce[y]i  
Gül-bâng-i 'andelîb yemîn ü yesârdan
  - 6 Etrâf-ı gülde sebze-i nev-res nümûnedür  
Gül-zâr-ı ârız üzre hat-ı sebz-i yârdan
  - 7 El uzadur çenâr benât-ı şükûfeye  
Kumrı figân iderse yiridür çenârdan
  - 8 Yaykar çemen libâsını sâbûn-ı berf ile  
Reng aldı gibi çerh zümür-rûd-i nigârdan
  - 9 Âb-ı revân terâne-serâdur 'aceb degül  
Ger serv raks ide taraf-ı cûy-bârdan
  - 10 'Ayyâr-veş nezâket ile kapdı rûzigâr  
Berfüñ 'imâmesini ser-i kûhsârdan
  - 11 Beñzer ikisi birlige bitmiş ki seyr iden  
Fark idemez benefşeyi zülf-i nigârdan
  - 12 Destümde lâle-gûn mey ile vakt-i subh-dem  
Geçdüm sabûhî eyleyürek lâle-zârdan
  - 13 Elfâz-ı dil-pezîr ile bu kavî-i rûh-bahş  
Cân sem'ine irişdi zebân-ı hezârdan
  - 144b
  - 14 Kim rûzigâr-ı 'ayş u zamân-ı neşâtdur  
Hoş gör dem-i murâduñı al rûzigârdan
  - 15 Hûbân-ı gül-'izâr ile gül-zâra çıkdı yâr  
Nahl-i gül oldu münfa'il ol gül-'izârdan
  - 16 Dest-i nigârumuñ göricek rengini sehâb  
Yaykatdı serv destini reng-i nigârdan
  - 17 Ya'kûb-vâr dîde-i ümmîdümüz sefid  
Olmuşdı mihnet ü elem-i rûzigârdan
  - 18 İrdi beşîr-i bâd-ı seher-gâh nâ-gehân  
İrgürdi sürme hâk-i reh-i şehriyârdan
  - 19 Sâhib-kırân-ı 'âdil [ü] gâzî ki 'âleme  
Feyz-i 'amîmdür kerem-i Kirdigâr'dan

- 20 Hızr u Mesîh-rütbe Süleymân ki vahş u tayr  
Eyler sücûd der-gehini her kenârdan
- 21 Zıll-ı himâyetinde olan âfitâb-vâr  
Aldı murâdını felek-i kec-medârdan
- 22 Her mu‘teber ki bulmadı bâbında i‘tibâr  
Tard oldu çıkdı dâyre-i i‘tibârdan
- 23 Bûy-ı bahâr-ı lutfına karşı meşâm-ı dehr  
Müstagnî oldu nâfe-i müşg-i Tatâr’dan
- 24 Her kim ki oldu hâk-i cenâbında zerre-vâr  
İrgürdi başını felege iktidârdan
- 145a 25 Gizler felek gözinde milk-i gerd-i râhını  
Kuhl-i cilâ idinse gerek ol gubârdan
- 26 Hûn-ı havârici yire dökdi ‘Alî-misâl  
Tîgî ‘alâmet olsa n’ola Zü’l-fikâr’dan
- 27 Katl-i ‘adûya olsa n’ola ragbeti ziyâd  
Eyler mi şâh-bâz ferâgat şikârdan
- 28 Peykân-ı tîri hûn-ı e‘âdîden oldu sürh  
Bir nâ-şükûfte gonca ‘ıyân oldu hârdan
- 29 A‘dâ-yı bed-nihâdına kâr olmayınca zâr  
Kahrı ferâgat eylemedi kâr-zârdan
- 30 Yüz yire kor müdâm selâtîn-i rûzgâr  
Yüz yirde kapusunda ser-i inkisârdan
- 31 Gûş eylese gazâlarını nükte-dân-ı Tûs  
Hâmûş olurdu midhat-i İsfendiyâr’dan
- 32 ‘Akl idemez ihâta kemâlin ‘aceb degül  
Vasfı birûn olursa haddü’l-hisârdan
- 33 Oldı güher-i samîm sade içre nâ-bedîd  
Evsâf-ı şehde bu güher-i şâh-vârdan
- 34 ‘Ummân Sehâbi çekse hacâlet ‘aceb midür  
Bahr-i sühanda bu dürer-i âb-dârdan
- 35 Gark oldu fülk-i fikr bihâr-ı medâyihe  
Çek sâhile du‘âyile anı bihârdan
- 145b 36 Niçe ki vâki‘ ola müsâvât u ittihâd  
Leyl ü nehâra makdem-i fasl-ı bahârdan
- 37 Rûz u şeb-i neşâtına endîşe-i fütûr  
İrişmesün te‘âkub-ı leyl ü nehârdan

## MUHAMMES

Mefâ‘îlün Mefâ‘îlün Mefâ‘îlün Mefâ‘îlün

1

Enîn-i derd ile sanma şeb-i fûrkatde nâlânuz  
Sürûd-ı ‘ışkdur tahrîrümüz mûrg-ı hoş-elhânuz  
Bu gün mihr-i cihân-ârâ gibi meşhûr-ı devrânuz  
Ne mîr-i âsumân-rif‘at ne hâkân-ı cihân-bânuz  
Bi-hamdi’llâh gulâm-ı şâh-ı dîn Sultân Süleymân’uz

2

İşitdük itmek istermiş bizümle müdde‘î gavgâ  
Muhâbâ itmesün meydâna gelsün eylesün da‘vâ  
Bütün dünyâ bizümle düşmen olsa itmezüz pervâ  
Kemân-veş gûşe-gîriz tîr-veş üftâdeyüz ammâ  
Deminde düşmen-i dîn kasdına şemşîr-i bürrânuz

3

Tama‘ erbâbını zemm eyleyüp ursak n’ola ta‘nı  
Gerekse Hâtem’i tavsîf kılsunlar gerek Ma‘nî  
Fesâhat mülkini aldık bizümdür kişver-i ma‘nî  
Gehî Selmân-ı ‘asruş gâh Hassân-ı zamân ya‘nî  
Muhammed-hulk bir şâha du‘â-gûyuz senâ-h<sup>w</sup>ânuz

4

146a

Düşen râh-ı fenâda Yûsuf-ı Ken‘ân-sıfat çâha  
İrişse Mısr-ı ‘izzetde ‘aceb mi rif‘at ü câha  
Sa‘âdet yâr olup devlet müsâ‘id minnet Allâh’a  
Olalı âsitân-ı devletinde bende ol şâha  
Diyâr-ı ‘ışka mîrüz mülk-i istignâyâ sultânuz

5

Gerekmez rind-i ‘âlî-himmete dünyâ vü “mâ-fîhâ”<sup>118</sup>  
Tek olsun cennet-i kûy-ı dil-ârâmı aña me’vâ  
Havâdis her taraftan olsa hatt-ı yâr-veş peydâ  
Sehâbî çekmezüz hayl-i havâdisden elem zîrâ  
Mukîm-i âsitân-ı kutb-ı devrân zıll-ı Yezdân’uz

<sup>118</sup>Orada bulunan.



- 1 “Bi-hamdi’llâhi ve’l-minne”<sup>119</sup> ki bu dürer-i gurer-i sadef-i hâtır-ı perîşân silk-i cem‘iyyetle muntazam
- 2 olup nâm-ı nâmî-i hümayûn-ı hazret-i pâdişâh-ı rub‘-ı meskûn ile ihtimâm bulup
- 3 encâma irdi. Kilk-i bedâyi‘-nigâr-ı sühan-güzâr bu nazm-ı nazîm-i âb-dâr ile târîh-i itmâmın sahîfe-i beyân üzre ‘ıyân eyler

### TÂRÎH-İ İTMÂM-I DÎVÂN

Mef‘ûlü Fâ‘ilâtü Mefâ‘ilü Fâ‘ilün

Kalbüm gibi Sehâbî perîşân idi sözüm

Cem‘iyyetine oldu sebep ol perî-veşüm

Dîvân-ı dil-güşâmı açup eyleseñ nazar

Târîhin añladur saña ‘eş‘âr-ı dil-keşüm’ (966/1558)

---

<sup>119</sup> Şükür ve minnet Allah içindir.

